

Ahmedî

İSKENDER-NÂME

Hazırlayan

Dr. Yaşar AKDOĞAN



©

T. C. KÜLTÜR VE TURİZM BAKANLIđI
KÜTÜPHANELER VE YAYIMLAR GENEL MÜDÜRLÜđÜ

3128

KÜLTÜR ESERLERİ

411

ISBN 978-975-17-3341-2

www.kulturturizm.gov.tr

[e-posta: yayimlar@kulturturizm.gov.tr](mailto:yayimlar@kulturturizm.gov.tr)

[Bu kitap internet ortamında ilk kez yayımlanmaktadır.](#)

1. Zikr-i Bismillâhi Rahmâni'r-Rahîm
Kamu nesne bizegidür iy Hakîm
2. Her kimüñ kim yoldaşı Tevfik ola
Her ne söz kim söyleye tahkîk ola
3. Çünkü tevfik oldu bize hem-tarîk
Dürr-i ma'nîye kulak tut iy refik
4. Andelîbem nagmeler sâz ideyim
Tütüyem şekker söz âgâz ideyim
5. Söz diyeyim söz ne resme şöyle nagz
Kim revân andan mu'attar kıla magz
6. Yazayım bir nakş kim Nakkâş-ı Çîn
Görse anı kıla yüzbin âferîn
7. Bir gül-istân düzedeyin şavk-ıla
Kim anı Rıdvân temâşâ-gâh kıla
8. Rûh-ı Kudsem şöyle üreyim nefes
Kim ana îsî ola cândan heves
9. Sözde şöyle nazm idem dürr-i semîn
K'anı gerden-bend ideler hûr-ı în
10. Câdulıkda her nefes k'efsûn kılam
Sihri ben Bâbillüden efzûn kılam
11. Çengümi bir perdeye sâz eyleyem
Kim ana Dâvûdı dem-sâz eyleyem
12. Sözde idem bir Yed-i Beyzâ ıyân
Kim vire Mûsâ Asâsından nişân
13. Derd-mendem yanaram niteki ûd
N'ola şöyle nâle eylersem ki ûd
14. Derd-mendüñ nâlesi dil-keş olur
Oda yanmayan dem-i nâ-hoş olur
15. Üd yandugı-y-çun oldu hoş-nefes
Şöyle k'eydür cân u dil aña heves
16. Yandugı-y-çun nây oldu hoş-nevâ
Sanma anuñ nâlesin bâd-ı hevâ

17. Kimde k'İbrâhîm bigi derd ola
Nâr-ı Nemrûd aña bâg-ı verd ola
18. Derdi vardı kim didi aña Kerîm
“İnne İbrâhîme evvâhün halîm”
19. Cân içinden oldu sözüm n'ola pes
Şöyle kim micmerdür olsam hoş-nefes
20. Sûzdur sözümi ma'mûr eyleyen
Nârdur şem'i yakup nûr eyleyen
21. Anuñ-ıçun hoş-nefes oldu adum
K'oldı micmer bigi içümden odum
22. Şem'a bir gice didi Pervâne ben
Âşık u ma'sûk-ıla vaslatda sen
23. Yâr-ıl'olmuş sinüñ işüñ şöyle nûr
Ben yanarken andan uş peyveste dûr
24. Şem' dir âşık benem kim her gice
Şubh olunca yanaram ucdan uca
25. Sini bir şu'le kaçurur şöyle hâm
Dururam uş ben yahılınca temâm
26. Ben bekâ virüp fenâyı almışam
Riştetin cânumuñ oda salmışam
27. Aña irdüm virdüğüm-çün ben beni
Sen seni dırsın bulamazsın anı
28. Şem' dahı micmere didi ki ben
Yanaram 'ışk odına şöyle ki sen
29. Gözi yaşlu içi başlu olmuşam
Her gice od içinde taña kalmışam
30. Bende-y-iken âyet-i Nûr u Duhân
N'ışe saña meyl ider peyveste cân
31. Ben dahı oda yanaram n'ışe pes
Yoh-durur bende bu sendeki nefes
32. Ne çohu irişdi cânândan saña
Kim göñüller meyl ider cândan saña
33. İkimüz bir odda nedür pes sebab
K'ol çohu baña virilmez iy 'aceb

34. Didi micmer taşradan yakan seni
İçerüden yaçar uş görgil beni
35. Sini taşra yañadan yakar bu nâr
Hem senuñ elüñde bir ser-rişte var
36. Sûzen-i îsî gibi saña hicâb
Oldı ol ser-rişte bu-durur savâb
37. Baña benden kalmadıgı-y-çun eser
Böyle oldum hoş-nefes iy pür-hüner
38. Varlıguñdan nice kim bir rişte var,
Sanma kim sini şabûl eyleye yâr
39. Ne ki senden sen fenâ olmayasın
Şem' bigi andan bekâ bulmayasın
40. Varlıguñı yaq ki hoş-dem olasın
Kendüñi yitür ki yârı bulasın
41. Derd-mend ol kim sini sora habîb
Derdi olana 'ilâc eyler şabîb
42. Yanmayınca 'üd hoş-dem olımaz
Ol ki yoqdur zahmı merhem bulımaz
43. Pâk iden cân gevherin derd olur
Kişi k'anuñ derdi yoq nâ-merd olur
44. Derd-mend ol râhat-ı cân bulasın
Cânlaruñ derdine dermân bulasın
45. Derddür cân naqdine olan mehek
Şalbi anuñ-ıla pâk itmek gerek
46. Derd ider gönlüñi tevhîde hâs
Od ider altını topraqdan halâs
47. Şöyle kim dûlâb dök der ile yaş
Kim yaşuñdan yaşarup kur'ola yaş
48. Çarh bigi hûb u ser-sebz olasın
Feth-i bâb-ı rahmete yol bulasın
49. Turduguñ yir Cennet ü eşcâr ola
Râst "tecrî tahtihe'l-enhâr" ola
50. Her ne tâ'atdan ki var yig oldı derd
Biñ du'âyı germ ider bir âh-ı serd

51. Âh yıkuqla sınıqlardan gelür
Hağ yıkuğ sınığ gönüllerde olur
52. Gönlini vîrân tutan ma'mûr olur
Hağ tecellîsi-y-ile pür-nûr olur
53. **AHMEDÎ** olduğı-y-ıçun sûz-nâk
Oldı her gışdan sözi zer gibi pâk
54. Lâ-cirem kim oldu pür deryâ-yı dür
Kim cihânı gevher-ile kıldı pür
55. Çünkü kâlıbın giderüp oldu pâk
Nağdin 'anuñ kimse ta'nından ne bâk
56. Olduğı-y-çun derd-mend eyle ki ney
Sözler ider ölü gönülleri hay
57. Derd-i Eyyûb olduğı-y-çun hem-nişîn
Adı Ni'me'l-'Abd oldu _anuñ yakîn
58. Kendüyi öger diyü 'ayb itme baña
Söz ögerem bini ögmezem saña
59. Söz-durur söz âdemînüñ rütbeti
Söz-durur iki cihânuñ ziyeti
60. Kamu nesne fer' sözdür bî-şek asl
Cinsden sözdür kim oldu nev'e fasl
61. Dünya işi söz-ile tutdı nizâm
'Uğba işi söz-ile oldu temâm
62. Yire gökden hân-ı rahmet geldi söz
Halka Hağdan kân-ı ni'met oldu söz
63. Ger bedâyi 'söz-ile olur 'ayân
Ger ma'ânî söz-ile bulur beyân
64. Yücelür söz-ile ulular adı
Dirilür söz-ile ölüler adı

MAKÂLE-İ ÜLÂ DER-TEVHÎD-İ BÂRİ TAÂLÂ CELLE CELÂLEHÜ

65. Fikr ider misin ki var bir pâk-zât
K'andan aldı varlığını kâyiñât
66. Bu cüvân-ser yir ü bu çarh-ı kebûd
Kendüzinden bulmadı lâ-şek vücûd
67. Kendü zâtından degül rûşen bu şem'

Kendü kendüden dirilmedi bu cem'

68. İşbu Hindû vü bu Rûmî nev-cüvân
Birbirin bî-sebeb kıomaz 'ayân
69. Hergün işbu şeb-rev-i sâhib-cemâl
Kendüzinden mi bulur naqs u kemâl
70. Kendü mi bizendi saıkf-ı lâciverd
Kendü mi döşendi ferş-i sâl-hord
71. Naqs ola mı kim anuñ naqsâşı yok
Ferş ola mı kim anuñ ferrâşı yok
72. Kendüden mi oldu zâhir kııl nazar
Bu kıamu elvân u eşkâl ü suver
73. Bir nazar kııl gör n'iredendür bu kevn
Fıkr it kimden belürdi bunca levn
74. Kimden olmışdur bu kıandil ü bu deyr
N'iredendür bu sükûn u bunca seyr
75. Kandan olmışdur bu haymezer-nigâr
Kimden olmışdur bu ferşatlas-şî'âr
76. Kim düzetti âlemüñ tertîbini
Kim yaratdı Âdemüñ terkîbini
77. Kimden ol k'eyler bahârı sîm-bâr
Kimdür ol k'eyler hazânı zer-nisâr
78. Kimden oldu hem-dem-i 'îsâ sabâ
Sebzeyi Hızra kim itdi hem-kabâ
79. Nergisüñ gözini kehlâ kim kıılır
Yâsemîn yüzini ra'nâ kim kıılır
80. Kim düzetmişdür güli rûşen-çirâğ
Lâlenüñ yüregine kim urdı dâğ
81. Kim bitürür âb u gilden ney-şeker
Kim getirürür hâreden hurmâ-yı ter
82. Saıhrâdan kimdür düzeden la'l-i nâb
Kaıtreyi kimdür iden dürr-i hûş-âb
83. Gicenüñ zülfin muıarrâ kim kıılır
Gündüzüñ yüzini garrâ kim kıılır

84. Hâlık-ı Kevneyn ki anuñ ‘izzeti
Yir ü gök ʈoludur anuñ ʈudreti
85. Evvel oldur Evvel-i bî-ibtidâ
Âhır oldur Âhır-ı bî-intihâ
86. Zâtına yoʈdur hicâb illâ zuhûr
Gaybetine yok sebep illâ huzûr
87. Halk anuñ emr anuñ ‘izzet anuñ
Mülk anuñ fazl anuñ ʈudret anuñ
88. Ten yaradur sûret ider cân virür
‘Âḳl in’âm eyler ü îmân virür
89. Yiri gögi ʈâyim iden Hâlık ol
İns ü cinne rızḳ viren Râzık ol
90. Rahmeti bî-hadd ü fazlı bî-kerân
Ni’meti bî-‘add ü luḳfi câvidân
91. Âşikâredür anuñ ilmüne gayb
Örtülüdür ‘afvı-y-ıla dürlü ‘ayb
92. Kanı fazl idüp ʈılır müşg-i Hıḳâ
Kirmden aḳlas düzedür zî atâ
93. Nûş-ı dârû ider arudan ayân
Sahreden âb-ı zülâl eyler revân
94. Âb u gilde şöyle san’atlar kılır
Kim aña cân u gönül hayrân olur
95. Bu ne mülketdür ʈamu ‘izz ü celâl
Bu ne hazretdür ʈolu fazl u kemâl
96. Müsteḳarrı ‘izzetinüñ lâ-mekân
Sür’atı fermânınıñdur Kün-fe-kân
97. Fehm künhinde anuñ bî-bâl ü per
Vehm zıkrinde anuñ bî-pâ vü ser
98. Pâkdur andan ki her gâfil didi
Pâk-ter andan ki her ‘âḳil didi
99. Ol-durur bî-şek Vücûd-ı Muḳlaḳ Ol
Böyle baḳla i’tikâduñ ber-Haḳ Ol
100. Muḳlaḳ oldur pes ne kim varsa vücûd
Lâ-büd iderler aña cândan sücûd

101. Bu'd eb'ad urb 'arebdür aña
Nahnü 'areb hüccet uş rüşen saña
102. Nie uzansa silsile bigi 'ilel
Hâşa k'ire urbına anuñ halel
103. Bu'd eb'ad ün aña olmaz hicâb
urb 'areb pes añañ min külli bâb
104. ün 'ilel 'illiyeti andan bulur
urb-ı 'areb pes yakîn anuñ olur
105. Rahmeti-y-le dirilür ervâh anuñ
Ni'meti-y-le bislenür eşbâh anuñ
106. Her ne var ger yir ü gök ger mihr ü mâh
Birliğine varlığınadır güvâh
107. Luğfuñ-ıla iy Kerîm-i Lem-yezel
'Afv it bizden ne kim geldi zeled
108. Bizüm işümüz nedür cürm ü hağâ
Saña lâyığ ne-durur 'afv u 'ağâ
109. Pâk ılğıl bu 'alâyığdan bizi
Bî-niyâz itgil halâyığdan bizi
110. Mahrem it gönümüzü esrâruña
Hem-dem it cânumuzı envâruña
111. Bizi tab' 'âlâyışinden eyle pâk
Şöyle ki_ olmaya bize pâ-bend hâk
112. Dünya vü 'ukbâda iy Rabb-i Rahîm
'Afv it gösterme bize hiç bîm
113. Her kim ol Hağ zâtınuñ fikrin ıla
Hi nesne_ añlamadın hayrân ala
114. Zâtı bir-durur velî evsâfi çok
amusı vasf-ı kemâl ü nağsı yok
115. Adınuñ bir nev'idür Esmâ-i zât
Birisi dahı anuñ Esmâ-i sıfât
116. Şâlişi esmâ-i ef'âl oldu bil
Diyeyim birbir amusın zabğ ıl
117. Her kişi kim anuñ adların bile
Dünya vü 'Ukbâda ol rahmet bula

118. Ol sıfâtı bil ki iki dürlü olur
Biri îcâbî biri Selbî gelür
119. Oldur îcâbî k'âña ehl-i maqâl
Nisbet ol vasf 'itdiler k'ola kemâl
120. Şöyle kim lafz-ı Kerîm ü hem Rahîm
Hem Ra'ûf u hem Ğafûr u hem 'Alîm
121. Selbi ol kim nefy ol'andan her sıfat
K'anda bula naqs ehl-i ma'rifet
122. Şöyle kim dirler aña yokdur mekân
Dahı ne hayyiz var aña ne zemân
123. Zâtı cismiyyetden olmışdur arı
Cevheriyyetle arazdandır berî
124. İsm-i Zâtun biri dah'oldur ayân
K'anda olmaya izâfetden nişân

DER-BEYAN-ÂH-NÜMÂ-İ ZÂT-I U TAKSİM-İ ÂN

125. Ol hayât-ıla vücûb oldı yakîn
Dahı Kayyûmiyyet iy pâkîze-dîn
126. Birisi dahı izâfetdür hemîn
Evveliyyet Âhiriyyet bil yakîn
127. Birisi dahı izâfetdür ayân
Lîki ne mahz-ı izâfetdür hemân
128. İlmüdür ol u İrâdet hem Gınâ
Hem Rübûbiyyet k'anuñ-durur senâ
129. Dahı Sübbûhiyye Kuddûsiyyedür
Rahmet ol nefse kim ol kudsiiyyedür
130. İktizâ itdi k' Ulûhiyyet ola
Anda kahr u lutf u hem hışm u rızâ

DER-HİKMET-İ İTTİSÂF-I HÜDÂ-YI TA'ÂLÂ Bİ-CEMÂL VE CELÂL

131. Kim muti'a vire lutf idüp sevâb
Kahrı-y-ıla ide âsîya ikâb
132. Tâ ki adı Nâfi' ola vü Latîf
Dahı Kakhâr ola vü Zârr iy harîf
133. İsm k'anda kahr var ism-i Celâl
Ol ki anda lutf var ism-i Cemâl

134. Kahrınıñ içinde pinhân lutfı çok
Lutfınıñ içinde sanma kahrı yok
135. Ni'metinde gizlü-durur nıkmeti
Nıkmesinde örtülüdür ni'meti
136. Lutfidur bu kim saña virdi gazab
Kim ziyânuñ def'ine ola sebeb
137. Dahı mevsûf itdi şehvetle seni
K'olasın cezb-i menâfi'le ganî
138. Cezbi nef' olmazsa vü def'i zarar
Bulmazsın dirlige bir dem zafer
139. Girü şehvetle gazabdur saña dâm
Cezb ü def'ol dâma dânedür müdâm
140. Avlar işbu dâm-ıla uş sini dîv
Dâne gösterdüp ider ol saña rîv
141. Dâne-i peydâ ider dâmı nihân
Sini dâma düşürür dâne ayân
142. Kahr içinde lutf u lutf içinde kahr
Gör nice koyup-durur Hallâk-ı dehr
143. Her kişi kim bu sözüñ sırrın bile
Huffeti'l-Cennet aña rûşen ola
144. Nedür ism-i zât Allâhü Selâm
Rabbü Kudûsü Melik iy nîg-nâm
145. Hem Azîm ü Hakk u Mü'min-durur ol
Dahı Cebbâr u Müheymin-durur ol
146. Hem Azîz ü Bâtın u Zâhir-durur
Hem Celîl ü Evvel ü Âhir-durur
147. Bir dahı ism aña Mütekebbir gelür
Bir dahı ism aña Mütaâlâ olur
148. Vâhid ü Bâkî Rakîb Evvel Ahed
Hem Kebîr ü hem Mecîd ü hem Samed
149. Zü'l-Celâl ü hem Metîn ü hem Mübîn
Bu-durur esmâsı zâtuñ bil yakîn

DER-BEYÂN-I ESMÂ-İ SIFÂT-I BÂRÎ-Yİ TA'ÂLÂ

150. Oldı esmâ-i Sıfât Hayy u Şekûr
Kâhir ü Kakhâr u Gaffâr u Gafûr
151. Hem Ra'ûf u Berr ü Rahmân u Rahîm
Hem Sabûr u hem Vedûd u hem Alîm
152. Hem Şehîd ü hem Semî' ü hem Basîr
Hem Kaviyy ü hem Kebîr ü hem Habîr
153. Muktedirdür hem Afüvv ü hem Halîm
Muhsî vü Settâr-durur hem Hakîm
154. Diyeyim esmâ-i ef'âlin anuñ
Dinler-isen sıdk-ıla devlet senüñ

DER-BEYAN-I ESMÂ-İ EF'ÂL-İ BÂRÎ-Yİ TA'ÂLÂ CELLE VE ALÂ

155. Oldı anuñ esmâ-i ef'âli Mücîb
Hem Vekîl ü Vâsi ü Mugnî Hasîb
156. Hem Şehîd ü hem Hafîz ü hem Mukît
Hem Latîf ü Muhyi vü ân-geh Mümît
157. Müntakımdur Vâli vü Tevvâb hem
Hâlık u Bârî-durur Vehhâb hem
158. Hem Hakem hem Adl-durur hem Mu'îd
Mübdi vü Hâdîdür ol u hem Reşîd
159. Hem Bedî' ü Bâsıt u Kâbızdur ol
Halka Râfi'dür ü hem Hâfızdur ol
160. Hem Kaviyy ü Zârr u Nâfi'dür ol
Muksit ü Câmi'dür ü Mâni'dür ol
161. Hem Mukaddim hem Mu'ahhır anı bil
Dahı Zü'l-İkrâm tâ'at aña kıl

DER-BEYÂN-I EİMME-İ SEB'A-İ EZ-ESMÂ-İ SIFÂT

162. Oldı eimme ad-ıla yidi sıfât
Evveî ol yidinüñ-durur hayât
163. İlmür andan irâdetdür imâm
Kudret-ü sem' ü basardur pes kelâm

164. Gerçi zâhirdür mezâhirden sıfât
Lîki dördidür bulardan ümmehât
165. Biri Evvel birisi Âhir-durur
Biri Bâtın birisi Zâhir-durur
166. Kamunuñ Allah u Rahmân câmi'i
Rahmet aña k'ola bu söz sâmi'i
167. Bu sıfâtlar zât-ıla birdür yakîn
Görinen kesret-eser-durur hemîn

TETİMME-İ TEFÂSİL-İ ESMÂ-İ SIFÂT

168. Bu kamu birdür velîkin her eser
K'olur andan zâhir itdükde nazar
169. Ol eser hâline lâyıık bir sıfat
Vaz' itdi aña ehl-i ma'rifet
170. Bildügi-y-çün kamu gaybı bî-gümân
Didiler aña Âlim-i ehl-i lisân
171. Mubsarâtı bildügi-y-çün ol Habîr
Kodılar adını âkıllar Basîr
172. Cümle mesmû'âtı çün bilür ayân
Didiler aña Semî'-i ehl-i beyân
173. 'Aklda hâricde ne kim var-durur
Herbiri bir vafına mazhar-durur

DER-TAFSİL-İ MEZÂHİR-İ ESMÂ-İ HÜSNÂ

174. 'Akl-ıla nefis-i mücerred iy emîn
Mazhar-ı ilm-i İlâhîdür yakîn
175. 'Akl adıdur kalem bî-irtikâb
Levhdür nefis adı vü ümmü'l-kitâb
176. Her ne sûret var-ısa âlemde bil
K'aña 'akl icmâl-ıladur müştemil
177. Kamuya tafsîl-il 'oldı nefis-i küll
Müştemil sırrını sözüñ aña bil
178. Mazhar-ı Rahmân-durur 'arş-ı azîm
Kürsi oldı mazhar-ı pâk-i Rahîm

BAKIYYE-İ TEFÂSİL-İ MEZÂHİR

179. Çarh-ı evvel mazhar-ı Hallâkdur
Çarh-ı sâbi' mazhar-ı Rezzâkdur
180. Çarh-ı evvel aya olmuşdur mahal
Çarh-ı sâbi'de olur dâyim Zühal
181. Çarh-ı şâdis mazhar-ı ism-i Alîm
Kim orada Müşterî-durur mukîm
182. Çarh-ı hâmis mazhar-ı Kahlâkdur
K'orada Merîh hancer-dârdur
183. Çarh-ı râbi' mazhar-ı muhyî vü nûr
Kim güneş andan ider dâyim zuhûr
184. Çarh-ı sâlisdür Musavvir mazharı
Ol felekdür Zühre-i zehrâ yiri
185. Mazhar-ı Bârîdür ikinci felek
K'orada olur 'Utarid dutma şek
186. Mazhar-ı Cebbâr nâr u Hayy âb
Mazhar-ı bâ'is hevâ vü Rab türâb

DER-MEZÂHİR-İ MÜREKKEBE

187. Bu besâyitde ne varsa bî-gümân
Her biri bir isme mazhardur hemân
188. Lîkin eczâ-yı mürekkebe herbiri
Bî-gümân bir ismüñ oldı mazharı
189. Bu mezâhir gerçi bî-had çok-durur
Zâhir olan birden artuğ yok-durur
190. Baksa yüz gözgüye bir kişi ayân
Yüz görünür orada ol bî-gümân
191. Oldı bir sûret bu yüz mazharda yüz
Zâhir olanlar kamu bir reybsüz

DER-BEYÂN-I ÂN Kİ İNSÂN MAZHAR-I İSMU'LLAH EST

192. Mazhar-ı İsmu'llah insândur hemîn
K'ol çamu esmâya câmi'dür yakîn
193. Cümle-i esmâya câmi'dür bu ism
Lâ-büd oldı aña mazhar bu tılısm
194. Kamu vasfa anı câmi' buldılar
Mazhar olduğın bu isme bildiler
195. Buldılar ezdâd üns anda temâm
Lâ-büd aña didiler insân-be-nâm
196. Kâbiliyyet bulup eczâ-yı kesîf
Mûnis oldı aña ol rûh-ı laîf
197. Şem'-i cân key rûşen işler işledi
Bu gider cisme safâ bağışladı
198. Çâbil itdi anı ilm ü hikmete
Çıldı lâyıık anı fażl u rahmete
199. Rûh-ı a'zam oldı zâtuñ mazharı
Çamu naçş u 'aybdandur ol berî

DER-MEV'İZE VE TAHRİZ BER-İKTİSÂB-I SA'ÂDET-İ MA'ÂD

200. Sen dahı ol nûrdansın muktebes
Râst aña irmege kılııl heves
201. Her n'ireye katre giderse gider
Âkıbet kılur girü bahre güzer
202. Düriş olma katre-y-iken seng ü hâk
Kim kabûl eyleye sini bahr-i pâk
203. Ne küdüret varsa nefsüñden gider
K'idesin sâfi olup bahra güzer
204. Ger küdüretten olursañ hâk-vâr
Taş-ıla toprakda bulduñ hâr u zâr

DER-TAHRÎZ-İ MEYL BE-ÂLEM-İ KUDS TAHÂRET

205. Çünkü Allâhuñ sen olduñ mazharı
Sen seni zînhâr sanma ser-serî
206. Nice k'ismu'llah mukaddemdür yakîn
Cümle esmâ-i sıfatdan iy karîn
207. Mazhar ol isme çü sensin bî-gümân
Bu mezâhirden mukaddemsin ayân
208. Rûhla evvel cism-ilesin âhirîn
Evvel âhir pes sen olursın yakîn
209. İşbu varlık yog-ıdı sen var-ıduñ
Ne hod âb u bâd u hâk ü nâr-ıduñ
210. Gitse bu varlık girü var olasın
Kuds ehli-y-le varup yâr olasın
211. İşbu cism ü sûret oldukda adem
Yog olam ben dahı diyü yime gam
212. Sûret-i hayvâniye irse hâlel
Hilkat-i rûhâniye ola bedel
213. Rûh ölmez ölecek tendür k'ölür
Ölice ten rûh bâkîdur kalur
214. Sûret-i tenden çü hâli ola rûh
Dahı yig hil'at ola aña fûtûh

DER-BEYÂN-I HÂL-İ RÛH BA'D-EZ MÛFÂREKAT-İ BEDEN

215. Varlıguñ her-dem tebeddülde yakîn
Girü sen sensin hakîkatde hemîn
216. Her nefes zâyil oluban bu vücûd
Yirine bir dahı virür feyz-i cûd
217. Gelmeye bu söz saña hergiz ba'îd
Okıduñs'âyetde "min halkın cedîd"
218. Pes bu nev'-i sûretüñ çünkim gide
Sâni' anı dahı yig sûret ide

DER-BEYÂN-I ŞEREF-İ İNSÂN BER-MAHLÛKÂTİ

219. Ten duhânından çü sen dûr olasın
Şem'-vâr ucdan uca nûr olasın
220. Bir güneşden sır k'aña gün zerredür
Bir denizden k'aña ummân katredür
221. Kamu isme işbu ism ider zuhûr
Herbiri bundan alur peyveste nûr
222. Kamunuñ bu mazharı-durur yakîn
Pes ta'addüd yok u vahdetdür hemîn
223. Rûh-ı insânî ki oldur pâk-zât
Olduğı-y-çun mecma'-ı cümle-sıfât

DER-MEV'İZE VE TAHRÎZ BER-RAGBET BE-ÂLEM-İ KUDS

224. Hakdan ol-ıymış halife bî-gümân
Âlem-i Gayb u Şehâdetde ayân
225. Sen dah'andan muktebessin dutma şek
Kamu nesne asla meyl itmek gerek
226. Cehd it pes k'iresin ol gül-şene
N'işe kalduñ bu dütünlü kül-hene
227. Oradansın aña eyle meyli sen
Hâtıruñda var-ısa hubbü'l-vatan
228. Jeng-i şehvetden iderseñ nefis pâk
Rûh-ı a'zâm gibi olduñ tâb-nâk
229. Sini andan ayıran işbu kafes
Sımsa sen Olsın ale't-tahkîk pes
230. Pes gerek nefsüñi şöyle idesin
K'iresin aña çü bundan gidesin
231. Ger anuñ vasfi-y-ıla mevsûf olasın
Aña irişmeklige yol bulasın
232. İlet-i zamm oldı cinsiyyet ne şek
An'irem diyend'anuñ vasfi gerek

233. Pâklıkdur vasf' anuñ her aybdan
Bu sözi diñle ki geldi gaybdan
234. Diler-iseñ kim görine saña Zât
Cehd it kim gide senden bu sıfât
235. Her kimüñ kim var-durur aklında sahv
Kendüzini kendülikden ide mahv
236. Pâk olgıl tâ ki pâki bulasın
Şöyle mahv olgıl ki sen ol olasın
237. **AHMEDÎ** bildüñse key söz söyledi
Vahdetüñ sırrın saña keşf eyledi
238. Bu söze olsañ benefşe bigi sem'
Keşf-ile gül gibi olasın şem'-i cem'
239. Tefrika mahv ola cem'a iresin
Râst andan cem'-i cem'a iresin

DER-MEDH-İ HÂTEME'N-NEBÎNE MUHAMMEDİ MUSTAFÂ ALEYHİ'S-SELÂM

240. Hazret-i 'izzetden olsun biñ selâm
Mustafâ'nuñ rûhına her-subh u şâm
241. Reh-ber-i ehl-i tarîkat tâc-ı şer'
K'andan oldu dîne zâhir asl u fer'
242. 'İlm bahri vü fezâyil mecma'ı
Luţfi kâmi vü fevâzıl menba'ı
243. Göñli anuñ mahzen-i esrâr-ı Haq
Rûhı anuñ mazhar-ı envâr-ı Haq
244. Hem ezel mülkinde Fahr-i 'Âlem ol
Hem ebedde enbiyâya hâtem ol
245. 'Işkına oldu anuñ rûşen bu şem'
Belk'anuñ-çuñ intizâm oldu bu cem'
246. Çünkü devletden başına urdı tâc
Aldı hândan bâc u kayserden harâc
247. Şirk çirkinde boyanmışken bu hâk
Kılıcı suyından anuñ oldu pâk
248. Tarfetü'l-'ayn içre çün tîz-i nazar
Kıldı bundan "Kâbe-Kavşeyn'e" güzer

249. Tutdı anda qurb-ı “Ev-ednâ”yı ol
Buldı “Sübhâne’llezî esrâ”yı ol
250. Buluban “Sümme Denâ”ya ol sebîl
“Lev-denevtü” diyü qaldı Cebra’îl
251. Kıldı na’lînini tâc-ı ser felek
İtdi sürme ayağı tozın melek
252. Gâh “Tâ-hâ” buldı geh “Yâ-sin” nidâ
Gâh “Elem neşrahleke” geh “Ve’d-duhâ”
253. Gâh anuñ hulqına didi Haqq ‘Azîm
Geh Ra’ûf itdi anı vü geh Rahîm
254. Geh didi aña “Şefî” ü geh “Nezîr”
Gâh “Şâhid” geh “Sirâc” ü geh “Beşîr”
255. Saltanaçla oldı halkuñ fahrı ol
Kendüzine fahr idindi faqrı ol
256. Çünki oldı himmeti anuñ ser-bülend
Hiç hışmet olmadı aña pâ-y-bend
257. Gökde güneş hışmetine qalmadı
Anuñ-ıçun yire sâye salmadı
258. İtmedi Firdevs bâgına nazar
Lâ-büd oldı vasfı “Mâ-zâge’l-basar
259. Hem sa’âdet hem kerâmet ehli ol
Hem hilâfet hem imâmet ehli ol
260. Cenkde hayli melâ’ik aña iş
“Mâ-remeyte iz remeyte”_ohına kîş
261. Dir “Etânî” Cebra’îl andan kelâm
Yir “Ebeytü inde Rabbî”den ta’âm
262. Ol-durur ol “Âlim-i ilme’l-yakîn”
Ol-durur ol “Rahmeten li’l-âlemîn”
263. Çil-sabâh u heşt-huld-i bî-misâl
Cüml ‘anuñ-çun bu söze hâ-mîm-dâl
264. Gitse andan nokta-i mîm-i hased
Ne kalur fikr eylegil “Bâki Ahed”
265. Çün nübüvvet zâhir itdi Mustafâ
Nesh old’anuñla şer’-i enbiyâ

266. Dîn anuñdur bâki-i edyân nedür
Hükmet-i Yûnân nedür
267. Rây-ı Yûnân mezheb-i Zerdüştdür
Felsefe-y-le şer' püşt-â-püştdür
268. Felsefedür sifli bî-şek şer'-i arş
Şer'-ile arşa irişür ehl-i ferş
269. Rahmetin Hakkuñ dilerseñ **AHMEDÎ**
Hamd-ile zıkr eyle dâyim Ahmed'i

DER-TAHRÎZ BE-İTBÂ VE MAHABBET-İ RESÛL

270. Dem anuñ adından ür peyveste pes
K'olasın ol ad-ıla îsî-nefes
271. Göñlüñi medhine it dürc-i le'âl
Kim ola kamu sözüñ sıhr-ı halâl
272. Sünnetin tut k'ehl-i devlet olasın
Şer'ine gir kim şefâ'at bulasın
273. K'ol nebî şer'ine her kim girmeye
Dünya vü 'Uqbâda rahmet görmeye
274. Yâ-Resûl 'Allah nazar itgil baña
Kim şefâat isteyü geldüm saña
275. Olsa 'âsiye şefâat mültahık
Cümle 'âsîlerden uş ben müstahık

DER-ŞEFÂAT-CÛSTEN EZ-RESÛL ALEYHİ'S-SELÂM

276. Bini iste kim günâhum çok-durur
Arada bir hayr işüm yok-durur
277. Olmaz işde geh yügüre geh yile
Virmişem 'ömrümi ney bigi yile
278. Şimdi uş zâr u peşîmân olmuşam
N'eyleyeyüm diyü hayrân kalmışam
279. Ne siyeh-kâram ki işüm yazmışam
Defterümi kara dîvân yazmışam
280. Sen var-iken ben kime yalvarayum
Kapuñı koyup n'ireye varayum

281. Çünkü sensin pes Şefî'ü'l-Müznibîn
Ben şefâat senden isderem hemîn
282. Dut elümi kim ayakdan düşmişem
Hem nedâmet odına dutuşmuşam
283. Tâ getürdüm kapuña mihr ü vidâd
Sıdk u ihlâs-ıla hüsn-i i'tikâd

DER-BEYÂN-I HAKİKAT-İ NUTK Kİ BÎ-HARF Ü SAVTEST

284. İy sehün-dân gel ki söz söyleyelüm
Hûb ma'niler beyân eyleyelüm
285. Gerçi söz oldur ki bî-kâm u zübân
Ola ma'nî ehli katında ayân
286. Ol degül söz kim ola ol savt u harf
Belki savt u harf olupdur söze zarf
287. Söz eger bu savt ola vü harf pes
Bî-şek insân ola tûtî dahı pes
288. Harf ü savtı söz sanursañ cehl ola
Harf-ıla savta kalan nâ-ehl ola
289. Lîki çün söz lafz-ıla sûret bulur
Hem ma'ânî tercümânı lafz olur
290. Pes sözi hoş-lafz-ıla idelüm beyân
K'ola san'at ehli kim olur ayân
291. Müşg ü anber-bîz idüp hâmeyi
Nakş kılalum **SİKENDER-NÂME'Yİ**

DER-TAHALLUS-I KİTÂB

292. Her sözi anda mülahhas idelüm
AHMEDÎ adına mahlas idelüm
293. Gevher-i fazlı sunalum fâzıla
Zâde-i aklı virelüm âkıla
294. Ucdan uca araduh bu âlemi
Bulmaduh ehl-i kerem bir âdemi
295. Kim kerem ehli kimi ölmüş-durur
Kimi yoklıktan nihân ölmüş-durur

296. Âdemî yirini dutmuşdur sibâ'
Kime lââyık ola bu zîbâ-metâ'
297. Bû kerîmedür ü hem bintü'l-kerîm
Nicesi küfv ola buña her le'îm
298. Söz çü a'tı'l-kavsi bârîhâ ola
AHMEDÎ 'yedür bu kim lââyık gele
299. Pes anuñ hıcrında gerekdür bu bıkır
Dahı dürlü yok-durur bu işde fikr
300. Aña lââyık bu kim oldur ol Kerîm
Kim saçar halka zer ü dürr-i yetîm
301. Hem dahı oldur gevherüñ kadrin bilen
'İzzetin yirine getiribilen
302. Bu güher bir kişiye lââyık mıdır
Kim berâberdür katında hâk ü dür
303. İşbu 'azrâ-yı cihânda iy Hüdây
Kıl hümâyûn-fâl şöyle kim hümây
304. Fikri-y-ile 'aklı pür-nûr eylegil
Zikri-y-ile cânı ma'mûr eylegil
305. Bunı gönüllere hem-dem eylegil
Cânları sırrına mahrem eylegil
306. Ciddine fazluñ-ıla virgil sevâb
Hezlini afv eyle vü itme hitâb

MATLA'-I DASİTAN-I ZÜ'L-KARNEYN İSKENDER-İ RÛMÎ

307. Söylegil iy bülbül-i şîrîn-zübân
Hayfdur kim gizlü kala bu beyân
308. Kâm-ı cân lafzuñdan olsun pür-şeker
Olma pes hâmûş iy mürğ-ı nagme-ger
309. Kim gele hâmuşlığa dahı zamân
Virmedi kimseye virmez çarh emân
310. Kim başarmışdur bu tîre-hâk-ile
Kim başa çıkmış-durur eflâk-ile
311. Nûşîdârû diyü virdügi bu dehr
Bî-gümân ol nîş-i cândur belki zehr

312. Yidi başlu ejdehâdur bu cihân
Bir nefes kimseneye virmez emân
313. Niçeler binüm diyü bu şark u garb
Ejdehâ vü dîv ile_eyledi harb
314. Niçeler binüm diyü bu bezm-gâh
İns ü cinn-ile düzetdi rezm-gâh
315. Niçeler ârâyiş itdi taht-ı âc
Niçeler yâkûtdan düzetdi tâc
316. Ol kamudan kalan uş efsânedür
Mülk Allâhuñ ki cāvîdânedür
317. Mülk mi ol ki_anı koyup gideler
Ayruga kalası mülki nideler
318. Bu söz üzre bir hikâyet ideyim
Ehl-i dânişden rivâyet ideyim

ŞÜRÛ'-I BE-NAZM-I KISSA

319. Ol zamân k'Îrâna Dârâb-ıdı şâh
Dilegince seyr iderdi mihr ü mâh
320. N'ireye yüz tutsa bulurdı zafer
Topraga el ursa olurdu güher
321. Kişiye çün yüz tuta ikbâl ü baht
Sehl olur ele getürmek tâc u taht
322. Kamu müşkil devlete âsân olur
Devlet oldukda gedâ sultân olur
323. Bir kıl-ıla yidilür çünkim gele
Gidicek uzar eger zencîr ola
324. Çün muzaffer gördi Dârâ devletin
Diledi k'artura câh u rütbetin
325. Nice kim artar kişide mâl u genc
Dahı artar hırs-ıla bî-hûde renc
326. Kasd itdi k'ilede Rûma sipâh
Rûmı feth idüp aña dahı_ola şâh
327. Bir çeri cem' itdi anda şehriyâr
Kim aña yog-ıdı hadd-ile şümâr

328. Ol aradan Rûma azm eyledi şâh
Her yañadan yürüdi hayl ü sipâh
329. Rûma yürüdi çeriler fevc fevc
Bahr sana-y-duñ ki gider mevc mevc
330. Yiryüzi kûs ü direfş-ile ‘alem
Tolmış-ıdı vü dahı hayl ü haşem
331. Kaysara irdi haber kim çok çeri
Rûma uş geldi vü Dârâ serveri
332. Nireye ugrasa gâretdür işi
Kanda irerse hasâretdür işi
333. Nirede ma’ mûr yir bulsa yıhar
Kankı şehri kim alur-ısa yahar
334. Her ki Dârâyı göre iy şehriyâr
Sana Behmendür ü yâ İsfendiyâr
335. Leşkere çün ola Dârâ pîş-rev
İlede Destânla Rüstenden girev
336. Leşkerinüñ hod kerâmı yok-durur
Her neden dirler-ise artuk-durur
337. Kim-durur Dârâya kim karşı tura
Yâ çerisinüñ hisâbın kim vire
338. Kaysara çünkim irişdi bu haber
Göñli oldı gussadan zîr ü zeber
339. Bildi kim tâli’ dönüp baht oldı şûm
Gidiser bî-şekk elinden mülk-i Rûm
340. Zîre ol pîr-ıdı Dârâ nev-cüvân
Ol zaîf-ıdı vü bu nev-pehlevân
341. Pîrden hergiz yigitlik gelmeye
Yigid-ile pîr hem-ser olmaya

DER-NASÎHAT- VE BEYÂN-I HÂL-İ PÎRÎ

342. Nev-cüvân-ıla nice_ola könhe-pîr
Dâr u gîr ü devlet ü nusretde bir
343. Fark ikisi arasında bu yiter
Kim yiter pîr ü cüvân olan biter

344. Bâgda bislenür ağaç ki_ola cüvân
Pîr olıcak keser anı bâgbân
345. Devlet-ile ger kişi Cimşîd ola
Pîrlıkde kamudan nev-mîd ola
346. Bu yigitlik ger hevâdur u heves
Pîrlık za'f olur u hem'acz pes
347. Az yir-ise ten olur zâr u nizâr
Çok yir-ise hod düşer bîmâr u zâr
348. Şîb ecel kılıc-durur çün ire şeyb
Dahı dünyâ istemeklik ola 'ayb
349. Gerçi Kaysar bilür-idi k'ol sipâh
İdesi-durur anuñ mülkin tebâh
350. Lîki saqladı hamıyyetle_adını
Urdı hasm-ıla savař bünyâdını
351. Kişi kim ol eyü ad-ıla ola
Yig ki yavuz ad-ıla diri kala
352. Tâc ıssına ki_ola bî-nâm u neng
Tahtdan yig tahta-i tâbût-ı teng
353. Bî-hamıyyetlerden erlik gelmeye
Bî-hamıyyetlikle dirlik olmaya
354. Bî-hamıyyet kişi server olamaz
Her ki cân u baş sever ser olamaz
355. Ur bu cân terkini kim baş olasın
Yüregine düşmenüñ baş olasın
356. Bir çeri cem' itdi Kaysar bî-kerân
K'ide Dârâ-y-ıla bir ceng-i girân
357. Kim cihân içinde kala yâdigâr
Anı târîh ide andan rûzigâr
358. Çün ecelden kimseye yokdur güzer
Er gerek k'ölmekden itmeye hazer
359. Yokdur ölmek çünkim olmaya kazâ
Çün kazâ var dirlik olmaya revâ
360. Yüridi birbirine iki sipâh
Şöyle kim örtildi tozdan mihr ü mâh

361. Ugraşup birbirine_âheng itdiler
Nâm-ıçun nâmûs-ıla ceng itdiler
362. Bir neberd oldu ki hergiz rûzigâr
Görmemişdi aña beñzer kâr-zâr
363. Nireye kılsañ nazar ceyhûn-ıdı
Nicesi ceyhûn ki mevc-i hûn-ıdı
364. Cânlara mahlas yolu bârîk-ıdı
Kan buhârından hevâ târîk-ıdı
365. Şöyle ceng eylediler Rûmî-sipâh
K'âferîn itdi olara mihr ü mâh
366. Lîki Kaysar bahtı çün olmuşdı şûm
Âkıbet basıldı anda hayl-i Rûm
367. Ne hazîne kaldı vü ne mülk ü mâl
Düşmene oldu ser-â-ser pâyimâl
368. Böyle-durur gerdiş-i çarh-ı bülend
Gâh şâdân ider ü geh müstemend
369. Düşdi atdan Kaysar u oldu esîr
Bahtı dönene kim ola dest-gîr
370. Kişiden çünkim yüzün döndüre baht
Nef' itmez dahı aña tâc u taht
371. Kaysar-ıçun dikdi Dârâ anda dâr
Asdı anı kaldı ansuz kasr u dâr
372. Dünyanuñ işbudur işbu pîşesi
Vay aña kim dünyadur endişesi
373. Dünya genci çünki degmez rencine
Ne heves itmek gerekdür gencine
374. Kaysar u Kisrîsidür ber-dâr olan
Kim-durur pes anda ber-hûrdâr olan
375. Çünki Kaysar öldi ıssuz kaldı Rûm
Oldı Dârânuñ kamu ol merzibûm
376. Diri kalan ger şerîf ü ger vazî'
Oldılar mecmû'ı Dârâya mutî'
377. Kamu anuñ hükmine râm oldılar
Cümle anuñ-ıla ârâm oldılar

378. Öliye kimse vefâ kılmış degül
Öli-y-içün kimsene ölmüş degül
379. Dirligüñde katı şefkatlüñ saña
Varımaz öldükde sinüñden yaña
380. Rûmı Dârâ kısmet itdi şehr şehr
Kıldı herbir şehri bir kişiye behr
381. Tâ ki her kişi yirinde mâh u sâl
Oturuban virbiye Dârâya mâl
382. Virdi Yûnân illerini ser-te-ser
Feylekûs-ı Rûmiye ol tâc-ver
383. Kim bilürdi Feylekûsuñ rütbetin
'Adl ü insâfın u rây u fikretin
384. Şeh gerek her kişinüñ hâlin bile
Terbiyet kıldukda ehline kıla
385. Âdemî çün müfsid ü nâ-ehl ola
Terbiyet itmeklik anı cehl ola
386. Terbiyetle yig olur yigden kerîm
Bed-ter olur terbiyet itseñ le'îm
387. Bisleseñ yüz yıl yılanı şehd-ile
Zehr olur u virdügi saña cehd-ile
388. Gürg-beççe bislemiş bir nâ-halef
Pençesi bitdükde_anı kılmış telef
389. İtdi ta'yîn Feylekûs'a şehriyâr
Altibiñ beyza kamu zerr-i ayâr
390. Kim vara Yûnândan Îrân'a harâc
Kendü_ala bâkî ne kalsa mâl u pâc
391. Ol zamân kim beyza nakd-i mâl-ıdı
Herbirinüñ vezni yüz miskâl-ıdı
392. Pes anuñ kızın dahı kâbîn-ile
Aldı şöyle kim gerek âyîn-ile
393. Bir zamân kim oldı ol iki bile
Oldı kız Hakk emri-y-ile hâmile
394. Rûmda hâtûnı koyyup gitdi şâh
Kim Medâyindi aña ârâm-gâh

395. Didi bundan togan olur-ısa er
Anuñ olsun Rûm mülki ser-te-ser
396. Feylekûs aña atabeglik ide
Dilese kim Rûmda beglik ide
397. Rûm cümle çünki tohdadı aña
Dönüben gitdi Medâyinden yaña
398. Vardı dâru'l-mülke vü oturdı şâd
Bâde nûş itdi vü ömre virdi dâd
399. Ömr k'ol bî-bâdedür berbâd olur
Ömr dadın virmeyen bî-dâd olur
400. Bâde_anuñ-çundur k'anı nûş ideler
Kamu kayguyı ferâmûş ideler
401. Lezzeti bî-hûş olup yatmah-durur
Kendü kendüzini unıtmah-durur
402. Âkıbet fikri-durur câna azâb
Kendülikdür kişiye Hakdan hicâb
403. Bir zamân çün geldi gitdi mâh u sâl
Dünyadan Dârâ dahı_itdi irtihâl
404. Ol öliceğ oğlı_anuñ Dârâb Şâh
Tahta çıkup urdı başına külâh
405. Böyle-durur gerdiş-i gerdân-sipih
Geh buña kîn ider ü geh aña mihr

DER-BEYÂN-I Bİ-VEFÂYÎ-İ CİHÂN

406. Tut bugün Dârâ vü Cimşîd olasıñ
Nef'i ne yarın ki nâ-gâh ölesin
407. Hûb-ıdı dirlik kişi ger ölmese
Çünki ölmek var bu dirlik olmasa
408. Dirliğüñ çünkim ölümdür âhiri
Assı ne biñ havf-ıla olmak diri
409. Yürek ölüm korkusından tolu dâğ
Kendüzin pes kişi nice diye sag
410. Kişinüñ cânına yitmez mi elem
Fikrine düşdüğü kim nâ-geh ölem

411. Dünyada çün yok-durur bir dem sebât
Pes hayâl-i hâb-durur bu hayât
412. Nâzişi halkuñ kim ol devlet-durur
Kej okıma râst ki_ol dû-let-durur
413. Ger felek olursa bugün saña taht
Yarın iltürsin yirüñ altına raht
414. Çarh dûlâbı-durur gerdûn-ı dún
Geh ser-efrâz eyler ü geh ser-nigûn
415. Pes gönül baglamagıl bu menzile
İ'timâd eylemegil âb u gile
416. N'ışe ola garre aña ehl-i tukâ
K'anı mablûb itseñ olur lâ-bekâ
417. Gör bu az müddet içinde rûzigâr
Niçe dürlü nakş itdi âşikâr

DER-İ'TİBÂR BE-TEGAYYÜR-İ AHVÂL-İ CİHÂN

418. Nice esdi tünd-bâd-ı kahrı gör
Nice mihnetler getürdi dehri gör
419. Niçe sultânları zâr öldürdi ol
Niçe Yûsufı kurda_aldurdi ol
420. Ne Süleymânlaruñ ol tahtın yile
Virdi vü mülkini dîve kim bile
421. Ne melikleri düşürüp itdi hâk
Ne selâtîni ki kıldı ol helâk
422. Âşikârâ gördüñ uş olmaz nihân
Nice yıhıldı yahıldı bu cihân
423. Yakılır Bagdâd u yıkılır Haleb
Yirine bir köy yapılmaz bu aceb
424. Gördüğün cennet-sıfat iklîm-i Rûm
Bak nic'oldı yıkılup me'vâ-yı bûm
425. Gitdi nirede var-ısa bir kerîm
Gelmedi kimse yirine cüz'le'îm
426. Çün le'îm irer kerîmüñ yirine

Ne aceb ehl-i kerem ger yirine

427. Sorma bu işleri kim kandan gelür
Dahı yirden sanma ol andan gelür

DER-TEVHİD-İ BÂRİ-Yİ TAÂLÂ

428. Mülkine oldur tasarruf eyleyen
Kâfir ola dahı dürlü söyleyen
429. Yir-ile gök toptolu oldur ol hemân
Dahı nesne var diyü dutma gümân
430. Ol-durur ol Lâ-Yezâl u Lem-Yezel
Hem Ebed oldur Yakîn u hem Ezel
431. Her neyi kim gözlerüñ görür ‘ayân
Ol-durur ol anuñ içinde nihân
432. Geh Tatar geh Türk aña mazhar-durur
Sanma andan artuğı kim var-durur
433. Bu mezâhir kim görürsin uş ‘ayân
Kamu oldur söz bu kim itdüm beyân
434. Lu’betüz biz lu’bete itgil nazar
Kim niredendür bu eşkâl ü suver
435. Nireden ol cünbiş ü cûşiş nedür
Ol görinen çıkmak u gûşiş nedür
436. **AHMEDÎ**’nüñ ger sözün diñleyesin
Çarh esrârın kamu añlayasın

DER-HASBİHÂL-İ HİŞTEN VE İFTİHÂR-I BE-FAZL

437. Kim ne aklında anuñ vardur maraz
Ne sözünde bulunur hergiz araz
438. Sözleri eydür hakâyıkdur kamu
Fikrler ki_ider dekâyıkdur kamu
439. Hiç söz agzına almaz ol güzâf
Urmaz ayruklar gibi bî-hûde lâf
440. Öginüp dimez fülâne’d-dîn benem
Yâ-hûd ehl-i ‘izzet ü temkîn benem
441. Kendüye tâvûs-veş ‘âşık degül
Aña çün ‘anqâdur ol lâyıkdur degül

442. Ben uluyam diyüben fikr eylemez
Adını her beytde zikr eylemez
443. Hîşten-binlik anuñ behri degül
AHMEDÎ'dür şükr **GÜLŞEHRÎ** degül
444. Kendüzin düzüp-durur ol bir fakîr
Kim aña muhtâcdur şâh u emîr
445. Kendünüñdür her ne varsa naqd-i hâs
Ayruguñ ğışşından olmışdur halâs

DER-TA'RÎZ-İ BA'Zİ EZ-EKÂBİR-İ DEHR

446. Göñli anuñ bir güherdür şeb-çirâğ
Nice görsün anı göz ki_ olmaya sag
447. Kimse_ anı ma'nî gözi-y-le görmedi
Ne kişidür niredendür sormadı
448. Çünki yokdur asr ehlinde nazar
Lâ-cirem bî-ķadr düşdi bu güher
449. Bilmediler anı ne mazhar-durur
Nireden geldi vü ne gevher-durur
450. Nicesi bilsün anı her bî-basar
Gevheri hergiz bile mi pîle-ver
451. Müşğ attâruñ dükânında olur
Ne-durur baytâr anı ne bilür
452. Sözi cândan nâzügerek söyledi
Lâ-büd anı az kişi fehm eyledi
453. Çün Yahûdî-tab' oldı halk pes
Assı n'olmak nuķ-ıla 'İsî-nefes,
454. Ol ki Şeyhoğlından ögrene maķâl
Bile mi ne reng-ile söyler Kemâl
455. Her ki ayruķlar sözini diñleye
Didügin Selmânuñ ol ne añlaya
456. Ol ki aña Sâmirî hem-dem ola
Buzagudur Mûsiden ne zevk ala
457. Tab' kim ol perdelerden düşe dūr

Ne bile Dâvûdı nic'okur Zebûr

458. Ol kişi kim ola hem-tab'-cü'al
Gül kohus'ider dimâgına hâlel
459. Ol ki hû duta duhân-ı kül-hene
Döye bile mi hevâ-yı gül-şene
460. Kime kim reh-ber ola bûm u gurâb
Yiri gûr-istândur u dîhi harâb
461. Kâmil-ile oturan bulur kemâl
Nâkış-ıla hem-nişînlîkdür vebâl
462. Çün elif oldı musâhib lâm-ıla
Egri düşd'ol dahı anuñla bile
463. Gil gül-ile olduğı-y-çun hem-nefes
Zülfî müşğînler kıtur anı heves
464. Mushafa cild olduğı-y-çun edîm
Anı öpüp başına kıor her kerîm
465. Çün şebih dürr-ile bir silke gelür
Sîm-berler boynına heykel olur

***DÂSİTÂN-I VİLÂDET-İ İSKENDER VE SEBEB-İ NİHÂDEN-İ LAKAB
BE-ZÜ'L-KARNEYN***

466. Söylegil iy bülbül-i ankâ-sıfat
Kim her işden sende vardur ma'rifet
467. Bir nefes ür sözde kim Rûhü'l-Emîn
İşidicek anı kıla âferîn
468. Söyle kim senden gelen söz hûb olur
Her gönülde cân gibi mergûb olur
469. Çünki yaraşur saña söz söylemek
Hayf ola dilüni hâmûş eylemek
470. Söylegil iy mürg-i kudsî söylegil
Bize bir zîbâ-hikâyet eylegil

MUKADDİME-İ DÂSİTÂN VE SIFAT-I BAHÂR

471. Bir seher-geh kim hevâ hoş-bû-y-ıdı
Yiryüzi tolu gül-i hod-rû-y-ıdı
472. Söz-ile düzmişdi bülbül sâzını

Râst itmişdi nûvâda âvâzını

473. Hem hevâdan saçılurdu müşg-nâb
Hem dökerdi ebr lü'lü-yi hoş-âb
474. Lâlenüñ yañahları hamrâ-y-ıdı
Nergisüñ ra'nâ gözi kehlâ-y-ıdı
475. Tolmuş-ıdı gül-sitân berg ü nevâ
Olmış-ıdı cân-fizâ bâd-ı sabâ
476. N'ireye varsañ gül ü reyhân-ıdı
Bâğ tolu mürğ-ı hoş-elhân-ıdı
477. Sebze mînâ-reng ton geymiş-ıdı
Gül cevâhir hırmenin yaymış-ıdı
478. Kûh olmuş-ıdı pîrûze-seleb
Lâle lü'lü-rîz ü gonca la'l-leb
479. Dürlü gevherle bezenmişdi çemen
Yiryüzün sîmîn düzetmişdi semen
480. Nergis almışdı ele zerrîn-kadah
La'l-gûn itmişdi gül yüzün ferah
481. Bâğ içinde oturmuş-ıdı şâd-kâm
Feylekûs öñinde gül elinde câm
482. Mutrib olmuş-ıdı nûvâda perde-sâz
Sâki itmiş-ıdı çemende bezme sâz
483. Sanasın kim meclis olmuş-ıdı Behişt
Âb-ı Kevserdi mey-i anber-sirişt
484. Gâh mutrib düzer-ıdı sâz-ı üd
Gâh bülbül söz-ile_ıderdi sürûd
485. Şemse-i gül zînet-i nevrûz-ıdı
Sûret-i sâkî bahâr-efrûz-ıdı
486. Sebze tolu lü'lü-yi lâlâ-y-ıdı
Lâlenüñ la'li çemen-ârâ-y-ıdı
487. Feylekûs oturur-ıken şâd-kâm
Bir kişi geldi didi iy nîg-nâm
488. Müjde olsun kim bugün vakt-i seher
Oldı tâli' kevkebi feth ü zafer
489. Bir mübârek kevkeb iy şâh-ı zemen

Togdı_Esedde Müşterî vü Zühreden

490. Nice kevkeb k' aña gün hayrân olur
Nûrî-y-ıla yiryüzi tâbân olur
491. Bir melik-zâde vücûda geldi_i şâh
K' aña mihr ü mâh olısar tâc-gâh
492. Bir nebîre kıldı rûzî Hak saña
Kim felek hem-tâ getürmedi aña
493. Togdı bir oğluñ k' olısar bahtiyâr
Tâc u taht anı kılısar ihtiyâr
494. Nûr-ı devlet-durur ol ser-tâ-kadem
Sıdk-ıla mihrinden ürür subh dem
495. Şâd oldı Feylekûs-ı nâmever
Virdi müjde getürene sîm ü zer
496. Sîm ü zer hoşdur be-gâyet virmege
Virmeseñ meyl itme anı dirmege
497. Pes müneccim getürüp her bâb-ıla
Tâli'in gördürdi usturlâb-ıla
498. Tâli'ü hîlâcını çün bildiler
Kamu yılduzı şerefde buldılar
499. Lîki arada Utâriddi hemân
Kim Şeref Burcında degüldi_ol zamân
500. K' altı yılduz çün Şeref Eyvân alur
Pes 'Utârid dahı dürlü evde_olur
501. Bu sebebden işi tutmuşken nizâm
Nâ-gehân bozıldı olmadı temâm
502. Ol kırânda yaradıldı Âdem dahı
Ol kırânda oldı hem âlem dahı
503. Lâ-cirem her iş hem-ân k' olur temâm
'Âlem ü âdemde bozılır nizâm
504. Dünyadan kimse murâd almış degül
Kimsenüñ işi temâm olmuş degül
505. Pes didiler kim bu meymûn-ahteri
İdiser Hak şark u garbuñ serveri
506. Yidi İklîmi müsahhar kılısar

Cânları kendüye çâker kılsar

507. İster-iseñ şarkdan tâ-hadd-i garb
Kalmaya yir k'anda bu kılmaya harb
508. Çünkü koya başına Cem bigi tâc
Ala Dârâ bigi biñ hândan harâc
509. Kanda k'ola kılıcı Dahhâk-fer
Bulmaya Cemşîd orada zafer
510. İy ki niçe Behmen ü İsfendiyâr
Olısar bunuñ katında bende-vâr
511. Feylekûs oldı bu sözden şâd-mân
Virdi tâli' tutana genc-i girân
512. Genc anuñ-çundur ki anı vireler
Yohsa_anı renc-ile niçün direler
513. Pes yidi gün îd itdi_ol nâm-ver
Virdi yohsullara bî-had sîm ü zer
514. Düzdi bir meclis ki Zühre rengini
Görüben bırakdı elden çengini
515. Olup Eflâtûn-ıla Bukrât şâd
Virdiler ol gün aña İskender ad
516. Çünkü hükm olmuşdı ol ferruh-piser
Yüriyiben şark u garbı tutısar
517. Herbirine şark-ıla garbuñ Arab
Karn komışdı kelâmında lakab
518. Dahı dirler çünkü togdı ol bahtiyâr
İki gîsûsı var-ıdı tâb-dâr
519. Karn-gîsûdur bu-y-ıdı bir sebeb
K'aña Zü'l-Karneyn urdılar lakab
520. Buldılar bir dâye aña hûb-rûy
Nîg-hulk u ca'd-zülf ü müşg-bûy
521. Ten-dürüst ü pâk-asl u nev-cüvân
Hûb-tab'u nîg-rây u hurde-dân
522. Altı yıl âyîn-ile ol şâh-zâd
Terbiyet buldı vü lâyık bûd u zâd
523. Yidisinde_âgâz itdi_ol nâm-ver

Tâ ki ögrene Ârestûdan hüner

524. Hikmetüñ aksâmına itdi şürû'
Bildî cümle ger usûl ü ger fûrû'
525. Añlayup ilm-i İlâhîden habar
Eyledî kısm-ı tabâyî'de nazar
526. Hem riyâzet ilmini bildi temâm
Cümle asl u fer'-ile ol nîg-nâm
527. Hem amelden ilm-i menzil hem siyer
Hem siyâsetden key añladı haber
528. Oldı on yaşında ol bir feylesûf
Kim felek esrârına buldı vukûf
529. Şöyle eşyâyı kemâhî añladı
K'anı üstâdı Arestû tañladı
530. Hendese-eşkâl-ıla çün kıldı farz
Yiri gögi bildi cev cev tûl u arz
531. Tıbda hem bahs itdi ol Bukrât-ıla
Dahı Eflâtûn u hem Sokrât-ıla
532. Çünki on yaşadı ol gâtî-fürûz
Tazı atlar istedi vü bâz u yûz
533. Sayd u atlanmak nicedür bildi bes
İlm-i tîr öğrenmege kıldı heves
534. Oldı ol san'atda şöyle kim kader
Kılur-ıdı okı zahmından hazer
535. Çünki alurđı eline _evvel kemân
Kaçar-ıdı okı sehminden gümân
536. Çünki onbiş yaşına irişdi şâh
Feylekûsa irdi fermân-ı İlâh
537. Gerçi kim ola kişi mîr-i ecel
Zûd-mîr olur çün irişe ecel
538. Teng görindi aña işbu fenâ
Tengdür hod bî-gümân dâr-ı fenâ
539. Emn var sanma bu yirde iy ulu
Kim ecel korkusı-durur toptolu
540. Şem' bigi kamuyı _eritdi bu bîm

Ne nebî buldı_aña çâre ne hakîm

541. Kamusı bu mihnet-ile öldiler
Tünd-bâd-ı kahr-ıla hâk oldılar
542. Kimsene bu derde dermân bulmadı
Çâresin kimse bu derdüñ bilmedi
543. Bulınur her ukdeye müşkil-güşây
İdemez bu ukdeyi hal hîç-rây
544. Hîç kimsene varamaz uhdeye
Kim küşâyış bula işbu ukdeye

DÂSİTAN-I VEFÂT-I FEYLEKÛS VE İBTİDÂ-YI ZUHÛR-I İSKENDER-İ ZÛ'L-KARNEYN

545. Feylekûs öldi vü Zü'l-Karneyn şâh
Rûm iklimine oldı pâdişâh
546. Rây-ıla Rûmı müsahhar eyledi
Begleri kendüye çâker eyledi
547. Devletüñ ser-mâyesidür hüsn-i rây
Rây-durur bî-gümân zıll-ı hümây
548. Rây-ıla_olur her kişi kim ola şâh
Râydur ârâyış-i taht u külâh
549. Nakz idüp halk Dârâ ahdini
Muhkem itdiler Sikender akdini
550. Kamu anuñ-ıla hem-ahd oldılar
Sankim ol şîr ü bular şehd oldılar
551. Çünkü gördiler Sikender lutfını
Kodılar Dârâyı añup unfini
552. Lutfil'olsa tâ'ata var i'tibâr
Unf-ıla oldukda kalmaz pâyidâr
553. Kamu halka sen gerek lutf idesin
Lutf varken hayf kim unf idesin
554. Kul olur lutf-ıla âzâde kişi
Unf-ıla âsîlîg olur kul işi
555. Kankı iş kim unf-ıla hâsıl olur
Unf çün götrile ol zâyil olur
556. Unfi ol vaktın gerek ide kişi

Kim anuñ lutf-ıla bitmeye işi

557. Bir melik kopdı Sikender kim bu Rûm
Hâtemine oldı nerm eyle ki mûm

DER-TEMSİL VE HÂTİME-İ DÂSİTÂN

558. Akl Arestû nefsi Zü'l-Karneyndür
Rûh mülk-i Rûm iy deryâ-yı dür

559. Nefsüni eger akluñ te'dîb ide
İlm-ile ahlâkuñı tehzîb ide

560. Her ne kim işler-iseñ meşkûr ola
Mülk-i rûh ucdan uca ma'mûr ola

561. Kâbil eyle nefsi akluñ pendine
Cânuñı düşürme şehvet bendine

562. Nefsdür kim sini yilter kül-hene
Akldur kim sini iltür gül-şene

563. Kim Sikender-vâr olasın nîg-baht
Kuds mülkinde bulasın tâc u taht

564. Sen eger ol tâc u tahtı bulasın
Aybını bu mülk ü bahtuñ bilesin

565. Kim bu fânîdür ü bes endek-bekâ
Ol-durur bâkî k'aña irmez fenâ

566. Nesne ki_ardınca fenâ ola anuñ
Mihnetidür bî-gümân cân u tenüñ

567. Mihnet-ile kişi ne lezzet bula
Mihnet olan yirde ne râhat ola

568. Her ne kim katuñda ol ni'met-durur
Çün bekâsı yok saña nıkmets-durur

569. Her vücûduñ k'âhiri ola adem
Varlığından ehl-i akl urmaya dem

570. **AHMEDÎ**'nüñ ger sözün işidesin
Kendüzüñe devleti iş idesin

571. Kim sözi anuñ kamu cândan gelür
Her ne kim eydürse irfândan gelür

572. Hâtırı anuñ melâyık câmıdur
Her ne söz kim diye Hakk ilhâmıdur

573. Ger anuñ sözi-y-le idesin amel
Hergiz işüñde bulunmaya hael
574. Bî-hael gerek-durur k'ola her iş
Koma işüñde hael hergiz düriş

DÂSİTÂN-I CÛLÛS-I İSKENDER BE-RAHT-I PÂDİŞÂHÎ-VE SIFAT-I ŞİRİN

575. Sûz-ile düzet mugannî sâzuñı
Râst it her perdede âvâzuñı
576. Nagme-sâz olup nüvâda söylegil
Cümle uşşâkı muhayyer eylegil
577. Çün Sikender oldı Rûma pâdişâh
Dürlü gevherden düzetdi tâc-gâh
578. Mâl dökdi vü hazîne eyledi cem'
K'ide Rûma düşmen olanları kam'
579. Pes te'emmül itdi rûşen-rây-ıla
Kim n'ide kim baht pâ-ber-cây ola
580. Neyleye k'artura mâl u devletin
Dilegince ide mülki beşâtin
581. Cem' itdi bir yire 'âkılları,
Feylesûf u kârdân fâzılları
582. Tâ bulara sora 'âlem hâlini
Bile bu mâl u sipihr ahvâlini
583. Dahı anlardan işide dürlü pend
Ola ol pendi dutıban sûd-mend
584. İşbu âlem hâlini her kim bile
Ni'met-i ukbîyi oldur kim bula
585. Her ne âkıllar öğüdüni duta
Dünyı kaygusından olmaya dü-tâ

SÛVÂL-I İSKENDER EZ-HÜKEMÂ KI ASL-I ÂLEM-I Çİ-BÛD

586. Pes Arestû geldi ol Bukrât-ıla
Dahı Eflâtûn u hem Sokrât-ıla
587. Didi bunlara ki iy erkân-ı mülk

Kim kamu tendür ü sızsız cân-ı mülk

588. Cümle eşyâyı kemâhî bildüñüz
Kamu müşkil ukdeyi hal kıldıñuz
589. İlm ü hikmetde çü koduñuz kadem
Bildüñüz nedür hudûs-ıla kıdem
590. Çünkü mevcûdâtı kısmet kıldıñuz
Mümkin ü vâcib ne-durur bildüñüz
591. Bildüñüz cevher nedür nedür araz
Âferînişden ne nesnedür garaz
592. Añladuñuz âkıl u ma'kûl ne
Bildüñüz illet ü nedür ma'lûl ne
593. Mümkinâtuñ mâddesin çünkim ayân
Bildüñüz idüñ baña cümle beyân
594. Diñ bu sûretler heyûlâsı nedür
Hem bu illetlerden ûlâsı nedür
595. Ne-y-idi bu âlemüñ aslı diñiz
N'olısar hem cüzvi vü külli diñiz

CEVÂB-I HUKEMÂ SÜVÂL-İ İSKENDER-RÂ

596. Did' Arestû şâha kim iy şehriyâr
Bil ki kamu nesnenüñ aslı-y-dı nâr
597. Kamu nesne andan oldı ibtidâ
Aña döner girü irse intihâ
598. Orada kim aslı od ola anuñ
Râhatı nice ola cân u tenüñ
599. Didi pes Bukrât kim asl-ı hayât
Çün hevâdur andan oldı kâyinât
600. Aslda çün kamu bâd-ıdı hemîn
Cümle_ anuñ-çun soñra bâd olur yakîn
601. Her ne nesne k'aslı anuñ bâd ola
Anda peydâdur ki ne bünyâd ola
602. Didi Eflâtûn ki bilgil iy ulu
Kim kamu mevcûduñ aslı oldı su
603. Çün sudandur tâze hayvân u nebât

Pes su olur bî-şek asl-ı kâyinât

604. Suda bünyâd eylemek key cehl olur
Sudan ârâm isteyen nâ-ehl olur

605. Böyle didi soñra Sokrât-ı Hakîm
Kim kamuya hâkdur asl-ı kadîm

606. Her ne kim var-ısa andan gûn alur
Anuñ-ıçun soñra kamu hâk olur

607. Nesne kim olmış ola aslı hâk
Ol küdüretten nicesi ola pâk

İ'TİRÂZ-I HIZR (A.S) BER-KAVL-İ HUKEMÂ VE CEVÂB-I Ū SUÂL-İ İSKENDER

608. Hızr hâzırdı didi kim iy ulu
Sözi taklîd-ile didiler kamu

609. Muhdesâta didiler bunlar kadîm
Bu muhâli hâşa kim eyde hakîm

610. Her ne kim var ger mürekkebi ger basît
İşbu âlem merkezinden tâ-muhît

611. Ger 'arâz ola vü ger cevher yakîn
Çamusı Muhdesdür iy dâna-yı dîn

612. Kamusunuñ Hâlıkıdur Kirdigâr
Kudretinden oldı cümle âşikâr

613. Mâdde vü müddet yog-ıdı vü misâl
Kim yaratdı âlemi ol Zü'l-Celâl

614. Çünkü Kâdir kudretinde ola tâm
Mâdde vü müddetsüz olur iş temâm

615. İhtiyâc-ı mâddedür 'acze delîl
Âlete muhtâc olan olur zelîl

616. 'Âlemi lâ-şey'den kıldı ayân
Ol ki anuñ emri-durur kün-fe-kân

617. Her ne kim var mümkün ol vâcib-durur
Emri kamu nesneye gâlib-durur

618. Kudret ü varlığına bî-iştibâh
Muhdisâtuñ uş hudûsıdur güvâh

619. Farzdur kim varlığını bilesin
Birliğini dahı rûşen kılasın

DELÎL-İ TEVHÎD-İ SÂNİ'-İ ÂLEM EZ-ZÜBÂN-I HIZR (A.S)

620. Olımaz Sâni' iki Ol bir olur
İkilikde mülk bî-tedbîr olur

621. Hâlık iki olımaz ol bir gerek
İki olıcak herbiri Kâdir gerek

622. Şöyle ki_ola herbiri kudretde tâm
K'âferîniş ola anuñla temâm

623. Herbirine kudret olup vasf-ı Zât
Ola nisbetle müsâvî kâyinât

624. Pes Mü'essir âferînişde ayân
Yâ ikisi ola yâ biri hemân

625. İkinci olsa gelür işbu imtinâ'
Kim ideler bir eserde ictimâ'

626. Çünkü bir Kâdirde Kudret ola tâm
Bî-gümân Makdûr anuñla_olur temâm

627. Bir-ile makdûr çün hâsıl olur
Fikr it biri dahı ne_işe gelür

628. İki kişi işleyemez bir işi
Yazamaz bir yazuyı iki kişi

629. Zîr ü bâlâ işbu âlem uş ayân
Kamu bir mevcûddur bil bî-gümân

630. Bir eserdür ucdan uca dutma şek
Pes Mü'essir olan aña bir gerek

631. Ger Mü'essir ikiden biri ola
Bî-müreccih ol biri râcih gele

632. Aklda çün bu dahı fâsid-durur
Sâni'i key bil kim ol Vâhid-durur

633. Varlığa birlige iy ehl-i sebîl
Bir dah'ideyim saña rûşen-delîl

HÜCCET-İ DİĞER BER-VAHDÂNIYYET-İ SÂNİ'

634. Ger cevâhirdür ger a'râz iy ulu
Muhdes ü muhtâc-ı muhdisdür kamu
635. Çün olur muhtâc Muhdes dutma şek
Kim aña bir Muhdis-i Vâcib gerek
636. Kim Kadîm ola vü Kâdir bî-gümân
Tâ kamu varlık ola andan ayân
637. Muhdes olur ol dahı_olmazsa Kadîm
Muhdise muhtâc olur iy hakîm
638. Devr olur yâhûd teselsül âşikâr
İkisi dahı muhâl iy nâm-dâr
639. Kâdir olmadukda_olur âciz hemân
Nesne mevcûd olmaz andan bî-gümân
640. Lâzım olur iki oldukda Kadîm
Biri birinden takaddüm iy hakîm
641. Kim Kadîmüñ varlığı bî-hîç şek
Kamu varlıktan mukaddem-ter gerek
642. Herbiri her-gâh kim böyle ola
Kendü kendüden mukaddem-ter gele
643. Birliğe bir dahı hüccet eydeyüm
Gün bigi_anı saña rûşen ideyüm
644. Olmaz olur-ısa Vâcib bir hemîn
Vech-i şirket gerek arada yakîn
645. Dahı temyîze cihet gerek'ayân
Kim ta'addüd bulına_anda bî-gümân
646. Böyle olsa olmaz imkândan berî
İkiden olur mürekkeb herbiri
647. Ger kulah tutduñ-ısa benden yaña
Hüccetin tevhîdüñ uş didüm saña
648. Cân u akla maksad-ı aksâdur ol

İns ü cinne matleb-i a'lâdur ol

649. Ol makâma her kişi bulmaz vusûl
Gark olur ol bahrda cümle ukûl
650. Cehd it irmege aña k'ol makâm
Müntehâsîdur makâmâtun temâm
651. Nev'ile üç kısım-durur ol ayân
İlmi vü Gaybî vü Hakkî bî-gümân
652. İki olur tevhîd-i İlmî bil yakîn
Ger dilerseñ kim olasın ehl-i dîn
653. Birisi tevhîd-i tasdîkî olur
Birisi tevhîd-i tahkîkî olur
654. Nakl-ıla añlansa tasdîkî olur
Akl-ıla bilinse tahkîkî olur
655. Ol-durur tevhîd-i Gaybî bî-gümân
K'anı zevk-ıla bilesin sen 'ayân
656. Olasın cân-ıla aña sen güvâh
K'ol-durur ol yirde vü gökde İlâh
657. Kamu varlık oldur anuñdur kıdem
Andan ayru ne-durur cümle 'adem
658. Zîr ü bâlâ her ne kim var az u çok
Ol-durur ol andan ayru kimse yok
659. Hod Hüve'l-Evvel ve'l-Âhir bu söze
Hüccet-i rüşendür uş didüm size
660. Ol-durur tevhîd-i Hakkî k'ol İlâh
Kendünün varlığına oldu güvâh
661. Şöyle âsârını ızhâr eyledi
Kim gören tevhîde ikrâr eyledi
662. Gel anuñ âsârına eyle nazar
Kim Mü'essir bilinür olsa eser
663. Bir mesel ideyüm uş saña beyân
Kim bilesin varlığın anuñ ayân
664. Her ne kim var filde hortûm u gûş
El ayak bir başda vardur görgil uş
665. İlik ü süñük tamar it ü deri

Şöyle kim eksük degül hergiz biri

666. Lîki peşşe çünki kulagın açar
Kuş gibi her yaña kim diler uçar
667. Bir yire hortûmını çünkim ura
Rumh bigi yara urur ol yire
668. İşbu hâl-ıla zebûndur aña fil
Bu ne Kudretdür tefekkür eyle bil
669. Var-iken arslanda bunca tâb u zûr
Gör zebûn nice idipdür anı mûr
670. Bâki hayvânâtı fikr eyle temâm
Gör ki Kudret nicedür iy nîg-nâm
671. Bil ki Sâni' kamuya birdür hemîn
Zâhir ü Bâtın hem ol-durur yakîn
672. Ger bu a'zâñı te'emmül kılasın
Herbirisinde neler var bilesin
673. Göresin her uzvuñ içinde yakîn
Toptolu olmuş Kirâmen Kâtibîn
674. Bâsıra uş gözlerüñde bir melek
Kulaguñda Sâmi'a uş tutma şek
675. Bir melek agzuñda turmuş Zâika
Bir melek dilüñde zâhir Nâtıka
676. Şâme burnuñda elüñde Bâtışa
K'ol-durur kuvvet viren her işe
677. Hem dimâguñda hayâl uş bir melek
Vehm ü fikr hıfz u hiss-i müşterek
678. Sende bu endâmlar kim var kamu
İşbu resm-ile melâyikdür tolu
679. Bî-gümân bu kamuyı iden bir-durur
Ol durur ol ki _Evvel ü Âhir-durur
680. Çünki Hızruñ sözünü işitdiler
Her ne kim didi-y-se tasdîk itdiler
681. Didi Eflâtûn ki söz budur yakîn
Kim beyân itdüñ sen iy dâna-yı dîn
682. Söz ki mısbeh-ı nübüvvetden gelür

Şem' bigi cânları rûşen kılur

683. Buraya irdi çü bu güft ü şinîd
Oldı ol dem Hızr andan nâ-bedîd
684. Bildiler anı ki Hızr-ıdı yakîn
Geldi itdi anlara ta'lîm-i dîn
685. Âferîn itdiler anuñ hâline
Kaldılar hayrân aceb akvâline
686. Pes did'İskender ki dîn işin beyân
İtdi Hızr u bize gösterdi ayân
687. Söz budur böyle idelüm i'tikâd
Kim bulavuz dünyi ukbîde murâd
688. Dâniş-ile siz dahı bir iş idüñ
Mülk nazmı neyledür endîşe_idüñ
689. Dördüñüz dörd nâme yazuñ sûd-mend
K'ola herbir nâmede çok dürlü pend
690. Tâ ki ol sözleri sizden işidem
Devletüm arta çün anı iş idem
691. Mülkden ol kişi ola sûd-mend
Kim tuta çün dostdan işide pend
692. Bu söz-ile aldı Eflâtûn kalem
Çekdi kâfûr üstine müşgîn-rakam
693. Didi kim şâh-ı nev-baht u cüvân
Dünyada câvîd olgıl şâdumân
694. Cehd it bahtı dilerseñ pâyidâr
Kim işüñden râzı ola Kirdigâr
695. Ni'met isterseñ müdâm it şükrini
Baht dilerseñ unıtma zikrini
696. Her ki anuñ zikri-le urmaya dem
Varlığından yig-durur bî-şekk adem
697. Her ki_anuñ itmeye şükr-i ni'metin
Depmiş ola yire kendü devletin
698. Aña varasıñ günü endîşe kıl
Dâim anuñ kullığını pîşe kıl
699. Nefsüni key işlere tergîb it

Dükeli ahlâkuñı tehzîb it

700. Âdetüñ olsun hayâ vü sabr u hilm
San'atuñ olsun sehâ vü fazl u ilm
701. Ger yüzüñe reng virürse hayâ
Olasın gül gibi pür-reng ü safâ
702. Dileseñ kim gide senden her harec
Sabr it k'es-sabrü miftahu'l-ferec
703. Hilmi âdet eylegil sen iy hakîm
K'ol Hakuñdur vasfı V'allâhu Halîm
704. Ger sehâyı hüy u âdet kılasın
Bî-gümân ehl-i saâdet olasın
705. Fâzıl ol kim izzet ehl-i fazladur
Âdemî fâzıl kalanı fazladur
706. Bî-fenâ bâkî dilerseñ k'ola Zât
İlme cehd it k'ol-durur Âb-ı Hayât
707. İlm olmayanda yok-durur hüner
Bî-hayâda yok saâdetden eser
708. Kimde kim yok ilm bed-gir-dâr olur
Bî-saâdet kişi dâim hâr olur
709. Sıdkı kendüzüñe dâim pîşe it
Şefkat-ıla halka key endîşe it
710. Ol kişi kim kavline sâdık degül
Ko anı kim devlete lâyıık degül
711. Halka sen ger ehl-i şefkat olasın
Hâlıkı kendüñe müşfik bulasın
712. Kişi kim gönlinde sefkat olmaya
Kimseyi kendüye müşfik bulmaya
713. Cânuna râhat gerekse tâ-ebed
Kimseden göñlüñde olmasun hased
714. Her göñülde kim hased duta makâm
Anda turmak râhata olur harâm
715. Çünki yokdur Tañrı hükminden güzer
Râzı ol aña ki yazmışdur kader
716. Yara k'anı yâr ura merhem-durur

Derd k'andan ire derde em-durur

717. İş ki hayr olmaya endîşe_itmegil
Şerri kendüzüñe pîşe itmegil
718. Düşmenüñ-ile müdârâ eylegil
El irince dost-âne söylegil
719. Çünkü ol gâfil sen îmîn olasın
Birgün ola aña fırsat bulasın
720. Avret-ile meşveret eylemegil
Râzuñı hergiz aña söylemegil
721. Kim olardur akl u dînde nâkısât
Ger olalar tâyibâtün âbidât
722. Çünkü didi “şâvirû hünne” Resûl
Pes olaruñ sözünü kılma kabûl
723. Söz ki dîni nâkıs olandan gele
Akl mi'yârında kâmil mi ola
724. Ol ki anda nâkıs ola akl u dîn
Kâmil olmaz her ki_aña uya yakîn
725. ‘Avretüñ sözün işiden er degül
‘Avreti ser eyleyen server degül
726. ‘Avret itdi_âşüfte Âdem bahtını
‘Avret aldurdu Süleymân tahtını
727. ‘Avret-idi Yûsufi habse salan
‘Avret-idi Dâvudı nâlân kılan
728. ‘Avret eyledi Siyâvûşî helâk
‘Avretüñ mekri-y-le ebreş oldu hâk
729. ‘Avret-idi Nûhdan i'râz iden
‘Avret-idi Lûtî terk idüp giden
730. ‘Avrete saksı vü reyhândur mişâl
İçi tolu hubs u taşrası cemâl
731. Hamrı şugl idüp dime kim budur iş
İş gerekse terkine anuñ düriş
732. Çün aña Ümmü'l-Habâisdür lakab
Tayyibü'n-nefs itmeye anı taleb
733. Bâde-y-ile memleket berbâd olur

İşi k'anuñla ola bî-bünyâd olur

734. İçme anı kim 'akl bünyâdın yıkar
Su dime_aña ki_oddur ol sini yaçar

735. Bâde tenden cân karârın aldurur
Tâze iken ömr bâgın soldurur

736. K'ol-durur beydâ-yı mihnetde serâb
Zevk bâgında anı sanma şerâb

737. Dîn ki oldı âdemîye ol şeref
Şerri-y-ile_olur şerâbuñ ol telef

738. Kişide ne sabr kor u ne karâr
Ne hod ârâm u ne hilm ü ne vakâr

739. Âlim-i deryâ-dili nâ-dân kılur
Müslim-i sünnîyi bî-îmân kılur

740. Bâdedür sultânlaruñ tahtın yıkan
Bâde-durur hâne-dânların yakan

741. Baht u bâde bir arada âz ola
Kim birbiri-y-ile dem-sâz ola

742. Bâde-durur bâde terk eyle anı
K'itmeye hâke salup hâr ol seni

743. Çünkü Eflâtûn düketdi nâmesin
Aldı eline Arestû hâmesin

PEND-NÂME-İ ARESTÛ

744. Yazdı kim iy şehriyâr-ı nîg-baht
Kim saña lâyıkdurur bu tâc u taht

745. Diler-iseñ bahtuñı ki_ola bülend
Devlete garre_olup olma hod-pesend

746. Kibri terk idüp tevâzu' pîşe it
Nâ-tüvânlıkdan müdâm endîşe it

747. Kibr nedür hûy-ı İblîs-i Laîn
Terk kıl anı k'olasın ehl-i dîn

748. Kibr ehli sürülüp dergâhdan
Dûr olur Şeytân gibi Allâhdan

749. Kıl tevâzu' kim tevâzu'la âdemî

İtdi kendüye müsahhar âlemi

750. Kişi kim alçaklık ide ol Ganî
Kendü lutfi-y-ıla kaldurur anı
751. Unf idüp gönülleri ürkitmegil
Lutf şartı neyse_anı terk itmegil
752. Kıl tefahhus her kişinüñ hâlini
Añla nedür sîret ü ef'âlini
753. Pes ne iş lâyıkça bildürgil aña
Kim nedâmet olmaya soñra saña
754. Kem kişi işin uluya_inanmagıl
Ulu kem işin bitüre sanmagıl
755. Gerçi igne çâbuk ü ser-tîz ola
Nicesi kılıc bigi hûn-rîz ola
756. Gerçi kim kılıc ola bürrân ü tünd
Olur igne işledügi işde künd
757. Ulu kişi kem işe itmez nazar
Ulu işe kici hod bulmaz zafer
758. İşe itmedin şürû' endîşe it
İvmegi terk it te'emmül pîşe it
759. İşlemegil işi vaktı yitmedin
Kesmegil bizi verendâz itmedin
760. İvme kim ivmek nedâmet getürür
Kıl te'ennî kim selâmet getürür
761. Hak k'anuñ emri-durur kün-fe-kân
Altı günde_itdi yiri gögi ayân
762. Anuñ-ıçun kim sen anı bilesin
Pes her işde key te'ennî kılasın
763. Meşveretsüz işi key iş sanmagıl
Kendü râyuñla işe el sunmagıl
764. Meşveretden kimse hüsrân bulmadı
Meşveret iden peşîmân olmadı
765. Meşveretle hâsıl olur her ümîd
Meşveretdür baglu işlere kilîd
766. Emr Hakdan çün “veşâvirhüm” gele

Pes her işde meşveret vâcib ola

767. Meşveretde çün olur çok dürlü rây
Bulınur anda savâba reh-nümây
768. Buradan icmâ' olmuşdur delil
Nassdan hükme bulunmasa sebîl
769. Gül gibi_ol handân diken gibi_olma tünd
Tîzlik yirinde nâ-geh düşme künd
770. Gül çü handân oldu düzdi aña baht
La'l-ıla pîrûzeden tâc-ıla taht
771. Tîzlikle dutdı kılıc devleti
Tîzlikle buldı hancer izzeti
772. Câhili sırruña hem-râz eyleme
Müfsidi kendüñe dem-sâz eyleme
773. Her ki diler kim riyâset eyleye
Mülki zâlimden siyâset eyleye
774. Kadrüñüñ yirin dilerseñ k'ola düz
Virmegil bed-rây-ıla gammâza yüz
775. Ziyet-i dünyâyâ meftûn olmagıl
Kalbdur mekrine magbûn olmagıl
776. Rengine aldanma k'anda yok safâ
Bulmadı bulmaz kimesne_andan vefâ
777. Mihrine aldanmagıl k'ol kahrđur
Şehdine imrenmegil k'ol zehrdür
778. Yi yidür mâluñı kim mâr olmasun
Nûr eyle anı kim nâr olmasun
779. Dôstu hoş dutmag-ıçundur bu mâl
Yâ adûyı kılmag-ıçun pâyimâl
780. Bu ikiye anuñla bulmazsañ zafer
Akl mi'yârında çih-seng ü çi-zer
781. Afv itgil kimsede bulsañ zeled
Bir iş itme sen dahı aña bedel
782. Gerçi yavuza yavuzluk adldür
Afv itseñ yavuz işi fazldur
783. Çün didi Hak''fa'sfahi's-safha'l-cemîl''

Afv it kudretde kim budur sebîl

784. Ululuk gerekse olma bî-edeb
Kim edebsüzlere ider Hak gazab
785. Bî-edeb kişi-y-ile oturmagıl
Bî-saâdetdür anuñla durmagıl
786. Hırs ehlini emîn eylemegil
Râzuñı mey-horeye söylemegil
787. Kân-ı hırsı hâyin ider bî-gümân
Hamr bunuñ sırrını kılur ayân
788. Hırs soydurur selâmet hil'atin
Hamr giydürür melâmet kisvetin
789. Âdemîyi hırsdur nâ-pâk iden
Hamrdur kişileri bî-bâk iden
790. Mâl çoğ olmag-ıçun bu hırs u âz
Ne gerekdür çünki olur ömr az
791. Tut ki âlem gencini cem' idesin
Fâyide ne çün yimedim gidesin
792. Kavl ü fi'lüñ olmasun diseñ şeni'
Olmagıl nefsiñ hevâsına mutî'
793. K'ol hevâ dünyâde sini hâr ider
Dâr-ı ukbâde yirüñi nâr ider
794. Nefs Şeytân-durur uymagıl aña
Yohsa çok dürlü zarar ider saña
795. Düşmenüñdür kahr itmedin seni
Dürişiben kahr itgil sen anı
796. Dileseñ kurtarmag andan cân u ten
Ârzü itdüğün aña virme sen
797. Ger bu dîvüñ def'ine yol bulasın
Bî-gümândur kim firişteh olasın
798. Yâdları sen saña hem-dem eyleme
Kimseyi kendüñe mahrem eyleme
799. Mahrem ü hem-dem özüñe hem sen ol
Derdüñe em gerek-ise em sen ol
800. Yok-durur dünyâda hem-demden eser

Kimse işitmedi mahremden haber

801. Râzuñı kimseye itdürme_istimâ'
Küllü sırrın câveze'l-işneyni şâ'
802. Sen idemedükde râzuñı nihân
Kim-durur kim anı itmeye ayân
803. Çün Arestû nâmesi oldu temâm
Nevbet-ile irdi Bukrâta kelâm

PEND-NÂME-İ İMÂM-I HUKEMÂ BUKRÂT HAKÎM

804. Yazdı kim iy hüsrev-i pîrûz-baht
Kim saña müştâk-durur tâc u taht
805. Diler-iseñ k'ola milkûñ pâydâr
Zulmı terk it adli eyle ihtiyâr
806. Zulmdan pâk itmege mülki düriş
Zulmı pîşe itmegil kim budur iş
807. Âlem işi adl-ile tutdı nizâm
Yir ü gök hem adl-ile oldu temâm
808. Adldür yirüñi illiyyîn iden
Menzilüñi zulmdur siccîn iden
809. Her ki adl-ile imâret eyleye
Dîn ü dünyâsın 'imâret eyleye
810. Çünki adl itdi şübânlıkda Kelîm
Virdi peygambarlıg aña ol Kerîm
811. Çün Süleymân itdi yir mülkinde dâd
Hükmine anuñ müsahhar oldu bâd
812. Çünki Dahhâk itdi kişverde sitem
Boynına bend oldu ef'î lâ-cirem
813. Zulmden Nemrûd çün itmedi bâk
Kıldı lâ-büd bir yarım peşşe helâk
814. Hırs u âmâl ıssına a'mâl u mâl
Virme kim olmaya mâluñ pâyimâl
815. Kişide kim çok ola hırs u emel
Gelmeve_andan iş ki_ola ol bî-halel
816. Hırs-durur cânlaruñ tahtın yıhan

Hırs-durur cânları oda yahan

817. Halkı râhatdan emeldür dûr iden
Tâ'atından Hâlıkun mehcûr iden
818. Kimsenün ehline yañlış bakmagıl
Cânuñı şehvet odına yakmagıl
819. Pâk-dâmen ol ki her kim pâk ola
Rütbeti-y-le menzili eflâk ola
820. Pâk-rev olmayanuñ u pâk-bâz
Çok sinadum gördüm olur ömri az
821. Her ki nâ-pâk ola vü şehvet-perest
Âhiretde hâr olur dünyâda pest
822. Nefse eyle vir riyâzetle edeb
K'itmeyesin her az işde çok gazab
823. Âdemîde çün gazab gâlib ola
Her ne iş k'işleye nâ-sâyib ola
824. Hilm suyını gazab odına saç
İşbu zulmet perdesin hilm-ile aç
825. Nefs-i râhatdan ten-âsân eyleme
Degme zahmetden herâsân eyleme
826. Genc bulunmaz meger anda ki renc
Renc çeke her kime gerekse genc
827. Mülke düşmesün dir-iseñ mefsede
Terbiyet eyleme hergiz müfside
828. Mâr-durur fi'l-mesel müfsid yakîn
Zehr olur mârdan hâsıl hemîn
829. Dünyada bâkî dilerseñ yâduñı
Hayr-ıla artur cihânda aduñı
830. Her ki oldı dünyada ol nîg-nâm
Bî-gümân ukbâda kaldı şâd-kâm
831. Va'deye itseñ kılmagıl aña hilâf
Herbir işde urmagıl bî-hûde lâf
832. Va'deye itmek hilâf erlik degül
Lâf urmak resmi serverlik degül
833. Ol kişi ala cihânda mülk ü baht

Hem sezâ ola ki bula tâc u taht

834. Kim musâf içinde ola saf-şiken
Düşmen işine düşe andan şiken
835. Okı sehminden düşe bî-cân peleng
Rumhı vehminden ola pîçân neheng
836. Ger felekde düşmeni Behrâm ola
Mümkin olmaya ki_ol aña râm ola
837. Yırde ger hasmı ola Efrâsiyâb
İde Rüstemlikle_anuñ mülkin harâb
838. Şâh olayım diyen hoş-hû gerek
Gül gibi hâr içre handân-rû gerek
839. Her kişünüñ ki_olmaya hulki hasen
Ger Alî olsa anı er sanma sen
840. Hüsn-i hulk-içün Resûli Ol Kerîm
Medh idüp didi”alâ hulkın azîm”
841. Hassinû ahlâkakümde_endîşe it
Hüsn-i hulkı kendüzüñe pişe it
842. Bed-güher kadrini itmegil bülend
Bed-güherden kimse olmaz sûd-mend
843. Bûriyâ leyy ola mı kand-ıla pür
Yâ ola mı cehd-ile har-mühre dür
844. Çünkü Bukrât itdi bu nakşı rakam,
Aldı Sokrât-ı hakîm ol dem kalem

PEND-NÂME-İ SOKRÂT-I HAKÎM

845. Böyle yazdı kim eyâ şâh-ı bülend
Tâ-ebed bahtuña irmesün güzend
846. Her ki diler ki_ola mülki bî-halel
İtmeye nâ-dân sözi-y-ile amel
847. Kıldı nâ-dân sözi-le Efrâsiyâb
Rüstemüñ elinde Tûrânı harâb
848. Bir kişi hakkında söz dise hasûd
Güş tutma kim ziyân olmaya sûd
849. Uydı hâsid sözine İsfendiyâr

Sîstânda gör ki n'oldı _encâm-ı kâr

850. Ger dilerseñ kim bula bahtuñ sebât
İtmegil avret sözine iltifât
851. Çü bular bî-akl u bed-girdâr olur
Bunlaruñ sözin işiden hâr olur
852. Çünki Kâvûs uydı avret sözine
Lâ-cirem düşdiş Siyâvûş sûzına
853. Ne-durur avret dimek ya'nî ki ayb
Pes olaruñ naksına sen tutma reyb
854. Her kişiyi saña togrı sanmagıl
Dôstuña dahı key inanmagıl
855. Yûsufi kardaşları aldurdılar
İrec'i Selme'y-le Tûr öldürdiler
856. Çünki bendü'l-hazm sûi'z-zânn ola
Kişi ne-y-çün kimseye tekye kıla
857. Her ki diler kim imâret eyleye
Mülki adl-ile 'imâret eyleye
858. Ol melik kim kişveri ma'mûr ola
Mâlî vâfir leşkeri mansûr ola
859. Ger dilerseñ kim riyâset idesin
Müfside dâim siyâset idesin
860. Kim siyâsetle olur beglik temâm
Bî-siyâset memleket dutmaz nizâm
861. Ger siyâsetsüz olabilse vücûd
Olmaya-y-dı şer'de hergiz hudûd
862. Hâr olacak yirde sen gül olmagıl
Dâg uracak yirde merhem urmagıl
863. Hâr sahlar hâr-püştüñ cânını
Nermlik döker samûruñ kanını
864. Ger dilerseñ kadrüni olmaya pest
Olmagıl hayvân gibi şehvet-perest
865. Şehveti yiñen firîştehdür yakîn
Şehvete_uyan kişi Şeytândur La'îñ
866. Söylemedin söz nedür fikr eylegil

Hayr u şerrin bilgil andan söylegil

867. Söz ki söylendi atılmış ok-durur
Anı döndürmege dermân yok-durur
868. Her iş için hûn-ı nâ-hak itmegil
Senden anı sorısar Hak itmegil
869. Hûn-ı nâ-hak nice yirde kalısar
Çünkü anuñ tâlibi Hak olısar
870. İş ki andan fitne kopar işleme
Hiç kimse-y-le adâvet başlama
871. Kişiyे biñ dost olsa olur az
Çok-durur bir düşmen olsa kîne-sâz
872. Câh seveni eminüñ sanmagıl
Mâluñı her kişiyе inanmagıl
873. Câh hırsı her kişiyi azdurur
Saña mâil olmayan kişi az-durur
874. Kıl tevâzu' lîkin itme ol kadar
K'ire andan heybete nâ-geh zarar
875. Kimsenüñ ardınca gaybet eyleme
Kimse yüzine mezemmet söyleme
876. K'ol ikiden nefrete dutar kişi
Senden i'râz eylemek olur işi
877. Ger işitdünse saña ben bir kitâb
Söz didüm v'Allâhü a'lem bi's-savâb
878. Çün nasîhat-nâmeler oldu temâm
Her birine uruban müşgîn-hitâm
879. Sundılar şâha vü şâh-ı nâm-ver
Bir bir itdi dördine dahı nazar
880. Ohıyup mecmû'ını zabt eyledi
Hurrem olup halka böyle söyledi
881. Kim cihânda_ anuñ ola bahtı bülend
K'uslulardan işide peyveste pend
882. Pes ol öğütleri itdi pîşvâ
Görmedi anuñ hılâfını revâ
883. Kendüye çün anı san'at eyledi

Aña her k'ışitdi ragbet eyledi

884. Çünkü oldı kamu dilde nîg-nâm
Tâatına girdi cümle hâs u âm
885. Rûz-efzûn oldı hergün devleti
Hem terakkî itdi her-dem rütbeti
886. Halk çün hulkına âşık oldılar
Subh-veş mihrinde sâdık oldılar
887. Cehd eyle hulk içinde şöyle ol
K'olalar âzâdlar tapuña kul
888. Üddan tuydukları-y-çun hoş-nefes
Ulu kiçi aña iderler heves
889. Çün çiçekler gülde hoşlık buldılar
Kendülere anı sultân kıldılar
890. Her ki görmüş-idi Dârâdan ziyân
Yâ-hud andan havfı var-ıdı nihân
891. Kaçuban mecmû'ı Rûma geldiler
Ahdî İskenderle tâze kıldılar
892. Mısır sultânı bir iki kez meger
Görmüş-idi şâh Dârâdan zarar
893. Çünkü gördi İskenderi her işde cüst
Kamu kavli togrı vü ahdi dürüst
894. Aldurayım diyü Dârâdan diyâr
Kıldı kullugını şâhuñ ihtiyâr
895. Bî-tekellüf itdi şâha inkıyâd
Arada ne kavlı ü ne ahd oldı yâd
896. Kişi çünkim kendüy'ide nîg-nâm
Kamu gönüllerde tutar ol makâm
897. İşbu destânı ki nazm eylemişem
Remz-ile çok dürlü söz söylemişem

DER-TEMSİL-İ RUMÛZÂT

898. Ger kulak tutar-ısañ bendin yaña
Şerh idem râzımı her remzüñ saña
899. Bu havâss içinde hiss-i müşterek

Şeh Sikender gibidür bilmek gerek

900. Kim kamu mahsûsı ol-durur bilen
Herbirinüñ nicedür hükmin kılan
901. Aña câsûs oldı mecmû' havâs
Hâkim oldur külline re'sen-be-râs
902. Beñzed 'Eflâtûna_anı k'oldur hayâl
Eylegil vehmi Arestûya misâl
903. Kuvvet-i fikriyyeyi Bukrât dut
Anı kim hıfziyyedür Sokrât dut
904. Hızr tenzîl-i İlâhîdür yakîn
Anı k'ol göstere Hak bilgil hemîn
905. Her ne k'ol göstere hiss-i müşterek
Anı cân levhine nakş itmek gerek
906. Kim olur bu kamu sevdâ-y-ıla vehm
K'ide Hak mâhiyyetin fikri-y-le fehm
907. Bunca teşvîşüñ içinde bu hayâl
Ne tasarrufla ide derk-i kemâl
908. Çünkü yok-durur aña nev'-ile cins
Anı ne fazlı-y-la bilsün cinn-ile_ins
909. Ne anuñ Zâtına var vasl-ıla beyn
Ne Sıfâtında kem ü ne keyf ü eyn
910. Çün k'aña yokdur hudûd-ıla rüsûm
Pes muhît aña kaçan olsun ulûm
911. Vehm kim yâ fikr-i insân kim olur
Orada kim akl-ı kül hayrân kalur
912. Kendü bilür kendü Zâtını hemîn
Vasfını hem kendüden bilgil yakîn
913. Kendüyi bilmege kendüdür sebab
Küfr ola_anı itmek ayrukdan taleb
914. Çünkü Kurân oldı hablu'llâh saña
Kamu işde i'tisâm itgil aña
915. Kim mehâlikden olıbanuñ halâs
Hak civârında bulasın ihtisâs
916. **AHMEDÎ** sözün eger diñleyesin

Vahdetüñ sırrını añlayasın

917. Olasın vahdetde bir dâna-yı dîn
Kim ola aduñ imâmu'l-mühtedîn
918. Söyle iy bülbül ki gül eyyâmıdur
Olma hâmuş kim sözüñ hengâmıdur
919. Müşg ü anberden mu'attardur hevâ
Toludur gül-zâr berg-ile nüvâ
920. Ebr ider âyet-i Mûsî beyân
Bâd kılur mu'ciz-i İsî ayân
921. Dâne-i şeb-nem çemende şöyledür
Kim zümürüd levhine saçılar dür
922. Yañağı yâkût-reng olmuş gülüñ
Zülfî anber-tâb olmuş sünbülüñ
923. Çün benefşe-y-le mutavves oldı râg
Lâle vü gülden letâfet buldı bâg
924. Gül-sitânda bülbül ider güft ü gû
Vech-i nâzükde çoğ olur cüst ü cû
925. Mevsim-i gül işretüñ hengâmıdur
Bâde sun kim bâdenüñ eyyâmıdur
926. Gül bigi_olsun dir-iseñ göñlüñ ferah
Koma nergis gibi elüñden kadah
927. Lâle bigi câm-ı la'l algıl ele
Tâ ki ıyşuñ yüzi rümmânî ola
928. Hâre çün lâle bitüre hâr gül
Hârdan ol huşk-ter k'ıçmeye mül
929. Virme ömri bâda kılğıl bâde nûş
Kim riyâyî-sûfiden yig bâde-nûş
930. Subh-dem ür bezme kim pes subh-dem
Bizde dem olmaya ura subh dem
931. Çünki kalmaz bize bu gündüz gice
Bir demümüz hayf kim zâyî' geçe
932. Subh-demdür bir kadeh nûş eylegil
N'olur encâmı ferâmûş eylegil
933. Çün seni hoş-vakt ide gül-gûn-kadah

Söyle bir söz k'andan ala cân ferah

934. Çün müsahhar oldu şâha Mısır u Şâm
Düşdi Dârâb ardına ol subh u şâm
935. Kim nicesi getüre encâmı baht
K'alına Dârâbdan ol tâc u taht
936. Hükmine ola mutî' Îrân dahı
Anuñ ola kişver-i Tûrân dahı
937. Çünki ol rây-ıdı dâyim pîşesi
Âkıbet virdi netîce_endîşesi
938. Rây-ıla hâsıl olur feth ü zafer
Râysuz kişide olmaz hiç fer
939. Râydur kamu işe müşkil-güşây
Akl-durur âdemîye reh-nümây
940. İşbu fikretde çü birkaç rûzigâr
Geçdi gelüp gidiben leyl ü nehâr

İSKENDERİN RÜYASI

941. Bir gice düşde görür şeh kim felek
Açılıban yire iner bir melek
942. Bir kılıc getürür ü virür aña
Dir ki Allâh virbidi bunı saña
943. Kılıc Allâhuñ-durur çekgil bunı
Ol kişiye kim kıla düşmen seni
944. Yüri vü sultânlar-ıla eyle harb
Kim senüñdür ucdan uca şark u garb
945. Subh-dem turdı Sikender şâd-kâm
Didi ol düşi Arestûya temâm
946. Pes didi kim iy hakîm-i hurde-dân
Baña evvel düşi bildürgil ayân
947. Sâdık u kâzib ki ol iki kısım olur
Bu hayâle herbiri kandan gelür
948. Baña evvel bunı eylegil ayân
Pes düşüñ ta'birini kılğil beyân
949. Ol hakîm evvel düşüñ tefsîrini

Şerh itdi pes didi ta'bîrini

RÜYANIN ARİSTO TARAFINDAN YORUMU

950. Kim düş iki nev' olur bî-iştibâh
Biri sâdık biri kâzibdür iy şâh
951. Kâzib üç dürlü olur birbir beyân
İdeyüm kim şâh anı bilsün ayân
952. Evvel ol kim hiss-i zâhirden hayâl
Sûret-i mahsûsa çün yazar misâl
953. Olmadın ol sûret andan dahı hak
Görür anı anda hiss-i müşterek
954. Mürtesim olur orada ol misâl
Kim anı nakş eylemiş-idi hayâl
955. Çün şevâgıl uyhu geldükde gider
Nefs anda_ol sûreti idrâk ider
956. Oldur ikinci ki bir nesne müdâm
Kişinüñ fikrinde_ola iy nîg-nâm
957. Çünki_ide_ol fikr anuñ-ıla ittisâl
Nakş düzer sûretin anuñ hayâl
958. Müşterek k'ol nakşı uyhuda görür
Nice kim gördi-y-se nefse irgürür
959. Kişi sevdüğünü bu-durur sebep
Gice çok gördüğü düşde iy aceb
960. Oldur üçüncü ki ola rûh süst
Ten mizâcî çünkim olmaya dürüst
961. Tende kankı hılt kim gâlib ola
Aña nisbet nesne uyhuda gele
962. Ger harâret gâlib ola öd ü kan
Dahı kızıl saru nesne_ola ayân
963. Ger bürûdet çoğ ola yagmur u kar
Dûd u zulmet görine vü mûr u mâr
964. Bu üçe ta'bîrde yok i'timâd
Bunlara adgâs u ahlâm oldı ad

965. Ol ki sâdıkdur anı dahı_eydeyim
Nicedür gün bigi rûşen ideyim
966. Nefs-i küllî k'ol-durur her nev'e asl
Fer'dür her nev' andan oldı fasl
967. Levh-i Mahfûz oldı anuñ adı hem
Şöyle ki_ oldı Akl-ı Küll adı kalem
968. Sâfi rûşendür ol eyledi_âyine
Görinür gayb orada her-âyine
969. Her ne kim geldi geliser bî-gümân
Müntakış olmışdur orada ayân
970. Nefs-i Cüzvî çün anuñ fer'i olur
Fer' asla lâ-cirem iribilür
971. Pes yakîn bil kim bu nefsi-nâtıka
Olduğı-y-ıçun arada sâbıka
972. Nakl kılmadın idibilür ayân
Gayb nakşı zabt oradan bî-gümân
973. Lîki peyveste bu tedbîr-i beden
Mâyî' olur aña bu maksûddan
974. Çün ferâğ uyhuda aña hâsıl olur
Ol makâma bî-gümân vâsıl olur
975. Aña kim ola mücerred hem basît
Ne mekân u ne zamân olur muhît
976. Anda_aña çok dürlü nakş olur ayân
Lîki_arada geçmedin hergiz zamân
977. Şöyle oldukda mukâbil âyine
Nesne andan nakş olur her-âyine
978. Bir nefes geçmedin olur müntakış
Âyine_andan hîd ayân-durur bu iş
979. Sûret-i gaybî-y-ile iy nîg-nâm
Nakş çünkim müntakış olur temâm
980. Sûret-i Cüzvî düzüp anı hayâl
Resm ider müşterek andan misâl
981. Pes orada_olur müşâhid ol ayân

Ol-durur togru düş uş itdüm beyân

982. İşbu sözden kim didüm rûşen olur
K'enbiyâya vahy ne resme gelür
983. Hem dahı Mi'râc ahbârı temâm
Bu söz-ile_ olur ayân iy nîg-nâm
984. Hem kerâmet kim velîlerde olur
Anlara ol işbu resm-ile gelür
985. Çün şehüñ gönli tecellî câmıdur
Her ne düş kim göre Hakk ilhâmıdur
986. Çün gönül sâf ola şöyle k'âyine
Her ne görse togru_ olur her-âyine
987. Yürüyüp şeh yidi iklîmi temâm
Kılıc-ıla dutup ola şâd-kâm
988. Her kime kim nusreti Tañrı vire
Kim-durur ol kim aña karşu tura
989. Oldı düş ta'bîri-y-ile şâd şâh
Göklerüñ üstinde dikdi bârıgâh
990. Didi kim binüm-durur mülk-i cihân
İtdi Dârâb-ıla düşmenlik ayân
991. Bu aradan irdi Dârâba haber
K'oldı Zül'l-karneyn eyle nâm-ver
992. Kim bizümdür dir cihânda taht u tâc
Bize gerek gele her yirden harâc
993. Çünki Dârâba irişdi bu haber
Didi ilçi virbiyüp k'iy nâm-aver
994. Rûmı biz saña mukarrer eyledük
Sini biz ol mülke server eyledük
995. Bize virbinmek gerek andan harâc
Kim bizüm-durur cihânda taht u tâc
996. Kılıcumuzla alındı mülk-i Rûm
Hâs bizümdür temâm ol merzibûm
997. Feylekûsa Rûmı biz virdük temâm
Câh bizden buldı ol hem nân u nâm
998. Sen yigitsin fikri ger eylemegil

Söz ki ol lâıyk degül söylemegil

999. Yigid olan kişide çok cehl olur

Cehl-ile iş işleyen nâ-ehl olur

1000.Memleketde_ anuñ olur hükmi revân

K'ola râıyı pîr kendü_ olsa cüvân

1001.Yâ katında kâr-dîde pîr ola

Kim her işde sâhib-i tedbîr ola

1002.Bize Keyhusrevden oldı tâc u taht

Hem Ferîdûndan irişdi mülk ü baht

1003.Andan dahı benem Husrev-nijâd

Mülk baña hîşdür ayruga yâd

1004.Kanda k'ola tuhme-i İsfendiyâr

Ayruga lâıyk degül şehr ü diyâr

1005.İlçi şâha geldi vü itdi beyân

Her ne kim Dârâb didi-y-se ayân

1006.İlçiden çüncim işitdi nâm-aver

Her ne peygâmî ki virdi hayr u şer

1007.Bu cevâbı didi Dârâba ki_ i şâh

Kim benüm dirsın cihânda tâc-gâh

1008.Saña dilersin ki vire Rûm bâc

Almak istersin kamu yirden harâc

1009.Ol tavuk kim beyzası olurdı zer

Yidi anı Feylekûs-ı nâm-aver

1010.Sayrılıhda_ ayruh gıdâsı olmadı

Ol tavuğı yimeyince ölmedi

1011.Kim ola yok nesneden isteye bâc

Yâ kim ola ki_ aña vire_ andan harâc

1012.Bu ki şeh dir kim kılıcumuzla Rûm

Alınup oldı bizüm ol merzibûm

1013.Hâlıküñdur mülk anı_ ol pâdişâh

Kime kim diler virüp eyleye şâh

1014.Mülk anuñdur Mâlikü'l-Mülk ol hemîn

Hîçdür Dârâb u İskender yakîn

1015.İki yüzlüdür kılıcdan urma lâf

Bî-vefâdandur vefâ ummah güzâf

1016. Tekye uran kılıca mecnûn olur
Ol kılıcdan âkıbet magbûn olur
1017. Dahı şeh didi ki bize tâc u taht
Degdi Keyhüsrevden ü hem mülk ü baht
1018. Taht Keyhüsrevden irdi-y-ise_ aña
Şükr kim Hakdan virildi uş baña
1019. Mülk mi ol ki_ anı Keyhüsrev vire
Mülk ol kim kişiye Hakdan ire
1020. Olsa Keyhüsrev elinde ihtiyâr
Memleket aña kala-y-dı pâydâr
1021. Dahı didi kim yigitlik cehl olur
Cehl-ile iş işleyen nâ-ehl olur
1022. Şâh bilsün kim yigitlikdür kemâl
Pîrlık-durur kamu naks u zevâl
1023. Çün kavî olur kuvâda nev-cüvân
Kuvvet ü akl anda olur bî-gümân
1024. Çün kuvâ olur kişi pîr olsa süst
Pes kamu fikr' olur anuñ nâ-dürüst
1025. Çün yigit kişi ola dâniş-pezîr
Lâyık olur olsa_ aña şâkird pîr
1026. Erzelü'l-ömr oldı pîrüñ ıyşı pes
Dahı n' olam diyü kıla ol heves
1027. Çün binâ-yı ömre vîrânlık gele
Assı ne ki_ ümmîd evi âbâd ola
1028. Çünkü huşk olur mizâc olduhda pîr
Olamaz akla dimâğı nakş-gîr
1029. Virbidi Dârâba şâh-ı nâm-aver
Böyle ki_ itdüm şerh peygâm u haber
1030. Çünkü Dârâba irişdi bu peyâm
Göñli mülki doldı gussa-y-la temâm
1031. Kıldı İskender sözinden ol gazab
Ol yavuz peygâmına kaldı aceb
1032. Ol gazabla diledi leşker dire

Tura vü İskender üstine vara

- 1033.Girü didi kendüzüne kim kişi
Ol-durur kim akl-ıla ola işi
- 1034.Hem sebük olmaya vü hem tîz-magz
Kıla herbir işde yüz efkâr nagz
- 1035.Kişi ol kim tag bigi_ola pâyidâr
Olmaya şöyle ki yildür bî-karâr
- 1036.Bir dahı tebdîr ideyim ben buña
Ola kim tebdîrle bu iş oña
- 1037.Ceng-çün anda gerek sâz u silâh
Kim orada mümkün olmaya salâh
- 1038.Baña İskender hemîn hem-râh ola
Pây-gâhum binüm evc-i mâh ola
- 1039.Girü ilçi virbidi İskendere
K'anı korkuda vü hem ögüt vire
- 1040.Virbidi ilçi-y-ile bir ulu sâ'
Dâne-i küncîdden kim bu metâ'
- 1041.Saña_iricek ne-durur remzini bil
Nice olısar iş aña çâre kıl
- 1042.Bu işâret k'eyledüm key bilesin
Pes aña akl-ıla çâre kılasın
- 1043.Olasın sen memleketde ser-firâz
Olmaya senden kimesne bî-niyâz
- 1044.Sen benümsin benden ayru olmagıl
Hişsin bî-gâne işi kılmagıl
- 1045.Key degül kişi adı tâgî ola
Hem ülü'l-emr olana bâgî ola
- 1046.Çün benüm ceddüm ola İsfendiyâr
Pes gerek benüm ola şehri diyâr
- 1047.Dahı_ulu ceddüm-durur Güştâsb şâh
Dahı ulusu-durur Lührâsb şâh
- 1048.K'urdu Keyhüsrev anuñ başına tâc
Rûm u Şâm aña virürlerdi harâc
- 1049.Bir dahı aslum Ferîdûndur benüm

Mülke istihkâkum efzûndur benüm

1050. Her kişi k'anadan olmaya ulu
Atadan sultân-ısa olur alu
1051. Oglan anaya olur tâbi' hemîn
Karavaş oğlu olan kuldur yakîn
1052. Çünkü kul olur karavaşdan togan
Pes ululuk anda ne gerek âyân
1053. Sende_ atadan varsa anlardan nijâd
Ben atadan anadan uş şâh-zâd
1054. Çün ben olam ana atadan velî
Ben var-iken kim tutabilür ili
1055. Her ki kendüden yige ısyân ide
Devletine kendünün hüsrân ide
1056. İlçi geldi_ İskendere viridi selâm
Didi ol Dârâbdan neyse peyâm
1057. Dökdi küncîdi öfine did'i şâh
Saña virbidi bunı ol pâdişâh
1058. Kim adı Dârâb u Behmendür anuñ
Devleti gün bigi rüşendür anuñ
1059. Çünkü küncîdi tefekkür kıldı şâh
Akl-ıla sırrını nedür bildi şâh
1060. Añladı kim eyle dimekdür aña
Kim mutî' olmaz olur-ısañ baña
1061. İşbu dâne bigi leşker bî-hisâb
Getürüven Rûmı eyleyem harâb
1062. Pes Sikender Şâhıpûr-ı Feylekûs
Hâzır itdürdi orada bir horûs
1063. Aña ol küncîdi yidürdi temâm
Kıldılar anı ta'accüb hâs u âm
1064. Bu-y-ıdı remzi ki_ eger ol şehriyâr
Rûma getürse sipâh-ı bî-şümâr
1065. Bir kişi-y-le kamusun idem tebâh
Olmasun leşker çoğına garre şâh
1066. Assı ne leşkerde çoğ olsa aded

Çünkü Hak fazlında olmaya meded

1067.Ne zarar leşker ger olur-ısa az

Çünkü virbiye zafer ol Bî-niyâz

1068.Garre olmah devlete beglik degül

Lâf urmah resmi serverlik degül

1069.Garre vü hod-bîn gerekmezdür kişi

Kim halellü olmaya hergiz işi

1070.Pes didi ilçiyeye kim Dârâb şâh

K'oldur İrân kişverine pâdişâh

1071.Mülki bilmez miki Allâhuñ-durur

Anı ol kime diler-ise virür

1072.Kim ola Keyhüsrev ü yâ Keykubâd

Kim kişiyeye mülk virüp kıla şâd

1073.Kişi ol kim şükri Allâha kıla

Her ne ni'met var-ısa andan bile

1074.Mülk anuñdur k'aña yok-durur zevâl

Hâbdur dahı ne varsa yâ hayâl

1075.Ölüden nice dem ura şehriyâr

Nice diye Behmen ü İsfendiyâr

1076.Behmenüñ ger çâresi ola-y-ıdı

Memleket dâim aña kala-y-ıdı

1077.Zûr-ıla girse ele şehir ü diyâr

Mülk-içün zâr olmaya-y-ıdı_İsfendiyâr

1078.Her kişinüñ kim ola fahri ölü

Ol ölüden bî-gümân olur alu

1079.Er gerek kim gevherinden söyleye

Kendüde var mı güher arz eyleye

1080.Âdemîde çünkü olmaya güher

Akl mi'yârında degmez mühre-har

1081.Ölmiş ata dededen her k'ura lâf

Bî-hüner-durur sözi cümle güzâf

1082.Bu söz-ile_İskender ol şâh-ı cihân

İlçiyi Dârâba eyledi revân

1083.İlçi çünküm gitdi Zü'l-Karneyn şâh

Ceng-içün yarakladı hayl ü sipâh

1084.İşbu destânuñ ki didüm saña ben
Remzini şerh ideyüm gûş eyle sen

DER-TEMSİL VE HÂTİME-İ DÂSİTÂN

1085.Nefsdür Dârâb Zü'l-Karneyn rûh
Rûha nefsi kıl zebûn k'oldur fütûh

1086.Ne-durur küncîd-dâne bî-şümâr
İtdügüñ cürm ü hatâ-durur i yâr

1087.Tevbe-durur ol horûs iy pür-hüner
Kim yidi küncîdi anda ser-te-ser

1088.Gerçi cürmüñ ola sinüñ bî-aded
Mahv olur bir tevbeden irse meded

1089.**AHMEDÎ**'nüñ sözin işitmek gerek
Her ne dirse_ anuñla iş itmek gerek

1090.Kim sözi anuñ nasâyıhdur kamu
Dîn ü dünyâda masâlihdür kamu

1091.Sıdk-ıla_ anuñ her ki sözin diñleye
Cümle assı vü ziyânın añlaya

1092.Bülbül işbu resme destân idemez
Kimse bu resme gül-istân idemez

1093.Derc itmişdür bu derce hâme dür
Sen bunı sanma ki **Yûsuf-nâmedür**

1094.K'anda har-mühre diziben dizeler
Yûsufa_ andan mintakalar düzeler

1095.Kılalar güneş nıkâbını pelâs
İdeler aya eşek çulın libâs

1096.Kahbe-nâme şivesindeki kelâm
Nice **Yûsuf-nâmedür** iy nîg-nâm

1097.Her sözi ki_ anı diyen nâ-ehl olur
Gûş eyleyen be-gâyet cehl olur

1098.Lutf it dilümi binüm iy Hudâ
Sahla k'andan gelmesün kizb ü hatâ

DÂSİTÂN-I MUHÂREBE-İ İSKENDER BÂ-DÂRÂB VE HEZİMET-YAFTEN DÂRÂB

- 1099.Söylegil iy bülbül-i şîrîn-nüvâ
Kim gül-istân toludur berg ü nevâ
- 1100.Sebzeden oldu çemen atlas-bisât
İder uş bülbül güle karşı nişât
- 1101.Lâle gibi sen dahı birkaç kadah
İç ki gül-gûn ide yüzüni ferah
- 1102.Çün yeşerdi sebze vü kızardı gül
Rengüni cehd it ki gül-renk ide mül
- 1103.İşbu mevsümde ki taşdan gül biter
Huşk oturan kişidür taşdan biter
- 1104.Bâg içinde lâle dutarken kadah
Hayf kim cân meyden olmaya ferah
- 1105.Bir iki dem gönlüni kıl şâdumân
Kim bu resm-ile kalur degül cihân
- 1106.İşbu resme gördüğün hurrem-bahâr
Bozılır gelüp gide leyl ü nehâr
- 1107.Fikr deryâsında kılma cânı gark
Bil ki assı_itmez saña bî-hûde zerk
- 1108.Zerkı rızk-ıçun ider her ki_ide iş
Râzıkı gör zerk zerk terkine düriş
- 1109.Rızk-ıçun maksûmdur bî-şek gelür
Zerk dahı arada bârî n'olur
- 1110.Kimse zerkı rızk-ıçun iş kılmaya
Kılsa nedür Râzıkını bilmeye
- 1111.Bir iki câm-ıla cânı şâd kıl
Gussalardan gönlüni âzâd kıl
- 1112.Pes beyân it kim Sikender-şîr-çeng
Nicesi eyledi Dârâ-y-ıla ceng
- 1113.İlçi çün Dârâba ilette haber
Didi İskender peyâmın ser-te-ser

MATLA'-I DÂSİTÂN

- 1114.Kakıdı Dârâb cem' itdi sipâh
Kim yürüyüp eyleye Rûmı tebâh
- 1115.Ne çeri k'anûñ hisâbın hiç-vehm
Hendese-y-le dahı_idemezdi fehm
- 1116.Leşker-i Îrân u hem Tûrân-zemîn
Anda cem'-idi vü hem Mâçîn ü Çîn
- 1117.Hâver ü Rûs u Hitâ vü Mülk-i Hind
Magrib ü Sûdân u hem Keşmîr ü Sind
- 1118.Anda-y-ıdı Pehlevân Mihrâc Hân
Hem sezâvâr-ı cihân Tamgaç Hân
- 1119.Rûmiline dek Medâyinden direfş
Tolu-y-ıdı vü 'alem sürh ü benefş
- 1120.Çarhı ger itmiş-idi âvâz-ı kûs
Tozı kılmışdı hevâyı âbnûs
- 1121.Nireye kim kişi iderdi niğâh
Hayme-y-ıdı vü direfş ü bârigâh
- 1122.Yiryüzi tolu kemân u tîr-ıdı
Kûh u sahrâ gürz-ile şimşîr-ıdı
- 1123.Ne Ferîdûn u ne hod Dahhâk u Cem
Düzmemişlerdi_eyle çok hayl ü haşem
- 1124.Garre olup tahtına ol şehriyar
Didi kanı Behmen ü İsfendiyâr
- 1125.Tâ ki görelerdi hışmet nice_olur
Resm-i tâc u taht u devlet nice_olur
- 1126.Bilmedi ol mâl u mülk ü tâc u taht
Düşmene varur çü yüz döndere baht
- 1127.Garre olmah devlete mezmûm olur
Ko gurûrı ki_ol be-gâyet şûm olur
- 1128.Hüsnine garre_olduğı-y-ıçun güli
Nice topraga döker görgil yili

- 1129.İtdügi-y-çün lale tâcına gurûr
Yil başından tâcını yire urur
- 1130.Rengine çün garre oldu nev-bahâr
Sald' aña bâd-ı hazânı rûzigâr
- 1131.Çünkü reng-â-reng tona bûsitân
Garre oldu n'itdi_aña gör mihrecân
- 1132.Bî-gümân şeytân işi-durur gurûr
Anuñ-ıçun didi aña Rahmân Garûr
- 1133.Ömr-i devletde ger olsa-y-dı sebât
Bâki ola-y-dı Süleymâna hayât
- 1134.Dîv aldı Hâtemin tahtını bâd
Dünyadan kim oldu vü kim ola şâd
- 1135.Behmen ol ki_iderdi sayd-ı ejdehâ
Olmadı bu mâr-ı nüh-serden rehâ
- 1136.Sayd gûr olmuş-iken Behrâma kâr
Gûr itdi nâ-gehân anı şikâr
- 1137.Didiler İskendere Dârâb şâh
Uş irişdi Rûma vü bî-had sipâh
- 1138.Kasdı bu kim eyleye Rûmı harâb
Yir komaya anda ki_itmedük yebâb
- 1139.Avret ü er kamusun ide helâk
Yile savura ne varsa anda hâk
- 1140.Dirdi İskender dahı serverlerin
Rûmilinüñ hem dahı leşkerlerin
- 1141.Herbirine istimâlet virdi şâh
Kim cihânda ben olursam pâdişâh
- 1142.Herbiriñüze virem bir memleket
Rûm bigi k'anda ide saltanat
- 1143.Çohlıgından düşmenüñ bâk itmeñüz
Korhudan yüregüñüz çâk itmeñüz
- 1144.Kim baña Hakdan virilüpdür meded
Çok kayurmâñ sizde az-ısa aded
- 1145.Sizden öñdin yürüyen ben olayın

Ölmek olursa ben evvel öleyin

- 1146.Dürişelüm nâm-ıçun ceng idelüm
Düşmene yiryüzini teng idelüm
- 1147.Kanda kim var nâm u nâmûs u hüner
Gerçi ola az bula çoga zafer
- 1148.İy niçe çohlar basılurlar aza
Çün Hak emri-y-le çoğuñ bahtı aza
- 1149.Kişide kim olmaya nâmûs u neng
Yiryüzinden aña yigdür gûr-ı teng
- 1150.Bu söz-ile kamu hoş-dil oldılar
Girü ahdi_ anuñla tâze kıldılar
- 1151.İstimâletle olur hoş-dil sipâh
Ol sipâh-ıla olur kuvvetlü şâh
- 1152.Pes didiler aña kim iy şehriyâr
Yoluña olsun bu cânumuz nisâr
- 1153.Yüriyelüm hasm-ıla görîşelüm
Nâm u neng-içün bugün dürişelüm
- 1154.İdelüm öñüñde bir şîr-âne ceng
K'andan olsun künd dendân-ı peleng
- 1155.Bundan öñdin kim bize Dârâ-y-dı şâh
Yüriyiben olmuş-ıdı kîne-hâh
- 1156.Pâdişâhumuz bizüm bir pîr-idi
Âciz ü bed-rây u bî-tedbîr-idi
- 1157.Leşkerüñ sâlârı çün ola dilîr
Nökeri gürbe-y-se olur nerre-şîr
- 1158.Anuñ-ıçun buldı bize ol zafer
K'olmadı serverümüz bize ser
- 1159.Şimdi kim sultânumuzdur bu cüvân
Hem dil-âver-şîr ü hem nev-pehlevân
- 1160.Bir neberd eyleyelüm kim tâc u taht
Alına düşmenden ü hem mülk ü baht
- 1161.Ne gerek çünkim dil-âver ola şâh
Hasmdan tâc almag u hem taht-gâh
- 1162.Ol kişi kim olayım dir halka baş

Ortaya komah gerekdür cân u baş

- 1163.Ol kişiye kim dil-âver olmaya
Memleket hergiz müsahhar olmaya
- 1164.Çün kılıc zahmı-y-la girür mülk ele
Kılıc ura her ki diler mülk ala
- 1165.Mülk alam diyen kılıcsuz iy ulu
Fikri bâtıldur kim ider ol delü
- 1166.Gül dikenden tîg almazsa eline
Olımaz sultân reyâhîn iline
- 1167.Gül ele tîg aldı buldı lâ-cirem
La'lden tâc u zümürüdden 'alem
- 1168.Hancer olmasa elinde sûsenüñ
Tonları zer-baft ola mı-y-d'ânuñ
- 1169.Tîg-zen ger olmaya-y-ıdı bu mihr
Encüme şâh itmez-id'anı sipihr
- 1170.Tîg-zen olduğu-çundur k'âfitâb
Oldı cümle encüme mâlik-rıķâb
- 1171.Çünkü Zü'l-Karneyn gördi ki_ehl-i Rûm
Nerm olmuş hükmine şöyle ki mûm
- 1172.Bildi k'anuçun-çun besî ceng-i peleng
İdiserler hasm-ıla şîr-âne ceng
- 1173.Kamu itmişdür anuçla ittifâk
Yok-durur gönlinde kimsenüñ nifâk
- 1174.Hoş-dil olıban didi iki kişi
Yig-dil olup çün tutalar bir işi
- 1175.Gerçi kim ol iş besî-müşkil ola
Bî-şek âsânlıg-ıla hâsıl ola
- 1176.Bozılur işler nirede_olsa nifâk
Kamu iş biter çün ola ittifâk
- 1177.Pâdişâh çün leşkerin gördi dilîr
Kendü rûbâh-ısa olur gönli şîr
- 1178.Dirdi İskender dahı hayl ü haşem
Düzdi raht u hayme vü kûs u alem
- 1179.Ne kadar kim Rûmda buldı sipâh

Cem' idüp karşıladı Dârâbı şâh

- 1180.Düşmenüñ def'ine çâre ceng olur
Her ki dahı çâre ister teng olur
- 1181.Hasmı kılıc dönderür key bilesin
Kimse bilmez dahı anuñ hîlesin
- 1182.Oldur er kim hasmı ger Behrâm ola
Olmaya mümkün kim aña râm ola
- 1183.Er olana baş gerek k'indüre çarh
Avret olan otura döndüre çarh
- 1184.Hâlîka kılup tevekkül şehriyâr
Düşmeni-y-le ceng kıldı ihtiyâr
- 1185.Pâdışâhlık kılıc altında olur
Memleket alan kılıc-ıla alur
- 1186.Kılıc-ıçun dir''ve enzelne'l-hadîd''
Tengrı Kurân içre hem "be'sün şedîd''
- 1187.Şâmdan irişmedin hayl ü sipâh
Düşmen üstine yürüdi germ şâh
- 1188.Berk-vâr irdi vü urdı bî-direng
Hasmı şöyle k'ura âhûyı peleng
- 1189.Gurrüş itdi nây-ı rûyîn-ile kûs
Oldı tozdan çarh yüzi âbnûs
- 1190.Bir neberd oldı ki çarh-ı tîz-gerd
Görmemişdi hîç aña beñzer neberd
- 1191.Kopdı orada bir ulu kâr-zâr
K'anı Rüstem görse_ola-y-dı kâr zâr
- 1192.Toldı kan mevci-y-ile rûd-ı Fırât
Lâle-rengin tutdı sahrâda nebât
- 1193.Yiryüzi toptolu gîr ü dâr-ıdı
Şâh Dârâba bu dünyâ dâr-ıdı
- 1194.Ma'reke kandan revân ceyhûn-ıdı
Hem hevâ tolu buhar-ı hûn-ıdı
- 1195.Bahtı Dârâbuñ çün olmışdı nigûn
Düşmenine âkıbet oldı zebûn
- 1196.Düşmene teslîm idüben tâc u taht

Gitdi çün gördi ki yüz döndürdi baht

- 1197.Kişiye devlet ne resme kim gelür
Gidicek gitdügi ol resme olur
- 1198.Döndi Dârâb u kaçup Rûmî-sipâh
Kıldılar târâc raht u bârigâh
- 1199.Oldı_esîr anda şeh-i Hâver-zemîn
Dahı şâh-ı Magrib ü Fagfûr-ı Çîn
- 1200.Oradan kaçıbanuñ Mihrâc Hân
Cengde tutıldı ol Tamgâc Hân
- 1201.Ol çerinüñ varı tâ şâh u emîr
Kimi öldi vü kimi oldı esîr
- 1202.Gâret oldı bî-aded genc ü güher
Dahı gûn-â-gûn metâ' u sîm ü zer
- 1203.Böyle geldi âdet-i gerdân-sipih
Kim gehî kîn gösterür ü gâh mihr
- 1204.Çün güzervedür ele giren gider
Mihrin ussuñ varsa göñlüñden gider
- 1205.Her ki diler k'aña gussa irmeye
Yitecek nesneye göñül virmeye
- 1206.Tagılacak nesneyi ne direler
Yitecege nişe göñül vireler
- 1207.Çünkü düşmen kaçdı Zü'l-Karneyn şâh
Tutdı bir hafta orada bârigâh
- 1208.Oradan Dârâb kılup kâr-zâr
Kaçtı düşmenden olıban kâr zâr
- 1209.Çarh aña n'eyledi şerh ideyüm
Ser-güzeştin tâ-be-pâyân ideyüm
- 1210.Leşkerinde var-ıdı_iki pehlevân
İkisi dahı dilîr ü nev-cüvân
- 1211.Anları_itmişdi kamudan ihtiyâr
Biri Mâhâz adlu biri Mâhiyâr
- 1212.Andan öñdin kim gelürdi Rûma şâh
Sâdır olmuşdı olardan bir günâh
- 1213.Şâh anuñ-çun anlara_itmişdi itâb

Anlaruñ gönlini kılmışdı harâb

- 1214.Gerçi anları suyırgayup girü
Hâs idüp çekmiş-idi ilerü
- 1215.Lîkin andan herbiri dil-rîş-idi
Cân u dilden aña bed-endîş-idi
- 1216.Anı ol fırsatda mecrûh itdiler
Yolda vü öldi diyüben gitdiler
- 1217.Kişi kim ola kişiye bed-gümân
Bulıcak fırsat aña virmez emân
- 1218.Bed-gümândan sen vefâ kılma heves
Hem-nişîn olma anuñla bir nefes
- 1219.Cehd it kimseneyi ürkitmegil
Ürkicek aña gönül berkitmegil
- 1220.Gönli çünkim bir kez âzâr idesin
Senden olunca_anı bîzâr idesin
- 1221.Çün sen andan senden ol dahı_ola yâd
Kılma_anı yâd itme aña i'timad
- 1222.Sırça-durur bu gönül çünkim sına
Bütün olmaz dahı_inanmazsañ sına
- 1223.Çünki Dârâba olar zahm urdılar
Kaçup İskender katına vardılar
- 1224.Çün katında itdiler bu işi yâd
Gâh gam-gîn oldı gönli gâh şâd
- 1225.Gâh gül gibi tebessüm eyledi
Geh küşâyışle bu sözi söyledi
- 1226.Ķim adûdan soñra dirlik bir nefes
İş-i câvîdân diseñ ol ola pes
- 1227.Hasm kahr olmah-durur feth-i fütûh
Düşmenüñ ölmekligidür revh-i rûh
- 1228.Gâh gonca gibi dil-teng oldı şâh
Didi kim nâ-mihribândur mihr ü mâh
- 1229.Hasm ölse biz dahı_ardınca_ölürüz
Nef' ne çün biz dahı eyle oluruz
- 1230.Dünya-y-ıçun işbu ceng ü gîr ü dâr

Ne gerek çünkim degüldür pâydâr

- 1231.Pes Arestûya didi şeh iy hakîm
Bî-vefâ olur kişi k'ola le'îm
- 1232.Ne le'îm öginde bulunur kerem
Ne vefâ olur kerîm olanda kem
- 1233.Dileseñ k'irmeye cânuña sitem
Nâ-sezâya döşeme hûn-ı kerem
- 1234.Bulmasun diseñ saña gam dest-res
Hem-dem olmagıl le'îme bir nefes
- 1235.Ol ki Dârâbuñ elinde bûd u zâd
Bula vü hâsıl ide cümle murâd
- 1236.Hâyin olup soñra ide_aña cefâ
Terbiyet itmek anı olur revâ
- 1237.Ol kişi k'itdi le'îmi ihtiyâr
Ebleh-idi bisledi cîbinde mâr
- 1238.Terbiyetle şefkat iden müfside
Nedür anuñ itdügi iş mefsede
- 1239.Pes didi şâha Arestû-yı hakîm
K'irmesün şâhâ saña dünyâda bîm
- 1240.Güneş olsun saña tâc u çarh taht
Olmasun senden cüdâ ikbâl ü baht
- 1241.Devletüñ olsun hemîşe nev-cüvân
Ömrüñüñ bâgına irmesün hazân
- 1242.Göñlüñe k'ol pür-safâ gül-şen-durur
Çarh râzı gün gibi rûşen-durur
- 1243.Var mı hîç iş kim sen anı bilmedüñ
Ola mı ukde ki_anı hal kılmaduñ
- 1244.Mâr u 'akrebdür tabîatde le'îm
Bislemez anı kişi k'ola hakîm
- 1245.Zehrden tiryâk kimse bula mı
Nîş-i 'akreb nûşîdârû ola mı
- 1246.Bunı işidüp buyurdı şehriyâr
Dikdiler meydân içinde iki dâr
- 1247.Mâhyârı asdılar Mâhâr-ıla

Öldiler ol ikiyüzbiñ zâr-ıla

1248.Hâyini sanma ki ber-hûr-dâr olur
Yâ kesilür başı yâ ber-dâr olur

1249.Kût bulmadın ger acın ölesin
Yig-durur andan ki hâyin olasın

1250.Çün mukadderdür virür rûzî melek
Pes hıyânet rızk-çun nişe gerek

1251.Ol zamân k'asıldı dâra Mâhyâr
Zahmdan Dârâb olmuş-ıdı zâr

1252.Vakt çün geçmişdi ol mecrûhdan
Bir nefes kalmışdı tende rûhdan

1253.Didiler aña ki Zü'l-Karneyn şâh
Saña zahm uranları kıldı tebâh

1254.Gerçi olmuşdı ümîdi cümle bâd
Bu haber çün irdi aña oldu şâd

1255.Kişi kim düşmenden ol soñra kala
Bir dem-ise ömri biñ yılca ola

1256.Pes viribidi peyâm İskendere
Kim senüñdür mülk-ü kişver yik-sere

1257.Hem senüñdür genc ü mâl u tâc u taht
Hem diyâr u hem sipâh u raht u baht

1258.Genc-i Dahhâk ü Ferîdûn bendedür
Her-çi Behmen kıldı mahzen bendedür

1259.Lîkin olmuşam kamudan bî-niyâz
Tîz iriş kim mülke sensin çâre-sâz

1260.Sen gerek kim olasın kişvere şâh
Cümle-i İrâna Tûrâna penâh

1261.Çünki Zülkarneyne irdi bu haber
Vardı Dârâbuñ katına_ol tâc-ver

1262.Görür anı kim yatur zâr u nahîf
Kanı gitmiş zahmdan olmuş zaîf

1263.Rûh-ı hayvânî bedende kan olur
Çünki kan olmaya ten bî-cân olur

1264.Didi kim şâhâ cihân hâli budur

Mâh u mihr ü çarh ahvâli budur

1265.Gâh endüh-nâk ider gâh şâd
Geh kılur mahrûm geh virür murâd

1266.Âsiyâdur çarh ömrümüz keder
Bu makâma her ki geldi-y-se gider

1267.Bir sebü'dür bulduğın yırtar revân
Dimez işbu hûbdur ol nev-cüvân

1268.Hem dimez bu gonca-leb dil-ber-durur
Yañağı gül saçları anber-durur

1269.Hem dimez kim işbu sûret hayf ola
Kim çüriyüp toprag içinde kala

1270.Hem dimez bu pâdişehdür tâc-bahş
Kim ider halka zer-ile sîm bahş

1271.Bunı tîz öldürmeyeyüm kim kala
Adl-ile iklîmi âbâdân kıla

1272.Hem dimez bu âlim ü âkıl-durur
Kamu işde fâzıl u kâmil-durur

1273.Koyayum bunı ki_ide halka beyân
Sünnet ü farzı ki biline ayân

1274.Gerçi kim biz şâha itmişüz günâh
Afv itsün lutfı-y-ıla anı şâh

1275.Kiçilerden ger gele cürm ü hatâ
Afv olur ulular işi vü atâ

1276.Didi Dârâb işbu devr-i âsümân
Bî-karâr olduğına yokdur gümân

1277.Kısmetin her kişinüñ vakt-i Ezel
Eyleyüp-durur muayyen Lem-Yezel

1278.Çünkü kılur bir makâma ol güzer
Kısmeti neyse yir ü andan gider

1279.Kısmetinden kim-durur k'artuk yiye
Kısmet az oldı-y-ısa ol çok yiye

1280.Biz yiyüben kısmetümüzüzi temâm
Saña virdük nevbeti iy nîg-nâm

1281.Biz durup uş saña koduk ni'meti

Sen yi anı kılma ayruk kısmeti

1282.Çün yakîn-durur gümân yok kim bu mâl
Duramaz yirden yire_ider intikâl

1283.Ebleh ol kim dire anı virmeye
Zîrek ol kim tagıda vü dirmeye

1284.Virdi bu sözi diyüp İskendere
Şehr ü mülk ü tâc u tahtın yik-sere

1285.Cümle mâl u gencini virdi aña
Leşker ü haylini bildürdi aña

1286.Pes anı mülke velî-ahd eyledi
İşbu resme anuñ-ıla_akd eyledi

1287.K'ide halka hayr sanmah pîşe ol
Kimsey'itmeye yavuz endîşe ol

1288.İşbu söz içinde bağlandı nefes
Gitdi Dârâb ü tehî kaldı kafes

1289.Gitdi Dârâb u isuz kaldı bu dâr
Kalmadı ol hışmet ü ol gîr ü dâr

1290.Böyle-durur âdet-i gerdân-sipih
Kimseye göstermez ol peyveste mihr

1291.Ten kafes-durur nefes bâd-ı hevâ
Olmaz aña i'timâd itmek revâ

1292.Nesne k'erkânı anuñ azdâd ola
Lâ-cirem ol nesne bî-bünyâd ola

1293.Çünkü Dârâb öldi Zülkarneyn şâh
Oldı Îrâna ser-â-ser pâdişâh

1294.Kavmini Dârâbuñ itdi ser-firâz
Mâl virüp kıldı_oları bî-niyâz

1295.Ger sipâhî vü eger şâh u emîr
Ceng içinde her kim olmuşdı esîr

1296.Kamusı-y-la ahd idüben üstüvâr
Virbidi yirlü yirine şehriyâr

1297.Kendüsi tutdı Medâyinde makâm
Anda ârâm eyledi hoş şâd-kâm

1298.Gûş tutarsañ benüm sözüme sen

İşbu destân remzin idem saña ben

DER-TEMSİL VE HÂTİME-İ DÂSİTÂN

- 1299.Nefsdür Dârâb u Zülkarneyn rûh
Nefsi rûha kıl zebûn k'oldur fütûh
- 1300.Def'in iderseñ Sikender-vâr anuñ
Pâdîşahsın Maşrık u Magrib senüñ
- 1301.Yohsa gönülün mülkini_ol sinün yıhar
Cânuñuñ Mısırın kamu oda yahar
- 1302.Key sakın k'ol zâlim emmâredür
Her k'aña ola zebûn bî-çâredür
- 1303.Geh behîmedür yiyüp toymaz alef
Geh siba'dur cân diler kıla telef
- 1304.Cahdla_anı ger melek-hûy idesin
Bir meliksin çünki bundan gidesin
- 1305.Kim senün milküne gelmeye zevâl
Devletüne irmeye hiç intikâl
- 1306.Ne melik belkim olasın bir melek
Kim senün cevlân-gehün ola felek
- 1307.Gafletün hazm ola vü hışmuñ rızâ
Vahdetün üns ü küdüratün safâ
- 1308.Âlem-i unsur tolu-durur fesâd
Pes anuñ kevnine yohdur i'timâd
- 1309.Nesne kim dâim tebeddüldür işi
Nice isdesün sebât andan kişi
- 1310.Bunda olmaz dâim isterseñ hayât
Bir yire var ki_anda bulna sebât
- 1311.Bâgın'anuñ hergiz irmeye hazân
Solmaya_anda tâze olan gül-sitân
- 1312.Çünki bundan yig vatan girür ele
Kişi bunda acz-ile niçün ola
- 1313.Hâzır-iken gül-şen-i dârü'n-naîm
Hayfdur olmah bu kül-handa mukîm

- 1314.**AHMEDÎ** sözün eger diñleyesin
Kamu eşyâ sırrını añlayasın
- 1315.Fâyız ola gaybdan göñlüñe nûr
Keşf idüp her sırrı bulasın sürûr
- 1316.Hem tecellî_ide saña İlme'l-Yakîn
Bilesin k'ol saña sendendür yakîn
- 1317.Hakdan ayru anda varlıh kalmaya
Ara yirde mâ u menlik olmaya
- 1318.Kamu varlıh çünki Ol Hakk oldı bes
Mâ u men dimeklik olur şirk pes
- 1319.Gerçi kim sûretde varlıh Hak-durur
Hak-durur ma'nîde ayruh yok-durur
- 1320.Hak didüñ gayrı unit ahdüñ sîma
Andan ayrunuñ vücûdın var dime
- 1321.Çünki Evvel Ol ola vü Âhir Ol
Fî'l-hakîka Bâtın Ol u Zâhir Ol
- 1322.Dükeli varlıh hemîn Anuñ olur
Pes burada saña ne varlıh kalur
- 1323.Mâ u menden geç ki me'men bulasın
Nefsi miskîn it ki mesken bulasın
- 1324.Çün Ahaddur bî-gümân asl-ı aded
Pes kamu varlıh Ahad oldı Ahad
- 1325.Vâhid oldı asl var yirde şümâr
Lîki_Ahad Mutlak-durur şöyle ki var
- 1326.Ger adedler cümlesi mefkûd ola
Ol k'Ahad-durur gerek mevcûd ola
- 1327.Çün Ahad olmasa bulunmaz aded
Pes aded varlıg olmışdur Ahad
- 1328.Çün Ahaddur varlıgı bildüñ yakîn
Ger muvahhidseñ Ahad digil hemîn
- 1329.Vahdetüñ yüzinde kesretdür nıkâb
Kasreti ko aradan gitsün hicâb
- 1330.Mâ'lıguñ mîmini vü nîst yâ'sını

Ortadan gider Ahad itdüñ seni

**REFTEN-İ İSKENDER BE-SİSTÂN BE-TARÎK-I RİSÂLE VE ÂŞIK-ŞÜDEN-İ Ü
BE-DUHTER-İ ZER-ESB**

- 1331.Söylegil iy mürğ-ı şeydâ söylegil
Cümle uşşâkı muhayyer eylegil
- 1332.Mu'tedil olur hevâ nev-rûzda
Hoş-nüvâ it sen dahı nev-rûzda
- 1333.Râst ıškuñ perdesinden sâz it
Nâleñi ankâ-y-ıla dem-sâz it
- 1334.Şöyle Şîrîn söyle ıškuñ sözini
K'unıdalar halk Husrev sûzını
- 1335.Sâz eyle nâle-i dil-sûz-ıla
Vâmık eyle akl Azrâ söz-ile
- 1336.Sözde çün âgâz efsûn idesin
Leyliyi gerek ki Mecnûn idesin
- 1337.Bir hümâyûn-nâme yazgıl cân-fizây
Kim hümâyûn-fâl ola andan hümây
- 1338.Söz nedür arz it yirüñ Cimşîdine
Belki gögüñ Zühre vü Hurşîdine

ÂGÂZ-I UŞŞÂKIYYÂT-I İSKENDER

- 1339.Işkdan söyle ki ol pes hûb olur
Söz ki mahbûbuñ ola mahbûb olur
- 1340.Işk egerçi cümlegî âteş-durur
Şem' bigi aña yanmah hoş-durur
- 1341.Âteş-i ışk itdi nâyı hoş-nefes
Şöyle k'ider cân u dil aña heves
- 1342.Oddur iden micmeri anber-duhân
Ûddan oddur getüren bûy-ı cân
- 1343.Cehd-ile_ iderdi taleb odı Kelîm
Od içinde_ aña tecellî_ itdi Kerîm
- 1344.Hullete od itdi İbrâhîmi hâs
Oddur iden altunı gışdan halâs
- 1345.Oddur pervâneyi ma'mûr iden

Varlığını yahup anı nûr iden

- 1346.İşkdur mebde'den evvel feyz-i cûd
Her ne kim var ışk-ıla buldı vücûd
- 1347.İşk derdin bil ki ol hoş derd olur
İşk derdin çekmeyen nâ-merd olur
- 1348.İşk derdine dime mihnet-durur
Ol ser-â-ser ni'met ü minhat-durur
- 1349.İşk çün ider seni senden fenâ
Bil ki oldur ol saña izz ü bekâ
- 1350.İşk varlığını çünkim bitürür
Sini oldem dilegüne yitürür
- 1351.Sensin ol mahbûba ki _olmuşsin hicâb
Görinür mi yâr gitmezse nıkâb
- 1352.İşkdan saña vireyim bir haber
Ola kim cânuña ide ol eser
- 1353.Ol eserden cân u dil ma'mûr ola
Hak tecellîsi-y-ile pür-nûr ola
- 1354.Çün Sikender tutdı İrân'ı temâm
Oldı Tûrân dahı fermânına râm
- 1355.Zâbilistân k'âña dirler Nîmrûz
K'anda idi Rüstem-i leşker-fürûz
- 1356.Olmamış-ıdı mutî' İskendere
Hürmüz ü hem Kâbilistân yiksere
- 1357.Anda Rüstem urugından bir dilîr
Var-ıdı kim cengine döymezdi şîr
- 1358.Adı-dı anuñ Zeresb-i nâm-dâr
Dir-ıdı kim kim olur Sâm-ı Süvar
- 1359.Sürme olur gürzi ursam kûh-ı Kâf
Kılıcum bahrı yahar itsem musâf
- 1360.Okınuñ ef'îsi çün ya'dan çıhar
Zehri-y-ile irdügi yiri yahar
- 1361.Zâr iderdi rezmde Gerşâsbı
Hâr iderdi bezmde Güştâsbı

- 1362.Şâh ol mülki almaga kıldı heves
Sûreti-y-le kendüyi ilçi düzdi pes
- 1363.Vardı gördi Zâbilistân illerin
Anda girüp çihacak menzillerin
- 1364.Sîstân şehrine çün irişdi şâh
Hem Zeresb-ile dahı görüşdi şâh
- 1365.Her ne peygâmı ki fikr-ile_eyledi
Cümlesin birbir Zeresbe söyledi
- 1366.Çün Zeresb anuñ sözini diñledi
Her ne kim didi-y-se birbir añladı
- 1367.Oldı âşık sözlerine_anuñ Zeresb
Didi buña kul yaraşur Bîveresb
- 1368.Çün fasîh-idi vü pes şîrîn-kelâm
Şeh Zeresbüñ gönlinde tutdı makâm
- 1369.Sihr-durur söz ider câna eser
Söz yayınuñ okı umaca yiter
- 1370.Ol müzevver sözine kalup taña
Virdi kendüzini yık-bâre aña
- 1371.Şöyle oldı cân-ıla aña heves
K'ansuz olamazdı hergiz bir nefes
- 1372.Eydür-idi hâşa kim bu kul ola
Yâ bu resme kimseye ilçi gele
- 1373.Dir ki kulam lîki yüz sultân gerek
Kim ola bunuñ çerisine yezek
- 1374.Kul bu resme olmaya Cemşîd ola
İlçi böyle gelmeye hurşîd ola
- 1375.İşret itdi_üç hafta anuñla temâm
İrte gice oldı nûş-â-nûş câm
- 1376.Var-ıdı bir kız'anuñ Gülşâh nâm
Kim yüzinden mihr nûr alurdı vâm
- 1377.Saçı Mûsîden virür-idi nişân
Agzı İsi sırrın iderdi beyân
- 1378.Yüzi-y-ile tâze-y-idi_erdibehişt
Fitne_olurdu gözine hûr-ı Behişt

- 1379.Dişinüñ vasfın sorarlarsa nedür
Utana pervîn diyen aña ne dür
- 1380.Gözinüñ nergis perestârı müdâm
Saçlarına müşg-ile anber gulâm
- 1381.Yüzi hande olur-ıdı ter-güle
Zülfi ta'ne ider-ıdı sünbüle
- 1382.Agzı vasfın nâzük ide-y-düm edâ
Rûh sırrın dimek olsa-y-dı revâ
- 1383.Saçı reyhân u yüzi nev-rûz-ıdı
Ala gözi bûsitân-efrûz-ıdı
- 1384.Görse yüzün vâlih olurdı melek
Arır-ıdı ışkına mâh-ı felek
- 1385.Gözlerinüñ cân-ıdı itdügi sayd
Göñli-y-ıdı zülfinüñ kılduğı kayd
- 1386.Mihr-i lâle cânına ururdı dâg
Yüzi mâha şem'-ıdı mihre çirâg
- 1387.Yağagı tâbına döymezdi_âfitâb
Teşne-y-ıdı la'line dürr-i hoş-âb
- 1388.Yüzünüñ aksi-y-ile ol dil-fürûz
Sîstânı kılmış-ıdı nîm-rûz
- 1389.Gözlerinüñ sihri-le ol dil-sitân
Kâbilistânı_itdidi Bâbil-sitân
- 1390.Virmiş-ıdı Sâni' aña bir cemâl
Görmemiş mislin hayâlinde hayâl
- 1391.Nakş-bend-i fitrat olal_âşikâr
Görmemişdi kimse_anuñ bigi nigâr

ÂŞIK-ŞÜDEN-İ GÜLŞÂH BE-İSKENDER

- 1392.Sîstânda çün Zeresb-i nâm-cûy
Oldı bir müddet şeh-ile kâm-cûy
- 1393.Çünkü mest olur şeb-istâna gider
Halvetinde_İskenderi_eyle vasf ider
- 1394.Kim sözünü işiden kalur aceb
Görmegini ilçinüñ kılur taleb
- 1395.Ol kadar söyler kimesne sormadın

Kim kızı_aña âşık olur görmedin

1396.İşk odı cânına_olur kâr-ger
Göñli milkini ider zîr ü zeber

1397.Hîle ile cehd idüp çâre kılur
Şâhı görmege bacadan yol bulur

1398.Cidd ü cehd-ile olur hâsıl her iş
İster-iseñ cedd ü cidd-ile düriş

1399.Bir nazarla çünkü gördi şeh yüzün
Âh idüben unıtdı kendüzün

1400.Göz-durur göñüllere ayn-ı anâ
Göz ider cânı belâya mübtelâ

1401.Âh idüp kız hasret-ile agladı
Şöyle kim dâye yüregün dagladı

1402.Aldı dâye kızı vü ive ive
Tamlar üstünden iriştürdi eve

ZÂRÎ-GERDEN-İ GÜLŞÂH

1403.Girdi Gülşâh ive bünyâd itdi âh
Âhı dūdından boyandı çarh u mâh

1404.Şem' bigi subh olunca yandı ol
Âhınuñ dütünine boyandı ol

1405.Oldı_elif kaddi anuñ hem şekl-i nûn
Gözlerinden mevc ururdı seyl-i hûn

1406.İşk derdi-y-ile hayrân oldı ol
Turreşi gibi perîşân oldı ol

1407.İşk derdinden içi başlu-y-ıdı
Fürkat odından gözi yaşlu-y-ıdı

1408.Gözlerinüñ yaşları ceyhûn-ıdı
Nicesi ceyhûn ki mevc-i hûn-ıdı

1409.Gitdi andan râhat u ârâm u hâb
Bes ki çekdi mihnet ü renc ü azâb

1410.Gözine kirpükleri_olmuş-ıdı hâr
Uyku pes anda nice ide-y-di karâr

1411.Çün yog-ıdı ışk derdine_anda tâb

Dir-idi yâ leytenî küntü türâb

1412.Vây vây aglardı ol ney bigi zâr
Şerha şerha_itmişdi cânın derd-i yâr

1413.Subh olunca zârılık itdi ol gice
Âşık olan böyle_olur dahı nice

1414.İrteye degin yanar şöyle ki şem'
İRte söyner uş didüm tutduñsa sem'

1415.Dâye çoh pend itdi Gülşâh almadı
Pend-ile hîç odı sâkin olmadı

1416.Işkdur yanar od u yil aña pend
Âşık pes nice ola sûd-mend

1417.Akl u gönül çünki bu yolda gider
Âşık pes nice ü melâmet pes nider

1418.Dâye gördi ki_assı itmez aña pend
Dahı dürlü kurdu_anuñ öñinde bend

1419.Didi âh itme anañ işitmesün
Saña baña bir yavuz iş itmesün

1420.Çün bu işde düşdi gönlüñe harec
Sabr it k'es-sabrü miftâhü'l-ferec

1421.Şöyle idem kim sen anı bulasın
Ol senüñ ola sen anuñ olasın

1422.Derdüñi şehzâdesin tutgıl nihân
İtme kendüzüñi rüsvâ-yı cihân

1423.Işkuña eyle_idem anı mübtelâ
K'ire sinüñ gibi_aña dahı belâ

1424.Dâye ol kız hâline idüp nazar
Akl u rây-ıla_oldı işe çâre-ger

1425.Rây-ıla her işe çâre bulunur
Akl-ıla her ukde halli bilinür

1426.Pes bulur bir nakş-bend-i hurde-kâr
Kim kılurdu sûretin cânuñ nigâr

1427.Nice sûret diseñ ol nakkâş-ı Çîn
Nakş iderdi cân viremezdi hemîn

- 1428.Cânı bir Hakdur hemîn bağışlayan
Hâşa dahı kimdür anı işleyen
1429.Cânı Oldur kim virür girü alır
Dahı dürlü söz diyen kâfir olur
1430.Sûretin yazdurdılar kızıñ aña
Şöyle kim gören kalur-ıdı taña
1431.Gören anı dir-idi Gülşeh-durur
Ol cihân-tâb u dil-ârâ meh-durur
1432.Gülşeh-idi reng ü nîrengî ayân
Fark ara yirde cân-ıdı hemân
1433.Sûretüñ ardında yazdı bir gazel
Kim odından lü'lü olur-ıdı hal

GAZEL-GUFTEN-İ GÜLŞÂH DER-MUHABBET-İ İSKENDER

- 1434.Vâlihem yâre aceb yârum kanı
Âşıkam dil-dâre dil-dârum kanı
1435.Yanaram ışk odına pervâne-vâr
Bilmezem ol şem'-ruhsârum kanı
1436.Kanımı içdi füsûnı-y-la gözüñ
Bilsem ol ser-mest ü hûn-hârum kanı
1437.Işk bîmâr itdi bini zahm idüp
Dimedi birgün ki bîmârum kanı
1438.Oh urur gizler kemânın gamzesi
Bilemezem ol cefâ-kârum kanı
1439.Tûtüyem ol şekker-istân kandadur
Bülbülem ol tâze gül-zârum kanı
1440.Gitdi yoluñda dil ü cân u hîred
Var mı varlıhdan dahı_âsârum kanı

NÂME FİRİSTÂDE BUD EZGÜLŞÂH BE-İSKENDER DERHÎLE-İ DÂYE

- 1441.Bunları yazup harfire dirdiler
Mühr urup bir kul eline virdiler
1442.Kim nihânî anı ilçiyे vire
K'ilçiyi_ açup anda ne vardur göre
İletüp kul virdi şahuñ eline
Girü tîz döndi vü gitdi yolına

- 1443.Şâh çünkim itdi ol nakşa nazar
Kıldı ol dem ışk cânına eser
- 1444.Hak cemâli-y-la tecellî itdi_ aña
Lâ-cirem hayrân olup kaldı taña
- 1445.Işk odından cânı şöyle itdi cûş
K'anda hergiz kalmadı akl-ıla hûş
- 1446.Sûreti gördi vü hayrân kaldı ol
Bî-dil ü zâr u perîşân oldı ol
- 1447.Gerçi ol nakşa perîşân kaldı şâh
Lîki âhir fikri böyle kıldı şâh
- 1448.Kim göre ol nakşuñ ıssını ayân
Olmaya andan perî bigi_ol nihân
- 1449.Didi var bu nakşda hoş-reng-rûy
Lîki reng oldur ki ola anda bûy
- 1450.Reng-i bî-cânı niderem cân gerek
Cân u gönli olana cânân gerek
- 1451.Reng kim anuñ-ıla olmaya bûy
Gösterür mi akl anı sevmege rûy
- 1452.Lâlede gerçi ki vardur reng-rûy
Kadri yok olmadugı-y-çun anda bûy
- 1453.Rengi yoh çün kohusuz –durur edîm
Pâyimâl ider anı herbir leîm
- 1454.Oldugı-y-ıçun gülüñ renginde bûy
Yüzini yüzün'urur her mâh-rûy
- 1455.Reng yohdur müşgde çün kohı var
Zülfinüñ çînde sahlar anı yâr
- 1456.Dürîşüp nakş ıssına irmek gerek
Görecek oldur anı görmek gerek
- 1457.Gülşahuñ bir hâdimin buldurdı şâh
Hâlmı cümle aña bildürdi şâh
- 1458.Didi bir kez ger anuñ yüzün görem
Sîm ü zer n'olur saña cânım virem

- 1459.Virdi varından aña çoh sîm ü zer
Sîm ü zerdür kim her işde_ider hüner
1460.Kimde kim var sîm ü zer olur kişi
Gevher-ise hâk olur bî-zer kişi
1461.Çünkü kâde'l-fakru dir tâcü'r-rüsül
Sabr çün anı_istemek ruhsat degül

CEVÂB-NÜVİŞTEN-İ İSKENDER BE-GAZELİŞ

- 1462.Bir gazel yazdı Sikender dahı_aña
Kim okıyan anı kalurdı taña
1463.Işk-ıla yüzüñe hayrânuñ benem
Zülfüñe zâr u perîşânuñ benem
1464.İtdi cân derdüñ-ile peymân ebed
Saklayan ahdin bu peymânuñ benem
1465.Gamze_ohın atar kemân_keş kaşlaruñ
Râst umacı bu peykânuñ benem
1466.Işkuñuñ gencine vîrân yir gerek
Bende ko anı ki vîrânuñ benem
1467.Câna virürlerse_ayaguñ tozını
Müşterîsi cân-ıla anuñ benem
1468.Görmedin zülf ü zenahdânuñ çahın
Âşıkı ol bend ü zindânuñ benem
1469.Sen gül-istânsın açılmış bî-hazân
Bülbül-i şeydâ vü nâlânuñ benem

NÂME-İ FİRİSTÂDE EZ-SİKENDER BÂ-GÜLŞÂH DER-IŞK-I Ü

- 1470.İşbu göynüklü sözi yazup aña
Virbidi şeh râst Gülşahdın yaña
1471.Çünkü hâdim buldı ol ser-mâyeyi
Vâkıf itdi işbu hâle dâyeyi
1472.Dâye hod dilerdi şeh kızı göre
Cân-ıla_ol dahı aña gönül vire
1473.İki yañadın hoş olur kâr-ı ışk
İki yañadın gerek bâzâr-ı ışk
1474.Işk bâzârında satılan nedür
Derd ü cevr ü gam ne sîm ü zer ne dür

- 1475.İşk bâzârında_olan bâzârgân
Şugl nedür bilmemek sûd u ziyân
- 1476.Dâye şâha böyle virbidi haber
Kim yarın gül-zâre iderüz güzer
- 1477.Gülşah-ıla gül-şene gidiserüz
Güllere Gülşâhı arz idiserüz
- 1478.Tâ göre gül kim nic'olur hüsn-i rûy
Tâ nice gerek ki ola reng ü bûy
- 1479.Zülfi bendin çözüserem tâ-sabâ
Bile k'aña müşg dimekdür hatâ
- 1480.Nergise gösteriserem gözini
Tâ ki nergis unıda kendüzünü
- 1481.Kaddini arz idiserem bâga ben
K'ayagina düşe serv-i nârven
- 1482.Saçını gösderiserem sünbüle
Kim nic'olur deste-i reyhân bile
- 1483.Goncaya gösderiserem agzın kim göre
Nokta-i mevhûm sırrına ire
- 1484.Çün Sikender tutdı işbu söze gûş
Şöyle oldu zâr k'andan gitdi hûş
- 1485.Çünkü gice gitdi geldi subh-dem
Râyet-i nûr irdi pest oldu zulem
- 1486.Gülşahı gül bâgına iletdiler
Şeh visâkınıñ yanından gitdiler
- 1487.Şeh nihân yirden gözedürken nıkâb
Götürüp arz itdi yüzün âfitâb
- 1488.Şâhı şeb-nem bigi mahv itdi_ol cemâl
İşk yolında olur çoh dürlü hâl
- 1489.Ol cemâle çünkim itdi bir nazar
Kıldı ol dem işk cânına eser
- 1490.Akl-ıla câna nazar-durur belâ
Bes nazardur âşıkı_iden mübtelâ

- 1491.İşk odında gönül eyle_ itdi cûş
Kim teninden cân başından gitdi hûş
- 1492.Toldı ışk-ıla içi taşı anuñ
Oda yandı kuru vü yaşı anuñ
- 1493.Oldı nergis bigi zâr u zed-gûn
Lâle bigi sûhte-dil gark-ı hûn
- 1494.Yüzini çün gördi didi âfitâb
Tutmaya bu resme anberden nıkâb
- 1495.Yañagın gördi didi nesrîn midür
Dişine bahdı didi pervîn midür
- 1496.Dudagın gördi didi ki_ Âb-ı Hayât
Teşne_olup didi ki bu azb-i Fırât
- 1497.Kaşına didi ki bu anber-kemân
Cân hedef ider ohına bî-gümân
- 1498.Gamzesine didi bu sihr-âferîn
Kasdı cân u dildür ü hem akl u dîn
- 1499.Agzına bahdı didi kim bûy u cân
Bundadır lîkin olupdur ol nihân
- 1500.Saçlarına didi zî reyhân-ı rûh
Kim olup-durur anuñ hayrânı rûh
- 1501.Gül yañakda gördi düşmiş müşg-hâl
Didi bundan cânâ müşkil oldı hâl
- 1502.Didi çün gördi zenahdânında çâh
Bu-durur cân Yûsufına habs-gâh
- 1503.Gördi boyun didi zî serv-i revân
Kim gözüm ser-çeşmesin itdi mekân
- 1504.Çün nıkâbın örtiniben gitdi mâh
Şâh girye itdi vü zârı vü âh
- 1505.Şeb dilerdi kim tuta-y-dı nîm-rûz
Lîki gönlin dutdı yüzi nîm-rûz
- 1506.Ol seferde kim direm dir-idi genc
Cân bahâ virdi vü satun aldı renc
- 1507.İşk sûkında fenâdur satılan
Ol metâ'a cân-durur kıymet olan

- 1508.İşk bâzârında_olur cân râyigân
Anda ne_assı ide pes bâzâr-gân
- 1509.Gülşahi çün gördi şâh-ı nâm-dâr
Kalmadı anda dahı sabr u karâr
- 1510.Gözleri Yâ-rab ne efsûn eyledi
Kim şehi zülfine mecnûn eyledi
- 1511.Şeh gözi müşg-içün itdi kasd-ı Çîn
Yolı-y-ıdı girdi gördi bahr için
- 1512.Gevher itdi assı vü cânı ziyân
Geh ziyân geh sûd ider bâzâr-gân
- 1513.Şeh cihân dutarken idüp dâr-gîr
Bir kıl-ıla anı itdiler esîr
- 1514.Şâh-iken oldı esîr ol bir kıla
İşk işidür akl ne çâre kıla
- 1515.Gerçi kim sultân-ıdı vü tâc-bahş
Mülk ü iklîm ider-idi halka bahş
- 1516.Şöyle oldı ki_ol işige bulsa yol
Râzı-y-ıdı k'ol işikte ola kul
- 1517.Didi k'ayagı tozın sürme kıla
Lîki mahrûm oldı girmede ele
- 1518.Görine düşümde didi ol cemâl
Lîki hâb olmışdı gözine hayâl
- 1519.Âşıkuñ kirpük gözinde hâr olur
Hâr içinde uyımak düşvâr olur
- 1520.Her gice tâ-subh olunca zârî ol
Gözedürdi ay u yılduzları ol
- 1521.Dir-idi bu gice mi yâ mûy-ı yâr
K'uzadı böyle perîşândur u târ
- 1522.Gice mi bu yâ belâ-yı câvidân
Kim belürmez subhdan andan nişan
- 1523.Gice midür bu ki_anuñ pâyânı yoh
Gitmege derdüm bigi dermânı yoh
- 1524.İy aceb nedür sebep k'itdi karâr
Kutb gibi mihver ü çarh u medâr

- 1525.Gice örtüpdür saç-y-la gündüzi
Şöyle kim bürka'da dil-dâruñ yüzi
- 1526.Gitdi gönünden anuñ kamu heves
Varı ol halvetde Gülşâh-ıdı pes
- 1527.Kanda bahsa görinen Gülşâh-ıdı
Fikr ü zikri kamu ol dil-hâh-ıdı
- 1528.Kulagı olmış-ıdı adına zarf
Ol-ıdı işitdügi savt-ıla harf
- 1529.Tamarında yürüyen kan ol-ıdı
Kim her endâmında_anuñ cân ol-ıdı
- 1530.Yüridügi ayag u dutduğı el
Ol-ıdı bu müşkil sen eyle hal
- 1531.Âşık oldur k'anda varlıh kalmaya
İşkdan artuh dahı nesne_olmaya
- 1532.Niçe gelse âşika cevr ü cefâ
Yârdan geldükde_olur mihr ü vefâ
- 1533.Yâr mihrî kahr-ıla girür ele
Genci rence sabr iden kişi ala
- 1534.Sordılar Mansûra işkı kim nedür
Didi_anı görmege üç gün bunda dur
- 1535.Evvelinde anı dâra dikdiler
Pes ikinci günde oda atdılar
- 1536.Pes üçinci gün külin savurdılar
Kamusın yil-ile suya virdiler
- 1537.Dâr üstinde anı çün gördiler
Nicedür hâlün diyüben sordılar
- 1538.Didi dâr erenlerüñ Mi'râcıdur
Âşıkun od şem' bigi tâcıdur
- 1539.Yâr ele gelse bu resm-ile gelür
Âşık olan kişi hâli böyle_olur
- 1540.Gül seven hâr-ıla hem hoş-hû gerek
Şem'-vâr od içre handân-rû gerek
- 1541.Tâ ki şeb-nem varlığından yitmeye
Kalkuban yirden güneşe yitmeye

- 1542.Âşık ol-durur ki aña dâg u derd
Yârdan geldükde ola bâg u verd
- 1543.Hak yolında sarf idüp çoh sîm ü zer
Cân-ıçun âş eyledi Leylî meger
- 1544.Kendü_eliyle_ider-idi âşı nâsîb
Kime kim gelse fakîr ü yâ garîb
- 1545.Ulu kiçi kim gelürse hâs u âm
Herbirine hîsse virürdi temâm
- 1546.Geldi Mecnûn isdeyü aşdan nasîb
Gerçi maksûdı-dı dîdâr-ı habîb
- 1547.Aldı Leylî çanagın urdı yire
Sandılar Mecnûnı ki_ol işi yire
- 1548.Dir-iken Mecnûn ol işe yirine
Şâd oldı hod yirinmek yirine
- 1549.Didiler Mecnûna kim renc ü belâ
Ne çekersin Leyliye_olup mübtelâ
- 1550.Ulu kiçiye kamu ni'met virür
Çanaguñı karşuña taşa urur
- 1551.Didi kim binüm-ile bir hâl var
Çanagı anuñ-çun urdı taşa yâr
- 1552.Ayruguñ çünkim çanagın simadı
Kimseye niçün gelürsin dimedi
- 1553.Anuñ-çun kim anuñ binüm-ile
Dahı dürlü ne işi var kim bile
- 1554.Pes benüm çanagum urduğı yire
Bir aş-ıçun-durur anı kim yire
- 1555.Işk dili dahı dürlü dil olur
Harf ü savtı yoh anı âşık bilür
- 1556.Bilür ol kim n'itse baña hoş gelür
Anuñ-ıçun cevr baña çoh kılur
- 1557.Her ne kim ol hûb iderse hûb olur
Her ne kim mahbûb ider mahbûb olur
- 1558.Her-çi ân Husrev-kuned Şîrîn-kuned
Çün diraht-ı tîn ki cümle tîn kuned

1559.Geçdi üç hafta revâne oldı şâh
Göñli _ içinde sâkin ol dû-hafta mâh

HASRET Ü ENÎN-İ ŞÂH BE-FİRÂKÎ GÜLŞÂH

1560.Girye vü zârı-y-ıla hem-râh-ıdı
İçi vü taşı tolu Gülşâh-ıdı

1561.Şeh benefşe bigi oluban dü-tâ
Egmiş-ıdı yârdın yaña kafâ

1562.Şöyle kim hûrşîde nergis kendüzin
Döndürürdi yârdın yaña yüzün

1563.Kûh u deşt âhı-y-ıla tolmış-ıdı
Yol gözi yaşıyla seyl olmuş-ıdı

1564.Âhı gök âyînesin itmişdi jeng
Olmış-ıdı yaşı-la yir sürh-reng

1565.Gözlerine bu cihân târîk-ıdı
Gıtdügi yir kıl bigi bârîk-ıdı

1566.Girye vü zârı-y-ıla girdi yola
İrdi yüzbiñ derd-ile bir menzile

1567.Nicesi menzil ki cân-ârâ-y-ıdı
Sana-y-ıduñ Cennetü'l-Me'vâ-y-ıdı

1568.Var-ıdı her talda biñ rahşende-şem'
Bülbül ünine benefşe olmuşdı sem'

1569.Nev-bahâr u lâle vü gül-zâr-ıdı
Çeşmeler her yañada enhâr-ıdı

1570.Her yaña reyhân-ıla nesrîn-ıdı
Topragı anber yili müşgîn-ıdı

1571.Anda kumrı bülbüle dem-sâz-ıdı
Perde-i gül tolu her _ dem sâz-ıdı

1572.Şeh dahı anda sûz-ıla sâz eyledi
Nâlesin kuşlara dem-sâz eyledi

1573.Herbirine kanlu göz-ile bahup
Zârı iderdi yüregini yahup

1574.Gördi bitmiş çeşme üzre bir çınar
Didi uş binüm gözüm ü kadd-i yâr

1575.Nergisi gördi _ aındı dil-dâruñ gözün

Gül görüp zikr eyledi yâruñ yüzün

1576.Saçını yâd itdi reyhânı görüp
Yañağın aña gül-istânı görüp

1577.Bülbüli işitdi kim olup nagme-sâz
Dir-idi gül karşısına dürlü râz

1578.Didi sen görebilürsin yâruñı
Arz idersin aña derd ü zâruñı

1579.Bini sor kim göremezem yârımı
Diyemez kim nedendür zârımı

1580.Yile virüp ömrümi sevdâ-y-ıla
İñlerem ney bigi âh u vâ-y-ıla

FİRAK-NÂME NÜVİŞTEN-İ İSKENDER BE-GÜLŞÂH

1581.Pes kalem alıban ol gül-şende şâh
Gülşaha bir biti yazdı tolu âh

1582.Didi kim iy yañağı gül kandasın
Gözi nergis saçı sünbül kandasın

1583.Işkuñ odı cânuma kâr eyledi
Fürkatüñ gönümi bîmâr eyledi

1584.Tolu içüm lâle bigi dâg u derd
Giderem nergis bigi uş zâr u zerd

1585.El-vidâ' iy yâr-ı dil-ber el-vidâ'
Elvidâ' iy zülfi anber el-vidâ'

1586.Ömr bigi sini bir dem görmişem
Gördüğüm dem hicr odına girmişem

1587.Bilmedüm ol göziken hüsn ü cemâl
Hâb mı-y-dı gözüme yâhûd hayâl

1588.Gerçi irmezem cemâlüne senüñ
Râzı olmuşam hayâlüne senüñ

1589.N'ideyüm kim gözlerüme bir nefes
Uyhu girmez k'ola hâsıl bu heves

1590.Zülfüñi aña perîşân olmuşam
Böyle ol reyhâna hayrân olmuşam

1591.Saña şavkumı nicesi söyleyem

Bî-nihâyetdür nice şerh eyleyem

1592.Yagmuruñ katrelerinden çoh-durur
Rîgüñ eczâsından ol artuh-durur

1593.Vardur evrâkına eşcârüñ şümâr
Lîki binüm şavkuma yohdur i yâr

1594.Ben bu yolda şerha şerha_idüp ciger
Seyr iderem ney bigi bî-pâ vü ser

1595.Oda yandum zahm yidüm bî-sebeb
Şöyle kim ûd inilersem ne aceb

1596.Def figân eyler niçekim urulur
Çeng nâle ider niçekim burulur

1597.Niçe dürlü k'iderem göñlüme pend
Taşa olur aña olmaz sûd-mend

1598.Dilerem k'idem saña şavkum beyân
Hâmeden kan nâmeye olur revân

1599.Yazar-iken nâmeyi şâh-ı cihân
Bir gazel yâdına geldi nâ-gehân

GAZEL-İ NÂ-GEHÂNÎ NÜVİŞTEN KERD BE-FİRAK-NÂME-İ GÜLŞÂH

1600.Dünya vü ukbâda saña kalmışam
Kapuñı cânuma Kible kılmışam

1601.Tâc u taht u mülk ü bahtı terk idüp
Cân-ıla işkuñı satun almışam

1602.İşvesine gamzeñüñ meftûn olup
Zülfüñe zâr u perîşân olmışam

1603.Baña dirler sahla nâm u nengi ben
Şîşe-i nâmûsı taşa çalmışam

1604.Mâh u pervîn karşusına giceler
Yüzüñe agzuña taña kalmışam

1605.Cân safâ bulmaga sıdk u mihr-ile
Subh bigi işigüñe gelmişem

1606.Uş kapuñda cân u dil yitürüben
Yirine gussa-y-la mihnet bulmuşam

1607.Yüzüñüñ şem'ine karşı cânımı

Şöyle kim pervâne oda salmışam

- 1608.Nev-bahârına cemâlünüñ ki cân
Bülbülidür irmesün bâd-ı hazân
- 1609.Hüsnünüñ gül-zârı hergiz solmasun
Kâmetüñ servi tagayyür bulmasun
- 1610.Tâze olsun nergis-ile ter-gülüñ
Dâyimâ ser-sebz olsun sünbülüñ
- 1611.Gonca olsun agzuñuñ kim la'ldür
Tâze vü ter şöyle kim dürcinde dür
- 1612.Nâme üstine urup müşgîn-hitâm
Virbidi Gülşâha şâh-ı nîg-nâm
- 1613.Nâmeyi ilten getürince cevâb
Hayme berkitdiler ü mîh ü tanâb
- 1614.Tutdı şâh birkaç gün orada makâm
İrte gice zâr aglayup müdâm
- 1615.Âh u zâr-ıla geçerdı gündüzi
Subha dek gözlerdi gice yılduzı
- 1616.Ol kadar zâr agladı vü çekdi gam
Kim vücûdına eser itdi sakam
- 1617.Çün harâret toldı kaygudan harâc
Fasd oldı def'-i sevdâya_ ihtiyâc
- 1618.Fasd îtmege çü fassâd itdi kasd
Şâh kîfâlından ol dem itdi fasd
- 1619.Dirler itdüğünde fasda şâh kasd
Gülşaha dahı gereklü oldı fasd
- 1620.Kanı-y-ıla kim dökilürdi şahuñ
Adı yazılurdi yirde Gülşahuñ
- 1621.Fasd-ıla kîfâlı ki_ anuñ dökdi kan
Yirde İskender yazıldı_ ol kan revân
- 1622.Hem şaha irişdüğünde nîş-ter
Gülşaha dahı irişdi_ anda eser
- 1623.İkilik yog-ıdı birlikdi hemân
Bunda olan anda dahı_ oldı ayân

- 1624.İşk olıcah işbu resm-ile gerek
K'ola birlik hâsıl oldur hod dilek
- 1625.İşk bu olanuñ insâniyyeti
Âdemîseñ aña hayvâniyyeti
- 1626.Böyle âşık olmaduñsa söyleme
Aybdur yoh yire da'vî eyleme
- 1627.Âşık olur-ısañ işbu resme ol
Kim gidesin sen aradan kala Ol
- 1628.Nâmeyi çünkim iletdi peyk-i şâh
Hâdime virmeklige_anı buldı râh
- 1629.Nâmeden çün oldı Gülşâha habar
Nâmeyi açdı ki ide-y-di nazar
- 1630.İşk bâğından irişdi bir nesîm
Reşk-i bâd-ı bâğ-ı Cennât-ı Na'îm
- 1631.İşk odından cânı ol dem itdi cûş
Gitdi ol sâatde andan akl u hûş
- 1632.Şöyle gitdi kuvvet-i cân u revân
Kim teninde bir nefes kaldı hemân
- 1633.Yatdı üç gün ol arada bî-haber
Soñra buldı rûhdan hem bir eser
- 1634.Didiler aña ki şeh sevmiş seni
Şöyle kim sen dahı sevmişsin anı
- 1635.Sini unıdur degül bir lahza şâh
Ne gerekdür bunca zârî-y-ıla âh
- 1636.Kaygudan hayf ola solmah bu cemâl
K'irmesün hergiz aña ayn-i zevâl
- 1637.İşbu hüsn İskenderüñdür ko aña
Bunu bozmak lâyıq olmaya saña
- 1638.Bu ümîd oldı aña bir pây-ı merd
K'anı öldürmedi ol âh-ıla derd
- 1639.Nâmesini çünki şâhuñ gördi ol
Başına koyup yüzine sürdi ol
- 1640.Ol kadar kan aglayuban dökdi yaş
K'oldı her ne kurı-y-ısa yirde yaş

FİRAK-NÂME-İ NÜVİŞTEN GÜLŞÂH-I BE-İSKENDER

1641. Pes eline aluban ol dem kalem
Çekdi levha derd-ile müşgîn-rakam
1642. Didi kim iy şâh-ı nev-baht u cüvân
K'itmişem bu cânı ışkuña revân
1643. Şöyle olupdur firâkuñda odum
Kim çıkupdur perdeden taşra odum
1644. Şem' bigi ışkuña yanan benem
Dil bigi_ agızlarda söylenen benem
1645. Binüm-içün mi-y-di kim bunda gelüp
Bini koyup gidesin göñlüm alup
1646. Ne sorarsın hâlümü senden ırâh
N'ola ten çün düşe cân andan ırâh
1647. Sorma baña nitdi yâruñ fûrkati
Gözlerüme bah göresin ibreti
1648. Kalbden olmaga hâlis zer bigi
Oda yanar yüregüm micmer bigi
1649. Cân dilerem virbiyem tuhfe saña
Girü didüm bu ne lâyıkdur aña
1650. N'ola bir cân virseler iki cihân
Ayaguñ tozına ola râyigân
1651. Yoluñuñ toprağı cânâ kîmiyâ
İşigüñüñ tozı göze tûtiyâ
1652. Dilümü dirseñ senüñ zikründeür
Göñlümi sorsañ senüñ fikründeür
1653. Diledüñ bu hastayı şâd idesin
Yohsa kimem kim beni yâd idesin
1654. Ben saña lâyıkdur degülem irmege
Yâ senüñ zîbâ-cemâlüñ görmege
1655. Varsa lutfuñdur bu işe çâre bes
Bizde yohdur bu murâda dest-res
1656. Niçe kim añam cemâlüñi senüñ

Yâ görem düşde hayâlünü senün

1657.Gözlerümüñ mevcî deryâyâ irer
Âhumuñ dudu süreyâyâ irer

1658.Çünki işbu hâle irişdi makâl
Ber-bedîha bir gazel didi_ol gazâl

GAZEL BEDÎHIYYE NÜVİŞTEN KERDED

1659.K'iy nigâr-ı gül-izâr u servi-kad
V'iy büt-i gonca-dehân u lâle-had

1660.Işkuñuñ derdin dilerem şerh idem
N'ideyüm dükenmez itdügümce ad

1661.Şavkumı yüzüñ cemâlin görmege
Nice ideyüm vasf çün yoh aña had

1662.İRte gice_elhamdülillâh vasfuñ
Ohıram çün kul hüvallahü ahad

1663.Fürkatüñüñ hurkatında giceler
Hırzdur cânuma Allâhü's-Samed

1664.Hicrünüñ uş kahr-ıla alur cânımı
Vasluñuñ mihrinden irmezse meded

1665.Baht bigi kapuña yüz süreyim
Gel beni bu kapudan eyleme red

NÂME FİRİSTÂDE-İ GÜLŞÂH BA-İSKENDER

1666.Çarh döndükçe ki döner rûzigâr
Bahtuñı pâyende itsün Kirdigâr

1667.Yidi iklimi saña râm eylesün
Memleket adlünüle ârâm eylesün

1668.Zühreyi perde-serây itsün kenîz
Hak serâ-perdeñde iy şâh-ı azîz

1669.Şems olsun saña tâc u müşterî
Cân-ıla_olsun kulluguña müşterî

1670.Matbahuñ yazıcısı_olsun ol dibîr
Kim kemân-ı çarhda_oldı adı tîr

1671.Olsun eyvânuñda keyvân pâsübân
Mâh-ı nev olsun kapuñda âşiyân

- 1672.Virbidi Gülşâh şâha nâmeysi
Kıldı_anuñla germ-ter hengâmeyî
- 1673.Nâmeysi çünkim ohıdı kıldı âh
Kişverinden yaña döndi râst-râh
- 1674.Söz öküş geldi girü sâlâr-ı Rûm
Gördi cennet olmuş ol merz-ile bûm
- 1675.Yiryüzi olmuş ser-â-ser mürğ-zâr
Her taluñ üstinde_öter yüz mürğ zâr
- 1676.Sebze-zâr içinde şâh-ı nesteren
Yıldırar şol resme kim gökde peren
- 1677.Hullesi yâkût-reng olmuş gülüñ
Zülfî anber-tâb olmuş sünbülüñ
- 1678.Atlas-ı dînâriyi geymiş çemen
Yüzini yumış gül-âb-ıla semen
- 1679.Nergis alduhça ele zerrîn-kadah
Gül yüzinde rûşen olurdı ferah
- 1680.Tahta otırdı şeh ü urındı tâc
Her yañadın geldi_aña pâc u harâc
- 1681.Padışâhlar her yañadın geldiler
Yir öpüben bende-fermân oldılar
- 1682.Çünki geldi işret âgâz eyledi
Çeng ü ney her yañadın sâz eyledi
- 1683.Câm-ı zer sundı büt-i yâkût-leb
Kim salardı âfitâba ışk teb
- 1684.Eyle nagme-sâz oldu erganûn
Kim anuñ sâzı-y-la akla_irdi cünûn
- 1685.Eyle nâle itdi derd-ile rebâb
Kim cigerler oldu sûzından kebâb
- 1686.Eyle düzdi perdede sâzını ney
K'itdi zühre çenginüñ târını tay
- 1687.Câm-ı la'le_idüp nazar şâh-ı cihân
Gülşahuñ yâkûtın añdı nâ-gehân

- 1688.İçer-iken la'l-gûn câm-ı şarâb
Gözlerinden indi lü'lü-yi hoş-âb
- 1689.Çünkü oldu ışk gâlib cânına
Tîz Arestûyî ohıtdı yanına
- 1690.Kodı nâmûs u hayâyı bir yaña
Ne hayâ aña ki ma'şûkın aña
- 1691.Işk komaz kişide akl u vekâr
Âşık olana ne nâmûs u ne âr
- 1692.Didi al zerr ü cevâhir bî-şümâr
Var Zeresbüñ kızına ol hâst-âr
- 1693.Gülşahı cehd eyle vü ırgür baña
Derdüme em it gereksem ben saña
- 1694.Bilmezem baña ne efsün eyledi
Kim gözi aklumı mecnûn eyledi
- 1695.Zülfine anuñ perîşân olmışam
Yüzine şeydâ vü hayrân olmışam
- 1696.Cânuma Kible kaşı mihrâbıdur
Göñlümüñ bendi saçınıñ tâbıdur
- 1697.Tutagıdur Kevser ü Âb-ı Hayât
Yüzi Nev-rûz u saçı Kadr-i Berât
- 1698.La'lına cân-ıla teşne olmışam
Hayretinden günde biñ kez ölmüşem
- 1699.Bilmezem âşık ne katı cânl' olur
Şem' bigi dirilür nice k'ölür
- 1700.Başımı kesdükçe olur zinde-ter
Yaşımı dökdükç' olur hoş-hande-ter
- 1701.Ney bigi bâd-ı hevâdur hâsılı
Başı yog u söyler ü durmaz dili
- 1702.Çün Arestû tutdı şah sözine gûş
Bildi kim gidüpdür andan akl u hûş
- 1703.Işk varlığını târâc eylemiş
Gamz ohına cânın umac eylemiş
- 1704.Aldı bî-hadd gevher ü dürr-i semîn
Tazı itlerle zer ü dîbâ-yı Çîn

- 1705.Ol aradan kıldı azm-i Sîstân
İrte gice durmadı oldu revân
DER-ÂMEDEN-İ ARESTU BE-SİSTÂN EZ-BEHR HÂSTÂRÎ-İ GÜLŞÂH
- 1706.Sîstân şehrine çün irişdi ol
Hem Zeresb-ile dahı görüşdi ol
- 1707.Devlet a'yânın dirüp anda ayân
Her ne peygâmi ki var itdi beyân
- 1708.Çünkü irişdi Zeresb'e bu haber
Oldı gönli gussadan zîr ü zeber
- 1709.K'andan öndin Rüstem-i ceng-süvâr
Ceng itdükde anunl'İsfendiyâr
- 1710.Mekr idüp oh zahmı-la bî-ters ü bâk
İtmiş-id'İsfendiyârı ol helâk
- 1711.Ol uruhdandı Zersb-i şîr-ceng
K'idemezdi ejdehâ anuñla ceng
- 1712.Behmenüñ atası-dı İsfendiyâr
Olıcah İrân'a Behmen şehriyâr
- 1713.Âteşi kan-ıçun idüp intikâm
Sîstân'ı yıhdı vü yahdı temâm
- 1714.Kıldı çünkim Sîstân'ı itdi hâk
Rüstem'üñ oğlın Ferâmûz'ı helâk
- 1715.Çün Sikender ol uruhdandı yakîn
Girü tâze oldu diri eski kîn
- 1716.Vaslat itmek düşmen-il'olur hatar
Zehrdür düşmen gerek andan hazar
- 1717.Her kişi kim zehr yir der-hâl ölür
Ol ki zehri kohılar sayru olur
- 1718.Gülşah'üñ işine virmedi rızâ
Olmad'ol hâcet katınd'anuñ revâ
- 1719.Döndi girü ol hakîm-i nâm-ver
Geldi vü İskender'e virdi haber
- 1720.Çün hakîmüñ sözine şah dutdı gûş
İtdi ol demde gazabdan kanı cûş
- 1721.Pâdişâhlıh ola vü ışk u şebâb

İşret ü pîrûzi vü câm-ı şarâb

AZM-İ KERDEN-İ İSKENDER BE-SÎSTÂN BE-ASKER-İ ENBÛH

1722.Niç'ola ma'sûk-ıçun ceng olmaya
Ceng ü fitn'olup halâyık ölmeye

1723.Cem' idiben sipâh-ı bî-kerân
Sîstân'a yürüdi sâhib-kırân

1724.Her yañadın hayl ü leşker yürüdi
Yiryüzün dürlü alemler büridi

1725.Sûr-nâ-sâz itdi vü kûs ü neffr
Toldı ucdan uca kişver dâr-gîr

1726.Meymene düzildi vü hem meysere
Hem cenâh u kalb ü dahı yigsere

1727.Altı yüz bin kişi-y-idi nâm-cûy
Şîr-merd ü pehlevân u kâm-cûy

1728.Çün Zeresb işitdi kim ner-ejdehâ
Kim deminden olımaz kimse rehâ

1729.Cem'olup Sîstân'a uş gelür
Kim-durur ana mukâbil kim olur

1730.Çün çeri dirdi Zeresb-i şîr-gîr
Kim ide İskender-ile dâr u gîr

1731.Leşker-i Bahreyn ü hem Kîş ü Aden
Olmış-ıd'anuñ katında encümen

1732.Şâhuñ olmasun diyüben Sîstân
Virdi çok leşker aña Hindûsitân

1733.Anda-y-ıdı hem Bedahşân leşkeri
Sind'den dahı var-ıdı çün çeri

1734.Leşkeri yasadı şâh-ı Sîstân
K'ide İskenderle bir ceng-i girân

1735.Kim anı târîh ide_andan rûzigâr
Kala andan ol cihânda yâdigâr

1736.Çün irişdi râyet-i İskenderî
Münhezim oldu Zeresb'üñ leşkeri

1737.Maşrıka gün râst itdükde inân

Çarhda kalmaz kevâkibden nişân

- 1738.Çün hevâda bâl ü per açâ ukâb
Tagılur sahrâ tolu-y-isa gurâb
- 1739.Kebg işitse bâzdan âvâz-ı zeng
Sad-hezâr-isa kaçâr itmez direng
- 1740.Münhezim olup kaçıncah ol çeri
Düşdi ardına Sîkender leşkeri
- 1741.Germ sürüp Sîstân'a vardılar
Bârıgâhı_urdılar ol dem k'irdiler
- 1742.Sîstân şehrini itdiler hisâr
Her yanadın kopdı ceng ü gîr ü dâr
- 1743.Pehlevânlar kûs-ı harbi urdılar
Ra'd düzüp mancınîkî kurdılar
- 1744.Tîr-endâz iki yüz biñ nâm-ver
Bî-hatâ ohları şöyle kim kader
- 1745.Kasd itdiler hisârı almaga
Zûr-ı bâzû-y-ıla vîrân kılmaga
- 1746.Dilediler tîri bârân ideler
Şöyle k'ohı şehre bârân ideler
- 1747.Şehri oh u taş-ıla tolduralar
Cümle halkın zahm-ıla öldüreler
- 1748.Nâ-gehân korha diyü Gülşâh'ı şâh
Komadı kim ceng ideler sipâh
- 1749.Didi Gülşâh'ı nice korhıdayım
Anı k'andan korhar ol nic'ideyim
- 1750.Nâ-gehân bir zahm irişürse aña
Andan öndin irişür bî-şek baña
- 1751.Zahm kim Gülşâh-ı dil-hâha irer
Baña dah'ol dem irer andan eser
- 1752.İkilik çün aramızdan sürülür
Baña irer zahmı kim an'urılır
- 1753.Işk-ıla ma'sûk u âşık bir-durur
Işkı bilene bu sır zâhir-durur

- 1754.Âşık u ma'şûk çünkim bir ola
Âşık'anda dahı ne varlıh kala
- 1755.İşk izâfî vasf-durur bî-gümân
İki nesne arasınd'olur ayân
- 1756.Nirede kim ikilik zâyil olur
Orada vasf-ı izâfî mi kalur
- 1757.Çünkü ma'şûkında âşık mahv ola
Zâyil olup ikilik birlik kala
- 1758.Anda ma'şûk ola âşık tutma şek
Hod hakîkî işk bu resme gerek
- 1759.Oradan ma'şûka iren hayr u şer
Âşuka dahı irer bî-şekk eser
- 1760.Ger febî yubsır vebî yesma' saña
Rûşen oldı-y-sa inangıl sen baña
- 1761.İşbu hâli k'iderem saña beyân
Diledi Mecnûn k'ide halka ayân
- 1762.Vardı Leylî'yi bıçağı-y-l'urdu ol
Lîki zahmın kendüye irgürdi ol
- 1763.Ol bıçağ-ıla k'anı urdu dürüst
Kendüyi yaralayuban düşdi süst
- 1764.Kendüyi Leylî'de buldı ol yakîn
Lâ-büd an'irdi bıçah zahmı hemîn
- 1765.Hasta düşmiş-idi meger bir gün Eyaz
Düşdi Mahmûd'a anı görmek niyâz
- 1766.Didi bir kulına kim var anı gör
İşbu lahza gel haber vir nicedür
- 1767.Yügür ü var tîz irmege düriş
Göz sana tutup dururam tîz iriş
- 1768.Gitdi ol kul şah katından yügürü
Çün Eyaz'un katına gird'içerü
- 1769.Gördi sultândur u oturmuş Eyaz
Aralarınd'anlaruñ nâz u niyâz
- 1770.Vehm-ile sehm irdi kuluñ cânına
Sandı kim boyanasıdur kanına

- 1771.Didi ben yügürü geldüm Hak güvâh
Ne sebebdür benden öñdin irdi şâh
- 1772.Didi sultân ben hemîşe bundayam
Gördüğüñ-çün sanma bini k'andayam
- 1773.Bir-durur Mahmûd Eyaz-ıla hâs
İkilikden bunlar olmışdur halâs
- 1774.İkimüz birüz siz iki sanmañuz
Bize ahvel iki dir inanmañuz
- 1775.Bâde câm-ıla çü bir yire gelür
Bâde câmuñ câm anuñ rengin alur
- 1776.Bir olup aradan ikilik gider
Vahdet ehli-y-señ ikiligi gider
- 1777.Key işitdüñse bu sözüñ sâzını
Keşf itdüñ ışk u vahdet râzını
- 1778.Bunu diyüp orada turanlara
Girü dönüp böyle didi anlara

TEEMMÛL KERDEN-İ İSKENDER

- 1779.Sabr idelüm bir iki gün turalum
Baht encâmı nic'olur görelüm
- 1780.Ola kim bir feth ola ceng olmadın
İş bite arada kimse ölmedin
- 1781.Cengsüz hâsıl olıcagaz murâd
Niçün ideler anı k'oldur fesâd
- 1782.Şah sözi-y-le orada oturdılar
Ceng sâzın aradan göturdiler
- 1783.Şehri çevre alubanuñ ol sipâh
Haymeler kurdılar u hem bârıgâh
- 1784.Gülşah'a karşı buyurdı şehriyâr
Bir serâ-perde_urdılar zerrîn-nigâr
- 1785.Ucdan uca la'l-ıla dürr-i Aden
Baglu vü hem nâfe-i müşg-i Hoten
- 1786.İçerüden nakşı reng-â-reng-idi
Taşı nakşı Mâni vü Erjeng-idi
- 1787.İRte gice anda olur-ıdı şâh

Nâl'iderdi Gülşah'a karşı vü âh

1788.Dir-idi kim şâh-ısam halka temâm
Cân virürem saña olmaga gulâm

1789.Niçebir işkuñda görem renc ü derd
Niçe idem girye-i germ âh-ı serd

1790.Şem' bigi yandı varum kuru yaş
Od içinde_ahar gözümde kanlu yaş

1791.Cânum'urduh bunca dürlü zahmı sen
İtmedüñ derdüme bir gün rahmı sen

1792.Şem' bigi bini giryân eyledüñ
Zülfünüñ bendinde hayrân eyledüñ

1793.Mihnetümi sanma k'azdur çoh-durur
Hiç kimse bana hem-dem yoh-durur

1794.Sayrunuñ derdi nedür bilse tabîb
Pes aña göre devâ kılma tabîb

1795.Derdümi nedür tabîbüm bilmedi
Lâ-cirem anun devâsın kılma

NÂME FİRİSTÂDEN-İ İSKENDER BÂR-I DÜVÜM BE-GÜLŞÂH

1796.Pes eline aluban ol dem kalem
Yazdı Gülşâh'a şah-ı sâhib-alem

1797.İy nigâr-ı serv-kadd ü lâle-rûy
V'iy büt-i gonca-dehân u müşg-mûy

1798.Cân gözüñüñ fitnesine mübtelâ
Saçlaruñ göñüle pâ-bend-i belâ

1799.Yañaguñ gark-ı hayâ itmiş güli
Der-hem urmuş müşgi zülfüñ sünbüli

1800.Benden olsun tapuña her subh u şâm
Cân u dilden çoh tahıyyât u selâm

1801.İtmişem ben aduñı vird-i lisân
Kılmışam hem yâduñı ta'vîd-i cân

1802.Zülfüñüñ bendinde hayrân kalmışam
Ukdeye düşüp perîşân olmuşam

1803.Fürkatuñ odında derdüm çoh-durur

Senden artuh hîç ümîdüm yoh-durur

1804.Gönlümi zülfüñ hamında iy habîb
Gör ki ne müşkil olur şâm-ı garîb

1805.Yüzüñi bir göre bilem sanmışam
Bir tecellîsinde oda yanmışam

1806.Senden olan derde bir em eylesen
Senden iren zahma merhem eylesen

1807.Çünkü sendendür yüregüm yaresi
Girü senden olur anuñ çâresi

1808.Zülfüñüñ bendinde olmuşam esîr
Kimse yohdur k'ola baña dest-gîr

1809.Niçebir dâma giriftâr olayım
Derd ü mihnetde niçe zâr olayım

1810.Vakti-durur derdümi kim bilesin
Çün devâsı sende-durur kılasın

1811.Sen yukaru ben aşagadın yaña
Nideyim kim nâlem irişmez saña

1812.İşbu sözi söyler-iken kıldı âh
Bir gazel ber-fevr inşâ itdi şâh

GAZEL GÜFTEN-İ İSKENDER

1813.İy yüzi tâze gül-istân kandasın
Gözi nergis zülfî reyhân kandasın

1814.Dişleri lü'lü-yi lâlâ kanısın
Tutagı la'l-i Bedahşân kandasın

1815.İy kamu zahmuma merhem kanısın
V'iy kamu derdüme dermân kandasın

1816.Fürkatüñüñ hasretinden teşne dil
Yanaram iy Âb-ı Hayvân kandasın

1817.Senden ayru düşdi cânım mihnete
Kandasın iy râhat-ı cân kandasın

1818.Zülfüñe kayd oldum u bir gün baña
Dimedüñ kim iy perîşân kandasın

1819.Bunca müddetdür gül-istândan ırâh

Âhir iy mürğ-i seher-hân kandasın

1820. Anuñ adı-y-çun ki feyz itdükde cûd
Cümle âlem andan almışdur vücûd

1821. Halk anuñ u kamunuñ Ol Hâlık'ı
Rızk anuñ u kamunuñ Ol Râzık'ı

1822. Akl u nefis ü mâh u mihrüñ hakkı-çun
Bu nücûm-ıla sipihrüñ hakkı-çun

1823. Ol Musavvir hakkı-çun kim bî-kalem
Zulmet içre nakşlar'ider rakam

1824. Kim gören ol nakşı ser-gerdân olur
Akl aña vâlih ü hayrân olur

1825. İki kevn ü dört erkân hakkı-çun
Üç mevâlîd-ile insân hakkı-çun

1826. Mustafâ hakkı vü anuñ şer'i-çün
Dîn yolında anuñ asl u fer'i-çün

1827. Gözlerüm mısâhınıñ hakkı-y-ıçun
Dillerüñ miftâhınıñ hakkı-y-ıçun

1828. Zülfler akla cünûn salduğı-çun
Gamzeler câna füsûn kılduğı-çun

1829. Kaşlaruñ ol anberîn-mihrâbı-çun
Leblerüñ ol gevher-i sır-âbı-çun

1830. Gurbete düşenlerüñ kan yaşı-çun
Âşık olanuñ yüregi başı-çun

1831. Yârdan ayru düşenler cânı-çun
Gözlerinden dökilen tûfân-ıçun

1832. Kim murâdum sensin ü ümmiyyetüm
Senden ayru dahı yohdur niyyetüm

1833. Bu kamusın çünki tahrîr itdiler
Oh-ıla Gülşâh'a karşı atdılar

1834. Gülşah ol dem bir kulını virbidi
Var ol ohı tîz baña getir didi

1835. Ol yazılı ohı çünkim buldılar
Ne kim anda yazılı-y-dı bildiler

- 1836.Gülşah ol ohı görüben kıldı âh
Did'ayaguñ tozın'irem mi i şâh
1837.Bir dahı Yâ-Rab görem mi yüzüñi
Yâhud işidem mi şîrîn sözüñi

***HÂNDEN-İ GÜLŞÂH NÂME-İ İSKENDER VE CEVÂB-I NÜVİŞTEN-İ Ū
BE-NÂME-İ DİĞER***

- 1838.Agladı şöyle ki ebr-i nev-bahâr
Gözleri yaş'itdi yiri lâle-zâr
1839.Giryesinden toldı yiryüzi figân
Tutdı âhından gönül sakfı duhân
1840.Derd-i dilden şol kadar kan agladı
Kim kamu halkuñ yüregın tagladı
1841.On iki gün şöyle bî-hûş oldu ol
Kim görenler sanur-ıdı öldi ol
1842.On iki günden başına geldi hûş
Girü itdi yüreginüñ kanı cûş
1843.Su-y-iken kan oldu gözindeki yaş
Münfecir oldu yüregindeki baş
1844.Fasl fasl ol nâmeyi min-küllü bâb
Ohıyıban yazdı ol demde cevâb
1845.Evvel-i nâme be-nâm-ı Kirdigâr
K'ol-durur halka kamu Perverdigâr
1846.Işk anuñ u âşık u ma'sûk Ol
Bu sözi añla bulasın bellü yol
1847.Başlara sevdâyı Ol-durur salan
Bunı Ferhâd u anı Mecnûn kılan
1848.Hüsn-il'Oldur yüzleri tahsîn iden
Bunı Leylî vü anı Şîrîn iden
1849.Didi bundan soñra kim iy pâdişâh
Saña taht olsun sipihr ü tâc mâh
1850.Râm olsun hükmüñ altında felek
Gökde Hak hâfiz saña yirde melek
1851.Düşmenüñi Hak ciger-hûn eylesün
Devletüñi rûz-efsûn eylesün

- 1852.Müddet-ile kamu nesne eksilür
Binüm odum artar u tâze olur
- 1853.Eyle kodum ışk yolına kadem
Kim baña birdür vücûd-ıla adem
- 1854.Işk hüznine benem Ya'kûb ben
Hicr derdine benem Eyyûb ben
- 1855.Ger Zekeryâ-vâr bıçgu-y-ıl'ölem
Hâşa kim yoluñda ayruhsı olam
- 1856.Varlıgımı iderem sende fenâ
Kim senüñ ola hemîn mutlak bekâ
- 1857.Katre ider cehd kim bahra vara
Tâ ki varlığın girü bahra vire
- 1858.Her küdüretden ola orada pâk
Olmaya dahi aña pâ-bend hâk
- 1859.Ben dahi olam diyü benlikden arı
Mahv olup sende yog eyledüm varı
- 1860.Tende cânsın u iki gözümde nûr
Bahtsın başumda gönülümde sürûr
- 1861.İşideliden Belî ahd-i Elest
Olmışam ışkuñda key hayrân u mest
- 1862.Baña kim zülfüñ beni itdi esîr
Kimsenem yoh girü sensin dest-gîr
- 1863.İRte gice yollaruñı gözlerüm
Kim gelesin göre sini gözlerüm
- 1864.Cânumı idem yoluña hâk-i râh
K'atuñ ayagina yüz sürem i şâh
- 1865.Sinüñem hoşdur yirüm yüce_eylemek
Her ne kim sinüñ-durur yüce gerek
- 1866.Nola kapuñdan togup devlet günü
Şöyle kim şeb-nem yüceldürse beni
- 1867.Topragun çün zerresine gün irer
Götürüp yirden anı ulvî ider
- 1868.Anı k'ol cân-ıladur saña kenîz
Bahtı yücelüp nola olsa azîz

1869.Çünkü hidmet-kârdur şâha alem
Ser-firâz olup göge çıka ne gam
1870.Olmışam ben işkuñuñ dîvânesi
Hem cemâlûñ şem'inuñ pervânesi

1871.Sabr iderem derde ne çâre kılam
Çünkü başuma bunu yazdı kalem

1872.Işka dermân sorana nedür cevâb
Sabrdur v'Allâhü a'lem bi's-savâb

1873.Söz arasında ki Gülşah söyledi
İşbu nazmı sûz-il'inşâ eyledi

GAZEL

1874.Âşık oldum hâlüm añlamaz habîb
Derd-mendem derdümi bilmez tabîb

1875.Görse ol zülfi ki ben akdindeyim
Ola mecnûn her hamında biñ lebîb

1876.Sinüm-içün bini bî-gân'itdi hîş
Kaldum uş kavmüm arasında garîb

1877.Bu aceb kim baña cüz' derd ü ta'ab
Olmadı hüsnüñ nisâbından nasîb

1878.Gâh hâcib cevri ider cânuma
Gâh cevri ider baña ayni rakîb

1879.Karşuña efgân iderem rûz u şeb
Nitekim gül karşusına andelîb

1880.Hâcetüm yüzüñ saçuñdur subh u şâm
Kim görem hayr-ıla v'Allâhü'l-mücîb

1881.Hakk-ı Ma'bûd-u İlâh-ı Zü'l-Celâl
Kim anuñ mülkine yoh-durur zevâl

1882.Akl anuñ künhinde ser-gerdân-durur
Nefs idrâkinde hem hayrân-durur

1883.İşbu gûn-â-gûn işi Oldur düzen
İşbu reng-â-reng nakşı Oldur yazan

1884.Göge yılduzları itmişdür bezek
Yir bizegi-y-çün düzer dürlü çiçek

1885.Lâlenüñ yüzini Ol rengin ider

Sünbülüñ zülfini Ol müşğın ider

1886.Bülbüli gül ışkın'Oldur söyleden
Kumriya Oldur terennüm eyleden

1887.Subh yili hakkı-y-ıçun Ol müdâm
Câna virür yâr zülfinden peyâm

1888.Gül çirâğı-y-la şükûfe şem'i-çün
Nergisüñ gözi benefşe sem'i-çün

1889.Lâle yüzi suyu-çun k'ider ayân
Yañagından dil-berüñ rûşen-nişân

1890.Gamzes'ohı-y-çun ki an'irmez gümân
Kaşı-y-ıçun k'oldı anberden kemân

1891.Ol 'izâr-ıla cebîn ü çehre-çün
Ya'ni mâh u müşterî vü mihr-çün

1892.Cân devâsı vü leb ü dendân-ıçun
Ya'ni la'l ü lü'lü-yi Ummân-ıçun

1893.Gün hakı k'oldur yüzinde bir hayâl
Dün hakı k'oldur saçından bir misâl

1894.Binüm içümdeki Ya'kûb âhı-çun
Yâr eñegindeki Yûsuf çâhı-çun

1895.Mustafâ üstinde turan ebr-içün
Mihnete Eyyûb iden sabr-ıçun

1896.Ol resûlüñ pâk rûhı hakkı-çun
Nusret ü feth ü fütûhı hakkı-çun

1897.K'ol-durur cehdüm ki kapuña irem
Ka'be bigi ol işige yüz sürem

1898.Yazuban atdurd'anı İskender'e
K'ohıya ma'nîsine nedür ire

1899.Çünkü bu ahvâli bildüñ ser-te-ser
İşid imdi Gülşah'ı kim nic'ider

1900.Nâmeyi yazup yüregi itdi cûş
Şol kadar agladı k'andan gitdi hûş

1901.Gördiler hâdimle dâye Gülşah'ı
Kim virür cân ger göremezse şahı

1902.Virmesün diyü gam u hasretle cân
Perniyândan düzdiler bir nerdübân
1903.Nerdübân burcuñ boyınca-y-dı temâm
Çünkü gitdi nûr irişdi zulâm

1904.Nerdübânı burca muhkem itdiler
Üçi dahı andan inüp gitdiler

1905.Geldi hâdem şâha irürdi haber
Ol haberden şâd oldı tâc-ver

1906.Didi bu gün oldum uş ben bahtiyâr
Kim getürdi devlet-ile bahtı yâr

ÂRÂSTEN-İ İSKENDER SARÂY-RÂ BE-GÜLŞÂH

1907.Gülşah-ıçun düzdi bir halvet-serây
Kim hümâyûn-ıdı vü zıll-i Hümây

1908.Dürr-ile yâkût u la'l-i bî-kerân
Virdi Gülşâh'a şah-ı sâhib-kırân

1909.Atlas-u eksûn u envâ'-ı harîr
Anber ü müşğ ü zübâd-ıla abîr

1910.Dahı dürlü nesnelere k'olur bezek
Şol kadar virdi olara kim gerek

1911.Lîki Gülşâh'ıñ katına varmadı
Bir nikâb açup cemâlin görmedi

1912.Çünkim irişdi Zeresb'e bu haber
Cânına oldı be-gâyet kâr-ger

1913.Âkıbet çâre ol oldı kim gele
Ol dahı İskender'e çâker ola

1914.Çünkü İskender katına geldi ol
Dürlü ihsân u nüvâziş buldı ol

1915.İdüben anı mukarreb tâc-bahş
Kıldı aña mülk ü tahtu tâc bahş

1916.Virdiler ol arada âyîn-ile
Gülşah'ı İskender'e kâbîn-ile

1917.İki âşık birbirini buldılar
İrübên maksûda hoş şâd oldılar

1918.Işk yolını çü togrı vardılar

Lâ-cirem maksûdlarına_irdiler

1919.Düzdi bir bezm ol gün İskender ki mihr
Kaldı hayrân aña şöyle kim sipihr

1920.Bahş itdi halka çoh tâc u kemer
Kal'a vü iklîm ü mülk ü genc ü zer

1921.Hiç yohsul Sîstân'da kalmadı
Kim şahuñ mâlı-y-ıla bây olmadı

1922.Şâhı Hakk ışk-ıla itdi ibtilâ
K'ol belâ-y-ıla ola ehl-i velâ

1923.Hâk eczâsından arınmaz zeheb
İrmeyince nârdan aña leheb

1924.**AHMEDÎ** bu söz ki saña söyledi
Işk râzıdur ki rûşen eyledi

1925.Cân-ıla her kim bu sözi diñleye
Işk esrârın kemâhî añlaya

1926.**PENC-GENC'**inde **NİZÂMÎ** iki söz
Diye mi bu resme hem bir yaluñuz

1927.Işk râzı kamu bu defterdedür
Bundan ayru her ne defter varsa dür

1928.Leyli vü Mecnûn ger olalar diri
Heykel ideler başa bu defteri

1929.Işkda Ferhâd'dan ilte sebak
İşbu defterden ohıyan bir varak

1930.**IŞK-NÂME** gerçi kim pes çoh-durur
Lîki bunuñ bigi hergiz yoh-durur

1931.Ol ki Cimşîd-ile Hûrşîdi aña
Unıda anı bu söz irürs'aña

1932.İki günde kim işümi yazmışam
İşbu nakş-ıla bunu ben yazmışam

Dünyada kimdür meger Mansûr ola
Kim ne meşr ebdendür üşbu söz-ile

1933.Dercdür bu dürcde iy pür-hüner
Altı yüz dahı biş dâne güher

1934.Subh-dem kim bülbül ider zezeme

Bir kadeh sun k'ura ta'ne zezeme

DÂSTÂN-I AZM-İ İSKENDER-BE-FETH-İ MEMÂLİK-İ HİNDÛSTÂN

1935.Çün bezedi la'l-ile şâhı nesîm

Âkıl ol k'ıçe ne zer koya ne sîm

1936.Çün gidersin ko bu çoh âmâluñı

Yi yidür kimseye koma mâluñı

1937.Çünkü bâğı bizedi erdîbehişt

Bâde iç kim bâdesüz olmaz Behişt

1938.Işk dâdın çün yahasın bâde virür

Ömr k'ol bî-bâdedür bâda varur

1939.Hızr bigi hulle geydi mürğ-zâr

Nagme-i Dâvûd ider her mürğ zâr

1940.Çün çemende oldı bülbül nagme-sâz

Sen dahı iy yüzi gül kıl bezme sâz

1941.Ka'be-i dilde küdüretdür riyâ

Câm-ı meyden iste isderseñ safâ

1942.Vakt-i gül nûş eyle câm-ı lâle-reng

Gonca gibi eyleme göñlüñi teng

1943.Râhat-ı cân mı gerek iç câm-ı şâd

Derd-i dildür eyleme encâmı yâd

1944.Nergisî kızarmış-iken bâğ u verd

Kıldı ömr encâmına bahdugı zerd

1945.Lâlenüñ bugün ki hurrem oldı bâğ

Âkıbet fikri içine urdı dâğ

1946.Bir nefesde baglu-durur bu hayât

Pes nic'isdesün kişi andan sebât

1947.Ko sözi mutrib al ele çengüñi

Râst eyle perdede âhengüñi

1948.Isfahân'ı Rûm'da eyle eyle sâz

Kim muhayyer ola sûzuñdan hicâz

1949.Bir mesel nazm eyle bize tolu pend

Kim olavuz gevherinden sûd-mend

1950.Çün düketdi dehr Dârâ devletin

Tutdı şâh İskender anun nevbetin

ÂGÂZ-I DÂSİTÂN

- 1951.Nevbet-iledür cihânda saltanat
Kimseye dâim virilmez memleket
- 1952.Tahtdan düzetdiler Dârâb'a dâr
Boyun urmakdur felek işi ya dâr
- 1953.Yirde ne var ger tefahhus kılasın
Her kademde bunca Dârâ bulasın
- 1954.Çarh râzın hiç kimse bilmedi
Kimsene bu derde dermân kılmadı
- 1955.Uydılar İskender'e İrânîler
Bende-fermân oldılar Tûrâniler
- 1956.Bir melik oldu ki hergiz rûzigâr
Görmemişdi aña benzer tâcidâr
- 1957.Şâd andan olur-ıdı hazm ü azm
Dâd andan alur-ıdı bezm ü rezm
- 1958.Devlet-ile tâze oldu tâc u taht
Hışmet-ile ziyet aldı mülk ü baht
- 1959.Her nekim kılursa adl ü dâd-ıdı
Ger ulu ger kici andan şâd-ıdı
- 1960.İffet ü ilm ü şecâat adl ü cûd
Dâyim iş itmiş-id'ol âlî-vücûd
- 1961.Her ki diler mülk'ola vü ola şâh
Mâl gerek aña vü bî-had-sipâh
- 1962.Kim sipâhı-y-la olur hasm olsa kam'
Mâl-ıla olur sipâh olursa cem'
- 1963.Mâl ele gelse imâretle gelür
Ger imâret olsa adl-ile olur
- 1964.Adlsüz hergiz imâret olmaya
Çün imâret yoh imâret olmaya
- 1965.Adldür kim beglige bünyâd olur
Her binâ bünyâd-ıla âbâd olur
- 1966.Zulm ider yavuz melikler adını

Zulm yihar memleket bünyâdını

1967.Adl-ile mülk alınur u tâc u taht
Zulm-ıla dîn yihılur mülk ü baht

1968.Çün ulu-y-ıdı Sikender himmeti
Dah'ululamah diledi devleti

1969.Kişi her ne bulsa himmetden bulur
Kimse himmet kadri nedür ne bilür

1970.Diledi kim Hind mülkini ala
Sinde dahı cümle hükminde ola

1971.Hind iklîmine çekdi bir sipâh
Şöyle kim örtüldi tozdan mihr ü mâh

1972.Yiryüzini tutdı gûn-â-gûn direfş
Hem alemler reng reng ah u benefş

1973.Ra'd bigi kûs çün kıldı hurûş
Leşker itdi Bahr-ı Ahdar bigi cûş

1974.Hind'e var-ıdı bir şâh adı Keyd
Kim kamu begler aña olmış-ıdı sayd

1975.Mâl u mülk ıssı idi ol şehriyâr
Leşkerine yoğ-ıdı hergiz şümâr

1976.Anuñ elinde-y-di nısf-ı mülk-i Hind
Fûr hükminde-y-di nısf-ı Hind ü Sind

1977.Bir gice düşde görür k'ol nîg-rây
Rûmdan rûşen olup togrı bir ay

1978.Şark u garb anuñ-ıla pür-nûr olur
Cümle yılduzlar aña secde kılur

1979.Bir mu'abbir var-ıdı Mehrân adı
Keyd şâh ol düşi Mehrân'a didi

1980.Didi Mihrân Rûm'dan bir şehriyâr
Kopup olısar cihânda tâcidâr

1981.Şark u garba cümle sultân olısar
Hânlar aña bende-fermân olısar

1982.Her ki girmeye anuñ fermânına
Kasd itmiş ola kendü cânına

1983. Her kime k'ide inâyet Kırdigâr
Aña ısyân iden olur hâr u zâr
1984. Her yigirmi yılda olmuşdur ayân
Kim Zühalle Müşterî_iderler kırân
1985. Çünki her burc üzre seyr-ile müdâm
Bir kırân iderler ol iki temâm
1986. Zâhir olur bir ulu sâhib-kırân
Kim olur fermânı âlemde revân
1987. Dört kırân her burcda idilse müdâm
Hem tokuzyüz yıl olınmışdur temâm
1988. Anda edyân u şerâyî' nesh olur
Hak dah'ayruh şer'ü dîn peydâ kılur
1989. Çün hisâb-ıla ol iki bî-keâm
Bir kırân her burcda itdiler temâm
1990. Kim ikiyüz kırh oldı ol dürüst
Eski devletler olurlar cümle süst
1991. Kopısar sâhib-kırân bir ulu şâh
Olısar ana müsahhar mihr ü mâh
1992. Dilegince döniser bu âsümân
Hem murâdınc'olısar devr-i zemân
1993. Devleti anuñ çü ser-sebz olısar
Eski devletler ki vardur solısar
1994. Devlet isdeyen anı bulmah gerek
Cân-ıla emrüne kul olmah gerek
1995. Ol çirâğı kim Hudâ rûşen kıla
Söynük isdeyen günü bî-nûr ola
1996. Olmasun bed-hâh-ı devlet olasın
Devlete kul ol ki devlet bulasın
1997. Bir zemân bu hâl üzre çün sipihr
Devr idüben geldi gitdi mâh u mihr
1998. Keyd şâha virbid'İskender selâm
Tuhfe vü hem nâme vü togrı peyâm
1999. Şöyle yazmış nâmede ol şehriyâr
K'evvel-i nâme be-nâm-ı Kırdigâr

- 2000.Sâni'-i âlem Kadîm-i Lem-yezel
Kim anuñ sun'ında yoh-durur halel
- 2001.Giceyi gündüz kılan oldur yakîn
Gündüzi gice iden oldur hemîn
- 2002.Ol virür kime dilerse tâc u taht
Ol alur kimden alursa mülk ü baht
- 2003.Devletüñ tâcın virene dâd-ger
Hizmet-içün bagla ney bigi kemer
- 2004.Her kişi k'ide anı Hakk ihtiyâr
Aña hidmet iden olur bahtiyâr
- 2005.Her ki bağlamaya ney bigi kemer
Hizmetine devletüñ olur kem er
- 2006.Keyd şâha baht eger hem-râh ola
Sıdk-ıla ol baña devlet-hâh ola
- 2007.Kendüzünü kullıga arz eyleye
Tâatumı cânına farz eyleye
- 2008.Çün bize Hakdan virildi tâc u taht
Hidmet ide bize kimde varsa baht
- 2009.Çün bu nevbet bizdedür bu taht u tâc
Bize virbinmek gerek bâc u harâc
- 2010.Bize virilmek gerek iklîm-i Hind
Hem bizüm olmah gerekdür mülk-i Sind
- 2011.Bahr u ber bizüm-durur hem şark u garb
Sâm Rüstem idemez bizümle harb
- 2012.Kılıcum bir ejdehâdur heft-ser
Kim kılur şîr ü peleng andan hazer
- 2013.Okımuñ peykânıdur peyk-i kazâ
Kim kader bigi irer kılmaz hatâ
- 2014.Her ki diler ser-firâz ola müdâm
Kullıguma serv bigi_ide kıyâm
- 2015.Her ki ney bigi olam dir sebz-ser
Hidmetüme bağlaya dâ'im kemer
- 2016.Pâdişâhlîh ister olur-ısa Keyd
Baña kul olsun ola ol aña sayd

- 2017.Yohsa iltem ol diyâra bir sipâh
K'ola tozdan ay u gün yüzi siyâh
- 2018.Nâmeyi çün Keyd ohıdı temâm
Göñline korhu düşürdi ol peyâm
- 2019.Bildi kim İskender-ile itse ceng
Cân u baş elden gider hem nâm u neng
- 2020.Kendüden yigi-y-l'ide her ki sitîz
Kendü başına belâ irüre tîz
- 2021.Çünkü bildi ceng-il'iş olmaz temâm
Rây-ıla tedbîr itd'ol nîg-nâm
- 2022.Rây-ıla hâsıl olur cümle ümîd
Râydur baglu kapulara kilîd
- 2023.Var-ıdı dört nesne anuñ pes acîb
K'olmamışdı kimseye biri nasîb
- 2024.Var-ıdı katınd'anuñ bir feylesûf
Kim felek râzına bulmışdı vukûf
- 2025.Hey'etini gökleriñ bilmiş-idi
Hükmini yılduzlarıñ kılmış-ıdı
- 2026.Bir rasad-bend-idi kim mâh-ıla mihr
Nice yürürler bilürdi vü sipihr
- 2027.Var-ıdı hem anda bir ulu tabîb
Tıbb aña ilm ü amel olmuş nasîb
- 2028.Kamu derd iderdi dermân cüz' ecel
Kim anı def'itmege yohdur hıyel
- 2029.Ol ki her mansûbeye çâre bilür
Bir piyâde-y-le ecelde mât olur
- 2030.Kulı-y-ıdı Keyd'üñ ol Îsî-kadem
Kim virürdi tenlere cân ürse dem
- 2031.Tıfl-iken anı satun almış-ıdı
Ulalınca terbiyet kılmış-ıdı
- 2032.Bir dah'anda var-ıdı bir ulu câm
Cem dah'andan hîç işitmemişdi nâm
- 2033.Dinle câmun vasfını kim bilesin
Hayrete varup ta'accüb kılasın

- 2034.Yaz u kış andan içerlerdi müdâm
Âb u bâde hergiz olmazdı temâm
- 2035.Yüz yıl andan içseler âb u şarâb
Ne şarâb eksilür-idi vü ne âb
- 2036.Bâdesi ne bâde kim yâkût-ıdı
Suyı şöyle hoş ki câna kût-ıdı
- 2037.Bir kızı dahı var-ıdı_anuñ ki mihr
Meh bigi hüsnine bağlamışdı mihr
- 2038.Şehr-bânû-y-ıdı ol hâtûn-be-nâm
Şâhlar olmışlar-ıdı aña gulâm
- 2039.Her ki bir kez göre-y-ıdı_ol dil-beri
Cân olurdı andan u hem dil berî
- 2040.Gamzesi oh kaşı yâ zülfî zirih
Ol zirihde müşg-i terden yüz girih
- 2041.Yüzi cennet kâmeti Tûbâ-hırâm
Tutağı Kevser dili tûtî-keâm
- 2042.Hem letâfetde lebi yâkût-ı nâb
Hem tarâvetde dişî dürr-i hoş-âb
- 2043.Çün sabâ kılurdı zülfine güzer
Toldururdı bâg ceybin müşg-i ter
- 2044.Saçı şeb-gûn ü yüzi gündüz misâl
Sun' işit kim düzmiş-ıdı Zü'l-Celâl
- 2045.Zülfine reyhân anuñ hayrân-ıdı
Vasl-ı rûha revh-ile reyhân-ıdı
- 2046.Lâle yüzi mushafından bir varak
Gül hayâsından anuñ gark-ı arak
- 2047.Çün düşerd'anuñ tenine mâhitâb
Ay odından gıcey'ıderdi nikâb
- 2048.Gözi efsûn öğredürdi Bâbil'e
Sihri bilür-ıdı fasl u bâb-ile
- 2049.Fıkr-ile tedbîri böyle kıldı Keyd
K'ide bu dörd-ile Zülkarneyn'i sayd
- 2050.Hem ide kendüyi şeh hükmüne râm
İrte gıce hizmetind'ola müdâm

2051. Subh big'irte kapusına gele
Şem'bigi gice hidmetde ola
2052. Üşbu râyı begenüp mîr ü vezîr
İttifâk eylediler bürnâ vü pîr
2053. Kim kamu Keyd'ile dem-sâz olalar
Hayr u şerde aña enbâz olalar
2054. Eyledi Mihrân'ı pes Keyd ihtiyâr
İlçilige k'ol-ıdı dâna-yı kâr
2055. Key fasîh ü kâr-dân gerek Resûl
Kim ola her söz ki söyleye kabûl
2056. İlm ü aklı çoh ola vü hırsı az
Gâlib olmaya aña âz u niyâz
2057. Hırs ehli kimseye itmez vefâ
İlm olmayanda hod olmaz safâ
2058. Nedür ilçî pâdişehlerden lisân
Pes gerek kim ola ol ehl-i beyân
2059. Kim sözi yirlü yirince söyleye
Her sözüñ ma'nîsini key añlaya
2060. Şimdi ilçilik ne olmışdur amel
Kim aña lâyıq görildi her dagal
2061. Lâ-cirem düşdi cihâna şeytanat
Buña irdi görür-isen saltanat
2062. Didi ilçiyê ki gelse şehriyâr
Mâl u genc anuñdur u şehr ü diyâr
2063. Lîki bizi sıdk-ıla dilerse şâh
Kim aña bende olavuz nîg-hâh
2064. Bizüm-ile eylesün bir ittisâl
Uş anuñ tâc-ıla taht u mülk ü mâl
2065. Şehr-bânûyı alursa tâc-ver
Cümle aña kul olur beste-kemer
2066. Feylesûf-ıla tabîb ü dahî câm
Şâhuñ u bir dahî şâha hem gulâm
2067. Virbidi Mihrân-ıla ol bî-şümâr
La'l hem yâkût u dürr-i şâh-vâr

2068. Geldi şâha didi peygâmı resûl
Şâh işitdi cümlesin kıldı kabûl
2069. Şehr-bânûdan işitmişdi haber
Var-ıdı gönlinde ıskından eser
2070. Gözden öñdin çün olur âşık kulah
Işka bir-durur yahın-ıla ırah
2071. Çünki işbu söz araya düşdi şâh
Diledi kim cüft ola aña mâh
2072. Işk-durur râm iden ser-keşleri
Işkdur pâmâl iden başları
2073. Işk-durur pehlevânları yıhan
Işk-durur cânları oda yahan
2074. Zülf dâmıdur ki kılur aklı kayd
Âhu gözdür k'ider arslanları sayd
2075. Cânları kılur zenahdân habs-i çâh
Hâl ider âşıklarun günin siyâh
2076. Virbidi pes Tûs-ı Keyd'e şehriyâr
K'ola bânûya anuñ-çun hâstâr
2077. Virdi ilçilere bî-had sîm ü zer
Atlas u dîbâ-yı Rûmî vü güher
2078. Pâdişeh kim Hâlikuñdur sâyesi
Ne-durur dâd u dihiş ser-mâyesi
2079. Kankı gevher k'anda yoh-durur kerem
Akl mi'yârında degmez bir direm
2080. Halka kalbi bigi düşmendür kerem
Halk içind'aña gıdâ nedür görem
2081. Bu kerem Sî-mürg olmuşdur meger
Kim vefâ bigi yog andan bir eser
2082. Dünyada biz bir kerîme irmedük
Bir eser dahı keremden görmedük
2083. Var diyen bu asr ehlinde kerem
Baña göstereşün kim anı ben görem
2084. Çün yiyüp yidürmeye ehl-i ni'am
Himmet ü rütbetde yig andan ne'am

- 2085.Çünk'ele gire bu gencü zer ü sîm
Devlet anuñ k'adını ide kerîm
- 2086.Ola bed-baht ol ki dünyâlik bula
Anı sahlâyup adın nâ-kes kıla
- 2087.Gerçi dirler mâl u zer çoh olsa yig
Issı nâ-kes olıcah yoh olsa yig
- 2088.Döndi birkaç günden ilçi şâd-kâm
Keyd'e iletdi Sikenderden peyâm
- 2089.Didi andan soñra şâhuñ rütbetin
Tâc u tahtın u şükûh u hışmetin
- 2090.Şerh itdi dâniş ü ferhengini
Vasf kıldı heybet ü âhengini
- 2091.Çün Sikender vasfını işitdi Keyd
Işkına cân u göñülden oldı sayd
- 2092.Girdi gencinden çıhardı sîm ü zer
La'l ü yâkût u dahı dürr ü güher
- 2093.Fîl yüz zencîr ü ester yüz katâr
Çulları çînî-harîr ü zer-nigâr
- 2094.Yüz katâr ester dahı zerrîne-na'l
Yükleri yâkût u hem dürr-ile la'l
- 2095.Atlas-ı elvân u ecnâs-ı harîr
Ûd-ı hâm u anber ü müşg ü abîr
- 2096.İkiyüz kul dahı cümle mâh-rûy
İkiyüz dahı karavaş müşg-mûy
- 2097.Bir murassa' tâc-ıla taht u kemer
Hem cevâhirlle bezenmiş mehd-i zer
- 2098.Mehd-i zer içinde dürr-i şeb-fürûz
Kim yüzinden nûrı vâm alurdi rûz
- 2099.Virbidi İskender'e ol Keyd şâh
Bunca dahı ni'met ü genc ü sipâh
- 2100.Şehrden ol menzil irah ol zamân
Şâh bir sahrâda tutmışdı mekân
- 2101.Kim hevâsı Huldden ürürdi dem
Reşk iderdi rengine Bâg-ı İrem

- 2102.Topragı anber suyu azb ü furât
Lâle vü nesrîn-idi anda nebât
- 2103.Sebzeden topragı mînâ-reng-idi
Gülleri ferseng-der-ferseng-idi
- 2104.Her yaña bir cûy-bâr-ıdı revân
Tâze olurdı hevâsından revân
- 2105.Bülbül anda mutrib-i nev-rûz-ıdı
Şâhid-i gül bûsitân-efrûz-ıdı
- 2106.Çünki dergâhına şâhuñ vardılar
Baş urup işige bûse virdiler
- 2107.Hurrem ü şâd oldı ol gün tâcidâr
Kıldı anda çoh zer ü gevher nisâr
- 2108.Bir toy itdi şeh ki anuñ bigi mihr
Görmemişdi dönelden bu sipihr
- 2109.Tâc-ı la'l urinuban pîrûz-baht
Gül bigi pîrûzeden düzetdi taht
- 2110.Feylesûf-ıla tabîb-i hurde-dân
Şâh õñine kodılar câmı ayân
- 2111.Şâh-ı Cem-devlet eline aldı câm
Bâde nûş itdi vü oldı şâd-kâm
- 2112.Baht rûz-efzûn u devlet nev-cüvân
Erganûn kulahda elde ergavân
- 2113.Sâkiyâ sungıl kanı ol Câm-ı Cem
Ola kim gide gönülde jeng-i gam
- 2114.Fursatı fevt itme bilürken ki dehr
Niçe bizüm bigileri kıldı kahr
- 2115.Tîg urur cânuña her subh mihr
El boyar kanuña her ahşâm sipihr
- 2116.Çarh yüzbin dürlü döner her nefes
Niç'inansın kiş'anuñ ahdine pes
- 2117.Devr birkaç döndi şâh-ı mey-perest
Oldı câm-ı la'l-gûnden nîm-mest
- 2118.Virdi ol dem halka çoh tâc u kemer
Kal'a vü iklîm ü şeh ü sîm ü zer

- 2119.Bezmde şeh gerek ola tâc-bahş
Gâh iklîm ide vü geh genc bahş
- 2120.Rezmde şeh gerek ola tîz-berk
Gâh andan garb yana gâh şark
- 2121.Şeh mi diyeler aña kim vakt-i bezm
Ola bed-mest ü ide meclisde rezm
- 2122.Şeh mi k'îşi rezmde ola girîz
Hasm-ıla itmeye ölince sitîz
- 2123.Zahmdan korhibanuñ yüz döndüre
Yâ varıban düşmene baş indüre
- 2124.Düşmen'inen baş yig ol kim kesile
Ya oda yana vü yâhûd asıla
- 2125.Kesilen başuñ ölümü bir olur
Düşmen'inen biñ kez in bir demd'ölür
- 2126.Şimdi şahlıh ol ki mâlı direler
Ne yiyeler ne kişiye vireler
- 2127.İy yavuz devlete kim biz irmişüz
Dûnleri milke melikler görmişüz
- 2128.Ol ki_bir şahn'olmaga degül sezâ
Pâdişah olmuş-durur şimdi bize
- 2129.Bülbül ü tâvûsdan boşaldı bâg
Dutdı olaruñ yirini bûm u zâg
- 2130.Aldı dimne yirini arslanlaruñ
Dutd'ayular bîşesin kaplanlaruñ
- 2131.Key erenler gitdi kaldı mülk boş
Yavuz işlüler diyârı tutdı uş
- 2132.Bâg gül yirinde diken bitürür
Ahmedüñ yirinde Bû Cehl oturur
- 2133.İsi vü Meryem piyâd'ider sefer
Tazı atlar binür uş hergün har
- 2134.Bir kerânsuz söze niçe kalalum
Girü İskender sözine talalum
- 2135.Çünkü garba varur-iken şâh-ı şark
Nîl-gûn-deryâda nâ-geh oldı gark

2136. Gaybdan biñ şem'oldı âşikâr
Lâjverdî sakfı kıldı zer-nigâr
2137. Girdi hurrem-dil şeb-istânına şâh
Gördi oturmuş şeref burcında mâh
2138. Bahdı gördi oturur bir zühre-çih
K'olur aña müştêrî mâh-ıla mihr
2139. Didi Yâ-Rabb üşbu eyvân mı yâ bâg
Bu dür-efşân-şem' mi yâhûd çerâg
2140. N'ireden geldi aceb bu nesl-i hûr
Kim şeb-istân toldı yûzi-y-ile nûr
2141. İşbu dürri sahlayan ne dürc ola
İşbu ayı gösteren ne bürc ola
2142. Gicede tâli' olur mı âfitâb
Yâ güneş dutar mı anberden nikâb
2143. Kanda olmuş tâze işbu nev-bahâr
Kimden almış rengi işbu lâle-zâr
2144. Meh kenârında karâr eyledi şâh
Şâh-ıla dahı hoş ârâm itdi mâh
2145. İrdi ol ser-tîz elmâsa göher
Ahdı ol dür-dânededen yâkût-ı ter
2146. Ol gice fi'l-cümle şâh-ı kâm-yâb
Cennete girmişdi virmedin hisâb
2147. Bulmuş-ıdı her murâda dest-res
Çün gice gitdi vü subh ürdi nefes
2148. Mâh magribden yaña eyledi seyr
Şark şem'inden safâ aldı bu deyr
2149. Çıhdı tag üstine ol zerrîn-alem
Sâyebânın yine devşürdi zulem
2150. Şâh turdı gasl idüp kıldı namâz
Arz itdi Mâlikü'l-mülke niyâz
2151. Kesme Hâlıkdan niyâzuñ bir nefes
Kim bulasın her murâda dest-res
2152. İt n'iderseñ kullığından kalmagıl
Kul-ısañ kullığı terkin kılmagıl

- 2153.Şâh iki gün turdı halvetde temâm
Çünkü açıldı iki günden zalâm
- 2154.Bir kadeh yag toldurup şâh-ı cihân
Feylesûf-ı Hinde virbidi nihân
- 2155.Kim bu yagı cümle dürtinsün hekîm
K'ola yol rencinden endâmı selîm
- 2156.Sancar ol yaga biñ igne feylesûf
Şâha virbir çün bulur sırra vukûf
- 2157.İgnelere şâh çün ider nigâh
Düzedür bir âyine rûşen azîm
- 2158.Ol hekîme virbir ü anı hekîm
Düzedür bir âyine rûşen azîm
- 2159.Şâha virbir şâh anı bî-direng
Nem yire kor tâ ki tuta cümle reng
- 2160.Feylesûfa virbir ü ol nâm-ver
Çünkü ider jengine anuñ nazar
- 2161.Sâfi ider saykal urdurup aña
Pes girü virbir anı şehden yaña
- 2162.Şâha geldi rûşen olmuş âyine
İlm-ile çoh iş biter her-âyine
- 2163.İlm-ile buldı saâdet her vücûd
Âdem'e ilmi-y-çün itdiler sücûd
- 2164.Pes hekîm katına iletirdi şâh
Buldı dâna şeh katında dest-gâh
- 2165.Dest-gâha lâyıkk ehl-i ilm olur
Kanda kim sadr ol'anı âlim alur
- 2166.Cehl ehli câha lâyıkk olmaya
Câhile izzet muvâfıkk olmaya
- 2167.Âkıl olan kişi hergiz câh-ile
Mansıbı görmeye lâyıkk câhile
- 2168.Câh nedür câhile bî-şekk çâh
Çâha düşmesün diseñ virm'aña câh
- 2169.Pes hekîme şeh didi k'iy kâr-dân
Kıl aramızda geçen râzı ayân

2170. Tâ ki ol esrârı kamu bileler
Anda ne müşkil ki var hal kılalar
2171. Didi şâha dâim olgıl şâd-kâm
Virbidügüñ yag-ıla ol tolu câm
2172. Bu-y-ıdı ma'nîsi kim baña bu dehr
İlm kamulardan artuh kıldı behr
2173. Kankı müşkildür k'anı hal kılmadum
Hikmet içinde ne var kim bilmedüm
2174. Lîki gönümi hevâ-yı genc ü zer
Hırs u mâl u mülk ü sevdâ-yı zafer
2175. Ol kadeh bigi leb-â-leb itdi pür
Aña nesne sigâ mı iy sözi dür
2176. Çün gönül şehvât-ı nefsânî tola
Hak nic'anda turmaga lâyük ola
2177. Bir gögüzde iki gönül olımaz
Nefs'uyan kişi Hak'a yol bulımaz
2178. Hâli olmayınca şehvetden temâm
Nice olısar gönül Hakka makâm
2179. Ben didüm hikmet sözi sûzen-misâl
Gerçi kim pürdür bulur anda mecâl
2180. Gerçi kim tolu-durur gönül hevâ
Olur aña hikmetüñ sözi devâ
2181. İtmese hikmet sözi câna eser
Ne Kitâb ine-y-di gökden ne haber
2182. Yoldan azana bulıncıah delîl
Togrı yola döner ü kalmaz zelif
2183. Pend-ile sem'üñ sadef big'eyle pür
Dileseñ gönülün kim ola bahr-ı dür
2184. Mühri-y-ile remzi böyle kıldı şâh
K'ol gönül k'âhen bigi oldı siyâh
2185. Gâh katl ü gâret ü geh rezm-ile
Gâh şugl-ı mâl u mülk ü bezm-ile
2186. Böyle katı vü karanu k'ola pend
Kâr-ger düşüp ola mı sûd-mend

- 2187.Ma'siyet kişiyi Hak'dan dūr ider
Göñlinüñ âyinesin bî-nūr ider
- 2188.Ma'siyetle çünki göñül jeng ala
Nic'ola k'ol rûşen ü hoş-reng ola
- 2189.Âyin'olmaz jeng-ile sûret-pezîr
Pes nic'ide nesne anda cây-gîr
- 2190.Kişi cehd itmek gerek her-âyine
K'olmaya pür-jeng üşbu âyine
- 2191.Çünki âyîne leb-â-leb tola jeng
Ala mı bî-jeng bigi nūr u reng
- 2192.Âkıl üşbu fikri nic'idibile
K'idilen idilmemiş bigi ola
- 2193.Ben didüm nice ki gördi âşikâr
Âhenî-âyîne olmuş şehriyâr
- 2194.Nükte-i hikmet dahı her-âyine
Rûşen ider göñli şöyle k'ayına
- 2195.Çün gönül âyinesi saykal bula
Sûret-i her-gayb aña rûşen ola
- 2196.Bir ulu râz âyinede var nihân
Diyeyim k'işid'anı şâh-ı cihân
- 2197.Ana bahan sûretin çünkim göre
Bî-gümân tevhdı sırrına ire
- 2198.Sûretini k'anda görünür ayân
Çün bile kim kendünüñdür bî-gümân
- 2199.Lîki kendü orada dâhil degül
Taşra turur gözgüde hâsıl degül
- 2200.Gerçi kim kendü degüldür ol ayân
Lîki dahı nesne degül bî-gümân
- 2201.Kendü degül ol görinen kendüdür
Añla bu söz gevherin iy bahr-ı dūr
- 2202.Gözde iki görünür sûret velî
Ol iki birdür hakıykat iy velî
- 2203.Halk dahı kamu Hakdandur ayân
Yoh-durur nesne arada bî-gümân

- 2204.Kamu oldur nesne yoh arada pes
Ahvel olma bir gör ikiligi kes
2205.Ol ki geldi jeng tutup âyine
Bu-y-ıdı ma'nîsi_anuñ her-âyine
- 2206.Kim didi şeh bunca vakt aşup ceng
Çün kıla gözgüyi ucdan uca jeng
- 2207.Nice ola gözgüden mahv ol eser
Yâ kaçan nûrâni ola ol güher
- 2208.Âyine yüzi leb-â-leb tolsa jeng
Hûb yüzden görine mi anda reng
- 2209.Ben didüm gönül gözügüsin günâh
Niçe jeng itse açar tevbe i şâh
- 2210.Dünya vü ukbâda dilerseñ fütûh
Yavuz işden idesin hem-çün nasûh
- 2211.Tevbe-y-ile çün gönül rûşen ola
Hayf anı kim koyasın jeng ala
- 2212.Çün habersüz tohınur çengâl-i mevt
Tevbeyi tîz eyle kim olmaya fevt
- 2213.Vâcib ol kim tevbe bugün kılasın
Kim bile şâyed ki yarın ölesin

SÜ'ÂL-İ İSKENDER HAKÎM-RÂ EZ-TEVHÎD-İ BÂRÎ

- 2214.Pes didi ol feylesûfa girtü şâh
Kim muhakkakdur bu kim birdür İlâh
- 2215.Çünki bir bilürdi anı ma'rifet
Dürlü dürlü n'iredendür bu sıfat
- 2216.Çünki birdür bir ale't-tahkıyk Zât
Muhtelif niçün olup-durur sıfât
- 2217.Ben aña Kâdir direm bi'l-ihtiyâr
Dahılar mûcib dir iy dâna-yı kâr
- 2218.Ben mekânsuz bilürem anı ayân
Ba'zı eydürler k'aña vardur mekân
- 2219.Sünni anuñ rû'yetin câiz dutar
İ'tizâl ehli aña inkâr ider

2220. Her biri bir dürl'ider an'ittisâf
N'iredendür şerh it bu ihtilâf
2221. Didi kim Sîmürg k'oldur şâh-ı tayr
Kâfdan bir gice nâ-geh itdi seyr
2222. Rub'-ı meskûna geliben bî-gümân
Dökdi birkaç bâl ü perr anda ayân
2223. Çünkü bu yaña getürdi anı yol
Gice gelüp olmadın tañ gitdi ol
2224. Kuşlar anuñ geldüğünü bildiler
Bulavuz diyü taleb-kâr oldılar
2225. Çünkü kim anı kamu cüst ü cû kılur
Her biri bir yirde bir yüñin bulur
2226. Biri dir k'aña fülân yirdür mekân
Biri dir rengi anuñ budur ayân
2227. Birisi dir kara vü biri kızıl
Birisi dir saru vü biri yeşil
2228. Birisi dir tagda bildüm anı
Birisi dir bâgda buldum anı
2229. Biri bir yirden dahı virür haber
Biri dahı dürlü gösterür eser
2230. Gerçi anuñ vasfidur kamu ayân
Lîki ol degül ki dirler bî-gümân
2231. Her biri gördüğünü itdi sıfat
Dürlü dürlü buradandur ma'rifet
2232. Her bölük bir mazharı kim buldılar
Hakkı mevsûf ol sıfatla bildiler
2233. Her kişi bî-şek virür andan nişân
Gerçi kimse görmedi anı ayân
2234. Bir-durur mevsûf çoh-durur sıfat
Dahı nesnedür degül bu ma'rifet
2235. Ma'rifet bu k'ol-durur varlıh hemîn
Andan artuh nesne görmez râst-bîn
2236. Pes didi ol feylesûfa şehriyâr
K'it baña bu câm râzın âşikâr

- 2237.Bu hümâyûn-câme üşbu iki nehr
Huld enhârından olmuş ola behr
2238.Feylesûf eydür ki şâhâ üşbu câm
Bunca san'atlarla olmuşdur temâm
- 2239.Kanda kim bir âlim işitmişdi Keyd
Mâl u ni'met virüben itmişdi sayd
- 2240.Yidi kişverde ne kim ehl-i hüner
Var-ıdı Hind'e götürd'ol nâm-ver
- 2241.Bir yire çün Keyd oları kıldı cem'
Terbiyetle oldılar tâbende-şem'
- 2242.Keyd-içün çoh nesne tasnîf itdiler
Câmı dahı anda te'lîf itdiler
- 2243.Nicedür ahter mizâcın bildiler
İttisâluñ Sa'd u Nahsin buldılar
- 2244.Dünyada ne dürlü gevher var temâm
Birbirine katdılar k'oldı bu câm
- 2245.Çünki buldılar güherden imtizâc
Kopdı ol terkîbden üşbu mizâc
- 2246.Kim kılur hâsıyyet-ile k'anda var
Cezb-i âb u bâde mıkânâtis-vâr
- 2247.Çün düzüldi iki bahş oldı temâm
Biri siflî vü biri ulvî bu câm
- 2248.Birisi ider hevâdan kesb-i âb
Birisi yirden kılur cezb-i şarâb

SU'ÂL-İ İSKENDER EZ-ÂFERİNİŞ-İ ÂLEM

- 2249.Pes didi şeh kim beyân it iy hakîm
Âlemi ibdâ' nic'itdi Kadîm
- 2250.Çünki birden bir olur zâhir hemân
Nicesi kopdı bu kesret kıl ayân
- 2251.Anda kim Sâni'den ızhâr oldı cûd
Kim-idi evvel kim ol buldı vücûd
- 2252.Âlemüñ birbir eyit tertîbini
Hem beyân it âdemüñ terkîbini
- 2253.Çün hekîme ol su'âl oldı ayân

Eyledi anuñ cevâbını beyân

CEVÂB-I SUÂL BE-TARÎK-I HİKMET

2254.Didi günüñ evvelinde Zül'l-Celâl
Bir güher yaratdı pür-fazl u kemâl

2255.Âferîniş evveli ol adı akl
Bize bu söz oldu bürhân-ıla nakl

2256.Gevher-i rûhâni vü pâk ü basît
Sûretine cümle eşyânuñ muhît

2257.Ol-durur ma'lûl evvel bî-gümân
Ol-durur mevcûd-ı sâni' bil ayân

2258.Feyz k'evvelden virilmişdi aña
İtdi bir mevcûd dahı iktizâ

2259.Lâ-büd andan bir güher dah'âşikâr
Kıldı kendü kudretinden Kirdikâr

2260.Akldan bir rütbet ednâ oldu ol
Nefs-i Külliyye-y-le şöhret buldı ol

2261.Kuvvet-i cüzvi nüfûsa ol virür
Kamuya feyz-i kemâl andan varur

2262.Akl-ı Evvelden idüp feyz iktisâb
Sâlise virdi bu söz-durur savâb

2263.Nefs-i Küllîden çü fâyiz oldu cûd
Buldı bir gevher dahı andan vücûd

2264.Rütbeti-y-le andan eksük geldi ol
Sûret olmahlığa kâbil oldu ol

2265.Sûrete çün kâbil oldu ol dürüst
Didiler aña heyûlâ-yı nühüst

2266.Çünkü tûl u arz u umkı buldı ol
Lâ-cirem kim cism-i mutlak oldu ol

2267.Çünkü tutdı dâyire şeklin ayân
K'efdalu'l-eşkâl oldu bî-gümân

2268.Âlem-i eflâk ü erkân ser-te-ser
Oldı bulup andan eşkâl u suver

2269.Oldı evvel ol felek andan bedîd

K'aña ehl-i şer'dir Arş-ı Mecîd

2270.Çarh-ı A'zam ol felek-durur müdâm
Döner ü döndürür eflâkı temâm

2271.Ay-ıla günü getüren ol-durur
Gice-y-ile gündüzi Ol ol-durur

2272.Gice vü gündüzde ol bir devr ider
Döndügince ömr bünyâdın keder

2273.Ol ki çarhuñ döndügince kemm ola
Nice bünyâdı anuñ muhkem ola

2274.Çün güzerdedür bekâ durmaz gider
Pes gönülde sevgüsin anuñ gider

2275.Dünyâyı seven kişi şâd olmaya
Kaygudan bir lahza âzâd olmaya

2276.Oldı andan bir felek dahı ayân
Kim sevâbit anda tutarlar mekân

2277.Bu felek oldu temâm oniki kısım
Herbiri bir burc olup buldı ism

2278.Ol hameldür sevr hem cevzâ-y-ıla
Dahı sertân u Esed pes Sünbüle

2279.Dahı Mîzândur u Akreb Kavs hem
Cedy ü Delv ü Hût ne bîş ü ne kem

2280.Herbirin bürcüñ otuz kısım itdiler
Pes ol aksâma derec ism itdiler

2281.Gün ki irte gice geliben gider
Herbirin bir günd'olaruñ kat' ider

2282.Kimisi iner kimi ider urûc
Ol-durur kürsî vü hem Zâti'l-bürûc

2283.Ol yigirmi dörtbiñ yılda temâm
Bir kez ider devr dönüben müdâm

2284.Oldı pes yidinci eyvân âşikâr
Kim Zühal anda ider dâim medâr

2285.Bî-fütûr irte gice durmaz gider
Çarhı otuz yılda bir kez devr ider

- 2286.Oldı altıncı felek andan temâm
Kim tutupdur Müşterî anda makâm
- 2287.Seyr idüp ol garbdan şarka gider
On iki yılda yakîn bir devr ider
- 2288.Oldı pes bişinci çarh andan ayân
K'and'ider Merrîh peyveste mekân
- 2289.İki yıldan eksük ol bir buçug ay
Geçse bir kez devr ider iy pâk-rây
- 2290.Buldı pes dördüncü çarh andan zuhûr
K'andan ider gün cihâna feyz-i nûr
- 2291.İder ol bir yılda bir devri temâm
Yıl u ay anuñla bulurlar nizâm
- 2292.Oldı pes andan üçüncü âsumân
Kim hemîşe Zühreye oldur mekân
- 2293.Seyr idüben oniki burcı müdâm
Devr ider bir yıl hudûdına temâm
- 2294.Pes hüveydâ oldu ol ikinci deyr
Kim Utârîd and'ider peyveste seyr
- 2295.Ol dahı seyr idüben irte gice
Çarhı bir yılda gezer ucdan uca
- 2296.Oldı andan soñra peydâ çarh-ı mâh
Kim kamer seyr ider anda sâl u mâh
- 2297.Çünki yigirmisekiz gün ol gider
Oniki burcı temâmet seyr ider
- 2298.On iki burcı-y-ıçun Rabbü'l-Enâm
Düzi yigirmisekiz menzil temâm
- 2299.Herbirinde birgün anuñ seyr ider
İbret-ile kudrete key kıl nazar
- 2300.Ol menâzil adı Şertayn u Butayn
Pes Süreyyâdur kim oldu çarha zeyn
- 2301.Girü Debrândur u Hak'a Hen'a hem
Pes Zirâ'u Nesr iy bahr-ı kerem
- 2302.Tarfe Cebhe Zebre Sarfe hem Avâ
Pes Simâk ü Gafrdur bî-imtirâ

- 2303.Pes Zebânâ vü dahı İklîl ü Kalb
Cehd-ile eyle gönülden cehli selb
- 2304.Menzile Şevle Nagâyim Belde hem
Zâyih ü Sa'd u Bela it aña zam
- 2305.Dahı hem Sa'dü's-sü'üd iy pâk-dil
Dahı Sa'dü'l-Ahbiyedür bellü bil
- 2306.Pes girü fer'-i Mukaddemdür yakîn
Pes Muahharla Reşâ-durur hemîn
- 2307.Kim bile kim ne-durur bu kâr-gâh
Yâ ne yüce nesnedür bu bâr-gâh
- 2308.Her felekde iki kutb olup temâm
Yüridiler mihver üstinde müdâm
- 2309.Merkez-ile kutb olup pâyidâr
Yüridi pergâr bigi her-medâr
- 2310.Oldı andan dörd erkân-ı basît
Biribirine felek bigi Muhît
- 2311.Od u yil ü su vü toprah kim müdâm
Her mürekkeb aslıdur bunlar temâm
- 2312.Ol tokuz âbâ bular dörd ümmehât
Togd'olardan kân u hayvân u nebât
- 2313.Kıldılar encüm feleklerde urûc
Tutdılar merkez yöresinde burûc
- 2314.Sâl u meh düzildi vü leyl ü nehâr
Kış u yaz oldu vü pâyiz ü bahâr
- 2315.Her yaña bir kevkeb olıban revân
Düşdi Sa'd ü Nahs arasında Kırân
- 2316.Hâdis olup gökde dürlü ittisâl
Kıldılar te'sîr yirde mâh u sâl
- 2317.Bir zamân çün döndi bu resme sipihr
Gice gündüz geldi gıtdi mâh u mihr
- 2318.Mümteziç oldu kesîf-ile latîf
İhtilât itdi sakîl-ile hafîf
- 2319.Sıdı su oddan harâret sevretin
Od dahı sudan bürûdet kuvvetin

- 2320.Oldı terkîb-i maâdin hem nebât
Dahı her nesne ki var anda hayât
- 2321.Buldı andan soñra pes Âdem vücûd
Kim melâik kıldılar aña sücûd
- 2322.Anı toprahdan yaratdı Kirdikâr
Kıldı dörd ezdadı anda sâzıkâr
- 2323.Topragı “hammartü teşrîfûn futûh”
İdübenüñ buldı Hakdan nefh-i rûh
- 2324.Şöyle kim çün âyine saykal bulur
Nakşına her sûretüñ kâbil olur
- 2325.Tasfiye-y-le çünki kâbil oldu hâk
Aña Hâlıkdan virildi rûh-ı pâk
- 2326.Âyınada çün görürsin sen yakîn
Sâfi_olıcak kamu nesne sûretin
- 2327.Şöyle kim hâricden idüp infisâl
Hiç nesn’âyîney’itmez ittisâl
- 2328.Ol musavvirten dahı her-âyine
Sûreti şöyle bulur her âyine
- 2329.Çün fetîle yagdan çerbiş bulur
Şöyle kim nâr olmaga kâbil olur
- 2330.Nârdan nûr olur aña muttasıl
Hiç nesn’olmadın andan munfasıl
- 2331.Cism dahı şöyle buldı ittisâl
Rûh-ıla Hakdan velî bî-infisâl
- 2332.Çünki fâyiz oldu Hakdan nûr-ı cûd
Degdi ol feyz-ile insâna vücûd
- 2333.Zâhir’anuñ nakş-ı cismânî-durur
Bâtın’anuñ nefs-i rûhânî-durur
- 2334.İki âlemden mürekkebe oldu ol
İlm ü akl-ıla mürettebe oldu ol
- 2335.Vird’aña Hakk ilm ü gösterdi sebîl
Hem aña bildürdi medlûl ü delîl
- 2336.Akl bağışladı öğretti hikem
Nutm ta’lîm itdi bildürdi kalem

- 2337.Oldı rûşen gönline Tevhîd-i Zât
Bildi hem aña nedür lâyıq sıfât
- 2338.İrgüribenüñ feleklere anı
Celve itdürdi meleklerle anı
- 2339.İtd'aña vahy ü viribidi Kitâb
Nedür öğretti hatâ-y-ıla savâb
- 2340.Mazhar-ı cümle-sanâyi' oldı ol
Mehbat-ı envâr-ı Sâni' oldı ol
- 2341.Sol eyegüsinden ol Feyyâz-ı Cûd
Yaradup Havvâyı vird'aña vücûd
- 2342.Anı aña cüft idüben bî-şümâr
Zür ü nesl itdi olardan âşikar
- 2343.Anlara her işi ta'lîm eyledi
Hayr ü şerri cümle tefhîm eyledi
- 2344.Çün bular vech-i maâşî bildiler
Rub'-ı meskûnı imâret kıldılar
- 2345.Geldi bunlara Resûl ü hem Kitâb
Kim hatâyı koyup ideler savâb
- 2346.Ne kadar kim diler-ise Kirdikâr
Anlaruñ üstinde döne rûzigâr
- 2347.Çünki hilkatden ola hâsıl murâd
Ne kala insân u ne insândan ad
- 2348.Sûr-ı Evvelde kamu yoh olalar
Ulu kiçi ucdan uca öleler
- 2349.Bir dahı Sûr ürilüp ba'de'l-memât
Bulalar baş kaldurup yirden hayât
- 2350.Her kişi itdügine bula cezâ
Ger savâb ola işi vü ger hatâ
- 2351.Ol kişi k'ola yolu hatt-ı hatâ
Bulmaya râhatdan i'tâ-i atâ
- 2352.Her kimüñ k'ola yolu savb-ı savâb
Cennete girüp giye sevb-i sevâb
- 2353.Ger dilerseñ k'ola saña baht yâr
Şerri terk it hayrı eyle ihtiyâr

2354.Şerr İblîs işidür terk it anı
Hayr kıl kim Hak melek kıla seni
2355.Hayr iden İsbî bigi göge varur
Şerr iden Kârûn bigi yire girür

2356.Çün bu sözleri işitdi şehriyâr
Âferîn itdi hakîme bî-şümâr

SÜÂL-İ İSKENDER EZ-MAKÂDİR-İ ECSÂM-I ÂLEM

2357.Pes didi şâh aña kim iy nig-nâm
Çünki şerh itdün bu ecsâmı temâm

2358.Gel makâdirin bularuñ it beyân
Kim bilem herbiri mîkdârın ayân

CEVÂB-I BEYÂN-I MİKDÂR-I KÜRRE-İ ARZ

2359.Didi altıbiñ sekizyüzdür temâm
Devri ferseng-ile yirün iy imâm

2360.Kutrı ikibiñ yüzaltmış dörd olur
Bu hisâbı hendese ehli bilür

DER-BEYÂN-I MİKDÂR-I NÂR VE HEVÂ

2361.Çünki anda olur od u yıl müdâm
Oldı ferseng-ile otuzbiñ temâm

2362.Hem onüç ferseng dahı bil ayân
Kudretinde Kâdirün yohdur gümân

BEYÂN-I MİKDÂR-I FELEK-İ KAMER

2363.Ol felek kim anda ay ider medâr
Otuzüç biñdür kalıñlığı i yâr

2364.Dahı yüz onbir-durur ferseng-ile
Bildı dâna bu sözi ferheng-ile

BEYÂN-I MİKDÂR-I CİRM-İ KAMER

2365.Yirün altmış bahşinuñ birincedür
Cirmi_anuñ kim geh tolu geh incedür

DER-BEYÂN-I MİKDÂR-I FELEK-İ UTÂRİD

2366.Ol felek k'anda Utâriddür müdâm
Kalıñı yüzbiñ ü ondörd biñ temâm

2367.Dahı_ikiyüzkırh ferseng oldı râst
Kudretüñ işinde ne kem var ne kâst

DER-BEYÂN-I MIKDÂR-I FELEK-İ ZÜHRE

2368.İki kez biñ kez biñ oldı bil temâm
Kalın'anuñ k'andadır Zühre müdâm

2369.Yıdiyüz biñ dahı hem ferseng-ile
Hem tokuzu yüz seksen anuñla bile

DER-BEYÂN-I MIKDÂR-I CİRM-İ ZÜHRE

2370.Altıyüzkırh biñ-durur bil bî-gümân
Zührenüñ ferseng-ile kutrı ayân

DER-SÂZ-I MIKDÂR-I FELEK-İ ÂFİTÂB

2371.Kalıñı ol şems olan menzilüñ
Yüzbiñ ü onbiñ-durur bellü bilüñ

2372.Dahı yıdiyüz ü altmışaltıdur
Râst hem ferseng-ile iy sözi dür

BEYÂN-I MIKDÂR-I CİRM-İ ŞEMS

2373.Cirmi şemsüñ kim görürsin sen ayân
Nûrı-y-ıla rûşen olmış bu cihân

2374.Yüz dahı_ altmışyidi yircedür temâm
Dahı bir sülsince yirüñ bî-kelâm

DER-BEYÂN-I MIKDÂR-I FELEK-İ MİRRİH

2375.Biñ kezin biñdür onaltı kez temâm
Kalıñ'anuñ k'oldı Mirrîhe makâm

2376.Dahı elli altıbiñ ferseng-ile
Sekseni dahı_anuñ-ıla bile

BEYÂN-I MIKDÂR-I CİRM-İ MİRRİH

2377.Kutrı fersahla ikibiñdür dürüst
Dahı yüzelli iki iy fehmi cüst

DER-BEYÂN-I MIKDÂR-I FELEK-İ MÜŞTERÎ

2378.Biñ kezin biñ lîkin ondört kez temâm
Hem tokuzu yüzbiñ dahı iy nig-nâm

2379.Dahı toksandörtbiñ ferseng-ile

Yidiyüz toksan sekiz dahı bile

2380.Kalıñıdur Müşterî duran gögüñ
Kudretini Hâlıkuñ görüp ögüñ

BEYÂN-I MIKDÂR-I CİRM-İ MÜŞTERİ

2381.Cirmi yir kadrince seksenbiş-durur
Zî gögüñ kim ilm aña iş-durur

DER-BEYÂN-I MIKDÂR-I FELEK-İ ZÜHAL

2382.Biñ kezin biñdür sekiz kez lâ-ekal
Kalıñ'ol çarhuñ k'olur anda Zühal

2383.Dahı bişyüzbiñ ü altmışbiñ temâm
Elliüç ferseng dahı bî-keâm

BEYÂN-I MIKDÂR-I CİRM-İ ZÜHAL

2384.Toksanaltı yircedür cirm-i Zühal
Hendese ilmînd'olur bu ukde hal

2385.Zî Celâl ü izzet-i bî-ibtidâ
Zî Kemâl ü Kudret-i bî-intihâ

DER-BEYÂN-I MIKDÂR-I FELEKİ'L-BÜRÛC

2386.Ol Sevâbit çarhınuñ iy dûr-bîn
Kalıñı yüzbiñ ü onbiñdür yakîn

2387.Dahı ikibiñdür ü kırhdörd râst
Girü hem ferseng-ile ne kem ne kâst

2388.Üçyüz ü toksanbiñ olur kıl şümâr
Ol derecden herbiri kim anda var

2389.Dahı dördyüz kırhdur ferseng-ile
İlm öğren dâniş ü ferheng-ile

2390.Kürsi ol k'eflâk içindedür nihân
Arş katında nedür kadri ayân

2391.Katra neyse bahr katında yakîn
Ol kadardur kadr'anuñ anda hemîn

DER-BEYÂN-I MAKÂDİR-İ KEVÂKİB-İ SÂBİTE

2392. Encümüñ key kicisi kim anda var
Onsekiz yirce-durur iy kâm-kâr
2393. Uluları anlarıñ iy dûr-bîn
Ol felek kalıñlıgıncadır yakîn
2394. Bu ne kudretdür bu ne izz ü celâl
Bu ne kuvvedür bu ne kadr ü kemâl
2395. Kim ukül anda kamu hayrân-durur
İns ü cinn ü hem melek yik-sân-durur

DER-BEYÂN-I SU'ÛD VE NÜHÛS-I KEVÂKİB-İ SEYYÂRÂT

2396. Şeh katında ol hakîm-i kârdân
Çünkü çarhuñ hey'etin itdi beyân
2397. Sa'd ü Nahsin ol yidinüñ yik-be-yek
Şerh itdi şâha şöyle kim gerek
2398. Did'anı kim Nahs-i Ekberdür Zühal
Kim kamudan yücerek buldı mahal
2399. Tâ biline Nahs-perverdür felek
Sa'd olan anı terk itmek gerek
2400. Pes bilindi bu ki dünyâ rif'ati
Dâr-ı Ukbâda nühûsetdür katı
2401. Sa'd-ı Ekber oldı bî-şek müşterî
Lîki Merrîh oldı Nahsüñ asgarı
2402. Sa'ddur şems ü kamer uş gör ayân
Sa'd-ı Asgar Zühre-durur bî-gümân
2403. Nahs-ile nahs olan u Sa'd-ile sa'd
Ol Utâriddür yakîn min-kabl ü ba'd
2404. Ol Zühal altında oldı Müşterî
Kim nühûsetden birez ola berî
2405. Oldı Merrîh esfelinde âfitâb
K'ola ba'zı şerrine anuñ hicâb
2406. Aşaga oldı Utâridden kamer
K'az ola Nahs olduğınd'andan eser

2407.Sâni'i gör kim ne hikmetler ider
Kâdire bah kim ne kudretler ider

DER-BEYÂN-I KEMİYYET-İ KEVÂKİB-İ SÂBİTE VE ESÂMİ-İ SUVER-İ ŞÂN

2408.Pes didi girü aña şâh-ı cihân
Kim sevâbit nicedür eyle beyân

2409.Didi biñdür ü yigirmi iki hem
Kırhsekiz sûretde iy şâh-ı Acem

2410.Sûret ol kim ilm düzen fehm-ile
Bu nücûmuñ birkaçını vehm-ile

2411.Görüben heryirde bir vaz'a müdâm
Râst bir hayvâna beñzetdi temâm

2412.Urdı ol hayvânuñ adını aña
Eydeyim adlarını birbir saña

2413.Üçyüzaltmış dört şemâlîde yakîn
Lîki sûretde yigirmibir hemîn

2414.Dübb-i Asgar Dübb-i Ekber bil dürüst
Dahı Tinnîndür üçinc'iy fehmi cüst

2415.Dahı Kaykâvûs u Gül'e lâ-muhâl
Oldı altıncısı İklîl-i Şimâl

2416.Câni vü pes Nesr-i Vâkı' bil ayân
Pes Dücâce Nesr-i Tâir bî-gümân

2417.Re's-i Gül ardınca Ayyûk it hisâb
Sûret-i Silyâk ardınca Ukâb

2418.Dahı Zâti'l-Kürsi vü Dilfeyn Sehm
Hayye ardınca anuñ it sözi fehm

2419.Pes Feres ardınc'anuñ Re's-i Feres
Dahı hem Mir'ât Müselles oldı pes

2420.Üçyüz onaltı cenûbîdür temâm
Lîki sûretde onaltı iy imâm

2421.Biri Kîfîs ü biri Ceb' ârdur
Nehr ü Erneb dahı Kelb iy ilme pür

2422.Makdemü'l-Kelb ü Sağîne pes Şücâ'
İtdi_ikisi-y-le Gurâb and'ictimâ

2423.Dahı Kantûrüs Semi'' pes Micmere

Dahı İklîl-i Cenûbî yig-sere

2424.Bir dahı Hût-ı Cenûbî Hayye hem
Adı-l'uş onaltı ne biş ü ne kem

2425.Şems yolınd'üçyüz ü kırhaltı var
Oniki sûretde itdükde şümâr

2426.Var Hamelde onsekiz yılduz yakîn
Sevrde kırkdörd iy dâna-yı dîn

2427.Var yigirmibiş kevâkibden ayân
Burc-ı Cevzâda uş saña itdüm beyân

2428.Var-durur Sertânda onbir bi'l-aded
Var otuzbiş anda k'adıdur Esed

2429.Otuz üç kevkeb alupdur Sünbüle
Var-durur Mîzând otuzbiş hem bile

2430.Var yigirmidörd Akrebde temâm
Var otuzbiş Kavsde iy şâd-kâm

2431.Cedyde vardur yigirmi vü sekiz
Delvde var kırh anı key añlañız

2432.Hûtta otuzsekiz vardur temâm
Bu ne sanatdur k'idur Rabbü'l-enâm

DER-BEYÂN-I EDVÂR-I ÇEHÂR-GÂNE

2433.Dörddür edvâr kim ehl-i hisâb
Yazubanuñ itdiler anı kitâb

2434.Çünkim oldılar hisâb itmekde cüst
Hükmler itdiler anuñla dürüst

2435.Devr-i A'zam Devr-i Ekber bil yakîn
Devr-i Evsat Devr-i Asgardur hemîn

2436.Devr-i A'zam ol derecden iy imâm
Herbiri biñ yıl alup-durur temâm

2437.Cümlesi üçyüzbiñ altmış yıl olur
Akl Sâni' sun'ına hayrân kalur

2438.Üşbu devri kim saña itdüm beyân
Kim bilür niçe kez itdi âsümân

2439.Yâ niçe kez girü ide dahı devr

Ne kerân vardur bu deryâya ne gavr

2440.Oldur ekber her derecden herbiri
Yüzyıl ala artuh eksükden beri

2441.Otuzaltıbiñ yıl olur râst bil
Bu ne kudret bu ne kuvvet fikr kıl

2442.Devr evsat ol derecden herbiri
On yıl olur şüphe vü şekden beri

2443.Altıbiñ ü altıyüz olur kamu
Üşbu hazret izz ü kuvvettür tolu

2444.Devr-i asgar herbiri bir yıl olur
Cümle üçyüzbiñ dahı altmış olur

DER-BEYÂN-I KEMİYYET-İ KEVÂKİB-İ SÂBİTE VE ESÂMİ'-İ SUVER-İ ŞÂN

2445.Pes didi şeh kim i dâna-yı cihan
Kim felek râzı degül senden nihân

2446.Üşbu bünyâdı düzeli Kirdikâr
Niçe yıldur baña itgil âşikâr

2447.Didi dâna şâha kim iy şehriyâr
Var mı sanursın buña hergiz şümâr

2448.İsdedi kim bunu bile-y-di Kelîm
Ol Kelîme böyle vahy itdi Kerîm

2449.Müddetinden birezin diyem saña
K'anı işidüp çoğ ola zikrûñ baña

2450.Göge degin yiryüzini iy Kelîm
Tolu hardal dânes'itdüm ben Kadîm

2451.Bir kuş itdüm anda ben cân-âferin
Yir-idi bir yılda bir dâne hemîn

2452.Bildi kim ol dükenicek öliser
Varlığı girü gidüp yog olısar

2453.Ol dükendükde öldüğün bildi yakîn
Birini on yılda yir-idi hemîn

2454.Üşbu korhudan hemîşe acıdı
Kuvveti-y-çün kûta ol muhtâc-ıdı

2455.Dâim ölmek korhusından kendüzin

Gussada dutardı gice gündüzin

2456.Ol kuşuñ hâli nice_öldi âkıbet
Dükedüp kamusın öldi âkıbet

2457.Niçe çoğ olsa dükenür ömr pes
Ne gerekdür ömr çoğına heves

2458.Nesneyi kim dükenür çoh sanmagıl
Az-durur çohlığına inanmagıl

2459.Geçdüginde biñ yıl olur bir nefes
Akıl-ısañ çoh dimegil aña pes

2460.Gül gül-âb iden katında ağlamış
Hasret odı-y-la yüregın taglamış

2461.Çünkü ömrüm böyle_eridi iy aceb
Bini yaratmahda pes ne-y-di sebeb

2462.Gâh topraga düşerem hâr u zâr
Geh yıl alur gâh yahar bini nâr

2463.Giderem üşbu cihândan turmadın
Gözlerüm nergis big'anı görmedin

2464.Çün gül-âb iden işitdi bu sözi
Didi aña toluvan kan yaş gözi

2465.Çün dükenür ömr kalmaz pâyidâr
Bir-ile bî-şek ber-â-berdür hezâr

2466.Çün didi bunı hakîm-i kârdân
Zâr u hayrân kald'aña şâh-ı cihân

2467.Didi kim zî kâr-gâh-ı kibriyâ
Zî celâl ü izz ü mülk ü zî senâ

2468.Bu söz üzre **AHMEDÎ** dahı saña
Bir söz ider nakl gûş olgıl aña

2469.Ahmed-i Mürsel Sirâc-ı enbiyâ
Kıble-i ebrâr ü tâc-ı evliyâ

2470.Çünkü irdi arşa Mi'râc'a varup
Hâs oldı menzili Kurb'a irüp

2471.Gördi arşuñ iki yanında ayân
İki_ulu deryâ melâikden revân

- 2472.Mevc urup yürürdi su bigi kamu
Didi Cibrîle bu nedür iy ulu
- 2473.Didi bini yaradalı Zü'l-Celâl
Bunlar işböyle geçerler mâh u sâl
- 2474.Ne biri döndi ne dükendi gelen
Böyle bilgil üşbu hâli bellü sen
- 2475.N'ireden n'ireyedür gidişleri
Bilmezem fikr eyle üşbu işleri
- 2476.Pes bir'anlaruñ Resûle söyledi
Her ne müşkil sordı-sa hall eyledi
- 2477.Bir su'âli bu-y-ıdı kim ol Ganî
Niçe yıldur yaradalıdan seni
- 2478.Didi fitrat çün kalem alup yazar
Dörtüzbîñ yılda bir kevkeb düzer
- 2479.Yaradalıdan beni ol Kirdigâr
Dörtüzbîñ kevkeb itdi âşikâr
- 2480.Ol zamândan seyr idüp rûz u şeb
Buraya şimdi irişdüm iy aceb
- 2481.Niçe biñ kez seyr itsem bu kadar
Gâyetinden bilmeyem bunuñ habar

DER-İ'TİBÂR BE-SÂNİ' VE İSBÂT-I VÜCÛD-I SÂNİ'

- 2482.Kıl nazar gör nicedür bu kârığâh
Fikr eyle kim nedür bu bârığâh
- 2483.Nesne bildüm diyü bişürme heves
Âferîniş sanma budur cümle pes
- 2484.Bu didügüm ol-durur k'idüp nazar
Buldı anı akl u fikr-ile beşer
- 2485.Bundan ayru dahı nesne çoh-durur
Lîk'aña akl irmege yol yoh-durur
- 2486.Bu rasadlarda bulunandur yakîn
Sanma kim budur Hakuñ mülki hemîn
- 2487.Kudretine çün nihâyet yoh-durur
Lâ-cirem Makdûra gâyet yoh-durur

- 2488.Bu suverden niçe sorasın haber
Ma'nisi gözle ki perdedür suver
- 2489.Anı bil k'oldur Kadîm-i pâk-Zât
Ne gerekdür bunca bahs ü muhdesât
- 2490.Aklı unıt anı andan bil hemîn
Tâ saña rûzî ola ilme'l-yakîn
- 2491.Kim anuñ künhinde yoh akla mecâl
İdemez fikrin anuñ vehm ü hayâl
- 2492.İlm oldur k'anı hâsıl idesin
Ola sinüñle çü bundan gidesin
- 2493.Ol ma'ârifde çü hayrândur ukûl
İşte bulasın riyâzetle vusûl
- 2494.Ger riyâzetle sen anı bulasın
Lezzet ü râhat nic' olur bilesin
- 2495.Alem oldur anda bulursañ mecâl
Devlete irdüñ k'aña yohdur zevâl
- 2496.Devlet oldur k'intikâli olmaya
Ni'met oldur kim zevâli olmaya
- 2497.Çün bu sözleri beyân itdi hakîm
Şâh aña âferîn itdi azîm
- 2498.Pes hazânededen buyurdı tâc-ver
Kim hakîme vireler zerr ü güher
- 2499.Ol hakîm eydür şaha k'iy nâm-ver
Bize seng-ile ber-â-berdür güher
- 2500.Hâkdur zer seng-gevher ola neng
Ol ki ma'bûd ola aña hâk ü seng
- 2501.Âdemînüñ gevheri dâniş olur
K'anı ne ugrı vü ne düşmen alur
- 2502.Âdemiye ilmdür genc-i nihân
İlm-ile hâsıl olur iki cihân
- 2503.İlmi arturgıl dilerseñ genc ü mâl
K'artar ol sarf itdügüñce mâh u sâl
- 2504.Hâkdür himmet katında sîm ü zer
Seng-ile ma'nîde yik-sândur güher

2505.Âkıbet-çün kişi mâlı kor gider
Koyuban gitdüğini dirüp n'ider

***DER-TA'RÎZ BA'ZÎ EZ-MÜNTEŞİBÂN-I İLM Kİ BE-CEM'-İ HİTÂM-I DÜNYÂ
MEŞGÛLEND***

2506.İlmiden kimde ki var-ıdı eser
Ol zamânda mâla itmezdi nazar

2507.Kim bilürdi yoh-durur anda bekâ
Âhiretde_olur kişiye ol şakâ

2508.N'oldı şimdi ilm da'vî eyleyen
Yâ hakîmem diyüben söz söyleyen

2509.Kim olupdur hırsa cânî pâyimâl
Karnı toymaz dirdüğünce genc ü mâl

2510.Oldı Tevrît ohınandan ol beter
Bir pula bulursa Kur'ânın satar

2511.Taylasân uzatmış u da'vî vü rîş
Lîki yigrek nefside andan keşîş

2512.Eyle sevmiş üşbu dünyâ menzilin
Kim dutar cândan azîz âb u gilin

2513.Hubs ü tezvîr ü hased endîşesi
İt bigi halkı talamah pîşesi

2514.Yoh yakîn ilminde lîkin tolu şek
Yüz kitâb üstinde şöyle kim eşek

2515.Hırs bigi hurd u hâb olmuş işi
Hûk bigi her necâsetdür işi

2516.Mûr bigi dahlı tolu dîh ü şeh
Mâr bigi sâ'ile virdüğü zehr

2517.Zâg bigi cîfe-hâr u şûm-fâl
Bûm bigi rûz-kûr u zîşt-hâl

2518.Karga bigi hîle-kâr u hem dagal
Har-meges bigi'avân u bî-asel

2519.Genc-i Kârûn virür-iseñ birine
Bir pulum yoh diyübenüñ yirine

2520.Taşu tolu kibr içi hubs-ıla kîn
Aña reh-ber olmuş İblîs-i La'în

2521. Bu kamu hâl-ıla gösderüp riyâ
Vâriş-i peygamberem dir zî hayâ
2522. Vâriş-i Peygâmbere ol ola yakîn
K'anda olmaya hasedle kibr ü kîn
2523. Zînet-i dünyâyâ kılmaya nazar
Himmetind'ola ber-â-ber hâk ü zer
2524. Tasfiye-y-le nefsi eyle ide pâk
K'ola ol âyîne bigi tâb-nâk
2525. Kim ola her gayb orada âşikâr
Hem Ledünnî ilm ide anda karâr
2526. İlm kim ol kesb-ile gelür ele
Enbiyâdan nicesi mîrâs ola
2527. Keşf-durur keşf ilm-i enbiyâ
Anı mîrâs ald'olardan evliyâ
2528. Şâh hakîmüñ sözine kaldı aceb
Pes tabîb-i Hindi eyledi taleb
2529. Ol tabîbi bilür-idi şehriyâr
Kim olupdur Hind içinde nâm-dâr
2530. İlm ü hikmetdedür olbir feylesûf
Kim kamu esrâra bulmuşdur vukûf
2531. Bir hakîm-âne sü'âl itdi aña
Şöyle kim kaldı tabîb andan taña
2532. Did'aña kim âdemîyi kıl beyân
Cân mıdur yâ cism tâ bilem ayân
2533. Şerh it baña anuñ terkîbini
Vasf it bir bir kamu tertîbini
2534. Bu tılısmuñ baña şerhin eylegil
Zâhir ü Bâtın nicedür söylegil
2535. Ol tabîb eydür diriben akl u hûş
Tut benüm sözlerüme bir lahza gûş

CEVÂB-I HAKÎM EZ-SUÂL-İ İSKENDER

- 2536.Bu sözüñ ma'nîsini ger bilesin
Biline kim kendüñ-ile bilesin
- 2537.Hâlıküñi bilmek isterseñ yakîn
Nefsüñi bil evvel iy pâkîze-dîn
- 2538.Añlagıl anı ki ne cevher-durur
N'ireden geldi vü ne mazhar-durur
- 2539.Nefs irfânını kıl evvel taleb
K'ol-durur ol Hakkı bilmege sebeb
- 2540.Ne kişisin bilmeyince sen seni
Nic'ola mümkün ki bilesin anı
- 2541.Aña kim nefsini nedür bilmeye
Ehl-i irfân adı lâyıık olmaya
- 2542.Bilmeyen nefsin ne gevherdür yakîn
Olmaya ârif ki câhildür hemîn
- 2543.Hûş-ıla ger gûş dutarsañ baña
Ne kişisin şerh idem sini saña
- 2544.Gelişüñ kandan n'ireye gidişüñ
Geldügüñden buraya nedür işüñ
- 2545.Kim getürdi sini üşbu menzile
Kim mukayyed itdi bu âb u gile
- 2546.Çün bu ahvâli temâmet bilesin
Aña lâyıık ne gerekdür kılasın

DER-BEYÂN-I MA'RİFFET-İ RÛH VE BEDEN

- 2547.Bil ki üşbu cismüñ aslı hâkdür
Nefsi key aña ki nûr-ı pâkdür
- 2548.Kuds gül-zârı-durur aña vatan
Lîki bunda kaygudur aña bu ten
- 2549.Bunda bağlandı ki tâ kâmil ola
Dürlü idrâkât aña hâsıl ola
- 2550.Cân u ten bir yirde çün cem' oldılar
Dilde insân lafzı-la ad buldılar

- 2551.Kısr-durur cism cândur aña magz
Bu sözi kim eydürem fikr eyle nagz
- 2552.Kısr anuñ-çundur ki anuñ-ıla magz
Sahlana aña degin kim ola nagz
- 2553.kısr içinde nagz çün ola temâm
kısr sınımlılığ gerekdür bî-kelâm
- 2554.Tâ ki ola âdemîye kuvvet ol
Kuvveti-y-le ola insânlığa yol
- 2555.Tâ nebât-iken bulıbanuñ hayât
Rûh-ı hayvânîden ala ol sıfât
- 2556.Nefs dahı cism'anuñ-çun ittisâl
İtdi k'anda eyleye kesb-i kemâl
- 2557.Çün kemâli kesb idüp ola temâm
Kısrı tenden çıhsa gerek bî-kelâm
- 2558.Ne ki bula kuds gül-zârına yol
Kuds ehlinden biri dah'ola ol
- 2559.Çûje çünkim beyzada bula kemâl
Lâ-şek ol bayza olur aña vebâl
- 2560.Lâ-cirem ol beyzai delmek gerek
Çıhup andan dünyaya gelmek gerek
- 2561.Yiryüzinde her yaña seyrân idüp
Zevk itmeklik gerek cevlân idüp
- 2562.Tâ yiri geh sebz'ola vü gâh bâg
Menzili geh yazı_ola vü gâh tag
- 2563.Göre anda nice sünbüller olur
Nice reyhânlar ne hoş güller olur
- 2564.Rûh tende dahı çün bula kemâl
Lâ-cirem ol ten olur aña vebâl
- 2565.Bu kafas çün uşanıban çıhar ol
Hoş bulur Firdevs gül-zârına yol
- 2566.Âlem-i ervâh olur cevlân-gehi
Cennet-i Firdevs olur seyrân-gehi

- 2567.Bilen ol Firdevs-i A'lâ gül-şenin
Nice seve bu heyûla kül-henin
2568.Hûş-ıla hoş gûş tut bir dem baña
K'ol makâmuñ vasfını idem saña
2569.Akla sıgmaz kim nedür ol kârığâh
Bî-nihâyet yir-durur ol bârığâh
2570.Tolu-durur nûr belki nûr-ı nûr
Ucdan uca râhat u zevk u sürûr
2571.Lezzetine hiç gâyet yoh-durur
Vüs'atine hod nihâyet yoh-durur

DER-ŞERH-İ ASL-I BEDEN VE RÛH

- 2572.İşid imdi cism hâlin eydeyim
Saña terkîbin anuñ şerh ideyim
2573.Bir güherdür cism bâkî vü sakîl
Muzlim ü müntin dahı hûr u alîl
2574.Balgam u safrâ vü sevdâdur u kan
Hem izâm u lahm eczâsı ayân
2575.Dahı evtâr u ribâtât-ı aceb
Hem urûk u cild ü gudrûf u asab
2576.Nefs bir gevher-durur pâk ü latîf
Hayy u nûrânî vü derrâk ü haffif
2577.Hem semâvîdür ü revhânî-sıfat
Sâhib-i idrâk ü ehl-i ma'rifet
2578.Çünkü eczâdan degül ol mü'telif
Pes tegayyürle olamaz muttasıl

DER-ŞERH-İ ECZÂ-YI BEDEN VE ACÂYİB-İ ÂN BE-TARİK-I RÛMÛZ

- 2579.İşid imdi bu beden terkîbini
Ucdan uca vü dahı tertîbini
2580.Fî'l-mesel bir şehrdür re'sen-be-râs
Aña dörd ezdâd olmışdur esâs
2581.Kıldı Hak tokuz güherden üstüvâr
Üşbu şehri kim görürsin âşikâr
2582.İkiyüz ü kırksekiz dahı amûd
Koyubanuñ anı berkitdi vedûd

- 2583.Yıdiyüz yigirmi bende-y-le temâm
Kıldı evsâlinı muhkem bî-kelâm
- 2584.Ortasında kıldı bir çeşme ayân
Üçyüz altmış cûy itd'andan revân
- 2585.Dürlü evler anda tertîb eyledi
Çog acâyib dahı terkîb eyledi
- 2586.On hazîne dahı kıld'anda ayân
İtdi anda dürlü gevherler nihân
- 2587.On iki kapu dahı_anda açdı ol
Kapulardan düzdi mahzenlere yol
- 2588.İşleyüp bunda sekiz üstâd-ı kâr
Eylediler üşbu şehri üstüvâr
- 2589.Kıldı biş kişiyi anda pâsübân
Bişi dahı dūr-bîn ü kâr-dân
- 2590.Pes aña iki kanat virüp ayân
Şeş-cihetden yaña kıld'anı revân
- 2591.Hem iki direkle berkidüp anı
Muttasıf kıldı hevâda ol Ganî
- 2592.Üç kabîle sâkin itd'anda ayân
İns ü cinn ü pes melâyik bî-gümân
- 2593.Bir melek kodı olara dâd-ger
Kim koyalar tâ'atına cümle ser
- 2594.Ol dah'anlara riyâset eyleye
Aralarında siyâset eyleye
- 2595.Üşbu resme şehr kim didüm saña
Eyd işitdün mi ya gördün mi baña
- 2596.Kim ne zîbâ düzedüpdür ol Kadîm
Üşbu şehri fikr itgil iy hakîm
- 2597.Üşbu resme şehr hergiz kim göre
Yâ bu sun'uñ fikretine kim ire
- 2598.Kim bedâyi'le acâyibdür tolu
Hem sanâyi'le garâyibdür tolu

2599. Gerçi kamu nesned'eksük çoh-durur
Bilki üşbu şehrd'eksük yoh-durur
2600. Çünkü kılduñ üşbu bünyâda nazar
Gel bu bünyâdı koyandan sor habar

DER-BEYÂN-I İSTİDLÂL BER-VÜCÛD-I SÂNİ-İ ÂLEM

2601. Her ki bir bünyâd görür üstüvâr
Bî-gümân bilür ki bir bânîsi var
2602. K'anı bu resm-ile bünyâd eyledi
Böyle hoş san'atla âbâd eyledi
2603. Çün bunuñ vasfında fikret kılasın
Kudretin ilmüñ beyânuñ bilesin
2604. Akluñı dirüp kulah dutgıl baña
Ol rümûzuñ şerhini idem saña

MATLA'-I RÛMÛZ-I ACÂYİB Kİ DER-BEDEN-İ İNSÂNEST

2605. Ol tokuz gevher nedür bilgil ayân
İlik ü süñük tamardur it ü kan
2606. Dahı hem siñir deri yag-ıla kıl
Herbiri nesne-y-içün bellü bil
2607. Ol ikiyüzkırhsekiz dahı direk
Bu süñüklerdür yakîn bilmek gerek
2608. Didigüm ol yidiyüz yigirmi bend
Cümle siñirler-durur iy hûş-mend
2609. Bu ten eczâsın sinirler ser-te-ser
Birbirine berkidüp kâyim dutar
2610. Ger bulardan biri nâ-gâh ola kem
Nakz ire uzva andan lâ-cirem
2611. Çeşme didigüm ciger-durur ki kan
Çıhuban ol çeşmeden olur revân
2612. Üçyüzaltmış ark tamarlar-durur
Kim cigerden çıhup a'zâya varur
2613. Oralardan irişür her uzva kan
Varur ol kan-ıla her endâma cân
2614. Bu ne hikmetdür ki ider ol Kadîm
Bu ne san'atdur ki kılur ol Hakîm

- 2615.On iki kapusın ol şehrüñ saña
Eydeyüm bir bir kulah dutgıl baña
- 2616.İki kulahdur u iki göz ayân
İki burındagı kapu bî-gümân
- 2617.Her nefes andan girür çıhar yakîn
Kim hayât anuñ-ıla-durur hemîn
- 2618.Sînede dahı uş iki kapu var
Rızk-ı etfâl-ıçun olmış âşikâr
- 2619.Bir kapu nâf u biri dahı agız
K'ol kapudan tartaruz ol rızkî biz
- 2620.İki kapu dahı ol kim oldı ol
Her gıdânuñ fazlası çıhmaga yol
- 2621.Bu kapulardan biri ger kem ola
Bî-gümân bu şehir nâ-muhkem ola
- 2622.Nedür ol biş päsübân bî-biş ü kem
Zevk u lems ü sem' hem ebsâr u şem'
- 2623.Ol sekiz üstâd iy dâna-yı dîn
Câzibedür mäsike bilgil yakîn
- 2624.Hâzıme-y-le dâfi'a pes gâdiye
Hem musavvirle müvellid nâmiye
- 2625.Câzibe ol kim gıdâyı cezb ider
K'ol gıdâ gidecegi yire gider
- 2626.Mäsika ol kim anı sahlar müdâm
Aña degin kim ola hazmı temâm
- 2627.Hâzıma ol kim gıdâ hazmın kıla
Tâ beden andan gereklüsin ala
- 2628.Dâfi'a ol kim gıdâdan artanı
Def' idiben pâk eyleye teni
- 2629.Gâdiye ol kim gıdâyı düzedür
Şöyle k'anı mugtedîye beñzedür
- 2630.Tâ ki ola mâ-tahallelden bedel
Tiz irişmeye bu terkîbe haleb

- 2631.Nâmiye ol k'artar anuñla beden
Gâyet-i neşvine irişince ten
- 2632.Bil Musavvir nedür ol kuvvet yakîn
K'andan alur sûreti tıfl-ı cenîn
- 2633.Üç karañulıguñ içinde müdâm
Nakş iden sûretleri oldur temâm
- 2634.İlm yohdur dir musavverde tabîb
Lîki sûretler düzer hûb u acîb
- 2635.Bu ne sözdür ilmsüz nice ola
Nakş k'ol bî-ayb u hem zîbâ gele
- 2636.Zulmet-i erhâmda Hakdur hemîn
Sûreti bu resme nakş iden yakîn
- 2637.Kamu eşyâya Musavver ol-durur
Kim yakîn Dâna vü Kâdir ol-durur
- 2638.Pes müvellid ol-durur kim çün gıdâ
Hazm ola bir cüz' ider andan cüdâ
- 2639.Tâ k'ola bir şahsa dahı kâbil ol
Bir dah'anuñ bigi ide hâsıl ol
- 2640.Tâ ki nev'a dahı irmeye fenâ
Şahsa çün mümkün degül dâim bekâ
- 2641.Bu sekiz üstâd celdi-y-le temâm
Üşbu ten şehri imâretdür müdâm
- 2642.Nefs-i emmâre-durur cinnî-misâl
Kim anuñ şer-durur işi mâh u sâl
- 2643.Nefs-i levvâme nedür insân-sıfat
Mutma'innedür melâik-ma'rifet
- 2644.Nefs-i levvâme adıdur muktasıd
Hayr u şerr andan gelür bu iki zıd
- 2645.Akl-durur ol didügüm pâdişâh
K'ol-durur nûr-ı Hak u zıll-ı İlâh
- 2646.Aña uygıl kim Ülü'l-emr ol-durur
Hazrete lâyık seni ol oldurur
- 2647.Ger uyarsañ togrılıg-ıla aña
Mutma'inne ide nefsüñi saña

2648. Tâ ki hem-tab'-ı firişteh olasin
Huld gül-zârına hoş yol bulasin
2649. Çünkü varup olasin anda mukîm
Bulasin rûh-ıla Reyhân u Na'îm
2650. Anda hoş câvîd zinde olasin
Her ne râhat kim dilersin bulasin
2651. Ger bu akl emrine isyân idesin
Nefsüni hem-tab'-şeytân idesin
2652. Lâ-büd olasin mu'azzeb câvidân
Ola cânuñ mihnet ohına nişân
2653. Ol hazâyinden birisidür dimâg
K'ol arada yahılur akla çirâg
2654. Bir hazîne dahı olmışdur yürek
Rûh-ı hayvânîy'anı bilmek gerek
2655. Birisi dahı ciger-durur ayân
K'orada mahzûn olur peyveste kan
2656. Bir hazîne dahı zehredür ayân
Orada tutup-durur safrâ mekân
2657. Kalur anda oradan olmaz cüdâ
Tâ ki em'â olmayınc'andan gıdâ
2658. Bir hazîne dahı bil k'em'a-durur
Bir zamân dahı gıdâ anda varur
2659. K'oradan az az tamlara gider
Tâ galîzini kanuñ terkîk ider
2660. Kim beden etrâfına varıbile
Teng yirlerde dahı cârî ola
2661. Bir hazîne dahı olmışdur tihâl
Yiri sevdânuñ ol olur mâh u sâl
2662. Orada mahzûn-durur sevdâ müdâm
Kim gıdâ andan alur cümle izâm
2663. Ma'de-durur ol hazâyinden biri
Anda añlanur gıdâ k'oldur yiri
2664. Biri dahı gürdedür anuñ ayân
Birisi dahı mesâne bî-gümân

- 2665.Gürdede çün bevl kandan ayrılır
Bir tamardan ol mesânaya gelür
2666.Gürdeden bu bevl çün az az iner
Pes aña bir yir gerek iy pür-hüner
- 2667.Kim temâm irince anda tura ol
Çün temâm ine bu çılmaga yol
- 2668.Ol yol olmasa bulamazdı karâr
Katre katre_ahardı dâim âşikâr
- 2669.Âdemî dâim necîs olur-ıdı
Belki yavuz kohudan ölür-idi
- 2670.Üşbu muhkem fitratı fikr eylegil
İlm ü kudret nic'olur zikr eylegil
- 2671.Biri nutfe yiri-durur bil anı
Sâfi kanuñ orada olur menî
- 2672.İki ayah-durur didüğüm ol direk
İki el iki kanat bilmek gerek

DER-ŞERH-İ ERVÂH VE KUVÂ-YI BEDEN-İ İNSÂNÎ

- 2673.Çün beden şerhini işitdüñ temâm
Gel işit ervâhdan dahı kelâm
- 2674.Üç olur olbiri hayvânî-durur
Dahı şehvânî vü nefsanî-durur
- 2675.Rûh-ı hayvânî k'olardandur biri
Kâbil idendür teni k'ola diri
- 2676.Bu buhâr-ı cism aña hâmil olur
Kim latîf ahlâtdan hâsıl olur
- 2677.Çün yürek cevfind e hâsıl olur ol
Rûh envârına kâbil olur ol
- 2678.Nâtıka bulur ta'alluk aña bil
Üşbu sözleri ki direm yâd kıl
- 2679.Ol taalluk-çün temâm olur aña
Câri olur ten içinde her yaña
- 2680.Ol'uruk içinde her uzva gider
Cümle-i a'zâyı nûrânî ider
- 2681.Rûh-ı nefsanîyye ol-durur sıfat

Kim ol ehl-i ilm ü fehm ü ma'rifet

2682.Rûh-ı şehvânî didüğüm ol ayân
Kim ciğer olup-durur aña mekân

2683.Kim varur her uzva oradan gıdâ
Kim bula her uzv neşv-ile nemâ

DER-MA'RİFET-İ RÛH-I TABÎ'Î

2684.Oradandur kuvvet-i neşv ü nemâ
Hem orada şehvet-i kût u gıdâ

2685.Ol sekiz üstâd kim didüm saña
Bî-gümân hâdim-durur cümle aña

2686.Üşbu ervâhdan dahı üçinci kısım
Rûh-ı nefsânî-durur sorarsañ ism

DER-MA'RİFET-İ RÛH-I İNSÂNÎ

2687.Ol iki kısımetde oldı münkasım
Herbiri bir vasf-ıladur müttesim

2688.Birine adı-y-la müdrik didiler
Birine dahı muharrik didiler

DER-BEYÂN-I KUVVET-İ MÜDRİKE EZ-KUVÂ-YI İNSÂN

2689.Müdrik iki kısım olmışdur temâm
Zâhir ü Bâtın işit iy nîg-nâm

2690.Zâhirî ebsâr u zevk u lems ü şemm
Biş olur sem'-ile ne bîş ü ne kemm

2691.Biş dahı bâtındur işit tutma şek
Birisinüñ adı hiss-i müşterek

2692.Müdreke-i cümle havâs-ı zâhire
Aña dahı zâhir olur yik-sere

2693.Katre k'iner birbirinden munfasıl
Bu sebebden görünürler muttasıl

2694.Kim basardan gâib olmadın berî
Râst hiss-i müşterek olur yiri

DER-BEYÂN-I HİSS-İ MÜŞTEREK EZ-KUVÂ-YI İNSÂNİYYE

2695. Müşterekden olmadın ol hem nihân
Biri dahı göze görünür ayân
2696. Nesnenüñ kim cevrine budur sebab
Dâyire görindüğü tutma aceb
2697. Sûretin eşyânuñ ol-durur bilen
Farkını her nesnenüñ oldur kılan
2698. ‘Âc ağını kara agından ol bilür
Bu havâsa cümle hâkim ol olur

DER-MA’RİFET-İ HAYÂL EZ-KUVÂ-YI BÂTINA

2699. Ol kuvâdandır ikincisi hayâl
K’anda her mahsûsa bağlanur misâl
2700. Ol dimâğ içinde dutmuşdur makâm,
Müşterek katında olur ol müdâm
2701. Her neyi kim müşterek zabt eyleye
Aña virür anı tâ k’ol sahlaya

DER-MA’RİFET-İ HİSS-İ VEHM EZ-KUVÂ-YI BÂTINA

2702. Vehmdür andan üçinci kısım olan
Ma’ni-yi cüzvîyi ol-durur bilen
2703. Zeyd mihrin Amr bugzın bilen ol
Bu ikinüñ dahı hükmin kılan ol
2704. Üşbu kuvvet kamu hayvânda olur
Hayrın u şerrin anuñ-ıla bilür

DER-MA’RİFET-İ KUVVET-İ HÂFİZA

2705. Hâfızadır biri dahı ol bişüñ
Biri âhir cevî’ içindedür başuñ
2706. Vehm idrâk eyledüğünü temâm
Ol hazîne-dârdur sahlar müdâm

**DER-BEYÂN-I KUVVET-İ MÜFEKKİRE Kİ ÂN-RÂ MÜTEHAYYİLE
NİZ-GÜYEND**

- 2707.Ol bişincidür tefekkür kuvveti
Kamudan artuhdur anuñ rütbeti
- 2708.Her neyi kim bildise vehm ü hayâl
Ol tasarruf ider anda mâh u sâl
- 2709.Dürlü dürlü nesnelere tertîb ider
Gâh tafsil ü gehî terkîb ider
- 2710.Gâh başsuz gâh iki başlu kişi
Ol tefekkür ider üşbudur işi
- 2711.Uyhuda kamu kuvâ sâkin olur
Bu kişide dâ'imâ şöyle kalur
- 2712.Orta batnında dimâguñ ol müdâm
Pîş-gâhını idüp-durur makâm
- 2713.Hem firâset hem siyâset andadur
Hem nübüvvet hem riyâset andadur
- 2714.Oldur eşyâyı tasavvur eyleyen
Her işi oldur tefekkür eyleyen
- 2715.An'olur ilhâm u vahy ü dîn ü şer'
Vaz' ol ider dîn yolında asl u fer'
- 2716.Ol melik-vâr ortada_olmuş pîşivâ
Aña hâdim olmuş ol kamu kuvâ
- 2717.Bu acâyib san'ata kılup nazar
N'iredendür aña bu kamu suver
- 2718.Ger bu san'atlarda fikret kılasın
Sen seni kimsin hakikat bilesin

KISM-I DÜVÜM DER-ŞERH-İ KUVVET-İ MUHARRİKE EZ-KUVÂ-YI İNSÂNÎ

- 2719.Ol muharrik dahı iki kısım olur
Herbirinden diñle kim ne iş gelür
- 2720.Görubenüñ bu sanâyî' hikmetin
Nicesidür aña Sâni' kudretin
- 2721.Biri ol k'anuñ-ıla her cânavar

Cezb-i nef' idüp kıla nef' ü zarar

2722.Biri debrenmeg-içün a'zâ temâm
Geh çeker her uzvı vü geh kor müdâm

2723.Bu kuvâ kim ben saña itdüm beyân
Kamunuñ a'sâbdur yiri ayân

2724.Hiss ü cünbiş âleti-durur asab
Menbeti baş oldugı budur sebab

2725.Üşbu tendedür ayân bu kamu kısım
Kim düze cüz' Hak bunuñ bigi tılısm

2726.Bu tılısmuñ işini zikr eylegil
Pes tılısmı düzeni fikr eylegil

KELÂM-I HİKMET DER-NAZAR-I İ'TİBÂR VE MEV'İZE VE TEVHÎD-İ SÂNİ'

2727.Bu tılısmı kim görürsin pîç pîç
Düşer az nesne-y-le olur hîç hîç

2728.Bu tılısmı terk it budur edeb
Var tılısmı düzedeni kıl taleb

2729.Ger ola tevfk k'anda iresin
Mülk-i Bârî nice olur göresin

2730.İRmez aña âfet ü derd ü 'anâ
Yohdur anda mihnet-i ters ü fenâ

2731.Râhat andadur ki kişi ölmeye
Ölüm olan yirde râhat olmaya

2732.Dut tenüñ kamu anâdan ola sag
Ölüm añmah içüñe yitmez mi tag

2733.Biñ yıl olmah yiryüzinde pâdişâh
Ölümi añmaga degmez gâh gâh

2734.Sözi çog itdügümi tutma aceb
Burada kim aña bu-durur sebab

2735.Kim nedensin sini kimsin bilesin
Pes işüñi aña lâyük kılasın

2736.Hem saña biline sırr-ı men aref
Hâlıkı bilmekle bulasın şeref

2737.Nefsi gerçi idüben üç nev'e kısım

Herbirine virdiler bir dürlü ism

2738.Ucı bir-durur ta'addüdsüz yakîn
Fi'ldedür ger taaddüd ver hemîn

2739.Tende çün neşv ü nemâ fi'lin kılur
Ad'anuñ nefsi-i nebâtiyye olur

2740.Kim nemâ vü neşv-ile olur nebât
Gerçi hayvân bigi yoh anda hayât

2741.Cisme çün kuvvet virüp zinde kılur
Lâ-büd adı rûh-ı hayvânî olur

2742.Fikr temyîz olıcah andan ayân
Rûh-ı nefsanî olur adı bî-gümân

2743.Çün bu üç yird'itdi üç dürlü eser
Bir degül didi anı kûteh-nazar

2744.Fi'li çog u kendüsi birdür yakîn
Yoh ta'addüd anda vahdetdür hemîn

2745.Herbir âletle ider bir dürlü iş
Ne güherdür bunı bilmege düriş

2746.Dil-ile söyler kulahla işidür
Göz-ile görmek hem anuñ işidür

2747.Şöyle kim neccâr bıçgu-y-la diler
Agacı vü miskab-ıla hem deler

2748.Pîşe birdür bî-şek ü hem pîşe-ger
Bunda anda yoh ta'addüdden eser

2749.Lîki olduğu-y-çun âlet muhtelif
Dürlü vasf-ıla_oldı bir iş muttasıf

2750.Bildüñ-ise üşbu sözleri dürüst
Kisvet-i dâniş boyuña geldi cüst

2751.Şeh bu sözleri çün andan kıldı gûş
Didi kim iy âlim-i bisyâr-hûş

SU'ÂL-İ İSKENDER EZ-KİYÂM-I BEDEN Kİ BEÇÇE-ÇİZEST

2752.Şerh itdügün bu terkîb-i latîf
Kim düzüpdür anı Hak böyle Şerîf

2753.Saña bu gurbetde ol merkeb-durur

Oraya varmaga kim matleb-durur

2754.Sini irgürür Hakuñ Rıdvânına
Bâg-ı Kudsüñ revh-ile reyhânına

2755.Pes bunı kânûn-ı tıbb-ıla müdâm
Sahlamah gerek-durur iy nîg-nâm

2756.Nedür ol kânûnı şerh eyle baña
Kim gereklüdür hemîşe ol buña

2757.Ne gereklüdür bu cisme şerh it
Hıfz-ı sıhhat aslı ne-durur eyit

2758.Didi budur âlet aña irmege
Varuban Dârü'n-Na'îme girmege

CEVÂB-I SUÂL-İ ZÜLKARNEYN

2759.Lâ-cirem kânûn düzilmiştir aña
Kim mizâcı dâ'im anuñla oña

2760.Az yimek-durur şehâ asl-ı ilâc
Kim anuñla ten-dürüst ola mizâc

2761.Az yigil az tâ ki râhat bulasın
Çoh yir-iseñ çoh harâret bulasın

2762.Az yiyen kişi hemîşe sag olur
Çoh yiyenüñ yüregi pür-dâg olur

2763.Az yiseñ geydüñ melâyik hil'atin
Çoh yiseñ dutduñ bahâyim hasletin

2764.Çoh yimekden ne gelür derd ü'anâ
Âhiri n'olur 'anânuñ cüz' fenâ

2765.Çoh yimekden kimse râhat almadı
Az yimeklikden peşîmân olmadı

2766.Az yiyen Îsî-sıfat göge varur
Çoh yiyen Kârûn bigi yire girür

2767.Ney bigi ger olasın hâlî-şikem
Düzesin gam def'ine dürlü nagam

2768.Ger kalem-vâr idesin mi'de-tehî
Ma'ni iklîminüñ olasın şehi

2769.Ger safâ-nefs ü gerekse az yigil

Hakk'irem dirseñ ta'allukdan kesil

2770.Var ehâdisüñ kitâbında sahih
K'oldı Hak'dan Îsaya vahy-i sarîh

2771.Ac olgıl tâ ki bini göresin
Var mücerred ol ki baña iresin

2772.Çün bu sözleri işitdi tâc-ver
Ol tabîbe virdi mâl u sîm ü zer

2773.Didi ol cân olmasun endûha kayd
K'ide lutfi-y-la hüner ehlini sayd

2774.Tolu hikmet remzidür bu dâsitân
Gûş tut kim bir bir ideyim beyân

DER-TEMSÎL DÂSİTÂN VE İ'TİBÂR

2775.Mü'mini İskender'e kılğıl mesel
K'ola çoh müşkil senüñ göñlüñe hal

2776.Kim-durur ol bânû-yı gül-çihre dîn
Zîneti tevfik-ile ilme'l-yakîn

2777.Oldı terk-i şehvet-i nefis aña mehr
Aña mihrüñ varsa kıl bu nefsi kahr

2778.Ol sıfat itdügümüz dâna hakîm
Bî-gümân kim ola Kur'ân-ı Azîm

2779.Dileseñ k'işüñde olmaya halel
Ol hakîmüñ sözi-y-ile kıl amel

2780.Ol tabîb-i hurde-dân kim Mustafâ
Kim bilür dîn derdine nedür şifâ

2781.Anda-durur kamu derdüñ çâresi
Her ki dermân ister aña varası

2782.Ol tabîbüñ destümüzden bil yakîn
Ne-durur dilde tahıyyetdür hemîn

2783.Nefs-durur didügüm ol ulu câm
Kim var anda hayra vü şerre makâm

2784.Hayr rahmetdür su Rahmândan gelür
Şerr la'net süci Şeytândan gelür

2785.İçme anı tâ müselmân olasın

İçer-iseñ mahz-1 şeytân olasın

2786.Girü İskenderden idelüm haber
Çıharalum ilm bahrından göher

DER-SIFAT-I BEZM-İ İSKENDER VE ÂRÂYİŞ-İ ÂN

2787.Çünkü itdi ilmde şâh-1 cihân
Feylesûf-ıla tabî'î imtihân

2788.Çıhdı halvet-hânesinden şâd-kâm
Bârıgâha geldi cümle hâs u âm

2789.Düzdi bir meclis k'anı Erdebehişt
Görse diye-y-di ki zî hurrem-Behişt

2790.Bâde Kevserdi vü sunan cümle hûr
Ehl-i cennet big'içen tolu sürûr

DER-SIFAT-I ÇENG

2791.Elin'aladı câmı kıldı bezme sâz
Çengini sâza getürdi nagme-sâz

2792.Sâz-zen çün çenge itdi râst-çeng
Dürlü dürlü sözler âgâz itdi çeng

2793.Her lügatde sûz-ıla söz söyledi
Cümle uşşâkı muhayyer eyledi

2794.Çünkü düşdi cânına derd-i firâk
Toldı sûz-ıla Sıfâhân u 'Irâk

2795.Zahm yiyüp key zaîf olmuş özi
Kâmeti egri velî togrı sözi

2796.Her yaña seyrân ider bî-pâ vü ser
Dili yoh her nesneden virür haber

2797.Kendü huşk ü söyledügi cümle ter
Zahm yidükçe olur hoş nagme-ger

2798.Pîre-zen şeklinde fi'li nev-cüvân
Vâlih olmuş ıskına akl-ıla cân

2799.Zühre bigi menzili işret yiri
Mihr-ile mâh olmuş aña Müşteri

DER-SIFAT-I NÂÛ

- 2800.Nây-zen çünküm eline aldı nay
Zühre sâzı perdesin eyledi tay
- 2801.Ney düzüp her perdede dürlü nagam
Ne gönülde gussa kodı vü ne gam
- 2802.Dilsüz-iken râst sözler söyledi
Ayrulıhlardan şikâyet eyledi
- 2803.Nây göynüklere virür haber
Nâlesi âşıklara kılur eser
- 2804.Âşık-ısañ sen dah'anuñ bigi ol
Bulasın her perdeye girmege yol
- 2805.Kamu gönüllerde makbûl olasın
Cânlaruñ içinde menzil bulasın
- 2806.Ney kabûli sûzı-la bulup-durur
Derdi-le derde tabîb olup-durur
- 2807.Zâhirinde bâtınında sağı yoh
Yir bulunmaz k'anda anuñ dağı yoh
- 2808.Bir dahı gire diyü maksûd ele
Vâyvây-ıla virür ömri yile
- 2809.Yüregi binüm bigidür tolu baş
Lîki ben yaşluyam u yoh anda yaş
- 2810.Yahmış ucdan uca anı âh u derd
Şem' big'olmuş nizâr u zâr u zerd
- 2811.Gâh inildü-y-le dirilür gâh ölür
Yârdan ayru düşen eyle olur
- 2812.Ayagı yoh yil-iledür hem-inân
Başı yoh od-ıla hem-serdür ayân
- 2813.Şerha şerh'olup-durur bu derd-mend
Anuñ-ıçundur teninde bunca bend
- 2814.Niçe kim yaralanur Cercîs-vâr
Yine diri zî kerâmet k'anda var
- 2815.Işk derdi pes mübârek derd olur

Aña yanan şem' bigi ferd olur

2816. Her gönül k' aña yahıldı oldı hâs
Nakdi anuñ kalbden oldı halâs

2817. Şem' bigi yahdugını nûr ider
Cânları rûşen kılup ma'mûr ider

2818. Işk odına yananı sanmañ k'ölür
Hızr bigi zinde-i câvîd olur

2819. Ney ünine şâh içüp birkaç kadah
Bâde neşvi gönline virdi ferah

DER-BEYÂN-I DÂD U DİHİŞ-İ İSKENDER-İ RÛMÎ

2820. Bahşış itdi Keyd-i Hind'e bî-şümâr
Atlas-ı dîbâ vü dürr-i şâh-vâr

2821. Taht-ı zerrîn ü dahı tâc u kemer
Herbirinde baglu biñ dürlü göher

2822. Pes buyurdu k'ilerü geldi dibâr
Kim saçardı hâmeden müşg ü abîr

2823. Çün şeh emri-y-le ele alup kalem
Çekdi kâfûr üstine müşgîn-rakam

2824. Hakd-ı Rûm'a Zengden bir hurde-kâr
Kıldı nakş-ı Çîn-ile Rûmı şikâr

2825. Müşg bahrına girüp çıhardı dür
Dürr-ile dîbâ-yı Çîni kıldı pür

2826. Rûm içinde kıldı Hindüstânı bahş
Keyd-i Hinde Zengî-iklîmini bahş

2827. Keydle her nev'a k'itmişdi karâr
Yirine getürdi şâh-ı nâm-dâr

2828. Şeh gerek kim ahdine ola dürüst
Dilese k'olmaya devlet rükni süst

2829. Devlet ıssı şöyle gerek k'ide cehd
K'olmaya ayruhsı andan hîç ahd

2830. Pâdişâhlığın dileyen pâydâr
Anda üstine gerekdür üstüvâr

2831. Nakz-ı ahd İblîs işidür bellü bil

Ahdüñi ayruhsı itme cehd kıl

2832.Şâh k'olmaya anuñ kavli dürüst
Bî-şek olur devleti erkânı süst

2833.Ger olayım dir-iseñ peyveste şâh
Cehd it kim olmaya arduñca âh

2834.Âh yili şehlerüñ tahtın yıhar
Âh odı illeri oda yahar

2835.Hiç nesne döyemez âh ohına
Kûh-ı âhenden geçer çün tohına

2836.Anı kim bir Zâl ider bir âh-ıla
Rüstem idemeye sâl u mâh-ıla

2837.Kim bilür âhı ne-durur ohı ne
Çarh korhar şerh'anuñ-çun ohına

2838.Gâh olur âh irse Kûh-ı Kâf
Âh elif-kaddi büker şöyle ki kâf

2839.Boyanur âhuñ dütüni-y-le sipihr
Kararur âh-ıla rûy-ı mâh u mihr

2840.Hâr görme pîre-zenler âhını
Kim ider ol kâh kûh-ı âheni

2841.Cehd it arduñca nefrîn olmasun
Aduñı sahin ki bî-dîn olmasun

2842.Her kişi k'ardınca nefrîn ohına
Olur umac ol belânuñ ohına

2843.Şeh gerek adl âyetine duta sem'
Adli-y-ile yilden îmîn ola şem'

2844.Râst-gû_ola sahlaya peymânını
Dîve aldurmaya ol îmânını

2845.Her ki yalancıdur u peygâm-şiken
Aña diri yürimekten yig kefen

2846.Söyleme yalan kim ol erlik degül
İki dillü olma kim dirlik degül

2847.İki dillü oldugı-y-ıçun kalem
Ser-nügündür u siyeh-kâr u dijem

- 2848.İkiliksüz kanda kim birlik ola
Hoşlıg-ıla bî-gümân dirlik ola
- 2849.Bir didüñse ikilik sözini ko
Rište-i tevhîd gerekmez dü-tû
- 2850.İki yüz tutma ikilik dîn degül
Yik-cihet ol ikilik âyin degül
- 2851.İkiyüzlü oldu kâgıd lâ-cirem
Kara tutar yüzine her-dem kalem
- 2852.AHMEDÎ'nün sözi hikmetdür ü pend
Devlet anuñ k'andan ola sûd-mend
- 2853.Ehl-i devlet ol-durur k'ögüt ala
Ögüt almayan kişiden ne gele
- 2854.Dostından her kim işitmeye pend
Bî-şek ire aña düşmenden güzend

DÂSİTÂN-I ŞİKÂR-GERDEN-İ İSKENDER DER-HİNDÛSTÂN

- 2855.Söylegil iy tûti-yi şîrîn-nefes
Kim sözüñ işitmeğdür cân heves
- 2856.Şimdi söylegil ki dilüñdür revân
Kim gelür birgün ki bağlanur zübân
- 2857.Var mı bülbül k'anı döğmez hâr-ı dehr
Var mı tûtî kim yidürmez aña zehr
- 2858.Ûd-veş söyle ki söz pes hûb olur
Hâse ol sözler ki sûz-ıla gelür
- 2859.Çünki ol tahtı mutî eyledi şâh
Diledi Fûr üstine ilte sipâh
- 2860.K'olmuş-ıdı aña yağı Fûr-ı Hind
Katına dirilmiş-idi cümle Sind
- 2861.Bir melikdi Fûr kim Hindûstân
Görmemişd'anuñ bigi sâhib-kırân
- 2862.Kış irişd'İskender eyle kıldı rây
Kim ide ârâm leşker birik'ay
- 2863.Şeh dahı birkaç gün ola şâd-kâm
El virürken içe Cem tahtında câm

- 2864.Kim karâr itmez bu gerdende sipihr
Ne vefâ ider kimesneye ne mihr
- 2865.Niçe geldi gitdi Zülkarneyn ü Cem
Niçe dahı gelübenüñ gide hem
- 2866.Her ne zerre kim tozıdur yirde bâd
Yâ Ferîdûndur u sorsañ yâ Kubâd
- 2867.Düzdi bir meclis şehinşâh-ı cihân
Kim virürdi bâg-ı cennetden nişân
- 2868.Mankal-ı zerrîne içinde bakam
Yahdı vü ûd-ıla sandal dahı hem
- 2869.Çün bulıtdan reng-i anber aldı evc
Müşg evcinden zer-endûd oldu mevc
- 2870.Çün hevâdan peşşe yagdı sîm-ber
Evde şeb-tâb uçdı açdı bâl-i zer
- 2871.Itr-ıla pür kıldı magzı dûd-ı'ûd
Sâz-ıla şâd itdi rûhı rûd-ı ûd
- 2872.Rûd-zen çünkim rebâba urdı dest
Bir nefesde meclis ehlin kıldı mest
- 2873.Açdı çünkim barbut oldu nagme-sâz
Bî-zübân uşşâkdan yüz dürlü râz
- 2874.Perdede nagme düzüp gösterdi çeng
Sâz-ıla her perdede yüz dürlü reng
- 2875.Sûz-ıla çün ney nüvâda söyledi
Râst uşşâkı muhayyer eyledi
- 2876.Sâki-yi yâkût-leb itdi revân
Câm-ı la'li k'ol-durur asl-ı revân
- 2877.Yüridi meclisde ol gül-gûn-kadah
Kim fütûh-ı rûhdur asl-ı ferah
- 2878.Sundılar bir bâde-i anber-buhûr
K'oldı eyvân aksi-y-ile tolu nûr
- 2879.İçdi birkaç gün bu resme tâc-bahş
Mâl u mülk ü gene ü iklîm itdi bahş
- 2880.Mülk alup olam diyen sâhib-vücûd
Pîşesi anuñ gerek kim ola cûd

2881. Tâ ki bula her murâda dest-res
Kullığına halk anuñ ide heves
2882. Âhir eyle rây kıldı şehriyâr
K'ide Hindüñ tagların dahı şikâr
2883. Göre ol taglarda kim şîr ü peleng
Âdemî-y-le nic'ider âşûb u ceng
2884. Bu söz üstine şeh-i gâtî-fürûz
Tazı itler'istedi vü bâz u yûz
2885. Hindi vü Rûmî vü Îrânî-gürûh
Yürüyüben toldı cümle deşt ü kûh
2886. Şâh bir şeb-reng bindi hâre-süm
'Ûd mûy u anberîn-dem müşg-düm
2887. Kûh-peyker bâd-pây u berk-seyr
Kim anuñ tozına anuñ irmez-idi tayr
2888. Yuharudan inse bir maktûr ecel
Aşagadan çıhsa bir sâlih-amel
2889. Görseñ oldem diye-y-idüñ şehriyâr
Kim Süleymândur yile olmış süvâr
2890. Yiryüzün tolu hilâl eyledi na'l
Cânavar kanından oldu hâk la'l
2891. Sayd içinde nâ-gehân bir şîr-i ner
K'ejdehâ kılurdu cenginden hazer
2892. Sâ'ika ohı bigi ser-ceng tîz
Her dişi bir hancer itdükde sitîz
2893. Kıldı Zülkarneyne cümle nerre-şîr
Çün gelür gördi anı şâh-ı dilîr
2894. Bir hadeng ohı-y-la yayın çekdi şâh
Sanasın kim burc-ı kavse girdi mâh
2895. Ya zihinden çünki açıldı girih
Geldi herbir gûşeden âvâz-ı zih
2896. Añrayıban gelür-idi nerre-şîr
Başına tohındı nâ-geh çûbe-tîr
2897. Yara geçdi beynisin tîr-i hadeng
Künd oldu yaradan ol tîr-i ceng

- 2898.Kana topraga bulaşup virdi cân
Şâh eline âferîn itdi cihân
- 2899.Mülk isdeyen gerek ser-bâz ola
Mâl u cân kadri katında az ola
- 2900.Baş kayuran uramaz başına tâc
Cân seven kişi tutamaz taht-ı âc
- 2901.Baş hatâsınsuz bulunmaz tâc-ı zer
Kim ulu işlerde çoh olur hatar
- 2902.İzzet iste itmegil nefsüñi dún
Ser-firâz ol kimseye olma zebûn
- 2903.Kişi kim izzetle devletde ola
Yig ki biñ yıl acz-ile diri öle
- 2904.Oradan bir yaña dahı vardı şâh
Kim nazar kıla nicedür sayd-gâh
- 2905.Şâh öñinden çıhdı bir gurrende-bebr
Kim emân bulmazdı cenginden hizebr
- 2906.Şâh anuñ üstine saldı semend
İrdi vü boynına berkitdi kemend
- 2907.Koyup atınuñ inânın şehriyâr
Bir iki meydân yügürdi berk-vâr
- 2908.Şeh kemendi tutar u asar semend
Bebr şâh ardınca boynında kemend
- 2909.Tâ ser-encâm oldı âciz cânavar
Derd-ile cân virdi ”fi nâri’s-sakar”
- 2910.Bebr ardınca iki gurrân peleng
Çıhdılar bîşe içinden tîz-ceng
- 2911.Bir pelenge irdi urdı bir hadeng
Şöyle kim cân virdi ol demde peleng
- 2912.Birine dahı pelengüñ şehriyâr
At sürüp ardınca irdi berk-vâr
- 2913.Bir kılıc başına urdı eyle tîz
Kim kopardı ol pelenge rüstahîz
- 2914.Zahm yiyüp düşdi topraga peleng
Kana bulaşmış ser-â-ser yâl ü çeng

2915. Didiler şâhı görenler k'âferîn
Cânuña sinüñ eyâ şâh-ı zemîn
2916. Şâd olgıl şâd iy Hak sâyesi
Çarh olsun taht-gâhuñ pâyesi
2917. Görmedi sinüñ bigi bir nîg-baht
Görmeyiser dahı hergiz tâc u taht
2918. Döndi ol nahcîrden eyvâna şâh
Lâle-zâr olmuş ser-â-ser sayd-gâh

DER-TEMSİL-İ DÂSİTÂN VE MEV'İZE

2919. Nefs-i emmâre-durur ol şîr-i ner
K'idemez anı zebûn her nâm-ver
2920. Bebr didüğüm saña nedür gazab
K'ol-durur her dürlü isyâna sebeb
2921. Ol iki kaplan nedür kibr ü menî
Kim helâk itmege isterler seni
2922. Ger bu düşmenlere fırsat bulasın
Sen Sikenderden dahı yig olasın
2923. Bunları yiñsen cihân sultânısın
Ne Sikender Tengriñ arslanıñ
2924. Ger neûz billâh anlara mecâl
Ola sini tîz iderler pâyimâl
2925. Hâlık emrin tut diler-iseñ Na'îm
Nefse gâlib ol gerekmezse Cahîm
2926. Ne-durur göñlüñde "Nâru'llâh" gazab
Cân u dil yahılur urduhda leheb
2927. Ger dilerseñ gelmeye câna hatar
Kibrden başuñda olmasun eser
2928. Kibrdür Şeytânı hazretten süren
La'net idüp tâ'atin yile viren
2929. Âdemîseñ kıl tevâzu' ihtiyâr
Kibr kandan hâklılığ kandan i yâr
2930. Dileseñ ayyûka kim yol bulasın
Şöyle kim şeb-nem fütâde olasın
2931. Ger tehevürle gelesin seyl-vâr

Ser-nigûn düşüp olasin hâr zâr

2932.Dil-şikeste dut meremmet olasin
Derdimend olgıl ki dermân bulasin

2933.Er kişi oldur ki sâhib-derd ola
Derdi olmayan kişi nâ-merd ola

2934.Her kimüñ kim sûzı var dem-germ olur
Şem' bigi âhen deminden nerm olur

2935.Böyle hoş-dem olmaya-y-dı ûdsuz
Şem' bigi olmasa cânında sûz

2936.Şem' oda yanıcah bulur safâ
Nûr olur gün bigi bulur ziyâ

2937.Çeng kim her perded'ider dürlü saz
Zahmı var anuñ-ıçundur dil-nüvâz

2938.Ney ki nefis ider hevâsına heves
Derdi var anuñ-ıçundur hoş-nefes

2939.Kalmadı bu devrde bir ehl-i derd
Kim göze sürme ola yolında gerd

DER-HÂTİME-İ DÂSİTÂN BE-MÜNÂCÂT

2940.AHMEDÎ'nüñ iy Kerîm-i bî-niyâz
Kılma gönlin pâyimâl-i hırs u âz

2941.Sâfi eylegil hasedden cânını
Pâk tutgil küfrden îmânını

2942.Gönlini tevhîd-ile pür-nûr it
Ma'rifetle cânını ma'mûr it

2943.Zâhirin anuñ riyâdan eyle pâk
Bâtının ihlâs-ıla kıl tâb-nâk

2944.Şöyle rûzî it aña ilme'l-yakîn
K'ol ola ayne'l-yakîn dahı hemîn

2945.Ol tecellî-y-ile sırrına sürûr
Şöyle kim gide küdüret kala nûr

2946.Rahmetüñden eyleme nev-mîd anı
K'isteyü geldi ümîd-ile seni

2947. Her ki ol sinüñ ümîdüñe gele
Rahmetüñden hâşa kim nev-mîd ola
2948. Her günehten k'itmişem ben iy Kerîm
Nâdimem "estagfîru'llâhe'l-azîm"

DÂSİTÂN-I CENG-İ İSKENDER BÂ-FÛR-I HİNDÎ VE HELÂK-ŞÛDEN-İ Û

2949. Sâz kıl iy andelîb-i hoş-nüvâ
Kim sözüñdür cânlara berg ü nevâ
2950. Söyle fırsat var-iken iy nagme-sâz
Sûz-ile her perdede yüz dürlü râz
2951. Kim ele girmez bu fırsat her zamân
Çarhtan kim buldı kim bula emân
2952. Niçe kim döndi döniser bu sipîhr
Kimseye itmedi vü itmeye mihr
2953. Kim bilür dehrüñ ser-encâmı nedür
Yâ bu dönmekden felek kâmı nedür
2954. Sâlehâ döndi döniser bî-gümân
Kimsene bilmez anı ne-y-çün ayân
2955. Rengine kalma anuñ iy bî-haber
Şûh-ı zâlimdür kıl andan sen hazer
2956. Bâg k'anuñ adlinüñ dîvânıdur
Her güli yüzbiñ Sikender kanıdur
2957. Her kimi añsan Sikender yâ Kubâd
Topragın biñ kez suya savurdu bâd
2958. Zerre zerre isdeseñ eczâ-yı hâk
Kaş u gözdür hatt u hâl olmuş helâk
2959. Kankı lâle k'açılup yirden biter
Bir semen-ber yañagındandur eser
2960. Kankı nergis k'açılup olur ayân
Bir gül-endâmuñ gözindendür nişân
2961. Kankı sebze kim çemende yaşarur
Bir yañagı lâle haddinden-durur
2962. Her benefşe kim yir altından çıhar
Bir perîşân zülfden virür habar
2963. Bir semen-ber yüzidür her-yâsemen

Hâl dili-y-ile dir vâ-yâ semen

2964.Bî-emeldür bu cihân u tolu ye's
Pes gerek her baş duta kendüye yas

2965.Gonca k'olur subh-dem anber-fişân
Bir yüzi gül tutagındandur nişân

2966.Sayd ider şâh u gedâ ne bulsa yir
Pes güzâf olmadı anuñ adı yir

2967.Hiç nesne olımaz aña siper
Hiç kimse bulımaz andan mefer

2968.Çün komaz sini kaçansa yir bu yir
Varsa akluñ ögmegil sen anı yir

2969.Bu yire bağlamagıl göñlüñ i yâr
Dahı yirdür bu degül cây-ı karâr

2970.Mülk ol ger anı ma'mûr idesin
Pâdişâhsın çünki bundan gidesin

2971.Girü İskender sözün söyleyelüm
Fûr-ı Hind'e n'itdi şerh eyleyelüm

DER-MATLA'-I DÂSİTÂN VE SIFAT-I BAHÂR

2972.Çün ber-â-ber oldı leyl-ile nehâr
Virdi İsiden nişân bâd-ı bahâr

2973.Oldı subh enfâsı hoş anber-sirişt
Oldı bâg etrâfı gül-zâr-ı Behişt

2974.Nergisüñ gözlerine düşdi humâr
Sünbülüñ gîsûsı oldı tâb-dâr

2975.Lâle saldı micmer-i yâkûta ûd
Düzdi gül şavkında bülbül sâz-ı ûd

2976.Oldı sebze ârızı pîrûze-hat
Goncadan kızardı yâkûtî-nukat

2977.La'l-ter bitürdi yirden hâr-ı huşk
Dökdi zülfinden benefşe târ-ı müşg

2978.Her taraf dürlü reyâhîn oldı cem'
Bitdi herbir talda bir rahş-ende şem'

2979.Levh-i mînâ üstine saçdı çemen

La'l-i sır-âb u zer ü dürr-i Aden

2980.Topraguñ her zerresinden bir güvâh
Baş götürüp didi “Lâ-Rabbün sivâh”

2981.İy hoşâ vakt-i gül ü fasl-ı bahâr
Câm-ı reyhânî vü ışk u vasl-ı yâr

2982.Hoş-durur işret hoş u zevk u safâ
Veh ki zâlimdür bu çarh-ı bî-vefâ

2983.Rahm itmez zahm urur bî-sebeb
Pes ne hayr itsün kişi andan taleb

SIFAT-I LEŞKER-İ İSKENDER

2984.Tâc-bahş u Karn u Zülkarneyn-i şâh
Fûr-ı Hind üstine ilette sipâh

2985.Biñ koşun leşker düzetti şehriyâr
Her koşun biñ kişi cevşen-ver süvâr

2986.Kendü boyında ikiyüzbiñ dilîr
Kamusı âlî-nijâd u şîr-gîr

2987.Toldı cümle kûh u deşt âvâz-ı kûs
Oldı tozdan çarh yüzi âbnûs

2988.Yüridiler nâm-verler fevc fevc
Bahr bigi Hind Berri urdı mevc

2989.Yiryüzi toldı direfş-ile alem
Âleme sığmazdı hod hayl ü haşem

2990.Fûr-ı Hindî'ye çün irişdi haber
Kim gelür uş leşkeri-y-le şîr-i ner

2991.Fûr dahı bir sipâh eyledi cem'
Kim anuñ mislin işitmemişdi sem'

2992.Biñ kezin biñ Hindi-y-idi kıyr-rûy
Oniki biñ dahı fil-i ceng-cûy

2993.Âbnûs u âcdan bagladı taht
Fîller üzre k'ola pîrûz-baht

2994.Kodı her taht üstine itmege ceng
Üç kişi herbiri bir gurrân-peleng

2995.Ohları herbirinüñ tîr-i kader

K'irürürdi bî-hatâ câna hatar

2996.Yüridi leşkerle vü kopdı gırıv
Sanasın oldı cihân deryâ-yı dîv

2997.Fîl cengin görmemişdi şehriyâr
Ne hod Îrânî vü ne Rûmî-süvar

2998.Fıkr itdi kim ne mekr ü âl-ıla
Leşkerin filüñ perâkende kıla

2999.Şâh çün dâna vü rây-engîz ola
Hükmine âlem müsahhar tîz ola

3000.Pâdişâh bilürdi cümle san'ati
Bile iltürdi ol ehl-i hırfeti

3001.Fıkr idiben bakırdan nîg-nâm
Biñ mücevvef fîl düzdürdi temâm

3002.Kıldı kibrît ü güherçile-y-le pür
Kamusın her iş kilîd-i akldur

3003.Bagladı her fili bir kañlıya şâh
Pes sürüp yüritdi ardınca sipâh

3004.Mevc urdı ol yañadın bahr-ı kıyr
Kûs gurrân oldı vü nâlân nefîr

3005.Kasdı bu kim fîl saffin ide sed
K'ola İskender çeris'anuñla red

3006.Çünki gördi birbirin iki sipâh
Fîli yüritdi ilerü Fûr-ı şâh

3007.Fîller üstinde turan ol sipâh
Tîr bârân ideler çünk'ire şâh

3008.Çün Sikender gördi Fûruñ âlını
Saldı_ilerü fillerüñ timsâlını

3009.Kanglı-y-ıla_evvel yüritdi fîl şâh
Pes yüridi fîl ardınca sipâh

3010.Fîl file iricek vakt-i sitîz
Urdılar kibrîte sûzân odı tîz

3011.Dutışup kibrît-ile güherçile
Kopdı yiryüzinde nâ-geh zelzele

- 3012.Hevlden kaldı serâsîme felek
Sînede çâk oldu korhudan yürek
- 3013.Göge çıhdı şu'le tagıldı şerâr
Ra'd üninden yir oldu bî-karâr
- 3014.Kaldı hayrân göz kulahlar oldu ker
Diye-y-idüñ kim kıyâmetdür meger
- 3015.Fîller od heybetinden ol zamân
Ürküben mecmû'ı kaçdılar devân
- 3016.Düşdi filüñ herbiri bir bîşeye
Âferîn hoş-rây u key endîşeye
- 3017.Rây-ıla her işe çâre bulunur
Kişi kadri dâniş-ile bilinür
- 3018.Çün tagıldı fil kaldı Fûr-ı şâh
Sald'anuñ üstine İskender sipâh
- 3019.İki düşmen birbiri-y-l'idüp neberd
At ayagından göge dikildi gerd
- 3020.Birbirine irdi leşker fevc fevc
Kan revân oldu arada mevc mevc
- 3021.Bahr-ı hûn-ıdı sanasın rezmigâh
Tozdan olmuşdı belürsüz mihr ü mâh
- 3022.Kan buhârından belürmezdi sipihr
Ata ogul birbirin'itmezdi mihr
- 3023.Baş-ıdı her kanda kim irişe na'l
Kandan olmuş-ıdı kûh u deşt la'l
- 3024.Diyedüñ elmâs yagdurur sehâb
Yâ hevâdan dökilür berr-i ukâb
- 3025.Şâh arada şöyle kim ceng-i peleng
Düşmenüñ kanına tiz itmişdi çeng
- 3026.Saf yıhardı n'ireye kim itse azm
Cân yahardı kimüñ-ile kılsa rezm
- 3027.Korhar-ıdı ohı sehminden Kader
Hem ecel iderdi rumhundan hazer
- 3028.Meymene hem kalb-gâh u meysere
Kılıcından oda yandı yiksere

- 3029.Âkîbet çün irdi te'yîd-i İlâh
Fûr-ı Hindî'ye muzaffer oldu şâh
- 3030.Kime kim te'yîdi Hakkuñ yâr ola
Âteş-i sûzân aña gül-zâr ola
- 3031.Her kimüñ kim Hakk ide bahtın bülend
Kimseneden irmeye aña güzend
- 3032.Fûr döndi tâli'in çün gördi şûm
Sürdi germ ardınc'anuñ sâlâr-ı Rûm
- 3033.Kaçamadı Fûr ki irmişdi kazâ
Ad' "izâcâ el-kazâ zâk'al-fezâ"
- 3034.İrdi vü bir darb-ıla ol demde hem
Başını göksine dek kıldı kalem
- 3035.Zahm yidi şâh-ı Hindû ser-nigûn
Düşüp ol dem oldu gark-ı hâk ü hûn
- 3036.Ger gedâdur u eger şâh-ı cihân
Toprag altında olur cümle nihân
- 3037.Toprah altında ne vardur kim bile
İşbu söz ser-riştesini kim bula
- 3038.Saña dünyâ mihr ide sanmagıl
Nîşdür nûşına hiç el sunmagıl
- 3039.Kimleri yir işbu tîre-hâki gör
Kimleri yire sohar eflâki gör
- 3040.Kahr ider mihr zahm urur sipihr
Kim ne bunda rahm var ne anda mihr
- 3041.Bir iki gün dut ki revnak buldı baht
Assı ne çün ayruguñdur tâc u taht
- 3042.Bunda biñ yıl ger imâret idesin
Bir nefesdür çünki bundan gidesin
- 3043.Çünki bu yirden koyup gitmek gerek
Gitmedin key yaragın itmek gerek
- 3044.Ölmedin gerek kayuñda olasın
Ne gele senden eyit çün ölesin

3045.Sen başar kendü işüni bîş ü kem
Kimse-y-içün yimeye kimsene gam

3046.Ben ki bu nakş-ıla dîvân baglaram
Kendüzümü dirligümde aglaram

3047.Bini benden soñra tâ hod kim aña
Yâ terahhum kim ide birgün baña

3048.Sözümü cân kulagı-y-la kıl semâ'
Bu tene cânuñ dimedin el-vidâ'

3049.Ben tarîkat şerhin iderem saña
Bu hikâyet bir bahânedür baña

DER-TEMSÎL VE HÂTİME-İ DÂSİTÂN

3050.Fûr-ı Hindî nefsi-i emmâre-durur
Kim elinde kişi bî-çâre-durur

3051.Fîller nefsüñ kuvâsıdur yakîn
Akl İskenderdür iy dâna-yı dîn

3052.Akl nefsüñ şerrini iderse def'
Pâdişâhsın dünyi ukbî saña nef'

3053.Merci'üñi itdi Hak Dârü'n-Na'îm
Câvidân kalduñ ol arada mukîm

3054.Giydügüñ nûr oldı yidügüñ sürûr
İçdügüñ kamu şarâb oldı tahûr

3055.Vây nefsi iderse akluñı zebûn
Dünya vü ukbîde olduñ ser-nigûn

3056.Oldı yirüñ câvidân nâr-ı Cahîm
Yidigüñ zakkum u içdügüñ hamîn

3057.Göñlüñi baglamagıl sen bu yire
Âkıl ol kim buni añmaya yire

3058.Ol ki burada sevine yiri ne
Bî-gümân birgün ola kim yirine

3059.Var-ısa göñlüñde sinüñ mihricân
Bir yire var k'anda esmez mihricân

3060.Tâzedür bâğında dâim berg ü bâr
Bî-hazândur anda olan nev-bahâr

3061. Ne ölüm var anda hergiz ne elem
Ne kimesne korkudan dir ne ölem
3062. Ol makâma var-ısa cânuñda şavk
Kıl Hakuñ emrin gönül boynına tavk
3063. “Yef’alu’llâhi mâ-yeşâ” di iy mürîd
tâ murâduñ vire “yahküm mâ yürîd”
3064. **AHMEDÎ**’ye iy Kerîm-i Zî’l-Minen
Dest-gîr ola dünya vü ukbîde sen
3065. Nefs âlâyışın andan zâyil it
Göñline ünsün safâsın hâsıl it
3066. Dehşetin sür aklına bağışla sahv
Eyle andan âdet evsâfını mahv
3067. Rahmet it aña ki fazluñ çok-durur
Senden artuk hiç ümîdi yok-durur

DÂSİTÂN-I EJDEHÂ-KÜŞTEN-İ İSKENDER DER-HİNDÜSİTÂN

3068. Subhdur iy mürğ-i hoş-gû sâz kıl
Sûz-ıla her perdede âvâz kıl
3069. Söyle bir destân ki rûhı kıla şâd
Kim var edvâruñ besî destânı yâd
3070. Kim bilür kim nice döndi döne devr
Ne kerân vardur bu deryâya ne gavr
3071. Her nefes bir levne döner rûzigâr
Her nefes bir nakş kılur âşikâr
3072. Gam yime bir iki gün ol şâd-kâm
Fikrin encâmuñ unıt nûş eyle câm
3073. Âkıbet fikrinde hûn olur çiger
Bî-haber olsañ yig andan bî-haber
3074. Bî-habarlık kurtarur senden seni
Pes kamu tâ’atdan efdâl bil anı
3075. Mâ u menlik saña olmışdur hicâb
Gider anı kim bulası feth-i bâb
3076. Gerçi temyîzüñ makâmı oldu sahv
Senden ol yig k’ola bu evsâf mahv

- 3077.Sâki-yi gül-çihre bir gül-gûn kadah
Sun elüme k'andan ala cân ferah
- 3078.Bir nefes hoş ol ki bu gerdende dehr
Kahramânları ider ü itdi kahr
- 3079.Ol ki baş çekmişdi dün eflâkden
Uşbu gün baş kalduramaz hâkden
- 3080.Şol k'aña irigelürdi dün harîr
Uş yatup bugün yir altında çürir
- 3081.Zerre zerre topragi itseñ taleb
Tolu-durur zülf ü hâl ü hatt u leb
- 3082.Bir nigâruñ zülfidür bah sünbülü
Bir semenber yüzidür görgil güli
- 3083.Serv bir dil-ber boyındandur nişân
Nâr bir bî-dil yüregidür ayân
- 3084.Bitdügi yir yâsemenle behmenüñ
Topragıdur Erdevân u Behmenüñ
- 3085.Bir kerîmüñ pençesi dest-çenâr
Bir fasîhüñ dili sûsen âşikâr
- 3086.Nakz-durur kamu devr itdügi ahd
Zehr-durur dehr düzetdügi şehd

MATLA-I DÂSİTÂN

- 3087.Nevbetin çünkim düketdi Fûr-ı Hind
Oldı Zülkarneyn'e fermân Hind ü Sind
- 3088.Migferi indürdi geydi tâc-ı Key
Aldı Cem tahtında_eline câm-ı mey
- 3089.İçdi nûş-â-nûş oldı şâd-kâm
Çünki nefsin tayyibü'l-vakt itdi câm
- 3090.Fûrdan aldugı mülk ü mâl u zer
La'l ü mervârîd ü yâkût u güher
- 3091.Dahı nekim aldı şâh-ı nîg-nâm
Halka in'âm eyledi ol gün temâm
- 3092.Virmeg-içündür bu mülk ü genc ü mâl
Virmeyicek renc olur u vebâl

- 3093.Yi vü yidür çünki bulduñ mâl u genc
Yohsa olur ol soñra saña mâr u renc
- 3094.Key sakın key zâyi' itme rencüñi
Sen gider kimseye koma gencüñi
- 3095.Mâl kim sen yimeyesin mârdur
Gül ki sen kokulamazsın hârdur
3096. Varuñı yohlulara kılığıl sebîl
Çün işitdün "beşşirû mâle'l-bahîl"
- 3097.Kişi k'anda olmaya dâd u dehiş
Gelmeye anuñ elinden hergiz iş
- 3098.Cehd it hayr-ıla ol dünyâda yâd
Diler-iseñ k'olasın ukbîde şâd
- 3099.Her k'anuñ key adı kaldı ölmedi
Tâze-durur ömri bâğı solmadı
- 3100.Çend-kerret çünki devr itdi sipih
Sâye Mîzân burcına düşürdi mihr

SIFAT-I HARÎF VE İSTIVÂ-İ LEYL Ü NEHAR

- 3101.Gice gündüz râst-mîzân oldılar
Çün terâzû keffesine geldiler
- 3102.Hulle-i bâğ olmuş-iken sebze-kâr
Oldı Hak fermânı-y-ıla zer-nigâr
- 3103.Oldı mînâ-reng tal-ı zer-fişân
Keh-rübâya degşürildi ergavân
- 3104.Kalmadı gül-zârda berg ü nüvâ
Başladı kâfûr saçmaga hevâ
- 3105.Sindden bir kişi geldi nâ-gehân
Yir öpüp didi ki iy şâh-ı cihân
- 3106.Hâlıküñ halkınasın feryâd-res
Sensüz olmasun bu âlem bir nefes
- 3107.Kopdı Sind ilinde bir ner-ejdehâ
Kim deminden kimsene olmaz rehâ
- 3108.Dütüninden karara yandı nebât
Aldı hayvândan anuñ zehri hayât

- 3109.Çıhar agzından nefes ürse semûm
Kohusu irdükde olur seng mûm
- 3110.Kuşı indürür hevâdan ürse dem
Tarta bir ferseng yirden vahşi hem
- 3111.Fîl gelse buraya yâ bebr ü şîr
Dem ürüben yudar iy şâh-ı dilîr
- 3112.Kıldı bir iklîm vîrân ser-te-ser
Çâresini şâh ide anuñ meger
- 3113.Ger kala bir yıl dahı ol ejdehâ
Şark u garb olmaya şerrinden rehâ
- 3114.Bu sözi çünkim temâm işitdi şâh
Sind iline râst itdi azm-i râh
- 3115.K'ejdehâyı ide ol yirde helâk
Ol belâdan kıla ol iklîmi pâk
- 3116.Söz öküş çün Sinde geldi şehriyâr
Ejdehâyı sordı kanda_ider karâr
- 3117.Ejdehâ durduğı tag altında şâh
Kondı vü şâh-ıla çok hayl ü sipâh
- 3118.Sordı evvel çünki oldı çâre-ger
Uzv uzv ol ejdehâyı ser-te-ser
- 3119.Pes bir ulu kanglı düzdi nîg-baht
Tahtadan baglatdı_anuñ üstinde taht
- 3120.Düzdi ağaçdan taht üzre tâc-ver
Kıyr-ıla bir ev sevinmiş ser-te-ser
- 3121.Biñ demür çengâl düzdi tîz-ser
Kim kılurdu herbiri taşdan güzer
- 3122.Virdi her çengâl ucına âb-ı zehr
K'ejdehâ zahm-ıla der-hâl ola kahr
- 3123.Kamusın ol ive berkitdürdi şâh
Her yañadın çünkim oldı kîne-hâh
- 3124.Pes getürdi iki öküz zûr-mend
Kıldı evi kañlı-y-ıla anlara bend
- 3125.İki kapu düzmiş-idi şâh aña
Herbiri ne-y-çün diyeyim ben saña

3126. Bir'anuñ-çun kim öküzi şehriyâr
Süre ol su'bânı itdükde şikâr
3127. Yiri k'anları yudarken ejdehâ
Şâh andan çihuban ola rehâ
3128. Yidi şeh tiryâk dürtindi devâ
Sıgınuş Allâh'a girdi ol eve
3129. Her k'aña sığına zâyî' olmaya
Ejdehâ kâmına düşe ölmeye
3130. Şol zamân k'ürdi nefes bâd-ı seher
Taga sürdi kanglıyı hûrşîd-fer
3131. Ejdehâ kasdına çünkim itdi hîz
Kim cihândan şerrini def'ide tîz
3132. Memleket bî-şek belâ dâmındadır
Şâh olan ejdehâ kâmındadır
3133. Şâh oldur k'idicek ser-tîz ceng
Döymeye cengine ser-tîz-i peleng
3134. Vasfını işidüben re'sen-be-râs
Ejdehânuñ gevdesin itdi kıyâs
3135. Kanglıy'eyle düzmiş-idi pür-hüner
Kim anı yudamaya-y-dı cânaver
3136. Çün kohu aldı bulardan ejdehâ
Zehr saçageldi haml'itdi şaha
3137. Ol kapuyı k'öküzi sürerdi şâh
Yapup oturdı Hakı itdi penâh
3138. Cânavar yahın gelicek ürdi dem
Kim yuda ol cüft ol kanglıyı hem
3139. Yudar öküzler ü kanglıyı temâm
Kalup öküzler anuñ old'aña dâm
3140. Batdı ol çengâller endâmına
Zîr ü bâlâ berkiniben kâmına
3141. Kanglıya dikildi iki çânesi
Oldı vîrân magz u dîde-hânesi
3142. Agzını açdukça ol çengâl-i tîz
Başı eczâsını kıldı rîze-rîz

- 3143.Çün yılanuñ dirligi başınd'olur
Başına irse hâlel bî-şekk ölür
- 3144.Açdı sandûkuñ kapusın şehriyâr
Çıhdı kâm-ı ejdehâdan berk-vâr
- 3145.Çekdi Dahhâkî kılıcın Cem-nijâd
Kıldı nusret virenüñ adını yâd
- 3146.Ejdehâya şöyle bir zahm urdı şâh
K'âferîn itdi eline mihr ü mâh
- 3147.Pes eline yayın alup şîr-ceng
Ejdehâya urdı bir tîr-i hadeng
- 3148.Ol hadengüñ yarasından cânaver
Oldı gark-ı hâk ü hûn-âb-ı ciger
- 3149.Virdi ol zahm-ıla cânın ejdehâ
Kimseyi itmez ecel çengi rehâ
- 3150.Ger peleng ü şîr ü ger bebr ü neheng
Çâresüz kalur ecel sunduhda çeng
- 3151.Mûm iderken zûr-ıla pûlâdi şâh
Ejdehâyı kañlı-y-ıl'avladı şâh
- 3152.Lâ-büd aldı ejdehâdan ol demâr
Zâr-ıla anuñ elinde öldi mâr
- 3153.İts'anı Behmen bigi atı-y-la sayd
Nâ-geh olurdu anuñ kâmına kayd
- 3154.Var-durur her nesnenüñ bir âleti
Bî-şek anuñ andan olur âfeti
- 3155.Çâresin her nesnenüñ bir âleti
Pes anuñla def'ini kılsañ gerek
- 3156.Gerçi şâhîn celd olur u tîz-per
Bulamaz it itdügi sayda zafer
- 3157.İtde gerçi tîz olur u tîz-per
Kuş gibi nice hevâda kıla ceng
- 3158.Çün işitdün k'ejdehâyı şehriyâr
Kañlı-y-ıla nicesi itdi şikâr
- 3159.Sen dahı kañlı-y-ıla it hasmı sayd
K'ejdehâ-y-ısa ola dâmuna kayd

3160. Gerçi kim çoğ ola sende zûr u tâb
Sabr it her işde kılmagıl şitâb
3161. Sunmagıl fikr itmedin her işe el
K'olur evvel fikret ü âhir amel

DER-TEMSİL VE HÂTİME-İ DÂSİTÂN

3162. Hâtıruñdur Sind ü Şeytân ejdehâ
Def'in itmezseñ hatâ-durur hatâ
3163. Kıl anı lâ-havle zahmı-y-la tebâh
Olduñ İskender bigi her mülke şâh
3164. Nefs cehd it bî-fezâyil kalmasun
Sa'y kıl k'ehl-i rezâyil olmasun

DER-BEYAN-I ECNAS-I FEZAYİL

3165. Oldur ecnâs-ı fezâyil bil yakîn
İlm-i hikmet dahı adl iy pâk-dîn
3166. İffet ü dahı şecâat cins hem
Dörd olur bilgil kamu bî-bîş ü kem
3167. Bu fezâyil sende ger olursa cem'
Olasın Hak nûrı-la tâbende-şem'
3168. İlm-i hikmetle gönül rûşen ola
Adl-ile cân menzili gül-şen ola

DER-BEYÂN-I İFFET EZ-ECNÂS-I FEZÂYİL

3169. İffeti-y-le kişi olur nîg-nâm
Hem şecâatle bulunur cümle kâm
3170. Bu didüğüm hikmetüñ ecnâsıdur
İşid envâ'ın dahı iy sözi dür
3171. Hikmet iki kısımdur biri nazar
Birisi dahı amel iy pür-hüner
3172. Kısm kim ilm-i nazarla ad olur
Cümle envâ'î riyâziyyât olur
3173. Hem dahı ilm-i İlâhîdür yakîn
Dahı hem ilm-i tabâyi' dür hemîn
3174. Oldı envâ'-ı amel iy pür-hüner
İlm menzil hem siyâset hem siyer

3175.Bil siyer ilmin kim ol ahlakdur
Bir bir eydeyüm işit iy sözi dür

DER-ŞERH-İ ŞECÂAT EZ-TEHZÎB-İ AHLÂK

3176.Ol dem olasin şecâatde dürüst
Kim sebâtuñ olmaya hiç işde süst

3177.Varsa akluñ yil big'olma bî-sebât
Pâyidâr ol tag big'isderseñ necât

3178.Bâd çünkim bî-sebât olup eser
Herze-rev oldı adı vü hâk-ser

3179.Taglar oldugı-y-ıçun sâbit-kadem
Buldılar evtâd-ı âlemler

3180.Nefsi dîn itme bülend it himmeti
Kişinüñ himmetle artar rütbeti

3181.Ger dilerseñ k'ola saña baht yâr
Kıl tevâzu'la tahammül ihtiyâr

3182.Bî-tahammül kişi olur bî-hüner
Bî-tevâzu' kişi şeytândan beter

3183.Kişi k'anda olmaya hilm ü sükûn
Kamu işi olur idbâr u cünûn

3184.Her kişide kim hamıyyet olmaya
Kemdür ölüden egerçi ölmeye

DER-SIFAT-I HAYÂ EZ-MEKÂRİM-İ AHLÂK

3185.İffetüñ varsa gerek sende hayâ
Bî-hayâ Şeytândur insân kim diye

3186.Bî-hayâlıhdur aña kibr itdüren
Kibrdür Hazretten anı atduran

3187.Çün "enâ hayrûn" didi ol la'netî
Hakdan işitdi "aleyke la'netî"

3188.Ne-durur nefsüñ kemâli rıfk u sabr
Pes nedür tab'-ı peleng ü hûy-ı bebr

3189.Kendü kibridür pelengi k'itdi hâk
Kendü hûyı kıldı hem bebr helâk

3190.Râhat isterseñ kanâat eylegil
Kendüñe anı sanâat eylegil

- 3191.Bî-kanâat tohlığında ac olur
Ger cihân anuñsa hem muhtâc olur
- 3192.Çün kanâat kenz-i lâ-yefnâ ola
Anuñ-ıla toymayan kiş'ac öle
- 3193.İffetüñ nedür sehâ pîrâyesi
Afv ne olur sehâ sermâyesi
- 3194.Kimde iffetle mürüvvet olmaya
Bî-şek ol ehl-i fütüvvet olmaya
- 3195.Ben ki bu yolda kemer bağlamışam
Tâkatumca her işi añlamışam
- 3196.Asr ehlinde mürüvvet görmedüm
Birini ehl-i fütüvvet görmedüm
- 3197.Ne mürüvvet ne keremden var eser
Kîmyâdur bu vü ol ankâ meger
- 3198.Yidi kirm ol germi k'adı-y-dı kerem
Kime sorarsam anı dir kim kerem
- 3199.Ger saña yoldaş olur-ısa vera'
Tâ-ebed cânuña irmeye fezâ'
- 3200.Bî-vera' olaña hod ayb ol yiter
Kim behâyimden dahı olur beter
- 3201.Var-ısa adlüñ gerek sende vefâ
Bî-vefâdan kimsene bulmaz safâ

DER-SIFAT-I ADL EZ-ECNÂS-I FEZÂYİL

- 3202.Âdil oldur k'eylügüñ hakkın bile
Pes aña lâyıık mükâfâtın kıla
- 3203.Pîşe ide hüsn-i hulk u şefkati
Halk-ıla hulk-ıla ola ülfeti
- 3204.Hem tevvekkülde ola azmi dürüst
Hem meveddet akdini itmeye süst
- 3205.Hâkime insâf lâzımdur yakîn
Tâ ola kâim umûr-ı mülk ü dîn
- 3206.Şimdi görünmez bu insâf u vefâ

Biri Sîmürg oldı biri kîmiyâ

3207.Âdile âdet ne teslîm ü rızâ
Her işe k'anı kaderledi kazâ

3208.Dahı hem tâat gerek hem inkıyâd
Kim bula dünyâda ukbîde murâd

DER-TAHRÎZ BER-MEKÂRİM-İ AHLÂK

3209.Bu siyerle ger sen ülfet bulasın
Mahrem-i Halvet-geh-i üns olasın

3210.Nefs k'ola bu sıfat aña bezek
Lâyık olur k'ide_ aña secde melek

3211.Ger behîmiyyetden isterseñ necât
Sende cem' ola gerekdür bu sıfât

3212.Oh bigi togru bu işlerde temâm
Kim idesin Kâbe Kavsen'i makâm

3213.Kimde kim yoh bu sıfatlar fî'l-mesel
Râst "ke'l-en'âmdur belhüm adal"

3214.AHMEÎ'nün her ki sözün diñleye
Nicedür kânûn-ı devlet añlaya

3215.Ol didügi yolu gözle iy hakîm
K'ol-durur bî-şek sırât-ı müstakîm

3216.Gerçi anuñ sözinde yoh-durur halel
Söz-ile olmaz amel vâcib-amel

3217.Hüccet-ile sâbit olur müdde'î
"Leyse lil insâni illâ mâ sa'î"

DER-MÛNÂCÂT VE HÂTİME-İ DÂSİTÂN

3218.Çünkü virdüñ bize ilm iy Lem-Yezel
Lutf it rûz eyle tevfik u amel

3219.Ol k'aña tevfikı sen itdüñ refik
Maksad u maksûdına buldı târik

3220.Biz kimüz bârî vü bizden ne gele
Bize eltâfuñ gerek hem-râh ola

3221.Kamulara çünkü sensin çâre pes

Hâlümüz saña iderüz arz bes

3222.Gussa odında yanup bî-çâreyüz
Yiryüzinde yil bigi âvâreyüz

3223.Lutfuñuñ fazlı kapusın bize aç
Odumuza bir kerem suyunı saç

3224.İy ki sendedür Celâl-ıla Cemâl
Nûr-ı işrâk-ıla vir baña kemâl

3225.Cism ü cânımdan sen it âfâtı dûr
Nûr-ıl'it rûşen beni iy nûr-ı nûr

3226.Nefsümize nûrı ilm-ile beze
Rahmetüñ âsârını feyz it bize

3227.Eyle it fazluñ-ıla iy ehl-i kerem
Bini kim ol nûr bahrına girem

***DÂSİTÂN-I REFTEN-İ İSKENDER BE-CEZÂYİR-İ HİNDÜSTÂN VE
DÎDEN-İ ACÂYİB***

3228.Yatma dur iy bülbül-i arş-âşiyân
Hoş ma'ânî-yi bedî' eyle beyân

3229.Yatma çünkim çıhdı mıs bâh-ı sabâh
K'uyanı kalk oldu öiftâh-ı felâh

3230.Necm-i Sâkıb kim Zühaldür çün çirâg
Gösterüp nûr-ıla tâbân oldu tag

3231.Sa'd-ı Ekber Müşterî uş virdi nûr
Âleme toldurdu râhatla sürûr

3232.Tutuban Mirrîh tîg-i âb-gûn
Kıldı gice râyetini ser-nigûn

3233.Kavs burcından zerrîn-siper
Toldı yir dürci sadef bigi güher

3234.Geldi Zühr'anuñla zerrîn-âyine
Kıldı sîmîn yiryüzün her-âyine

3235.Vard'Esed burcında penhân oldu mâh
Bir yaña dahı Utârid tutdı râh

3236.Âleme çün mihr-ile ürdi subh dem
Pür-safâ ol sıdkıl'oldı subh-dem

- 3237.Gice gitdi geldi subh-ı dil-fürûz
Zulmet eksildi vü rûşen oldu rûz
3238.Sen dahı sıdk-ıla dem üresin
Subh bigi hoş safâlar göresin
3239.Sun’-ı Sâni’de acâyible iber
Çoh-durur andan bize virgil haber
3240.Geh sanâyi’ hâlini kılğıl ayân
Geh bedâyi’ sûretin itgil beyân
3241.Tâ eser nice-y-düğini bilevüz
Pes Mü’essir fikrin andan kılavuz
3242.Çün Mü’essir bilinür olsa eser
Pes bize virgil eserden sen haber

MATLA-I DÂSİTÂN

- 3243.Çün Sikender ejdehây’ itdi helâk
Kıld’anuñ şerrinden ol iklîmi pâk
3244.Diledi anda nekim bahr u ber
Yürüyüp kıla temâşâ ser-te-ser
3245.Çoh gemiler düzdi kim bahra gire
Ol deñizde ne acâyib var göre
3246.Sâni’i bile sanâyi’ görüben
Mübdi’i_anlaya bedâyi’ görüben
3247.Gice gündüz çünki işlenüp müdâm
Ol gemiler kim didi oldu temâm

REFTEN-İ İSKENDER BE-CEZİRE-İ RÂYİH

- 3248.Râyic adlu bir cezîre vardı şâh
Varuban kurdurdu anda bârigâh
3249.Pes buyurdu k’ideler ol yiri sayd
Kılalar her nesne kim bulna kayd
3250.Pes getüreler şaha k’ol kâr-dân
Kamusınuñ sûretin göre ayân
3251.Añlaya herbirinüñ hâsıyyetin
Fikr idiben bile mâhıyyetin
3252.Görüben anuñ acîb-i hilkatın
Sâni’üñ bile latîf-i san’atın

- 3253.Kim anuñ her cüz’i birlige güvâh
Olubanuñ dir ki “Lâ Rabbe sivâh”
- 3254.Varlığından birliğindendir beyân
Zerre zerre yir ü gök görgil ayân
- 3255.Çün nazarla buldı temyîz âdemî
Yüz nazar olsa gerek herbir demi
- 3256.Âdemî kim olmaya anda nazar
Ol behâyimden dahı olur beter
- 3257.Buldılar bir nev’ anda cânavar
Sûreti-y-le âdemî tâ-pây u ser
- 3258.Lîki kanatlu kamu şöyle ki tayr
Uçup iderlerdi yirden yire seyr
- 3259.Sözlerini kimse idemezdi fehm
Sâni’üñ sun’ına irmez akl u vehm
- 3260.İtdiler hayvândan anda ıstıyâd
Anı kim anuñ derindendir zebâd
- 3261.Ol çetükdür şekl ü sûretde yakîn
Fark ara yirde arak-durur hemîn
- 3262.Bir çetük dahı itdiler anda şikâr
Kim hevâda uçar-ıdı mürğ-vâr
- 3263.Çünki kudretde Tüvânâdur Kadîm
Ne dilerse ihdâs_ider ol Hakîm
- 3264.Fıtratullah nakşına kılıgıl nigâh
Kim göresin nice olur kâr-gâh

RESİDEN-İ İSKENDER BE-KÛH-I MÂRÂN

- 3265.Buldılar bir tag ol yirde ulu
İçi ol taguñ yılan-ıla tolu
- 3266.Her yılanı ejdehâ-girdâr-ıdı
Fîl gelse yolına yudar-ıdı
- 3267.Lîki ol tag olmuş-ıdı anlara dâm
Oradan taşra uramazlardı kâm
- 3268.Varmazdı kimse ol taga yakîn

Anı ırahdan görürlerdi hemîn

3269.Kim yolu taş u kaya-y-ıdı temâm
Oda yanar-ıdı ol taşlar müdâm

3270.Ne acâyib hilkat ü fitrat-durur
Nice kuvvet nicesi kudret-durur

3271.Ol yılanlar birbirin yirdi müdâm
Kim bulamazlardı dah'ayruh ta'âm

VASF-I TÛTÎ Kİ DER-HİND YÂFTEND

3272.Anda hem bir nev' tûtî buldılar
Dâne saçup anı dâma aldılar

3273.Kişi her dilde ki söylerdi kelâm
Döndürüp eydürdi anı ol temâm

VASF-I DIRAHT-I KÂFÛR Kİ DER-ÂN CEZÎRE BÛDE

3274.Buldılar bir nev' ağaç anda hem
Samgı anuñ kâfûr-ıdı ser-tâ-kadem

3275.Her agacuñ k'anda-y-ıdı pâyesi
Bin kişinüñ yiri-y-ıdı sâyesi

3276.Lîki tolu-y-ıdı ucdan uca mâr
Ejdehâ gibi kamusı cân-şikâr

3277.Kimse yazın anda kâfûr alımaz
Ol yılanlardan aña yol bulımaz

3278.Lîki kâfûr almah isdeyen kişi
Yazın oh atmahdur agaca işi

3279.Ohına her kiş'adın yazup ayân
İder ırahdan ağaçlara revân

3280.Çünkü irişür kış u issi gider
Kalur ağaçlar yılansuz ser-te-ser

3281.Her kişi k'agaçda ohını bulur
Ol ağaç kâfûrı hem anuñ olur

3282.Fikr-ile kıl bu eserlere nazar
Kim mü'essirden bilesin sen habar

3283.Nakşa bakup nalşdan Nakkâşı bil
Sun'ı görüp Sâni'üñ fikrini kıl

RESİDEN-İ İSKENDER BE-CEZİRE-İ RÂMNÎ

3284.Râyici çünküm temâmet gördiler
Ol aradan Râmine'ye vardılar

3285.Buldılar insândan anda bî-şümâr
Avret u er cümle üryân hâr u zâr

3286.Yimiş-idi pes yidükleri ta'âm
Fehm olunmazdı didükleri kalâm

3287.Anlara görünse insândan biri
Andan ürkerlerdi şöyle kim perî

3288.Yirden ot bigi biterdi anda zer
Çün maâdin dahı vardı pür-güher

3289.Ne aceb âsârdur bahgıl buña
Kim haber vire Mü'essirden saña

3290.Ger bu âsâra nazar key kılasın
Ol Mü'essir kudretini bilesin

RESİDEN-İ İSKENDER BE-CEZİRE-İ VÂKVÂK

3291.Vardı oradan şâh bağlayup nitâk
Ol bire k'anuñ adıdur Vâkvâk

3292.Yiri anuñ cümle rîg-istân olur
Yolına peydâ varan hayrân olur

3293.Gice yılduzla yürürler ol yolu
Gündüz anda bulımazlar menzili

3294.Biñ cezîre vardı ol yörede hem
Dahı yidiyüz yakîn ne bîş ü kem

3295.Şehr-idi ser-tâ-ser mülk ü diyâr
Kamuya bir avret-idi şehriyâr

3296.Altıbin ebkâr-ı gül-rûh gonca-leb
Hidmet iderlerdi aña rûz u şeb

3297.Çün Sikenderden işitdi ol haber
Virbidi bî-hadd aña zerr ü güher

3298.Ol kadar tuhfe viribidi ki şâh
Âferîn kıldı aña vü hem sipâh

3299.Buldı Őeh bir aga anda pes yuca
Tâze vü ser-sebz ü hûb ucdan uca

3300.Dökmez-idi yapragın båd-ı vezân
İrmez-id' anuñ bahârına hazân

3301.Ol agada bir aceb yimiŐ biter
ün temâm olup yimiŐ' anuñ yiter

3302.Ol yimiŐden Vâkvâk üni gelür
Bu ne kudretdür bu ne hikmet olur

3303.Gelicek ol ün gelür ile vebâ
Dahı kaht u fetret ü dürlü belâ

3304.Vaktehâ gelür ol ün ne mâh u sâl
Ol ün olur gelicek ne hûb-fâl

DER-TARİK-I İSTİDLÂL BER-VÜCÛD-I SÂNİ'

3305.Hûb u ferhunde-delâyil hâlini
Görüp işbu muhdisât ahvâlini

3306.Anlaya kim herbirine bu havâs
Niredendür nice buldı ihtisâs

3307.Bî-muhasıs ün olmaz hî-Őey
Pes gerek eşyâya bir Kayyûm-ı Hay

3308.Kim Kadîmü'z-zât ola vü hem mürîd
K'ola her mevcûd sun'ından bedîd

3309.Ol aradan gidiben Őâh-ı cihân
Bir yire irdi ki adıdur Betân

3310.Buldı bir kavm anda pes sâhib-cemâl
Avret ü er hüsn içinde ber-kemâl

3311.Kmau insân Őekli illâ kim müdâm
Sa'b taglar üzre tutarlar makâm

3312.Kim oraya ıkamaz hî âdemî
Gör neler kılır yaradan âlemi

3313.Hîle-y-ile birisin Őâh-ı cihân
Dutdı dutulduğı sâat virdi cân

3314.Ulusın' anuñ nazar oh kıldılar

Hüsnine mecmû'ı hayrân kaldılar

3315.Kâr-gâh-ı Fıtrata kılığıl nazar
Diler-iseñ kim ayân ola habar

3316.Germ süribenüñ irte gice râh
Ol aradan vardı Etvâribe şâh

RESÎDEN-İ İSKENDER BE-CEZÎRE-İ ETVÂRİYYE

3317.Buldı bir kavm anda bu sözi işit
Tenleri merdüm velî başları it

3318.Anlara leşker çü yakın geldiler
Oradan anlar belürsüz oldılar

3319.Cinn idügin bildi olaruñ şehriyâr
Kim cezâyirde iderlermiş karâr

SUÂL-İ İSKENDER EZ-HÂL-İ DERYÂ

3320.Buldı bir yir anda şâh-ı şîr-gîr
Pes mübârek âkıl u dâneninde pîr

3321.Ömri kerkes gibi irmişdi bine
Rûşen idi hâli ol yirüñ aña

3322.Yaşamah kerkes bigi biñ yıl ne nef
Çünkü olmaya ecel çengâli def

3323.Hâlini bahruñ bilürdi ser-te-ser
Mülk-i Çinde her en varsa huşk ü ter

3324.Şâh pîre didi ne çâre kılam
Kim bu bahruñ umkı ne-durur bilem

3325.Pîr didi Hızr bin Âmil hem
Kim ol-ıdı server ü tâc-ı ümem

3326.Sencileyin meyli eyle_oldı anuñ
Tâ ki bile umkı mikdârın bunuñ

3327.Bir firişteh gelüben didi aña
Kim bu bahruñ diyeyüm umkın saña

3328.Bir kişi Dâvûd asrında meger
Ser-nigûn düşdi bu bahre bî-haber

3329.Oldı üçyüz yıl iner cismi anuñ
Dahı ka' rına irişimez bunuñ

3330.Bu ne mülk olur gel imdi it kıyâs
Kim aña ne akl irer ne havâs

DER-İ'TİBÂR VE NAZAR BER-AHVÂL-İ ÂLEM

3331.İdemez keyfîyyetin kimsene farz
Ne bilür kemmiyyetini tûl u arz

3332.Kıl bu masnûâta fikr-ile nazar
Kim vireler saña Sâni'den habar

3333.Ger bu eşyâda te'emmül kılasın
Nicedür Kudret kemâlin bilesin

SUÂL-İ İSKENDER EZ-ACÂİB-İ DERYÂ

3334.Pes didi şeh kim baña kamu
Kim bu deryâda acâyibden ne var

3335.Encüm ü eflâk ü bahr u ber kamu
Cev-be-cev ne-y-se bilürsin iy ulu

3336.Didi kim bunda acâyib çoh-durur
Şöyle kim hergiz hisâbı yoh-durur

3337.Bir balıh burada tutmuşdur makâm
K'uzunıdır ikiyüz arşuñ temâm

3338.Çün görür nâ-geh gemiyi ol suda
Kasd ider kim varup anı yuda

3339.Ehl-i keştî tabl urup çağırı
Döndürürler korkudup anı yuda

3340.Gevde büyükligine itme nazar
Kim yürekdedür nekim varsa hüner

SIFAT-I HAR-ÇENG VE HÂSİYYET-İ ÂN

3341.Bunda bir har-çeng var kim taş olur
Bir nefes çünkim sudan taşra kalur

3342.Sürme bigi dögüp ol taşı tabîb
Tütüyâya katar andan bir nasîb

3343.Kmau derdine gözüñ dermân olur
Akl kim sun'a bahar hayrân olur

DER-İSTİDLÂL BER-SÂNİ'BE-NAZAR-I DER-SANÂYİ'

- 3344.Akl bunda nice hayrân olmasun
Yâ nice burada ibret almasun
- 3345.Kim su hayvân olur u hayvân hacet
Ol hacet dönüp olur nûr-ı basar
- 3346.Taşdan uş sürme-y-ile tûtiyâ
Gözde görürsin k'olur nûr-ı ziyâ
- 3347.Ol ki taş nûr ider dutma şek
Kim seni dahı idebilür melek
- 3348.Cehd it kim topraguñı ide nûr
Kıla göñlüñde ne gam varsa sürûr
- 3349.Kıla sini fazlı-y-ıla bir melek
K'ayaguñ altında kala bu felek

DER-SIFAT-I ÂHÛ Kİ HÛNEŞ MÜŞG-MÎŞEVED

- 3350.Dahı bir hayvân var işbu suda hem
Kim geyige beñzer ol ser-tâ-kadem
- 3351.Göbeğinde kan anuñ çün huşk olur
Dahı ayruh yire varsa müşg olur
- 3352.Gitmeyince buradan müşg olmaz ol
Bunda durduğınca korhu bulmaz ol
- 3353.Ne aceb işler-durur fikr eylegil
Kudretini Sâni'ün zikr eylegil
- 3354.Her ne kim vardur yirind' olur kemâl
Çün yirinden ayrıla bulur zevâl
- 3355.Ol arada nişe kohu almaz ol
Kopduğı yirde neçün müşg olmaz ol
- 3356.Gül diken içinde bulur reng ü bûy
La'l kân kaydında olur sürh-rûy
- 3357.Agacında tatlu olur her yimiş
Ger şeker olsa yirind' olur kemiş
- 3358.Dürr deryâda olur her yimiş
Topraguñ için' olur hoş-reng zer

3359.İşbu işlerden ki gördün bî-gümân
Sâni'üñ muhtârlığın bil ayân

3360.Kimine yirinde bağışlar cemâl
Kimin'ayruh yirde virür ol kemâl

3361.Her nekim var oldur işleyen ayân
Bu tabîat didüğün sözdür hemân

3362.Her ki virürse tabâyi'den haber
Bil ki yohdur anda îmândan eser

SIFAT-I NÛR Kİ BE-SÛRET-İ MÛRG DER-DERYÂ PEYDÂ-ŞEVD

3363.Dahı işbu bahrda iy şehriyâr
Kuş bigi bir nûr olur âşikâr

3364.Hey'eti kuşdur anuñ lîkin basar
Hîre_olur nûrından itdükde nazar

3365.Ol belüricek hevâ gül-şen olur
Şu'lesinden bahr anuñ rûşen olur

3366.Mevc olur sâkin çün ola bedîd
Ol-durur keştî necâtına kilîd

DER-TAHRÎZ BER-İ'TİBÂR EZ-NAZAR BER-ACÂİB-İ ÂLEM

3367.İşbu âsârı ger añlarsan ayân
Kâmilü'l-îmân olasın bî-gümân

3368.Bilesin ol Sâni'üñ sen kudretin
İlmin ü hem dahı mülkini Bestatin

3369.Her ne kim iderse ol zîbâ ider
N'ola nâ-zîbâ görürse kej-nazar

3370.Güni görmedügi-y-içün rûz kûr
Güneşün ire mi nûrına fütûr

SIFAT-I MÂHİ PİL-SER

3371.Bir balıh dahı olur bu suda bil
Gevdesi yılan velîkin başı pîl

3372.Uzunı bir mil olur anuñ temâm
Yidügi hayvân-i bahrîdür müdâm

3373.Çün görürsin kâr-gâhın fitratuñ
Var kıyâs it gâyetini Kudretuñ

3374.Muhdesâtı çün görürsin iy hakîm
Muhdisi bil kim gerek ola Kadîm

3375.Bu haberlerden ki pîr-i nâm-dâr
Şerh kıldı kaldı hayrân şehriyâr

SIFAT-I MÂHÎ-Yİ ÂDEMÎ-RÛY

3376.Hem bulınd'ol bahrda bir cânavâr
Cismi balıh başı vü yüzi beşer

3377.Sûreti gâyet latîf ü tolu hâl
Sun'ı gör kim gösterür ol Zü'l-Celâl

SIFAT-I CANAVARÎ Kİ ŞEB-DER BER VE RÛZ DER- BAHİR-I BE-ŞÛD

3378.Gördiler hem ol suda bir cânavar
Kim gice uçup sudan taşra çıkar

3379.Subh olunca yürür ü çün subh olur
Uçubanuñ girü deryâya gelür

3380.Gündüzün balıh bigi suda yüzer
Gice kuş bigi havâda ol uçar

3381.Bu ne kudret-durur âhir fikr it
Âdemîseñ Hâlîkuñı zikr it

3382.Ol ki gic'andan balıh kanat alır
Pes havâya çihuban ulvî olur

3383.Saña dahı viribilür bâl ü per
K'idesin Firdevs Bâğına güzer

3384.Dünyâya kalma ki bu zâg-âşiyân
Bûm u kerkeslere olmışdur mekân

3385.Girü ol suda gezerken şehriyâr
Oldı bir hayvân öñinde âşikâr

3386.K'od ururdı şu'le agzından müdâm
Her eney ugrasa yakardı temâm

DER-TAHRİZ BE-NAZAR-I İ'TİBÂR

3387.Bu nicesi sun' olur kıl nazar

K'ola âteş suda olan cânavar

3388.od-ıla yili su eyler suyu hâk
tolu kudretdür semekden tâ-simâk

3389.Nicedür fikr eylegil bu kârığâh
K'anlayasın kim nedür bu bârığâh

3390.Sun'ına bah k'ulasın andan nişân
Kudretin gör k'anı bulasın ayân

3391.Sun'dan her ne virilürse haber
Sıdkıl' "âmennâ" digil iy pür-hüner

3392.Gice yıldız kurdını gören ayân
Bu hikâyetde neçün tuta gümân

3393.Sun'da çohdur acâyible iber
Sen gözüñle gör gerekmez hod haber

3394.İss'odı sovuh suya karışdurur
İkisin birbiri-le barışdurur

3395.Yili toprag-ıla idüp sâzıkâr
Dürlü nesne yaradur dâna-yı kâr

3396.İşbu dördini idiben mu'telif
Nakşlar tasvîr ider muhtelif

3397.Rengler düzer ne zîbâ vü acîb
Nakşlar yazar ne hûb u dil-firîb

3398.Kankı nakşa kim urur Sâni' kalem
Ne ziyâde bulunur anda ne kem

3399.Kankı rengi kim kılur-ısa ayân
Rûşen olur anuñ-ıla cism ü cân

3400.Ney degüldür sun'yazduğı kalem
Ne hod anuñ rengidür nîl ü bakan

RESİDEN-İ İSKENDER BE-CEZİRE-İ CÂBE

3401.Ugradı bir mülke dah'orada şâh
Adı Câbe kurdı anda bârığâh

3402.Buldı bir kavm anda bî-endâze çoh
Yüzi boynında kamunuñ başı yoh

3403.Tenleri uryân u pür-mû ser-te-ser

Mevz idi yidükleri vü ney-şeker

3404.Buldı bir tag orada gāyet yüce
Tutar od ol tagı çün olur gice

3405.Gündüz olur karañu düitinden ol
Kimse bulamaz aña çıhmaga yol

3406.Ol taguñ üstinde bir akkuş olur
Kim çıkıcağ taşra ol oddan ölür

3407.Ol kuşuñ adı Semenderdür yakîn
Dirliği oduñ içindedür hemîn

3408.Zî aceb sun' u zi âlî-kâr-gâh
Zî yüce hazret zi ulu bâr-gâh

3409.K'anda fehm ü fikr ser-gerdân olur
Belki Akl-ı Kül dahı hayrân olur

BİNÂ-İ İSKENDER ŞEHR-İ SER-ENDÎB-RÂ

3410.Çün hevâsın Câbenüñ hoş gördi şâh
Orada bir şehre bünyâd urdı şâh

3411.Çün temâm ol şehri tertîb eyledi
Adını anuñ Ser-ândîb eyledi

3412.Var-durur bir tag anda ser-firâz
Agacı ûd otı sünbül kış u yaz

3413.Âdem uçmahdan hübût and'itdi hem
Kaldı anda andan âsâr-ı kadem

3414.Câbede begler var-ıdı nâm-dâr
Birbirine düşmen ü nâ-sâz-kâr

3415.Rây u tedbîr-ile İskender temâm
Az zamând'itd'anları hükmine râm

3416.Rây-ıl'olur memleket işi dürüst
Her ki kej-rây ola olur işi süst

3417.Bir cezîre vardı Lengâvûs nâm
Aña vardı Câbeden şeh şâd-kâm

3418.Ugradı bir halka anda bî-kıyâs
Cümle uryân birisinde yoh libâs

3419.Zencebîl-idi nebâtı vü bakam

Sandal u fülful karanfül dahı hem

- 3420.Ol yörede bir cezîre var-ıdı
Tolu şehr ü kal'a vü Tinnîn adı
- 3421.Kopmış-ıdı anda bir ner-ejdehâ
Kim deminden fîl olmazdı rehâ
- 3422.Zehri seng-i hâreyi kılurdu mûm
Çün nefes ürürd'eserd'anda semûm
- 3423.Günde bir kez agız açard'ejdehâ
İki öküz olur-ıd'aña gıdâ
- 3424.Yolın'iltürlerdi ilden her sabâh
İk'öküz bulmag-ıçun andan felâh
- 3425.Çün öküzleri bulıban yir-ıdı
Yatuban tâ subha dek uyur-ıdı
- 3426.Ejdehâ havfı-y-la ol şehr ü diyâr
Geçürürlerdi bu resme rûzigâr
- 3427.İl ü şehr andan çekerlerdi belâ
Kim vatandan idemezlerdi celâ
- 3428.Nüşı-dârûdur yakîn nüş-ı mihen
Kişıye yirinde kim hubbû'l-vatan
- 3429.Ney vatandan düşdügi-y-içün cüdâ
Vâyvây-ıla virür ömrin yile
- 3430.Şem' anuñ-çun yahılur tutma şek
K'anı Şîrînden cüdâ kıldı felek
- 3431.Gurbete düşene kims'itmez nazar
Gerçi âlim ola vü sâhib-hüner
- 3432.Halk içind'olur garîb adı le'im
Gerçi kim ola tabîatda kerîm
- 3433.Ol bilür kim düşe gurbet odına
Mihnet-i dûzah nedür ü odı ne
- 3434.Ger tüvânâ mün'im ola ger gedâ
Hak vatandan kimsey'itmesün cüdâ
- 3435.Ejdehâdan şeh çün işitdi haber
Ol cezîreden yaña kıldı güzer

- 3436.Zift ü kibrît ü kirec getürdi tîz
Biñ dahı hancer kamu ucları tîz
- 3437.İki ul' öküz derisin kıldı pür
Üşbu dört nesne-y-le gel bu fikri gör
- 3438.Diri vafında deriyi subh-gâh
Ejdehâ yolına iletdürdi şâh
- 3439.Çünki zulmet gitdi rûşen oldı hûr
Meskeninden kıldı cünbiş mürğ ü mûr
- 3440.Ejdehâ uyanubanuñ kıldı hîz
Yüridi kût isteyü ol yola tîz
- 3441.Ol derileri ki kodurmuşdı Cem
Ejdehâ yuddı ürüben tîz dem
- 3442.Çün derileri yudıban döndi mâr
Kim geel vü ide yirinde karâr
- 3443.Çün rutûbet mi'deden kıldı eser
Ol kirecle eyledi kibrîti ter
- 3444.Zift ü zernîh ü kirec kükürd tîz
Dutuşup bir kûre-i nâr oldı tîz
- 3445.Ol rutûbetden kirec çün oldı hâr
Zift ü kibrîti harâret kıldı nâr
- 3446.Ejdehânuñ toldı içi sîz u tâb
Bî-karâr oldı vü kıldı ıztırâb
- 3447.Çün dolanamazdı bir yirde durup
Kendüzin taşa ururdı götürüp
- 3448.Niçe kim ururdı kendüzin yire
Ol dmeür geçer-idi için yara
- 3449.Ejdehâ bu resm-ile oldı helâk
Kaldı şerrinden anuñ ol mülk bâk
- 3450.İtdiler ol halk şâha âferîn
Kim hemîşe şâd ol iy şâh-ı zemîn
- 3451.Ömrüñi pâyende itsün lâ-Yezâl
Devletüñe irmesün hergiz zevâl

- 3452.Nefsdür Tinnîn didüğüm fi'l-mesel
Müfsid ü hûn-hâr u mekkâr u dagal
- 3453.Ol deri içinde key sen fikr kıl
Kim hudûd-ı şer'-durur bellü bil
- 3454.Bu hudûd u bu riyâzetle anı
Katl it kim kurtarasın sen seni
- 3455.Nefs-i şehvânî belâdur şol belâ
Kim kamu olmışdur aña mübtelâ
- 3456.Öldür anı tâ ki îmîn olasın
Düşmen ol aña ki mü'mîn olasın
- 3457.İki düşmen bir arada olamaz
Biribirisi-y-le râhat bulamaz
- 3458.İkiden bir olmayınca hâr u zâr
Biribirinde olamaz pâydâr
- 3459.Ger bu sözde key te'emmül kılasın
Sırr-ı tevhîdi mu'ayyen bilesin
- 3460.**AHMEDÎ** sözini her kim diñleye
Dünyî vü ukbîde işin añlaya

RESİDEN-İ İSKENDER BE-CEZİRE-İ SELÂMIT

- 3461.Ejdehâyı eyledi anda tebâh
Pes Selâmitdın yaña yürüdi şâh
- 3462.Buldı anda bir ulu çeşme revân
K'anı görs'olur-ıdı rûşen-revân
- 3463.Çeşmenüñ katında var bir ulu çâh
Çeşme suyu aña girür sâl u mâh
- 3464.Ne tolar ol çâh ne kimse bilür
K'ol su ol çâha giriben ne olur
- 3465.Su inerken katreler k'ider reşâş
Olur ol çâhuñ kıranlarında taş
- 3466.Nice taş eyle musaykal k'âyine
Yüz içinde görünür her-âyine
- 3467.Gice sıçrayan su olur kara taş
Aktaş olur gündüzin anda reşâş

DER-İ'TİBÂR EZ-HÂL-İ VE ACÂYİB-İ ÂLEM

- 3468.Ne acâyib-durur üşbu kâr-gâh
Aç gözüñi kim göresin bâr-gâh
- 3469.Ger nazar ol bârigâha kılasın
Nice olur mülk-i Bârî bilesin
- 3470.Bilesin k'aña nihâyet yoh-durur
Şöyle k'âgâz u bidâyet yoh-durur
- 3471.Akl k'anı zikr ide hayrân olur
Vehm anuñ fikrinde ser-gerdân olur

DER-TEMSİL VE MEV'İZE

- 3472.Sun'-ı Hakdur çeşme-i âb-ı revân
K'andan olur halka fâyiz cism ü cân
- 3473.Üşbu varlıhla ki uş zâhir olur
Kamu ol çeşme suydur kim gelür
- 3474.Ol ulu kuyı nedür çâh-ı adem
Kim bu varlıh aña döner bîş ü kem
- 3475.Nâ-bedîd olur aña düşen kişi
Hiç bilmez kim nice olur işi
- 3476.Her ne su varsa buña iner yakîn
Lîki bu kuyu dahı boşdur hemîn
- 3477.Niçe su girdi-y-se buña tolmadı
Tolacağı dahı mümkün olmadı
- 3478.Bu kuyı tolmadı vü tolmayısar
Ol su eksük olmadı olmayısar
- 3479.İlm gündüz bigi rûşendür yakîn
Cehl karañu kara gice hemîn
- 3480.Ahtaş olur âlim itdügi amel
Câhil itdügi karataşdur dagal
- 3481.Âlimüñ işi hemîş' olur savâb
Câhilüñ işi hatâ min-küllî bâb
- 3482.Âlim ol âlim k'ider-iseñ amel
Olmaya mi'yârda nakde dagal

RESİDEN-İ İSKENDER BE-VÂDİ-İ ELMÂS

- 3483.İrdi şâh orada hem bir vâdiye
Çevresi bî-âb u bî-nem bâdiye
- 3484.Yimiş etrâfi karara ser-te-ser
Diyedüñ vâdî cehennemdür meger
- 3485.Didi Hind ehline bu vâdî nedür
Bunda ne vardur bunuñ adı nedür
- 3486.Didiler bu ma'den-i elmâsdur
Kim anuñ-ıla delinür la'l ü dür
- 3487.Buradadur kânı elmâsun velî
Kimsenüñ hergiz ana irmez eli
- 3488.Kim bu vâdi oldu şimdi tolu mâr
Ejdehâ dah'idemez anda güzâr
- 3489.Zehri ol yılanlaruñ kim anda var
Her neye irse eridür şem'-vâr
- 3490.İşbu vâdî'çinde vardur bir semûm
Kim taşa ugrarsa ider anı mûm
- 3491.Hiç nesn'elmâsa idemez eser
Ne anı tîşe sır u ne hod teber
- 3492.Kanda bir hakkâk varsa cevherî
Yonup anuñla delerler cevheri
- 3493.Ol yanar her taşı vü kurşun anı
Ne aceb işler düzer gör ol Ganî
- 3494.Şâh işbu sözlere güş itdi pes
Kıldı elmâs almaga andan heves
- 3495.Didi sayd ehline kim idüp şitâb
Dâm kurıban dutalar biñ ukâb
- 3496.Biñ ukâbı çünki dutdılar temâm
Ac kodı anları iki gün müdâm
- 3497.Pes olara karşı pâre pâre it
Vâdiye saldurdı bu sözi işit
- 3498.Çünki elmâs-ıdı tolu ol dere
Çoh yapışd'elmâsdan ol etlere

- 3499.Kuşları saldırdı ol dem tâc-ver
Vardı her kuş ite urup bâl u per
- 3500.Kapdı kuşuñ herbiri bir pâre it
Bu ne rây u dâniş olur fikr it
- 3501.Çıhdı biñ pâre it-ile biñ ukâb
Her it'ol taşdan yapışmış bî-hisâb
- 3502.Kuşlaruñ ardınca kullar vardılar
Kuş konan yirlerde taşı dirdiler
- 3503.Üşbu rây-ıla şeh-i pîrûz ger
Buldı ol elmâsı almaga zafer
- 3504.Rây-ıla her ukde kim var hallolur
Sâhib-i rây ehl-i akd ü hall olur
- 3505.Şehler ilerü olurdu rây-zen
Şimdi ney-çün oldılar hem-rây-zen
- 3506.Ol zamân başlara tâc-ımiş hüner
Şimdi hâk-i pây oldu ol güher

RESİDEN-İ İSKENDER BE-KASR-I BİLLÛR

- 3507.Ol aradan dahı Zülkarneyn-i şâh
Kûs urup leşkerle kıldı azm-i râh
- 3508.Bir cezîre dahı buldı şehriyâr
Gördi anda bir yüce kasr âşikâr
- 3509.Yılduzı-y-la kullesi hem-râz-ıdı
Bîhi sahre taşına dem-sâz-ıdı
- 3510.Şekli gökler şekli bigi müstedîr
Levni yılduz levni bigi müstenîr
- 3511.Kasr yapılalıdan çoh davr-ıdı
Taş'anuñ ucdan uca billûr-ıdı
- 3512.Kaldı şâh ol kasr işinde aceb
Pes hakîm-i Hindi eyledi taleb
- 3513.Şeh katına geldi oldem feylesûf
Kim kamu işlere bulmuşdı vukûf
- 3514.Sordı aña kasr ahvâlini şâh
Ol hakîm aña didi iy pâdişâh

- 3515.Kimse bu kasruñ içine giremez
Kimse hem sırrına dahı iremez
- 3516.Bundan artuh kim bu kasr içi temâm
Çüriyiben toptolu yatur izâm
- 3517.Kimsene bilmez idibenüñ kıyâs
K'ins ü cinden buña kim urdı esâs
- 3518.Kasr uşbu kasrı yapan kandardur
Kasr ıssı gıtdi kasrı bundadur
- 3519.Âkıbet çün ıssuz olur bu kusûr
Pes kusûr sevmek nedür akla kusûr
- 3520.Tut ki olduñuz sudûr u yâ izâm
N'assı çün çürür sudûr olup izâm
- 3521.Nef' olmah rû'üs ü yâhud sudûr
Çünkü hâk olur rû'üs-ıla sudûr
- 3522.Üşbu sözleri ider-iken beyân
Şeh katında feylesûf-ı kârdân
- 3523.Kasrdan bir halk çıhdı bî-hisâb
Tenleri insân u başları kilâb
- 3524.Dişleri hancer-sıfat bürrân u tîz
Kıldılar şeh leşkeri-y-ile sitîz
- 3525.İki leşker kîn-ile ceng itdiler
Birbirine yiryüzin teng itdiler
- 3526.Tîz-bârân idüben şeh leşkeri
Oha dikdiler ser-â-ser anları
- 3527.Âkıbet çün şâhı gâlib gördiler
Cümle kaçup kasr içine girdiler
- 3528.Şeh diledi k'ol gıce anda dura
Subh kasrı alup ol halkı kıra
- 3529.Didi şâha feylesûf-ı nâm-dâr
Kim gerekmez k'idesiz bunda karâr
- 3530.Kim tılısm-ıla yapılmışdur bu kasr
Ol tılısmı bozamaz geçdükçe asr
- 3531.Böyle-durur ol tılısm iy şehriyâr

Kim burada her k'ide gice karâr

3532.Hâb u bî-hodlık aña gâlib olur
Şöyle k'ölü bigi bî-tâkat kalur

3533.Çün bu kavm anı görürler bî-haber
Çıkup iderler anı zîr ü zeber

3534.Bu söz-ile çün oradan döndi şâh
Râst Çîn iklimine sürdi sipâh

3535.Kasdı ol kim oradan Çîn'e vara
Görmedügi yirleri anda göre

3536.Didiler Tamgac'a kim iy şehriyâr
Şâh-ı karn İskenderi cengi süvâr

3537.Hind ikliminde yir yoh k'almadı
Şehr ü kal'a yoh ki anuñ olmadı

3538.Hind ü Sindi çünki feth itdi temâm
Diler uş kim ide Çîn şehrin makâm

3539.Bir melikdi ol zamân Tamgac Hân
Kim anuñdı Türk ü Kışmîr ü Vegan

3540.Tübbüt ü Mükrân u Almalîh u Çîn
Ürigenc ü cümle-i maşrîk-zemîn

3541.Çinde vardı üçyüzaltmış pâre şehr
K'olmuş-ıdı_ucdan uca Tamgac'a behr

3542.Ol Hıtâ şehrinde_olurdu mâh u sâl
Günde bir şardan gelürdi aña mâl

3543.Leşkerinde vardı on yüzbin süvâr
Tîg-zen cengî kamusı nîze-dâr

3544.Çün Sikender geldügin bildi yakîn
İtdi gönlin âkıbet fikri hazîn

3545.Her işüñ soñına bahmayan kişi
Sehv olur her ne işlerse işi

3546.Didi kim bu iş ser-encâmı n'ola
Bunda gelmekden şehüñ kâmi n'ola

3547.Çünkü âkıl âkıbet-endîş ola
Rütbet içinde melekden pîş ola

- 3548.Pes dirüp âkılları şâh-ı Hoten
Oldı İskender işinde rây-zen
- 3549.Her kişi virdi aña bir dürlü pend
Kim degüldi hıçbiri sûd-mend
- 3550.Ol kişi dünyâda ehl-i rây ola
Kim her işi fikr idiben bile
- 3551.İş fesâdı n'iredendür bile râst
Tâ salâhın aña lâyıık kıla râst
- 3552.Hastanuñ bilmek gerekdür derdi ne
Tâ devâ nef' ide anuñ derdine
- 3553.Nabz u kârûre çü bilmeye tabîb
Sayruy'andan sıhhat olmaya nasîb
- 3554.Çünki bilinmeye kim nedür maraz
Ne sebep zâyil olur u ne garaz
- 3555.Çün hakîm anlamaya nedür mizâc
Nice assı kıla itdüğü ilâc
- 3556.Çünki bildi şâh-ı Çîn k'ol cümle pend
Olmayısar hergiz aña sûd-mend
- 3557.Tutmadı sözin kimüñ key söyledi
Kendü âhir böyle tedbîr eyledi
- 3558.Kim baş indüre şehüñ fermânına
Tâ güzend irmeye şehden cânına
- 3559.Anuñ-ıçun kim Sikender cengini
Görmemiş-idi dahi âhengini
- 3560.Bilür-idi n'ireye k'ol nâm-ver
Varsa hem-râh olur-ıdı aña zafer
- 3561.Her kişi k'iderdi anuñ-ıla ceng
Arslan ols'olurdu yiri gûr-ı teng
- 3562.Kendüden uluya iden pençe tîz
Kendünüñ cânın düşüre rence tîz
- 3563.Cengüme döymez diyen bebr-ile şîr
Ol delüdür sanma sen anı dilîr
- 3564.Hem öñine geld'anuñ ol rûzigâr

K'anı âzâd itmiş-id'ol tâcidâr

3565.Her ki eylük ide zâyi' olmaya
Eylük eyleyen yavuzluh bulmaya

3566.Eylük eyle birine yüz eylük al
Didiler kim eylük eyle suya sal

3567.Şimdi kimse_olsa k'ola eylük işi
Gözine eylük ide-y-di bir kişi

3568.Tâ ki bakmaya-y-dı ol herbir ele
Düşmeye-y-di rızk-ıçun ilden ile

3569.Oladı bir gûşede halvet-nişîn
Görmeye-y-di herkes ü nâkes ü yüzün

3570.Çün şehüñ itdi ol ihsânımı zıkr
Eyledi şâha muti olmagı fikr

3571.Her ki halka olmaya nîgî-şinâs
Hâlîka dahı olur ol nâ-şinâs

3572.Kişi midür ol ki eylük bilmeye
Her ki eylük bilmez eylük bulmaya

3573.İtde k'etmek yir vefâlu et biter
Pes vefâsuz kiş'olur itden biter

3574.Kişi her ne kim ider anı bulur
Ger yavuzluh işi ger eylük olur

3575.Kimse yavuzlıhdan eylük bulmadı
Kimse eylükden peşmân olmadı

3576.İşbu fikr ü rây-ıla Tamgac Hân
Oldı şâh İskendere karşı revân

3577.Çünkü Çîn haddine geldi pâdişâh
Oraya irişdi hem Tamgac şâh

3578.İndi atdan çün şehi gördi şüvar
Şâh öninde yir öpdı bende-vâr

3579.Bir nüvâziş itdi şeh dahı aña
Kim anı gören kişi kaldı taña

3580.Kime kim irseñ nüvâziş it müdâm
K'ide kullıguña ragbet hâs u âm

- 3581.Key nvâziř bulmayınca sâz-ı ũd
Râst olmaz perded'âvâz-ı srd
- 3582.řâh-ı gl çn gsterr berg ũ nvâ
Blble el řavk itdrr nevâ
- 3583.Sinñ oldur k'uydurasın lutf-ıla
Sinñ olmaz saña uyan unf-ıla
- 3584.İy niçe iřler ki lutf-ıla biter
İy niçe bařlar ki unf-ıla biter
- 3585.Geldi Tamgâc-ıla řehre řehriyâr
Grdi bizenmiř kamu řehr ũ diyâr
- 3586.Su bigi her yaña saçılmıř gl-âb
Her taraf kimhâ dřenmiř bi-hisâb
- 3587.Sad-hezârân nâfe-i mřg-i Hoten
Olmıř-ıdı hoř-nefes her yañadan
- 3588.İrdi bâga diyedñ erdebihıřt
Yâhud indi yire gl-zâr-ı Bihıřt

SIFAT-I BEZM-İ İSKENDER-İ ZLKARNEYN

- 3589.Geldi Zlkarneyn řehre řâd u kâm
Hurrem oldu v eline aldı câm
- 3590.Çn yridi bâde-i anber-buhr
Aksi-y-ile oldu meclis tolu nr
- 3591.Sâgar-ı zerrîne iinde řarâb
Diyedñ yâkt u dr yâ la'l-i nâb
- 3592.Bâde saçardı dem-i mřg ũ abîr
d nagme ider-ıdı bemm ũ zîr
- 3593.Çeng inilerdi v glerdi câm
Ol benefře-kadd olup bu lâle-fâm
- 3594.Yridi câm-ıla yâkt-ı revân
Kim ol olur kuvvet ũ kt-ı revân
- 3595.řâh eline sundı bir sâkî řarâb
Kim yzi tâbına dymezd'âfitâb
- 3596.Gl yañagında kemend-i anberîn
Gâh sayd-ı cân iderdi gâh dîn

3597. Tutagı cânlara kânûn-ı şifâ
Zülfi gönüllere zencîr-i belâ
3598. Agzınuñ penhâmı râzın kim bile
K'Âb-ı Hayvân-ıdı ol Kevser bile
3599. Çünkü hoş-vakt oldu şâh-ı nâm-ver
Virdi Çîn şâhına tâc-ıla kemer
3600. Çoh nüvâziş kıldı vü hoş söyledi
Girü Çîni_aña mukarrer eyledi
3601. Her kime kim vardı anda ser-te-ser
Virdi şehr ü mülk ü mâl u sîm ü zer
3602. Virmeyince memleket girmez ele
Vire mâlın her ki diler mülk ala
3603. Memleket tahtı ele girse belaş
Tâc uruna-y-di bilâ-şek cümle baş
3604. Halka çünkim bâde eyledi eser
Girdiler şeh meclisinden ser-te-ser
3605. Çün kişiyi tayyibü'l-vakt ide câm
Hoş-durur şeb-hoş dimeklik şâd-kâm
3606. Çün buhâr-ı mey dimâğı kıla germ
Gide başdan akl u yüzden dahı şerm
3607. Söylenen sözden gelür câna hatar
İşlenen işden dahı olur bîm-i ser

SUÂL-İ İSKENDER EZ-BEHRÂM-I HAKÎM

3608. Şâh halvet kaldı vü birkaç nedîm
Çîn ilinden dahı Behrâm-ı Hakîm
3609. Şeh hakîme didi k'iy dâna-yı Çîn
Kim senüñ fikrünüñ Hıtâyı kıldı çîn
3610. Her neyi kim sen tasavvur kılasın
Hükmi tasdıyk-ıla nedür bilesin
3611. Ne-durur mâhiyyetin sensin bilen
Cümle eşyânuñ ki var farkın kılan
3612. Oldı gönül dünya sözinden melûl
K'anda yohdur fazl u toludur fuzûl

3613.Âlem ü gayb u şehâdetden baña
Söz digil kim tutmuşam kulah saña

3614.Baña mahıyyet nedür eyle beyân
Pes vücûd aksâmını kılğıl ayân

3615.Vâcib ü mümkün nedür şerh eylegil
Mümteni' ta'rîfini hem söylegil

CEVÂB-I HAKÎM BE-SÜÂL-İ İSKENDER

3616.Didi var her nesnede iy pîş-bîn
Bir hakıykat k'ola anuñl'ol yakîn

3617.Adını mâhıyyet urmuşdur hakîm
Zât oldur çün var ide anı Kadîm

3618.Vâcib oldur bilgil iy zıll-ı Hudâ
Kim vücûdın Zâtı ide iktizâ

3619.Kendüzinden ola zâtı kendünüñ
Varlığı kimseden olmaya anuñ

3620.Mümteni' ol k'iktizâ eyleye Zât
Yohlığını iy şeh-i nîgû-sıfât

3621.Mümkün ol kim Zât'anuñ iy bahr-ı cûd
Ne adem ide_iktizâ vü ne vücûd

3622.Varlığını Vâcibüñ iy pîş-bîn
Hüccet-ile bileyim dirseñ yakîn

3623.Olmasa mevcûd Vâcib bellü bil
Bulmaya-y-dı varlığa muhdes sebîl

3624.Çünki hâdis kendüzinden olmaz
Vâcib olmayınca varlıh bulımaz

3625.Lâ-cirem Vâcib gerekdür bî-gümân
K'ola muhdes kudreti-y-l'andan ayân

3626.Pes vücûdı hâdisüñ oldı delîl
Varlığına Vâcibüñ bî-kāl ü kîl

3627.Vâcib Allâhuñ vücûdudur hemîn
Mümteni'anuñ şerîkidür yakîn

3628.Zîr ü bâla mümkünât uş kıl nazar
Yir ü gök Zühre vü şems ü kamer

- 3629.Mümkinе çün kendüden yohdur vücûd
Pes gerek Vâcibden aña feyz-i cûd
- 3630.Tâ ki ol feyz-ile varlıh bula ol
Mûcid ü icâda şâhid ola ol
- 3631.İşbu sözden uş yakîn olur saña
Kim yir-ile gök müsebbihdür aña
- 3632.Varlıguñ her zerresi bî-iştibâh
Birligine-durur Allâhuñ güvâh
- 3633.Mümkin iki kısım olur bil yakîn
Kısm-ı Rûhânî vü Cismânî hemîn
- 3634.Kısm-ı Rûhânî vü Cismânî hemîn
K'anlara hiss-ile bulunmaz vusûl
- 3635.Lîkin olur zâhir anlardan eser
Ol eserden bilür anları beşer
- 3636.Mâddeden akl bi'l-küllî beri
Ol taallukdan dahı olmış arı
- 3637.Nefs hem bî-maddedür lîkin anı
Mâddeye kıldı mülâbis ol Ganî
- 3638.Kim anuñ tedbirini ider müdâm
Tâ kemâli ola anuñla temâm
- 3639.Âlem-i Gayb ol ikisidür hemîn
Her ne var bâkî şehâdetdür yakîn
- 3640.Kısm-ı Cismânî nedür ol kim havâs
Anı idrâk ideler re'sen-be-râs
- 3641.Ol dahı hem iki kısım olur hemîn
Biri Ulvî biri Siflîdür yakîn
- 3642.Ulvi iki kısım olur hem bî-gümân
Biri encüm biri eflâk uş ayân
- 3643.Kısm-ı Siflî dahı olur iki kısım
Bir Basît ü bir Mürekkebe sorsañ ism
- 3644.Ol mürekkebdür mevâlîd âşikâr
Ol Basît uş dört unsur kıl şümâr
- 3645.Od u yil ü su vü yir bu dört Basît

Emri-le birbirine_olmuşdur Muhît

- 3646.Kmausından kicirek-durur zemîn
Arada bir nokta-durur ol hemîn
- 3647.Dört bahş itdi anı ehl-i hesâb
Birisi ma'mûr u üçidür harâb
- 3648.Üşbu ma'mûrı bilenler fehm-ile
Yidi kısmet eylediler vehm-ile
- 3649.Herbirinüñ adın İklîm urdılar
Tûl u arzına ser-â-ser irdiler
- 3650.Herbirinüñ tûlı maşrıkdan temâm
Magribüñ ser-haddidür iy nîg-nâm
- 3651.Bu yidide oldı mahsûr âdemî
K'oldı ol bu âferîniş hâtemi
- 3652.İşbu rub' içindedür ma'mûr pes
Dahı yiri yapmaga yoh dest-res
- 3653.Kim şemâlîsi yirüñ sovuh olur
Altı ay kış u karañulih olur
- 3654.Altı ay anda gice olur müdâm
Gündüz olur altı ay dahı temâm
- 3655.Lâ-cirem orada hayvân u nebât
Ne nemâ vü neşv bulur ne hayât
- 3656.Ol cenûbîsinde dahı altı ay
Gündüz olur dâ'im ü kamusı yay
- 3657.Ol iki kutbuñ yöresind'âsumân
Âsiyâ bigi ider gerdiş ayân
- 3658.Lâ-cirem olur hevâ orada nâr
Hergiz anda idemez kimse karâr
- 3659.Cânib-i Şarkîde_ulu taglar olur
Kim kuş irse orada bî-per kalur
- 3660.Toludur garbîsi zulmetle buhâr
Dahı bir deryâ k'aña yohdur kenâr
- 3661.Bahr-ı Okyânûs ol-durur be-nâm
Kim Muhit olmuş-durur yire temâm

- 3662.Andan oldılar deñizler munfasıl
Hem girü aña olurlar muttasıl
- 3663.Bu deñizler aslı bî-şekk ol-durur
Bahrı berr ü berri bahr ol oldurur
- 3664.Biş deñizüñ herbiri andan çıhar
Girü andan yaña meyl idüp ahar
- 3665.Bu deñizlerde cezâyir bî-şümâr
Var ki yoh anlarda deyyâr u diyâr
- 3666.İşbu rub' uñ dahı k'âbâdân-durur
Azı ma'mûr u çoğı vîrân-durur
- 3667.Kimi taglardur u kimi bâdiye
Kimi deryâdur u kimi evdiye
- 3668.Azıdur ma'mûr u çoğıdur harâb
Var bu az yirde halâyık bî-hisâb
- 3669.Çün bi-hamdillâh var sende basar
İbret-ile kıl bu âsâra nazar
- 3670.Ger bu âsâra nazar key kılasın
Ol mü'essir kudretini bilesin

DER-BEYÂN-I TARÎK-I İSTİDLÂL BER-VÜCÛD-I SÂNİ'

- 3671.Çünki bildüñ kendüden olmaz eser
N'iredendür üşbu âsâr it nazar
- 3672.Bâniye bünyâd oldugı delîl
Saña reh-ber pes varur-ısañ sebîl
- 3673.Bu kamu âsârı kim gördüñ hemîn
Bir mü'essirden-durur zâhir yakîn
- 3674.Gerç'eser çohdur mü'essir bir yiter
Âkıl olan sırrına sözüñ yiter
- 3675.İki olmaz Bir gerekdür pes hemîn
Bir-durur Hakk iki olmaz Ol yakîn
- 3676.Vâcib ü Hak kim Kadîm oldur ayân
İki olamaz bir olur bir hemân

- 3677.Vâcib iki_olsa i dânişde melek
Herbirinde hâs bir nesne gerek
- 3678.Tâ ki birlik gide ikilik gele
Birbirinden ol iki mümtâz ola
- 3679.Böyle ols' olur i gafletden berî
İki nesneden mürekkebe herbiri
- 3680.Ol iki cüzvüñ bir' olkim iştirâk
Arada anuñladur iy fikri pâk
- 3681.Birisi dah' ol-durur k' anuñ-ıla
Birbirinden ol iki mümtâz ola
- 3682.Çün gerek terkîbden Vâcib arı
Pes olur Vâcîblîh anlardan berî
- 3683.Pes bilindi râst kim Hak Bir gerek
Birligi-y-le Vâcib ü Kâdir gerek
- 3684.Niçe idersin eserden sözi kes
Pes mü'essir bilmege eyle heves
- 3685.Burada kalma_ki âb u gîl-durur
Bunda kalanun işi müşkil-durur
- 3686.Çün dahı yig yir gelür-imiş ele
Buña kâni' kişi bî-himmet ola
- 3687.N' işe sevdüñ bu heyûlâ kül-hanın
Gel temâşâ eyle cennet gül-şenin
- 3688.Kuds gül-zârına kılursañ heves
Kendüzüñden tab' evsâfını kes
- 3689.Şer-durur şer bî-şek evsâf-ı beşer
Hayr ol k'ola ırâh senden bu şer
- 3690.Ârzûsın virme nefsüñ k' ol le'îm
Cânuña iy dost düşmendür azîm
- 3691.Nefsüñe uyma ki sini azdurur
Uyar-ısañ aña akluñ az-durur
- 3692.N' işe bislersin anı k' ol gûze-mâr
Kasd ider kim ala cânuñdan damar
- 3693.Mâr-durur nefis bislerseñ anı
Ejdehâ olup yudar bî-şek seni

3694.Dîv-durur nefis ider peyveste rîv
Kim belâya sala cânuñı bu dîv

3695.Âdem-iseñ dîvi hergiz esleme
Var-ısa akluñ yılanı bisleme

3696.Var aña bir nesne vir k'ol ejdehâ
Öle vü sen olasın andan rehâ

3697.Ger dilerseñ k'ola göñlüñ pür-safâ
Zînetine dünyanuñ urgil kafâ

3698.Hâlıkî gerek halâyıkdan kesil
Kurb isterseñ alâyıkdan kesil

3699.Oradan mebde' hem añadur maâd
Anı eyle yâd andan olma yâd

DER-TEMSÎL VE TEVHÎD VE HÂTİME-İ DÂSİTÂN

3700.Bahr-ı A'zamdan ki deryâlar çıhar
Hem girü ol bahra varıban ahar

3701.Saña enmûzec-durur key eyle yâd
K'oradan mebde' hem añadur ma'âd

3702.Aña döne kim merci'oldur hem me'âb
Pendümi dutgıl ki sözümdür savâb

3703.İşbu sözler k'**AHMEDÎ** eydür saña
Tangrıdan ilhâm olmışdur aña

3704.Saña ol itdügi sözleri beyân
Añladuñ-ısa Hakı gördüñ ayân

DÂSİTÂN-I REFTEN İSKENDER BE-MAŞRIK VE DÎD Zİ ACÂİB

3705.Söylegil iy tûti-yi Tûbâ-nişîn
K'âferîn şekker sözüñe âferîn

3706.Söyle söylemek saña lâyıkdurur
Bülbül-i cân nagmañe âşık-durur

3707.Sözi bugün söyle yarın kim bile
Gelmedügin geldügin sözüñ dile

3708.İy ki niçe tûti-yi şekker-keâm
Kaldı bî-nutk itmedin sözün temâm

- 3709.İy ki niçe bülbül-i şîrîn-nefes
Söyler-iken bagladı dilin kafes
- 3710.Niçe bugün yeşeren berg-i rezân
Yarın olmadın sarardı bî-hazân
- 3711.Niçe yaşarup kızaran bâg u verd
Mihrecân esmedin oldı zâr u zerd
- 3712.Cân nedâmetden dilerseñ k'arına
Koma bugünkü işüñi yarına
- 3713.Ger bugün fevt ider-iseñ işüñi
Göresin yarın n'olur teşvîşüñi
- 3714.Fursatı fevt eyleme kim bu sipihr
Günde yüz dürlü döner ü mâh u mihr
- 3715.Her nefesde gösterür yüz dürlü levn
Böyle geldi böyle gidiser bu kevn
- 3716.Kime eyledi vefâ bu rûzigâr
Kim saña dahı_eyleye pâyân-ı kâr
- 3717.Ahdine aldanma k'olur ahdi süst
Kavline inanma k'olur nâ-dürüst
- 3718.Gün ki oldur âleme viren cemâl
Gör nice bulur kûsûf-ıla zevâl
- 3719.Gice gündüz kim gelibenüñ gider
Bedri gör kim niçe eksildür keder
- 3720.Güne hergün bir zevâl ider sipihr
Bu hayâdur bahma kim var anda mihr
- 3721.Kim buña salar anuñ aña kûsûf
Hem buña virür gurûb aña hûsûf
- 3722.Bâki-i encüm bulurlar lâ-muhâl
Geh hûbûta gâh ric'at geh vebâl
- 3723.Çün havâdisden felekde yoh emân
Saña yirde ola mı nedür gümân
- 3724.Encüme kej bahma kim ola yakîn
Saña sırr-ıla ühibbü'l-âfilîn
- 3725.Her ki gider nesneye gönül vire

N'olur ahvâlini gidicek göre

3726.Garre olma dehre kim yoh anda ahd
Sundugı geh zehr-durur gâh şehd

3727.Böyle kim gelür gider gündüz gice
Tîz iledür sini ol komaz gice

3728.Ol k'aña hâkim gice gündüz ola
İşi bellüdür ki ne gün düz ola

3729.Dünya sevgüsini gönlüñden gider
K'ol nice kim geldi-se şöyle gider

MATLA'-I DÂSİTÂN

3730.Çün müsahhar oldu şâha mülk-i Çîn
Kıldı hurem adl-ile ol mülk için

3731.Bay u yohsula kamu hoş söyledi
Ulu vü kiçiyi hoş-dil eyledi

3732.Her ki diler kim ululuh eyleye
Gerek ulu kiçiyeye hoş söyleye

3733.Cümle halka hayr ola endîşesi
Adl yolın varmag olur pîşesi

3734.ne-y-di evvel soñra n'olısar bile
halka sultân-ısa Hakka kul ola

3735.Pes diledi şâh kim şarka vara
Anda dahı ne acâyib var göre

3736.Çünkü birkaç gün yürüdi şehriyâr
Bir yire irişdi çün hurrem bahâr

3737.Sandal-ıd' anuñ agacı vü bakam
Behmen-idi otı sünbül dahı hem

3738.Oraya çün irdi şâh-ı nâm-cûy
Bir iki gün oldu anda kâm-cûy

3739.Cânı hoş tutmaga câm itdi talab
Nûş kıldı bâde vü itdi tarab

3740.Çünkü nûş-â-nûş oldu şâd-kâm
Bir kişi geldi didi iy nîg-nâm

SIFAT-I SENGÎ Kİ BED-ÂN CİN VE AKÂRÎB MÜSAHHAR MEY-İ ŞÛD

- 3741.Dünki gün kim devlet-ile pâdişâh
İrişüp burada dutdı bârigâh
- 3742.Merkebüm yitürdüm iderken taleb
Ugradum bir taşa yolda bes aceb
- 3743.Her zamânda gösterür bir dürlü reng
Cehd idüp anı ne âhen sır ne seng
- 3744.Gösterür çoh dürlü reng ol her zamân
Cümle-i elvân olur andan ayân
- 3745.Gâh ahdur geh kara vü geh kızıl
Gâh saru gâh gög ü geh yeşil
- 3746.Gice âyîne bigi rûşen olur
Şu'lesi-y-le her taraf gül-şen olur
- 3747.Üşbu sözden kaldı İskender aceb
Eyledi ol dem Arestû'yı taleb
- 3748.Didi taş vasfın hakîme ol temâm
Pes didi aña hakîm iy nîg-nâm
- 3749.İşbu taşuñ adı-durur Feylekûs
Çîn-durur kânı bu taşuñ dahı Rûs
- 3750.Kimde kim bu taş olursa müdâm
Dîvler olurlar aña cümle râm
- 3751.Kankı yirde kim ola üşbu metâ'
Ne hevâm olur orada ne sibâ'
- 3752.Dahı ne akreb olur ne gûze-mâr
Dahı ne hod ejdehâ-yı cân-şikâr
- 3753.Lîki cinnîler bunuñ kânın müdâm
Gizlü tutarlar halâyıkdan temâm
- 3754.Kimse anuñ-çun zafer bulmaz aña
Gûş tut bir söz dahı eydem saña

BEYÂN-I TERKÎB-İ CEVÂHİR-İ MA'ÂDİN

- 3755.Çünkü yağmur inse gökden âb u nem
Cem' olur cevfinde yirüñ bîş ü kem

- 3756.Müddet-il'ider güneş aña hâk
Kimi ahcâr olur u kimi güher
- 3757.Çünkü leze olup karışmay'aña hâk
La'l bigi gevher olur tâb-nâk
- 3758.Çün leze olup karış'aña türâb
Lâ-cirem kim taş olur ol hâk ü âb
- 3759.Pes bularuñ herbirinden Kirdikâr
Güne gün hâsıyyet ider âşikâr
- 3760.Çün kılur kudret anâsırda eser
Suyı lü'lü toprağı yâkût ider
- 3761.Yürece kuvvet virür yâkût-ıla
Lü'lüyi dermân ider derd-i dile
- 3762.Ömr misbâhına odı nûr ider
Rûh milkin yıl-ile yagmur ider
- 3763.Sâni'uña sun'ı egerçi çoh-durur
Arada hergiz gerekmez yoh-durur
- 3764.Her ne nesne kim gereklü vardur
Kâr-gâh-ı sun'a bahan er-durur
- 3765.Kamusını düzdi eyle kim gerek
Pes anuñ birligine yoh hîç şek
- 3766.Çün işitdi bunı şâh-ı mülk-gîr
Geldi bu söz aña gâyet dil-peziâr
- 3767.Vardı ol kândan şeh-i pîrûz-ceng
Aldı elmâs-ıla birkaç pâre seng
- 3768.Anı gizlerdi hazâyinde müdâm
Gâlib anuñ'oldı ol cinne temâm

RESİDEN-İ İSKENDER BE-MA'DEN-İ HÂR-I ÇİNİ

- 3769.Gitdi oradan dahı şâh-ı cihân
Geldi gördi işlenür bir ulu kân
- 3770.Kürede toprag çünkim od yahar
Hâr-ı Çînî hall olup andan ahar
- 3771.Hâr-ı çînî ol-durur bilgil yakîn
K'âyine düzerler andan ehl-i Çîn

- 3772.Sâhib-i lakve çoğ its'aña nazar
İlletinden kalmaz anda hiç eser
- 3773.Dahı andan bir aceb peykân olur
Her kime kim ire ol bî-cân olur
- 3774.Çünkü gördi anı şâh-ı kâm-kâr
Didi Ârestû'ya k'iy dâna-yı kâr
- 3775.Bu filizzâtuñ baña şerhini it
Bunlaruñ terkîbi nedendür eyit
- 3776.Kamu bir toprahda nedür ihtisâs
Kim bu nukre olur ol zer şol resâs
- 3777.Hâr-ı Çînî bu neçündür şol hadîd
Ol neden kurşun bu bakır kıl bedîd
- 3778.İşbu yididen baña sen söylegil
Herbirinüñ hâlini şerh eylegil
- 3779.Çün hakîme rûşen oldu bu hitâb
Virdi ol dem şeh süâline cevâb
- 3780.Kim yir altında rutûbetle buhâr
Muhtebis olup çün iderler karâr
- 3781.Ma'den-ile güneşüñ harrı meger
Müddet-ile ider anlara eser
- 3782.Ol eserden olup ol mâtde latîf
Gâr sakfına çihup olur hatîf
- 3783.Bir zamân yapışup anda meks ider
Pes hevâs'ider kışuñ aña eser
- 3784.Çün sovuhdan ol galîz olur temâm
Oradan düşüp kılur yirde makâm
- 3785.Şöyle kim hammâmlarda su buhâr
Oluban sakfa çihup kılur karâr
- 3786.Sakfda aña sovuş kılur eser
Hall olıban girü ol ferşe iner
- 3787.Gâr sakfindan çü hall olup buhâr
Dönüp ider gâh sathında karâr
- 3788.Râst bir müddet orada kalur ol
Ma'den ü günden harâret bulur ol

- 3789.Ol harâret çün aña kılur eser
Müddet-ile ol galîz andan gider
- 3790.Zîbak olur andan eczâ-yı kesîf
Cümle kükürd olur eczâ-yı latîf
- 3791.Mümtezic olıcah ol iki temâm
Harr-ı ma'dinden eser bulup müdâm
- 3792.İmtizâcından bularuñ bî-gümân
Yir içind'olur mürekkeb yidi kân
- 3793.Zîbak u kibrît çün sâfi olur
Zîbakuñ terligini kükürd alur
- 3794.Nice k'içer terligin sunuñ türâb
Şöyle kim anda belürmez hiç âb
- 3795.Şöyle kim su topraguñ yübsin alur
Mümtezic olduhda anı ter kılur
- 3796.Huşkligin dahı kibrîtüñ kamu
Zîbakuñ terligin alur iy ulu
- 3797.Çün bu resme ihtilât olup temâm
Sahlu_olalar huşk ü terlikden müdâm
- 3798.Hem münâsib ola mikdâr u eser
Müddet-ile_olur mürekkeb kân-ı zer
- 3799.Ârız olsa nuzc bulmadın temâm
Âfet-i bürd aña olur sîm-i hâm
- 3800.Ger harâretten yübûset bula ol
Şol eserden karabakır ola ol
- 3801.Zîbak u kükürd eczâsı temâm
Karışup bir olmadın iy nîg-nâm
- 3802.Çün bürûdetle yübûset bulalar
Kân içinde hâs kal'ay olalar
- 3803.Andan öñdin k'ol ikisi nuze ala
Ger bürûdet bunlara gâlib ola
- 3804.Çünki kibrît ola çoh olur hadîd
Zîbak olsa çoh olur kurşun bedîd
- 3805.Çün kızıl kükürde çok nuzc irmedin

Akd bula hâr-ı Çînî olur yakîn

3806.Ol suâle kim didüm şâhâ cevâb
Bu-durur v'Allâhü a'lem bi s-savâb

İ'TİRAZ BER-KAVL-İ ARESTÜ VE İSTİDLÂL BE-SÂNİ'-İ KÂDİR

3807.İşbu sözleri k'Arestü itdi nakl
Zâhir egerçi kabûl itd'anı akl

3808.Lîki bundan dahı yig söz var saña
Eydeyim kulah tutarsañ sen baña

3809.Bir cizim yirde görürsin bî-gümân
Dürlü ağaçlar bitüp olmuş ayân

3810.Topragı bir ü hevâsı suyu hem
Bir ağaç sandal olur biri bakam

3811.Bir ağaç şeftâlu vü biri enâr
Birisi serv olur u biri çenâr

3812.Ger Mü'essir olsa yil ü hâk ü su
Kamu bir nev' ağaç ola-y-dı iy ulu

3813.Çün ağaçlar dürlü dürlüdür ayân
Bil ki ayruhdur Mü'essir bî-gümân

3814.Kim bunı ünnâb ider anı ineb
Anı ratbe düzer ü bunı ruteb

3815.Bunı ayva vü anı âlû düzer
Anı emrûd u bunı şeftâlu_ider

3816.Tohmsuz bir yirde dürlü ot biter
Herbiri bir hâsıyet bulup yiter

3817.İşbu na'na' olur u ol bâdiyân
Ol olur nergis ü budur ergavân

3818.Çün nebâtuñ hâlini bildüñ yakîn
Bil maâdin hâli kim budur hemîn

3819.Ma'dinüñ içinde bil kim ol Kadîm
Kimini zer ider ü kimini sîm

3820.Niredendür fikr it bunca eser
Kimden olmuşdur mürekkeb bu suver

DER-TAHRİZ BE-NAZAR-I İ'TİBÂR BER-MASNÛÂT

- 3821.Mübdi'i añ ko bedâyi' zikrini
Sâni'i añ ko sanâyi' fikrini
- 3822.Çün bu masnûâtuñ aslını kamu
Bildüñ od u toprag u yildür ü su
- 3823.Lîki herbirinde var bir dürlü yeng
Dahı bir mîkdâr u resm ü şekl ü reng
- 3824.Dahı herbirinde var bir vaz'-ı hâs
Muhtelif keyfiyyet ü dürlü havâs
- 3825.Bil ki gerek bir Muhassıs bî-gümân
K'anda olmuş ola bu kamu ayân
- 3826.Bu yakîndür k'ol Muhassıs bir gerek
Hem Mürîd ü Âlim ü Kâdir gerek
- 3827.Ol Muhassıs zâtı vâcibdür yakîn
K'ol-durur Hâlık kamusına hemîn
- 3828.Kuvveti fi'le yitüren ol-durur
Bitüren ol hem yitüren ol-durur
- 3829.Kuvvet ü Kudret anuñdur u Kemâl
Hâs anuñdur Celâl u hem Cemâl
- 3830.Zât'anuñ ayruh zevâta beñzemez
Hem sıfâtı_ayruh sıfâta beñzemez
- 3831.Hükmine irmez anuñ hergiz halel
Fi'line kat'â anuñ girmez ilel
- 3832.Vasfidur zâtı bigi anuñ Kadîm
Zıddıdur misli bigi anuñ Adîm
- 3833.Gerçi kim çohdur eser bilgil yakîn
Kim Mü'essir arada birdür hemîn
- 3834.İki gerekmez Mü'essir bir yiter
Bu sözüñ sırrına aklı_olan yiter
- 3835.Aña kim Hâlık ola Kudret gerek
Nesne îcâd itmege kuvvet gerek
- 3836.Kudret içinde çü Kâdir ola tâm
Cümle makdûrât olur andan temâm

3837.Bir-ile çün iş temâm olur ola
Bir dahı fikr eylegil nişe gele

3838.Birliğı-y-le muntazımdır iki kevn
Kâdir ayruhdan nice isdeye avn

3839.Çün bu sözleri işitdi şehriyâr
Âferîn itdi hakîme bî-şümâr

REFTEN-İ İSKENDER BE-MEMLEKET-İ KIŞMÎR

3840.Yüridi Kişmîr'e andan şâh-ı Rûm
Kim göre kim nicedür ol merzibâm

3841.Buldı anda bî-aded şehir ü diyâr
Cümle reng ü bûy çün hurrem-bahâr

3842.Ser-te-ser ma'mûr kim vîrânı yoh
Halkınuñ deryâ-sıfat pâyânı yoh

3843.Tâli'-i meymûn-ıla ferruh kamu
Sûret-i zîbâ-y-ıla gül-ruh kamu

3844.Vardı andan Türk iline şehriyâr
Buldı anda bî-kerân şehir ü diyâr

3845.Kimi virürd'anlaruñ Tamgâc'a mâl
Kimi âsî olup iderlerdi kıtâl

3846.Bir melik k'adı anuñ Tarhân-ıdı
Türk'den tâgî olan'ol hân-ıdı

3847.Var-ıdı leşker anuñla bî-şümâr
Kamu tîr-endâz u cevşen-ver süvâr

3848.Büt-perest idi olar kamu yakîn
Kimse ne tevhîd bilürdi ne dîn

3849.Şâhdan ol mülke irişdi haber
Kim gelür uş leşker-ile şîr-i ner

3850.Bir çeri cem' oldı anda bî-adad
K'aña ne pâyân var-ıdı vü ne had

3851.Çünki şâhuñ leşkerini gördiler
Saf düzedüp şâha karşı durdılar

3852.Anlaruñla bir neberd eyledi şâh
K'itdi rûşen günü anlara siyâh

3853.Kûsler gurrüş idüben bemm ü zîr

Kopd'iki leşker arasında nefir

3854.Birbir üstine yihılup küşteler
Oldı ol sahra ser-â-ser püşteler

3855.Kanda kim bahsañ ten-idi bî-kerân
Her taraf kan suyladı olmış revân

3856.Türk yadan tîr bârân itdiler
Eyle kim peykânı perrân itdiler

3857.Âreş ol günd'itdi çoh dürlü hüner
Anda oldı ser-firâz u nâm-ver

3858.Kıldı biñ kişiyi peykân-ıla hâk
Biñ dahı oldı kılıcından helâk

3859.Şol kemân-dâr-ıdı Âreş kim kader
Kılur-ıdı ohı sehminden hazer

3860.Çünkü yayından çihard'anuñ hadeng
Aña ne âhen döyer-idi ne seng

3861.Ohı çihduhda kemândan berk-vâr
Demreninden şu'le urur-ıdı nâr

3862.Öldi iki yañadın bî-had sipâh
Âkıbet oldı muzaffer Türk'e şâh

3863.Türk kim adı-y-la anlardur Tatar
Oldılar şeh kılıcından târ u mâr

3864.Kimi uryân u kimi gark-âb-ı hûn
Kaçdılar olup alemler ser-nigûn

3865.Olup ol leşker ser-â-ser pâyimâl
Dökdiler büngâh u genc ü raht u mâl

3866.Ol arada k'olmuş-ıdı dâr u gîr
Düşdi Tarhân atdan u oldı esîr

3867.Bunca serverler dah'anuñla bile
Çün gide baş ayaguñ hâli n'ola

3868.Girdi Türküñ kişverine şehriyâr
Feth itdi her ne var şeh ü diyâr

3869.Her ne k'almışdı Tatardan tâc-bahş
Cümlesini leşkerine kıldı bahş

3870.Virüben Tamgâc'a tâc-ıla külâh

Kıldı anı ol ulusa dahı şâh

3871.Aslda Tamgâc olara hân-ıdı
Ol ulusa dahı ol sultân-ıdı

3872.Çün şeh Tamgâc esîr olmış-ıdı
Anı Tarhân ayırup almış-ıdı

3873.Çün alamazdı _anı andan şâh-ı Çîn
Anuñ-ıla sulh itmişdi güzîn

3874.Düşmene ceng-ile bulmazsañ zafer
Ol müdârâ-y-ıla aña çâre-ger

3875.Çün müsahhar oldı ol kişver temâm
Geldiler şâhun katına hâs u âm

3876.Cümlesine viridi şeh teşrîf-i hâs
Buldılar şâhuñ katında ihtisâs

3877.Da'vet itd'anları Hak tevhîdine
K'añlayalar Hak ne vü tevhîdi ne

3878.Bileler kim nicedür îmân u dîn
İ'tikâd u sıdk u tevhîd ü yakîn

3879.Haklıgını haşr ü neşrûñ bileler
Aña lâyıq Hakka tâ'at kılalar

3880.Şâhdan cümle nasîhat aldılar
Dîne giriben muvahhid oldılar

3881.Añladılar şirk kim ol şûm olur
İhtiyâr iden anı meşûm olur

3882.Şirk ü çirkidür dil ü câna şerek
Şirki tevhîd-ile arıtmah gerek

3883.Şirk çünkim Hak didi zulm-ı azîm
İt hazer andan ki oldur cây-bîm

3884.Çünki bildiler nedür îmân u dîn
Girdi gönüllerine ilme'l-yakîn

3885.Çünki revnak dutdı ol kişver temâm
Şâh Cem tahtınd'eline aldı câm

3886.Ald'eline cam kodı hanceri
Başına tâc urdı kodı mi'feri

3887.Her zamânuñ bir işi vardur yakîn

K'ol zamânda ol gereklüdür hemîn

3888.Rezm güninde gerekmez k'ola bezm
Bezm vaktinde yaraşmaz k'ola rezm

3889.Ald'eline şâh bir gül-gûn-kadah
Kim bulurdu cân safâsından felah

3890.Nûş kıldı bâde-i anber-şemîm
Kim deminden tâze olurdu nesîm

3891.Bir zamân çün bezmden şâh oldu şâd
Virdi câm-ı bâdeden ömrine dâd

3892.Gerçi bâde tab'-ıla âteş-durur
Çün anuñla tâzedür cân hoş-durur

3893.Bâde-y-ile her ki virmez ömre dâd
Hâk-ber-ser k'olur anuñ ömri bâd

3894.Bir zamandan soñra fermân kıldı şâh
Kim ol etrâfa yürüdüben sipâh

3895.Ne acâyib k'ol memâlikde ola
Görmeg-içün şeh getüreler ele

3896.Kûh u deşti yürüyüp sayd itdiler
Çoh acâyib cânavar kayd itdiler

3897.Buldılar nesnâsı ol evde yakîn
Şekl insân el ayagı bir hemîn

3898.Bir ayagı-y-ıla eyl'iderdi seyr
Kim anı gören kişi sanurdu tayr

3899.Bir cemâat dahı kim sayd itdiler
Tagda bir boynuzlu tavşan tutdılar

3900.Her sebü' ürkerdi andan görse reng
Ger dirende-şîr ola-y-dı ger peleng

3901.Bu acâyib fitrata kılğıl nigâh
Kim göresin nice-durur bârigâh

3902.Bî-nihâyetdür bu dergeh bil ayân
Ne yakîn irişür ana ne gümân

3903.Bir zamândan soñra rây eyl'itdi şâh
Kim Tagargar'dan yaña ilte sipâh

RESİDEN-İ İSKENDER BE-VİLÂYET-İ TAGARGAR

3904. Geldi bir yir buldı kim yoh aña had
Cümlesin bir kavm tutmuş bî-aded
3905. Sûret-i zâhirde âdem-rû kamu
Lîki sîretde bahâyim-hû kamu
3906. Buldı bir ümmet dah'anda ser-te-ser
Âdemî-hey'et velîkin gürg-ser
3907. Gözüñ aç gör ne gerekdür çoh haber
Ucdan uca gürg-hû olmuş beşer
3908. Gâv u hardur tolu görgil âlemi
Var mı göster arada bir âdemi
3909. Hûk ü seg-sîret toludur bu cihân
Âdemî-hû ara yirde yoh ayân
3910. Bu beşer şeklinde gördüğüñ milel
Cümle ke'l-enâmdur belhüm adal
3911. Buldılar hem ol arada bir gürûh
Tolu anlardan ser-â-ser deşt ü kûh
3912. Âdemî-kâmet velîkin fil-vâr
Yüzlerinde kamunuñ hortûm var
3913. Sûreti-y-le fil tende âdemî
Akl Hak künhinde adım ada mı
3914. El yirin'anlarda vardı bâl ü per
Başları it tenleri cümle beşer
3915. Ol burun kim ola hod-binlîh tolu
Fîl hortûmından olur ol alu
3916. Zıştdür burunlulîh sen bellü bil
Âdemîde şöyle kim hortûm-ı fil
3917. Âdemi-y-ken ger ola burnuñ ulu
Cîfedür fil andan olursın alu
3918. Fîle yaraşur burunlulîh hemîn
Dahı Şeytâna kim ol-durur La'în
3919. Kişi kim burunlu hod-bîn ola
Fîl-veş mürdâr u bed-âyîn ola

- 3920.Çün burunlulıhdı şeytânıñ işi
Kamu la'net ehlinüñ oldı başı
- 3921.Kibr Şeytân işi-durur ko anı
Çünki insân yaradupdur Hak seni
- 3922.Baş kim anda olmaya hilm ü vekâr
İt başıdur anda hayr itmez karâr
- 3923.Magz kim yoh anda dânişden eser
Magz-ı hardur belki andan hem beter
- 3924.Âdemîde akl-durur nev'a fasl
Aklsuz hayvân degüldür âdem-asl
- 3925.Âdemîde k'olmaya nefsi-i melek
Dîvdür olmaz aña insân dimek
- 3926.Ol aradan dahı gitdi tâc-ver
Şâh-ı Çîn Tamgâc öñince râh-ber

BİNÂ-GERDEN-İ İSKENDER SEDD-İ YE'CÜC VE ME'CÜC

- 3927.İki taga ugradı ol yirde şâh
Herbirinüñ kules'olmuş evc-i mâh
- 3928.Yahınınd'ol taglarıñ şâh-ı cihân
Ugradı bir halka gâyet nâ-tüvân
- 3929.Avret ü er cümlesi uryân u hâr
Aclıg elinden kamu hayrân u zâr
- 3930.Sordı ahvâlin bularuñ pâdişâh
Didiler câvîd ol iy zıll-ı İlâh
- 3931.Niçe dönse çarh dutsa yir karâr
Bahtuñı Allâh kılson pâyidâr
- 3932.Ömrüñi câvîd itsün Lâ-Yezâl
İrmesün hergiz kemâlüne zevâl
- 3933.İns ü cin şîr ü peleng ü ejdehâ
Heybetüñ cenginden olmadı rehâ
- 3934.Fitneden kıldıñ bu yiryüzin pâk
Adlüñ âsârı-y-la gül-zâr oldı hâk
- 3935.Çünki iy şeh sorduñ ahvâlümüzi
Eydelüm nedür işit hâlümüzi

- 3936.Ola kim bu işe çâre bulasın
Üşbu müşkil ukdeyi hal kılasın
- 3937.Var bu taglardan añaru bî-kerân
Kûh u sahrâ Yâcüc'e olmuş mekân
- 3938.Ger imâret idevüz ger kişt-kâr
Ye'cüc ü Me'cüc iderler târ u mâr
- 3939.İşleri zulm-ıla gâretdür kamu
Her ne itseler hasâretdür kamu
- 3940.Kanda irseler iderler cevr ü kahr
Bunlaruñ zulmına döymez il ü şehir
- 3941.Âdemî nısfınca_olaruñ kaddi var
Anda ol birüñ k'olur nesli hezâr
- 3942.Tenleri pür-mûdur eyle kim kürâz
Pençe vü çengâli ser-tîz ü dırâz
- 3943.Ne olarda var-durur şümâr
Ne bilürler kim nedür dînden eser
- 3944.Rîg eczâsına var-durur evsâf-ı beşer
Lîki yohdur bunlara iy şehriyâr
- 3945.Bu iki taguñ arasıdur yakîn
Geçmege bu yaña yolları hemîn
- 3946.Dahı yirden yoh olara reh-güzer
Çâre eylesün bu işe tâc-ver
- 3947.K'olalar şeh devletinde halk şâd
Hem ola adı şehüñ hayr-ıla yâd
- 3948.Her kimüñ kim hayr-ıl'adı yâd ola
Dünya vü ukbâda rûhı şâd ola
- 3949.Bir dahı dürişüp idelüm meded
İki tag arasın itsün şâh sed
- 3950.Tâ k'ola ol sedd bunlara hicâb
Fitneden bu kişver olmaya harâb
- 3951.Didi şeh kim şükr Hakka k'ol Ganî
Bî-niyâz itdi halâyıkdan beni

- 3952.Kimseden baña gerekmezdir meded
Avn olursa Tangrıdan yapıla sed
- 3953.Pes Sikender orada kıldı karâr
Kâr-gerler cem' idüp bî-şümâr
- 3954.Dökdi seng ü âhen-içün sîm ü zer
Hayr-çun ol seddi yapdı nâm-ver
- 3955.Hayra sarf it mâlı k'olasın kerîm
Gizlem'anı k'aduñ olmaya le'îm
- 3956.İki tag üstine irince temâm
Düzdi bir dîvâr şâh-ı nîg-nâm
- 3957.Hurde-i âhenle misden ser-te-ser
Kıldı pür dîvâ arasın tâc-ver
- 3958.Kûreler getürdüben şâh-ı Acem
Her taraftan ürđi ol dîvâra dem
- 3959.Âhen ü mis kaynayuban oldu hal
Toldı sedd arası kalmadı halel
- 3960.Tañrıdan tevfiik olıban hem meded
İşbu resme kim didüm bağlandı sed
- 3961.Ye'cüc ü Me'cüc sedden añaru
Kaldılar hergiz geçemezler berü
- 3962.Liki çün irişe fermân-ı Ahad
Haşr yahınında rahne ola sed
- 3963.Sed yihılmadı bugün uş rûzigâr
Fitneyi Ye'cüc idüpdür âşikâr
- 3964.Yâcüc ü Me'cüc tolu-durur zemîn
Arada İskender eksükdür hemîn
- 3965.Şükr kim sultân-ı İslâm-ı Samed
Fitne-i Âhir zamâna itdi sed
- 3966.Olsa Ya'cüc bigi düşmen bî-şümâr
Ol Sikender seddi-durur pâydâr
- 3967.Ger sehâvetde sorarsañ Hâtem ol
Ver şecâatde dir-iseñ Rüstem ol
- 3968.Niçe kim devr eyleye gerdân-sipih
Dilegince dönsün anuñ mâh u mihr

DER-TEMSİL VE HÂTİME-İ DÂSİTÂN

- 3969.Yâcüc ü Me'cüc nedür eydeyüm
Ne işâretdür saña şerh ideyüm
- 3970.Şehvet-ile hırs-ı dünyidür bular
Herbiri dîn gâretin itmek diler
- 3971.Bunlara takvî-y-ile sen bagla sed
Kim bularuñ şerri senden ola red
- 3972.Mülk-i cân gâretlerinden dûr ola
Vâridât-ı kuds-ile ma'mûr ola
- 3973.Tefrika gide vü hâsıl ola cem'
Keşf irişiben hicâbı ide kam'
- 3974.Merdüm-i seg-sâr nefsüñdür yakîn
K'ışı hırs u hışm olmışdur hemîn
- 3975.Sûretin hırs u gazab mesh eylemiş
Âyet-i insânlığın nesh eylemiş
- 3976.Dirseñ olsun girü hem şekl-i beşer
Koma hırs u hışmdan anda eser
- 3977.İt ki ol sîretle ola Hak-şinâs
Ol kişiden yig ki ola nâ-sipâs
- 3978.Taş ki añadur zebûn dîv-i Laîn
Kuvvet-i Lâ-havledür bilgil yakîn
- 3979.Seng-i lâ-havle-y-le dîv-i nefsi dîn
Recm zahmından olur lâ-şek zebûn
- 3980.Recm olıcah ol bu zahm-ıla ne şek
Kim gelür anuñ makâmına melek
- 3981.Olmayayım dir-iseñ Şeytân-sıfat
İlm-ile olgıl firişte-ma'rifet
- 3982.Ger dilerseñ nefsüñi k'ola melek
Dîv evsâfını mahv itmek gerek
- 3983.Dîv vasfı ucb u kibr ü kîn olur
Pîşe iden bunları bî-dîn olur
- 3984.Hişten-bîn olma k'ol âyin degül
Hişten-bîn olan ehl-i dîn degül

- 3985.Hâkden düzdi seni Yezdân-ı Pâk
Pes fitâd'olmah gerek eyle ki hâk
- 3986.Hâkdensin tîz ü ser-keş olmagıl
Dîv-veş hem tab'-ı âteş olmagıl
- 3987.Baş çeküp çün âteş oldu hevl-nâk
Düşdi ayaga tevâzu' ide hâk
- 3988.Lâ-büd ol Hak kim yaratdı âlemi
Andan itdi dîv bundan âdemî
- 3989.Katre çün urtâdalıh kıld'ihtiyâr
İtdi deryâ anı dürr-i şâhvâr
- 3990.Çünki âteş ürdi ser-keşlikle dem
Hâk olıban tünde kaldı lâ-cirem
- 3991.Fakr u yohlıh göster aña k'ol Ganî
Sevmez anı k'anda ola kibr ü menî
- 3992.Ger var-ısa sende dânişden eser
Kimseye itme hakâretle nazar
- 3993.Kendüzüñi bizem'eyle kim bahâr
K'itmeye saña tama' leyl ü nehâr
- 3994.Bizemese kendüzin şâh-ı cüvân
Gâret itmeye-y-di_anı bâd-ı hazân
- 3995.Olmasa gül la'l-pîrûze-seleb
Hırmenini yil ala mı-y-dı aceb
- 3996.Ton degül-durur ululıh bil yakîn
Geyse eşek atlas eşek-durur hemîn
- 3997.Berg-i gülden ton geyür-ise cü'al
Kadri artup gevhere olmaz bedel
- 3998.Atlasa tolanur-ısa mühre-har
Kims'aña gevher diyü itmez nazar
- 3999.Âdemî olan güher bigi gerek
K'ola kendü zâtı kendüye bezek
- 4000.Hulkuñı hoş dut ki Hallâk-ı Kerîm
Hulki ögüp dir "alâ hulkın azîm"
- 4001.Zî hüner saña k'aduñ hoş-hüy ola
Müşg bigi sîretüñ hoş-büy ola

- 4002.Âdemînüñ dûzahıdur hûy-ı zıřt
Nîg-hûy olgıl ki bulasın Behiřt
- 4003.Garre olma tâata kim ol gurûr
Hakdan ider sini řeytân bigi dûr
- 4004.Yıdiyüzbiñ yıl ibâdet itdüğün
Yile virdi bir gurûr-ıla ol Laîn
- 4005.Hakka irmeklige miskînlik gerek
Sanmagıl kim kibr ü hod-bînlih gerek
- 4006.Ucb ider âbidi ehl-i Cahîm
Meskenetl' olur yiri rindüñ Naîm
- 4007.Çünkü Hak zâtında yoh-durur ilel
Tekye itmege yaramaz pes amel
- 4008.Tâata zinhâr tekye kılmagıl
Lîki tâatsuz dahı hem olmagıl
- 4009.Garre olmah tâata ısyân olur
Lîki tâat itmek küfrân olur
- 4010.Ger amel kılsa ameld' olur savâb
K'ummayasın Hakdan anuñ-çun sevâb
- 4011.Kullıguñ yirine yitür ol Samed
Ger kabûl ide veger hod kıla red
- 4012.Hükm anuñdur ne dilerse işleye
Ger azâ ide veger bağışlaya
- 4013.**AHMEDÎ**'nüñ sözine gûş ide dur
Kim sadeğ gibi kulaguñ tola dür
- 4014.Çoh söz işitdün bunı dahı işit
Göñlüne bu cân-fizâ pendı iş it
- 4015.Göñline reh-ber olanuñ bu kelâm
Âhıretde_ olur yiri Dâru's-selâm

DÂSİTÂN-I MUHÂREBE-İ İSKENDER BÂ-LEŞKER-İ ŞEYÂTİN

- 4016.Çün güneş iriřdi Burc-ı Akrebe
Beñzedi yıl k'esdi nîř-i akrebe
- 4017.Lâle vü gülden muattal oldu bâğ

Bülbülün işret-gehini aldı zâg

4018.Ol yeşil yaş yaprağı bu bâd-ı serd
İtdi ucdan uca huşk ü zâr ü zerd

4019.İ'tidâlınden udûl itdi hevâ
Gitdi gülden berg ü bülbülden nevâ

4020.Döndi bir renge dahı bu reng-i rez
K'anı her kim göre dir zî Reng-rez

4021.Reng-rez ol kim boyasuz reng ider
Her yüzinde yaprağın yüz yeng ider

4022.Her ki ide rengine bâgun nazar
Göre rûşen Sıbgatu'llahdan eser

4023.Mutrib-i hoş-nagme bir dem sâz it
Zühreye çengüni hoş dem-sâz it

4024.N'itdi görüñ bâğı bâd-ı mihrecân
Bâde iç pes varsa sende mihricân

4025.Bakduñ-ısa key nebâtuñ hâline
Bildüñ insân-ıla hayvân hâli ne

4026.Nic'idem dirsın burada sen vatan
Kim leb-â-leb tolıdur mekr ü fiten

4027.Bu aradan çün gidersin an-karîb
Buña ne gönül virürsin iy garîb

4028.Bu imâret idecek menzil degül
Buña gönül bağlayan âkıl degül

4029.Eglenecek yir midür târ-ı megâk
Duracak menzil midür bu tîre-hâk

4030.Yire sor n'oldı mülûk-ı ins ü cân
Kanda vardılar selâtîn-i cihân

4031.İns ü cinne server olanlar kanı
Maşrık-ıla Magrib alanlar kanı

4032.Sor bu çarh-ı zâle Destân kandadır
N'oldı Rüstem yâ Nerîmân kandadır

4033.Kanı ehl-i ilm ü erbâb-ı nazar
N'ireye vardılar ashâb-ı hüner

- 4034.N'oldı Hakka tâat iden evliyâ
Kanı halkı da'vet iden enbiyâ
- 4035.Toprag altında-durur kamu nihân
Âh k'itmez kimseye şefkat cihân
- 4036.İsdeseñ toprahda isdegil hüner
Kim hüner ehl'anda olur ser-te-ser
- 4037.Yüregüm bu gussadan pür-derddür
Çâresi bir câm-ı cân-perver-durur
- 4038.Tâ taallukdan beni âzâd ide
Âkıbet fikrinden alur cân herâs
- 4039.Kim niçe kim akl vardur u havâs
Âkıbet fikrinden alur cân herâs
- 4040.Câm sun sâkî ki olup bî-haber
Unıdam encâm fikrin ser-te-ser
- 4041.Kim kılur yürekleri ol fikr kan
Olur ol fikr-ile bî-ârâm cân
- 4042.Lâlenün içine bu fikr urdı dag
İşbu fikrûñ derdile sarardı bâg
- 4043.İşbu fikri çünki düşürdi öge
Boyadı tonlarını sûsen göge
- 4044.Garka-i hûn işbu fikr itdi güli
İşbu fikr itdi perîşân sünbüli
- 4045.Nergisi bu fikrdür ruh-zerd iden
Câm elinde-y-ken için pür-derd iden
- 4046.Niçe sûsen bigi uzadup zebân
Bu cihân ahvâlini idem beyân
- 4047.Saña bir kıss'eydeyüm cem' eyle hûş
Pes sözüme ol benefşe bigi gûş
- 4048.Girü bir nagme düzeyim dil-nüvâz
K'idemez ol resme zühre râst sâz
- 4049.Gûşı hûş tut sen ki ben hoş söyleyem
Sözi gevher bigi hoş-nazm eyleyem
- 4050.Çünki kulah tuta söze müstemi'
Söz diyenüñ gönli olur müctemi'

4051.Lâ-cirem her söz ki ol dile gelür
Ucdan uca âyet-i ma'nî olur

4052.Hâzır olan çün söz işitmez ola
Söz ki gaybîdür nice hâzır gele

4053.Sûsenüñ dili anuñ-çundur hamûş
Kim benefşe tutmadı sözine gûş

4054.Çünkü işbu hâkdândan Keykubâd
Gidüben oldu ümîdi cümle bâd

DER-SEBEB-İ İCTİMÂ-I ŞEYÂTİN BE-CENG-İ İSKENDER

4055.Tâcını başından aldurup ecel
Tahta-i na'ş'eyledi tahtın bedel

4056.Old'anuñ yirine Keykâvûs şâh
Uydılar aña kamu İrân-sipâh

4057.Bir kişi nâ-kâm olmayınca zâr
Birisi dahı olamaz kâm-kâr

4058.Baş kodılar aña ser-keşler temâm
Tûs u Kiy ü Rüstem-i Destân u Sâm

4059.Ser-firâz oldu anuñ kadri-y-le tâc
Bahtı-y-ıla kâim oldu taht-ı âc

4060.Böyle bir târîh ehli k'ol zamân
Dîvler yiri-y-idi Mâzenderân

4061.Server-idi anlara dîv-i sipîd
Ol siyeh-kâr-ıdı anlara ümîd

4062.Kim katı bed-kîş-idi vü bed-nijâd
Dün gün işi fitne-y-idi vü fesâd

4063.Cinne kamu ol iderdi saltanat
Tolmuş-ıdı dünya andan şeytanat

4064.Cinniler anuñla kuvvet buldılar
İns-ile girü adâvet kıldılar

4065.Dîv kim insâna düşmendür yakîn
El bulıncah n'itmez aña ol la'în

4066.Dîv düşmen-durur aldanma aña
Diler-iseñ k'irmeye şerri saña

- 4067.Dîve uymah âdemîden cehl olur
Düşmene her k'aldana nâ-ehl olur
- 4068.Nefs dîvin def'iderseñ iy cüvân
Şîr'i nersin ü dil-âver-pehlevân
- 4069.Hayf ola k'ilhâm-ı aklı koyasın
Nefs yiltedügi işe uyasın
- 4070.Çünkü gördi dîvi Keykâvûs-ı şâh
Kim iderler ins cinsini tebâh
- 4071.Böyle azm itdi ki terk-i bezm ide
Pes varıban dîvlerle rezm ide
- 4072.Leşkeri Mâzenderân'a sürdi tîz
Kim ide cinn-ile ol ceng ü sıfız
- 4073.Mülk alam diyen gerek ola dilîr
Ohı sehmin görse rûbâh ola şîr
- 4074.Baş olam diyen gerek baş ide terk
Göñline cân mihrini kılmaya berk
- 4075.Söz öküş Mâzenderân'a geldi şâh
Anuñ-ıla bî-kerân hayl ü sipâh
- 4076.Bilesinde-y-di kamu İrân-zemîn
Rüstem-idi kim degüld'anda hemîn
- 4077.K'ol zamânda Rüstem-i iklîm-bahş
Sîstân mülkine sürmiş-idi rahş
- 4078.Geldi bir sahrâyâ düşdi şehriyâr
Dîvler isdedi ki_ide kâr-zâr
- 4079.Çünkü karardı gice dîv-i sipîd
Kırdı Kâvûsı vü oldı nâ-bedîd
- 4080.Kıldı bir çâhun içinde anı bend
Kaldı çâh içinde zâr u derd-mend
- 4081.Kodı çâh üstine bir seng-âsiyâb
Kaldı Kâvûs anda bâ-derd ü azâb
- 4082.Âdemîden çünkü yüz döndere baht
Aña ne tâc assı ider ü ne taht
- 4083.Çünkü leşkerden belürsüz oldı şâh
Kaldı ol sahrâda ser-gerdân sipâh

- 4084.Pâdişâh baş olur u leşker beden
Bellüdür n'olur çü başsuz ola ten
- 4085.Âhirü'l-emr ol aradan gitdiler
Rüstemi bu işden âgâh itdiler
- 4086.Çün haber-dâr oldı işden tâc-bahş
Yaluñuz Mâzenderân'a sürdi rahş
- 4087.Çoh azâim bilür-idi pehlevân
Dîvler olmazlar-ıd'andan nihân
- 4088.Geldi vü ol dîvi itdi_anda helâk
Hanceri-y-l'itdi ciger-gâhını çâk
- 4089.Şeşdi Keykâvûs bendin nîg-baht
Virdi aña girü mülk ü tâc u taht
- 4090.Diledi dîv oğlu Erjeng-i la'ın
K'anda Rüstem-i Destânla ceng
- 4091.Lîki ol vaktin degüldi tîz-ceng
İdemezdi Rüstem-ile ceng ü kîn
- 4092.Geçdi bu iş üstine biñ yıl temâm
Dîv-beççe karşu artardı müdâm
- 4093.Üşbu müddet arasında ol recîm
Büiyiben oldı ifrît-i azîm
- 4094.Uydılar cinnîler aña ser-te-ser
Kim fesâd-ıdı işi vü şûr u şer
- 4095.Âdeti dîvüñ nedür şerr ü fesâd
Âdemîseñ şirreden hîç itme yâd
- 4096.Dîve âdetdür tabâtdan bu şer
Şerri olsa dîvden kemdür beşer
- 4097.Çünkü geçdi devrden biñ yıl temâm
Memleket İskender'e virdi zimâm
- 4098.Heybetinden mülk-i Çîn toldı girîv
Cândan anuñla hased bağladı dîv
- 4099.Atasınuñ kanı-çun ol dil-siyâh
Kasdı kıldı k'ide İrân'ı tebâh
- 4100.Eski düşmen dost ola sanmagıl
Dostlığına düşmenüñ inanmagıl

- 4101.Dostına düşmenüñüñ olma yâr
Kim yakîn bu mârdur ol zehr-i mâr
- 4102.Dost olmaz eski düşmen itme cehd
İ'timâduñ eks ol arturdukça ahd
- 4103.Nice tiryâk olasıdur zehr-i mâr
Yâ kaçan ter-gül bitüre huşk-hâr
- 4104.Nîş-i akreb olmayısar nûş-ı şehd
Sen niçe dilerseñ it bîhûde cehd
- 4105.Hem dahı eglendügi-çün Çinde şâh
Düşdi şehden mülke ahbâr-ı tebâh
- 4106.Told'erâcîf-ile şehri ü her-diyâr
Böyl'olur ırâh düşicek şehriyâr
- 4107.Aña magrûr olıban Erjeng-dîv
Diledi kim düşüre işe girîv
- 4108.Kanda kim ma'mûr yir bula yıha
Âdemîsin öldürüp oda yaha
- 4109.Oldı İblîs aña üşbu işde yâr
Birbiri-y-le itdiler ahde karâr
- 4110.Kendünüñ zürriyyetinden ol recîm
Düzdi yitmişikibiñ dîv-i le'îm
- 4111.İkiyüzbiñ dahı Erjeng itdi cem'
İtmege İskenderüñ milkini kam'
- 4112.Dahı yüzbiñ gül-i ifrît ol la'îñ
Cem'itdi anda ol bed-hâh-ı dîn
- 4113.Çün işitdün dîvler ahvâlini
Gel işit imdi Sikender hâlini

RESİDEN-İ İSKENDER BER-RÛS VE CENG-BE-RÛS

- 4114.Çün ser-â-ser gezdi Şarkı şehriyâr
Dutdı anda her ne var şehri ü diyâr
- 4115.Matla'ına güneşüñ kıldı nazar
Gördi kim andan güneş nice çıhar
- 4116.Pes ol aradan kılıban azm-i râh
Girü Tûrândan yaña yürüdi şâh

4117.Yolda giderken aña Rûs u Hazer
Cem' olıban kasd itdiler meger

4118.Katı düşvâr-ıdı Rûsuñ yolları
Tolu hâr-ıdı yog-ıdı gülleri

4119.Tolu-y-ıdı ol mülk der-bend ü hısâr
Mûr u mâr andan idemezdi güzâr

4120.Fehm-i zîrek orada hayrân-ıdı
Akl u dâniş anda ser-gerdân-ıdı

4121.Degül-ıdı girmegi âsan anuñ
Çıhmagına yog-ıdı imkân anuñ

4122.Çeşm-i sûzen bigi yolu var-ıdı
Her dikenî akreb ü yâ mâr-ıdı

4123.Yolu anuñ fikrden bârîk-ter
Hicr düninden dahı târîk-ter

4124.Tolu-y-ıdı ol yol kader-endâzlar
Pehlevân ser-keşler ü ser-bâzlar

4125.Ol hevâda kuş dökerdi bâl ü per
Arslan anda iderdi terk-i ser

4126.Rûs şâhı leşkeri-y-le bî-şümâr
Bağladı der-bend k'ide kâr-zâr

4127.Komaya İskenderi k'ile gire
Yâhud ol mülküñ sevâdını göre

4128.Çünki der-bende irişdi nâm-ver
Gördi der-bendi tolu Rûs u Hazer

4129.Geçmege der-bendi âheng itdiler
Bi'l-gurûre Rûs ile ceng itdiler

4130.Her yaña leşker yürüdi fevc fevc
Kan revân oldı orada mevc mevc

4131.Bir neberd oldı ki_aña benzer neberd
Görmedi hergiz bu çarh-ı sâl-hurd

4132.Leşkeri şâhuñ oha oldı hedef
Çoh kişi peykân-ıla düşdi telef

4133.Buncalar dahı kılıcdan öldiler
Buncalar dahı cerâhatl'oldılar

- 4134.Az kaldı kim şeh-i Yezdân-perest
Bula ol der-bend üstine şikest
- 4135.Lîkin idiben inâyet ol Samed
Virbidi şâha melâyikden meded
- 4136.Pes şikeste olıban Rûh u Hazer
Kaçdılar şâhuñ öñinde ser-te-ser
- 4137.Kime kim Hakk ısmeti hem-râh ola
Çâhdan çihup Azîz-i câh ola
- 4138.Hıfzı Hakkuñ her kime kim yâr ola
Âteş-i sûzân gül ü gül-zâr ola
- 4139.Ol gazabla Rûsa girtüp nâm-ver
Kıldı Rûsı ser-te-ser zîr ü zeber
- 4140.Çünkü ol Hakk ide bir kavme gazab
Kahrına Allâhuñ bulunur çoh sebeb
- 4141.Kırd'erenlerin kamu bürnâ vü pîr
Avret ü oğlanların itdi esîr
- 4142.Yahdı vü yıhdı ol ili şehriyâr
Şöyle k'anda kalmadı şehir ü diyâr
- 4143.Kendüden yig-ile pençe şûm olur
Âsı olmah devlete mezmûm olur

MUSÂF-I İSKENDER BÂ-LEŞKER-İ ŞEYÂTÎN CİNN

- 4144.Yüridi andan Horâsandan yaña
Yolda cinn ahbârı irişdi aña
- 4145.Şâh İskender Azâyımdan-ıdı
Cinn teshîrinde da'vet-hân-ıdı
- 4146.İy niçe dîv'eyleyiben ol zebûn
Bend urup çekmişdi ol çâha nigûn
- 4147.Niçesin dah'idüp ilmi-y-ile râm
Kullıh itdürürdi rûz u şeb müdâm
- 4148.Mülke dahi girmedin cinnî-sipâh
Yüridi Mâzenderândan yaña şâh
- 4149.Anda kim konmış-ıdı Kâvûs u Key

Bârıgâh urdı şeh-i pîrûz-pey

4150.Bî-aded leşker düzetti cinn ü ins
Vahş ü dâm u ded dahı her nev' cins

4151.Pes getürdi şâh otuzbiñ zinde-fil
K'anı gördi dîv cengine sebîl

4152.Böyledür ehl-i Azâimden habar
Kim görincek fili dîv ürker kaçar

4153.Çünki bilürdi şeh-i Keyyi hıdîv
Bunı kim döymez mehîb-âvâza dîv

4154.Çün hevâdan katı âvâz üre mevc
Dîvler yire düşerler fevc fevc

4155.Anlar anuñ-çun olur gündüz nihân
Kim tolu âvâz olur bu cihân

4156.Çün gice olur kamu nesne hamûş
Debreniben kılur anlar dahı hûş

4157.Düzdi bî-had kûs şâh-ı mülk-gîr
Sûr-nây-ı ispîd-mühre hem nefîr

4158.Sâika düzdürdi vü rûy-gîne hem
Ra'd-ıla Hindî-derây u gâv-dem

4159.Yüridi cinnî hevâdan fevc fevc
Yirden İskender çerisi mevc mevc

4160.Dîv-i Erjeng idüp âheng-i musâf
Şehriyâra karşı bî-hadd ürdi lâf

4161.Leşkerine pîş-rev hannâs-ıdı
Kalb-gâhında turan vesvâs-ıdı

4162.Meymenesinde duran ekvân-ıdı
Oniki biñ dîv aña fermân-ıdı

4163.Meyseresinde durur-ıdı şimâl
Kim idem dir-ıdı insi pâyimâl

4164.Şâhı meydâna ohıdı dîv-i şûm
Sald'anuñ üstine atın şâh-ı Rûm

4165.Bir azîmet cinniye karşı dürüst
Şöyl'ohıdı şâh ki_ oldı dîv süst

4166.Düşdi dîvüñ cânına teşvîş ü şûr
Kalmadı hergiz teninde tâb u zûr

4167.Dîv-i Dahhâki kılıcı-y-ıla Cem
Şöyle çaldı k'itdi varlığın adem

4168.Yardı Erjengüñ yüregın tîg-zen
Şöyle kim dîv-i sipîdüñ pîl-ten

4169.Dîvler çünkim bu hâli gördiler
Ceng ide leşker içine girdiler

4170.Yirden insân u hevâdan dîv-i şûm
Çâre-ger olmuş arada şâh-ı Rûm

4171.Cinn ü insüñ arasında bir neberd
Koydı kim göge irişdi hâk ü gerd

4172.Kûs u sıbh u nây itdükce hurûş
Dîv başından giderdi akl u hûş

4173.Na're urup leşker itdükde gırîv
Dökilür-idi hevâdan yire dîv

HEZÎMET-YÂFTEN-İ CİN EZ-İSKENDER

4174.Kimin ata basdurup kırdurdu şâh
Kimin itdi at ayakında tebâh

4175.Kimini kıldı Azâimle helâk
Kimin itdi tîg zahmı-y-ıla hâk

4176.Öldi cinden Âreş ohında şemâl
Tûs elinde oldu ekvân pây-mâl

4177.Gîv elinde öldi hem hannâs dîv
Tûr elinde oldu ekvân pây-mâl

4178.İşbu hâletde ki cinn maglûb olur
Gör ki şâhuñ başına ne iş gelür

4179.Anuñ-ıçun kim bile şâh u sipâh
Kim degül kuvvet viren illâ ilâh

4180.Tâ özine kimse magrûr olmaya
Zûr-ı bâzûsına tekye kılmaya

4181.Ol ki bu hâli rivâyet eyledi
Bize bu resme hikâyet eyledi

4182. Kim yürürken kalb içinde şâh-ı Rûm
Bindi nâ-geh boynına bir dîv-i şûm
4183. Kim ayagı-y-ıdı ol dîvüñ düvâl
Ne aceb hikmet-durur bu nice hâl
4184. Olup ol ifritüñ ayagı kemend
Kıldı şâhuñ cümle endâmını bend
4185. Çün çözüld'evsâlı vü bağlandı dem
Gitdi yâdından Azâim dahı hem
4186. Ol Azâim k'anı ohıduhda perî
Dahı dîv olurdu anuñ çâkeri
4187. Lâ-cirem kim düşdi ol leşker zebûn
Oldı anlardan revân seyl-âb-ı hûn
4188. Âhirü'l-emr irdi lutf-ı Kırdigâr
Şöyle urdı dîvi k'oldı rîze rîz
4189. Bir firişteh indi gökden yire tîz
Şöyle urdı dîvi k'oldı rîze rîz
4190. Ol melekle indi bir rahşende nûr
Düşdi andan cinne veyl-ile sübûr
4191. Toldı gönülleri ol sâatde bîm
Hod melekle nic' olur dîv-i recîm
4192. Ne gam ol Allâhdan olana avn
Ger aña düşmen olursa cümle kevn
4193. İlder-iseñ andan isdegil meded
K'ide korkuñdan imin sini Samed
4194. Her kime k'andan irişmez-ise avn
Bir dem anı sahlamayamaz iki kevn
4195. Çünki ol ifrît-idi serdâr-ı dîv
Ol ölicecek cinniden kopdı gırîv
4196. Cinne düşdi anuñ ölüminden herâs
Kim bular dîvâr-ı dîv ü ol esâs
4197. Hevlden ol araya cinnî-sipâh
Yire dökiliben oldılar tebâh
4198. Bildi şeh kim lutf-ı Rabbânîdür ol
Rahmet-i eltâf-ı Rahmânîdür ol

- 4199.Havf gönünden gidüp irdi ümîd
Buldı baglu kapuya nâ-geh kilîd
- 4200.Kamu müşkil iş Haka âsân-durur
Müşkil ü âsân aña yiksân-durur
- 4201.Kamu müşkiller kilîdi andadur
Kamu miskinler ümîdi andadur
- 4202.Akl-çün başına geldi nâm-ver
Öñine düşdi Azâim ser-te-ser
- 4203.Bir azîmet başlayup ohıdı şâh
K'itdi rûşen günini cinnün sipâh
- 4204.Ol azîmet eyledi cinne eser
Şöyle k'oldılar kamu zîr ü zeber
- 4205.İnse çün bu fethi viridi Kirdikâr
Cinniden katl eylediler bî-şümâr
- 4206.Oldı Hak fermânı-la Pîrûz şâh
Kaçdı mahzûl oluban cinnî sipâh
- 4207.Anda şâhuñ oldu cümle şark u garb
İtmedi kimse dahı _anuñla harb
- 4208.Dîvler dahı müsahhar oldılar
Cümle fermânına çâker oldılar
- 4209.N'irede kim var-ıdı bir tâc-ver
Hidmetine bağladı şâhuñ kemer
- 4210.Dünyada ne şehr kaldı ne hısâr
K'anı itmedi müsahhar şehriyâr
- 4211.Bu kamusın soñra n'itdi âkıbet
Bunda kodı kendü gitdi âkıbet

DER-MEV'İZE

- 4212.Hoş-durur dünyâda olmah kâm-kâr
Bu yavuz kim bî-vefâdur rûzigâr
- 4213.Yüregüm bu derd-ile pür-hündur
Gözlerüm bu verd-ile ceyhündur
- 4214.Ger Ferîdûn ola yâ Efrâsiyâb
Bulımaz bu Zâl destânına tâb

- 4215.Çeng vurduhda ecel şöyle ki şîr
N'Erdevân döyer aña ne Erdeşîr
- 4216.Gerçi buldı rûz-ı zer Behrâm-ı Gûr
Âkîbet behre ne oldı aña gûr
- 4217.Gerçi hükm itdi revân Nûşîn-revân
Nîş-i mürğ oldı aña nûş-ı revân
- 4218.N'itdi ol sultânlara bu hâk-dân
Anı ide saña dahı bî-gümân
- 4219.Kalma aña alma ahdinden gurûr
K'olmayasın Tangrıdan yik-bâre dûr
- 4220.Dileseñ k'olmaya işüñde hâlel
Hâlis itgil sıdk-ı niyyetle amel
- 4221.Hâlikuñ Rıdvânını eyle taleb
Menzil-i kurba heves it rûz u şeb
- 4222.İsdeseñ ol menzili isde düriş
Sa'y itseñ aña it kim oldur iş
- 4223.Cennete kalma ki andan yig mekân
Cehd iderseñ bulunur bî-gümân
- 4224.Bu hevesle isdemek hûr u kusûr
Ne gerek himmetde yog-ısa kusûr

DER-TEMSÎL DÂSİTÂN

- 4225.Kim-durur Erjeng-i dîv ol nefsi-i şûm
Akl didügüm-durur sâlâr-ı Rûm
- 4226.Ucbdur şerh itdügüm hannâs dîv
Hırs-durur andugum vesvâs dîv
- 4227.Dîv kim şeh boynına bind'oldı vehm
Bu sözi kim eydürem key eyle fehm
- 4228.Kibr bil ekvân-ı dîvi lâ-muhâl
Şehvet ol divi ki adıdur şemâl
- 4229.Hilm-durur Tûs didügüm yakîn
Kibr ü hırsı def' ol eyle hemîn
- 4230.Kût-ı fikriyyedür adı-y-la Gıyv

K'aña durmaz vehm kim ol oldı rîv

4231.Ol Azâim şâhı kurtaran melek
Kim yakîn geldükd'olur lâ-şey' şek

4232.Kim-durur Âreş riyâzet bil dürüst
Kim olur anuñla şehvet pâ-y-ı süst

4233.Tûr ol lâ-havledür aña habar
Kim yavuz ef'âl õñinden kaçır

4234.Leşker-i cinn bâkî evsâf-ı beşer
K'anda yohdur hayra oldur cümle şer

4235.Vesveseye sînen olmışdur mekân
Şöyle kim cinnîlere Mâzenderân

4236.Âkıl-ısañ çâker itmege düriş
Nefs dîvin akluña kim budur iş

4237.Tîg-i lâ-havle-y-le İskender-misâl
Nefsüñi dîv-ile eylerseñ kıtâl

4238.Vâridât-ı kudsdan saña meded
Göresin kim nice birbir ol Samed

4239.Bu rezâ'il kim senüñ nefsüñde var
Dürişüp anı fezâyille gider

4240.Kim Sikender bigi devlet bulasın
Ne Sikender kim Süleymân olasın

HÂTİME-İ DÂSİTÂN BE-MÜNÂCÂT

4241.**AHMEDÎ**'yi lutf kıl iy Reh-nümûn
Nefsinüñ dîvine kılmagıl zebûn

4242.Kendülik evsâfın andan eyle kam'
Kim irişe tefrika yirine cem'

4243.Aña sen olgıl İlâhî reh-nümûn
Koma kim nefsi kıla anı zebûn

4244.Lutfuñ-ıla eyle kılğıl sen anı
K'ana pâ-bend olmaya mâ u meni

4245.Kılma meftûn anı dünyâ câhına
K'olmaya mahbûs ukbâ çâhına

4246.Senden artuhdan ne kim var iy Ganî

Fazluñ-ıla bî-niyâz itgil anı

DEN-İ İSKENDER BE-MISR VE DÎDEN-İ Û ACÂİB-İ ÂN DİYÂR-RÂ

4247.Kavs burcın çün güneş kıldı mekân

Zemherî ohına kuruldı kemân

4248.Cevşen-i pûlâd geydi cûyibâr

Hem havâsıl-pûş oldı kûhisâr

4249.Rûzigâr oldı abûsen kamtarîr

Tîr bârân itdi yire zemherîr

4250.Taş dahı döymez anuñ sehmine

Taş içi mecrûh olur zahmına

4251.Çünk'anuñ adı adüvvü'd-dîn ola

Aña karşu varmamah âyin ola

4252.İki nev' âteş olur aña siper

Biridür huşk ol ikinüñ biri ter

4253.Anlaruñla mülk-i cân ma'mûr olur

İç ü taş'ivi dahı pür-nûr olur

4254.Âteş ile def' olur bâd-ı serd

Sürh-gül olur mül-ile rûy-zerd

4255.Maslahat-çun anı redd itdi-y-se nakl

N'ola cândan çün kabûl eyler bu akl

4256.Çünkü ol senden halâs eyler seni

Var-ısa akluñ koma elden anı

4257.Mâ u menligi çü senden ol alur

Ol günâha ger diyem tâat olur

4258.Vahdete girdüñse gider sen seni

Vahdet-ile nic'olur mâ u menî

4259.Vahdeti bilgil ki birlikdür hemîn

İkiligi ko k'ola vahdet yakîn

4260.Vahdet-ile ikilik nic'ola cem'

Birlik isderseñ id ikiligi kam'

4261.Bâg-ı cân bulsun diseñ neşv ü nemâ

Cehd it sende ne men kalsun ne mâ

4262.Mü'min olanda gerekmez mâ u men
Me'men isterseñ men ü mâ'yı ko sen

4263.Kankı başda kim ola mâ u menî
Bî-gümân tenden ayırurlar anı

4264.Çün "enâ hayrün" didi ol la'netî
Tavk oldu boynına Hak la'neti

4265.Hâkden olan kişi miskîn gerek
Hâk olana ne kibr ü kîn gerek

4266.Baş k'enâniyyet tuta anda mekân
Düşüben bir yan'üzilür bî-gümân

4267.Hâk işi uftâdalıh-durur yakîn
Pes işüñ uftâdalıh gerek hemîn

4268.Hâk bigi ger fütâde olasın
Rahmet âsârından ihyâ bulasın

4269.Göñlüñüñ bâğında ter-güller bite
Lâle vü nesrîn ü sünbüller bite

4270.Hâtıruñ Mısırında bite ney-şeker
Huşk-hâruñdan gele hurmâ-yı ter

4271.Meskenetle çün tevâzu' kıldı hâk
Lâ-cirem Hakdan hilâfet buldı hâk

4272.Kendüyi çünkim fütâde kıldı ol
Encüm ü eflâke Kible oldu ol

4273.Encüm ü eflâk anuñ-çun bî-hilâf
Ka'be bigi anı iderler tavâf

4274.Aña indi Tengridan vahy u kelâm
İlm ü irfân dahı and'oldı temâm

4275.Enbiyâya cümle mazhar oldu ol
Evliyâyâ dahı masdar oldu ol

4276.İns ü cinnüñ müstakarrı ol-durur
Ölü vü diri makarrı ol-durur

4277.Çün bilürsin ömri kim durmaz gider
Sevgüsün cehd eyle göñlüñden gider

4278.Çünkü dünyâ kimseye itmez vefâ
İ'timâd itmek aña olur hatâ

4279.Sor selâmet oldı m'andan Silm ü Tûr
Buldı m'andan behre gör Behrâm-ı Gûr

4280.Çarha sor âhî ki ne destân-ıla
Yire basdı Rüstem-i Destân-ıla

4281.Nice kıldı agladup Dahhâki zâr
Nicesi itdi Azîz-i Mısrı hâr

4282.Nice mekr itdi bu çarh-ı fîre-fâm
Kim düşüp Cem topraga uşandı câm

4283.Küşte n'eyle kıldı ol Güştâsbı
Câm sunup n'eyledi Câmâsbı

4284.Tahtını viren Süleymânuñ yile
N'ülkarneyn tâcın kim bile

4285.Leşkerin cinnüñ çü Zülkarneyn şâh
Şöyle kim şerh eyledüm kıldı tebâh

MATLA-I DÂSİTÂN

4286.Çün şeyâtîn oldılar cümle helâk
Kaldı anlardan Horâsân mülki pâk

4287.Yapdı Merv-ile Semerkand'ı temâm
Hem Herât'ı dahı şâh-ı nîg-nâm

4288.Tâ ki geçdügince devr-i rûzigâr
Ol mevâzi' anda kala yâdigâr

4289.Kişi eyle gerek kim çün öle
Dünyada dâ'im adı diri kala

4290.İlerükiler k'imâret itdiler
Adı-çun mülki imâret itdiler

4291.Şimdikiler iy aceb dâim neçün
İli yıharlar yaharlar dün ü gün

4292.Ol aradan Mısra vardı şehriyâr
Buldı Mısır bir ulu hurrem diyâr

4293.Yiri ma'mûr u suyu sıhhat-fizây
Topragı münbit hevâsı dil-güşây

4294.Her yañadın iki aylıh yol temâm
Olmış a'mâlinden anuñ bî-keâm

4295.Çünkü Mısruñ kişverine girdi şâh
Anda çoh dürlü imâret gördi şâh

DÎDEN-İ İSKENDER BE-BÎNÂYÎ-RÂ Kİ DER-VEY SUVER BÛD

4296.Buldu bir kubb'anda pür-nakş u nigâr
Geçmiş üstine anuñ çoh rûzigâr

4297.Bilemez kimse neden terkîbini
Tâ kim itmişdür anuñ tertîbini

4298.Bişbiñ arşun her yañadın tû u arz
Yazılı her nesne k'itseñ anda farz

4299.Yazıl'anda sûret-ile evliyâ
Nakş olmuş hey'et-ile enbiyâ

4300.Yazılı anda selâtîn dahı hem
Adlu adı-y-la Arab yâ-hûd Acem

4301.Hem Müvellih hem Kalender Haydarî
Gebr ü Tersâ vü Yahûd u Hayberî

4302.Ka'be vü mescid kelisyâ vü künişt
Yazıl'anda dahı cümle hûb u zişt

4303.Yazıl'anda kamu millet gelmedin
Kimse adın u sıfâtın bilmedin

4304.Gelmedin her tâife şeklin ki var
Nakş itmişlerdi anda âşikâr

4305.Yazılı anda Sikender sûreti
Fûr-ıla ceng itdüginüñ hey'eti

4306.Yazıl'anda Behmen ü İsfendiyâr
Rüstem-i Destân u hem Sâm-ı Suvâr

4307.Ne demür iderd'aña ne taş eser
Ne hod elmâs u ne hod dahı güher

4308.Kapusında yazılı anuñ bu hat
“K'iy Sikender itme işüñde galat”

4309.Yapmışuz bu meskeni biz uş temâm
Her ki var dir kuvvetüm iy nîg-nâm

4310.İdebilsün işbu ma'mûrı harâb
Gerçi yapmahdan geñez itmek yebâb

4311.Dâne-i hardalca andan şâh-ı ahd
Koparamadı niçe kim itdi cehd

4312.Kimlerüñ yiri-y-idi görgil bu yir
Kimleri bisleyübenüñ soñra yir

DÎDEN-İ İSKENDER EHRÂM-RÂ

4313.Buldı anda bir imâret dahı hem
Pes muazzam lîki bî-nakş u rakam

4314.Adı Ehrâm anuñ u gâyet bülend
Devr döndüg'itmemiş aña güzend

4315.Devr kim her nesneyi ekser keder
Hergiz aña olmamış ol kâr-ger

4316.İçi musmet taşı gâyet üstüvâr
Geçmiş ol yapılalı çoh rûzigâr

4317.Anda bir kerkes var-ıdı yazılı
Durmuş ol bir yengec üzre iy ulu

4318.Göriccek anı didi şâh-ı cihân
Kim bunuñ ma'nîsi bu ola ayân

4319.K'itmiş-ıdı burc-ı Sertânı makâm
Nesr-i Tâir bu yapılduhda temâm

4320.Orada bilindi k'Âdem gelmedin
Dünyad'anuñ nakşı zâhir olmadın

4321.Bunca yıllardan ilerü ol makâm
Anda yapıliban olmuşdı temâm

4322.Yiñi sanma eski-durur bu cihân
Çok kişilerden kalup-durur ayân

4323.Geçmiş üstine bunuñ yıllar delim
Lîki hâdisdür bilâ-şek ne kadîm

4324.Devr ider sâl ü meh durmaz yakîn
N'evvelin bilür kişi ne âhirin

4325.Anuñ edvârında birisi ayân
Üçyüzaltmış biñ yıl olur bî-gümân

4326.Herbiri içün bu dercden biñ kez in
Yil-ile ilm ehl'ider anı şümâr

- 4327.Otuzaltıbiñ dahı bir devr var
Yıl-ıla güneş bezer çarhuñ yüzün
- 4328.K'ol burûcuñ her birisi-y-çün müdâm
Güneş üçbiñ yıl döner gökde temâm
- 4329.Yidibiñdür bir dahı kim gör ayân
Oldı her seyyâre çün biñ yıl revân
- 4330.Üşbu edvârı nice biñ kez sipihr
Yürüyüp düketmiş ola mâh u mihr
- 4331.Niçe dahı hem dönüben dükede
Vây aña kim çarha ol tekye ide
- 4332.Üşbu sözden kim didüñ kendüni bil
Meskenet dut mâ u menligi kogıl

ZİKR-İ RÛD-I NÎL VE ACÂYİB-İ MENÂBİ-İ ÂN

- 4333.Nîl Irmagın dah'anda gördi şâh
Menba'ın kandan diyüben sordı şâh
- 4334.Didiler hatt-ı istivâ k'andan berü
Altı aylıh yoldan ahar ol beru
- 4335.Ol-durur hatt-ı istivâ k'andan berü
Var imâret yoh-durur dah'añaru
- 4336.Kat' kılur yiri hatt-ı istivâ
Düni günü iki nısf eyler cüda
- 4337.Kumrı dirler anda var bir ulu tag
Hûb u tâbân şöyle kim rûşen-çirâg
- 4338.Bir yanından biş ulu çeşme çıhar
Bir dahı hem bir yañasından ahar
- 4339.Bir kişi yürüyü bir yire gelür
Ol arada cem' olup bir bahr olur
- 4340.Ol bişi dahı olur bir bahr hem
Bir araya dirilüben bîş ü kem
- 4341.Herbirinden buñlaruñ bir cûy-bâr
Çıhup ider rub'-ı meskûna karâr
- 4342.Bir mesâfet gidüben girü gelür
Ol iki bir yirde bir bahr olur

- 4343.Bî-gümân ol bahr ayagıdur bu Nîl
Nîlüñ uş şerhini didüm râst bil
- 4344.Didi şah hayrân olup kim iy Hudây
Pâdişâh sensin ü biz kamu gedây
- 4345.Ne gerek her nesneye sensin bilen
Çâresini kamu eşyânuñ bulan
- 4346.Senden almışdur vücûdı kamu şey
Her ne var fânî vü sen Kayyûm u Hay
- 4347.Mısr Mısr olmag-ıçundur bî-gümân
K'itdi Nîli Kudretüñ iy Hak revân

SIFAT-I RÛGAN-I BELESÂN

- 4348.Ol nebâtı dahı şeh anda bulur
Kim yimişi her yıl anuñ yag olur
- 4349.Nicesi kim samg agaçdan çıhar
Ol yag andan eyle çıhuban ahar
- 4350.Rûgan-ı Mısrî diyen ol yag olur
Niçe sayrular anuñla sag olur
- 4351.Yiri aynü'ş-şemsdür anuñ hemîn
Suyı dahı bir kuyudandur yakîn
- 4352.Ol su ayruh yirde bitürmez anı
Ol yir ayruh su-y-la yitürmez anı
- 4353.Dilde Matriyye bulupdur ol su ad
Gör ne san'atlar kılur Rabbü'l-ibâd
- 4354.Fikr it nice acâyib yaradur
Nesneyi nesneye nice yaradur
- 4355.San'atına bah ki hayrân kalasın
Kudretini gör ki ibret alasın
- 4356.Şeh dahı kıldı heves Mısrı göre
Ol dahı bir şehre hem bünyâd ura
- 4357.K'anda dahı hem acâyib çog ola
Şöyle k'anuñ bigi dahı yog ola

BÜNYÂD-KERDEN-İ İSKENDER İSKENDERİYYE-RÂ

- 4358.Buldı ol sâhilde bir hurrem-behişt

Topragı müşğ ü suyu Kevser-sirişt

4359.Gül nesîminden hevâsı hûbı-rah
Az yir ol Mısrûñ diyârından irah

4360.Yapdı bir şehri anda pür-reng ü nigâr
Tâze vü hurrem çü bâğ-ı nev-bahâr

4361.Urdı usturlâb-ıla bünyâdını
Kod'anıñ İskenderiyye adını

4362.Yapdı ol şehriñ içinde bir menâr
K'aña beñzer görmemişdi rûzigâr

4363.Ol menâr üstinde düzdi nîg-rây
Câm kim dirler aña gîtî-nümây

4364.Yirde hayr u şer ne olsa mâh u sâl
Görinür ol câm içind'andan hayâl

4365.Her yañadın leşker olduhda revân
Olurıd'ol câmda aksi ayân

4366.Dahı mermerden şeh-i nîgû-hisâl
Düzdi bir timsâl and'âdem-misâl

4367.Çün müretteb oldı ol bî-rûh cism
Şeh menâr üstind'anı kıldı tılısm

4368.Nireden ol şehre düşmenitse azm
Kim anı feth itmeg-içün kıla rezm

4369.Ol yaña dönerdi ol sûret meger
İl ü şehre_olur-ıdı andan hazer

4370.Ne kadar gelse adû ferseng ü mîl
Bilinürd'andan ne sırdur bunı bil

4371.Bu tılısmı dahı eyl'itmişdi şâh
Kim hevâm olmazdı andan sâl u mâh

4372.Girmez-idi akreb ü hem mûr u mâr
Ne meges ne peşşe zî hurrem-diyâr

4373.Üşbu resm-ile düzetdi şâh-ı Rûm
Kendü-y-içün ol arada merzübûm

4374.Şehri yapdı kendü-y-içün şehriyâr
Kendü gitdi kaldı uş şehri ü diyâr

4375.Niçeler yapıdı serây oturmadı
Niçeler tohm ekdi vü götürmedi

4376.Girmesün şehrüme diyen mûr u mâr
Mûr u mâra oldı sinde târ u mâr

4377.Gâh şehrin mü'min alur geh fireng
Şehriyâruñ yiri işde gûr-ı teng

SEBEB-İ HARÂBÎ-İ MENÂRE-İ İSKENDERİYYE

4378.İşid imdi ol tılısmuñ hâlini
N'oldı ol u hem menâr ahvâlini

4379.Bunı anlar kim rivâyet itdiler
Bize bu resme hikâyet itdiler

4380.Çün Benî Abbâsuñ oldı ol diyâr
Hem hilâfet dutdı anlarda karâr

4381.Geldi magribden yañadın bir fireng
Taşı mü'min küfrle_ içi tolu jeng

4382.Zühd-ile kıldı riyâzet âşikâr
Şöyle oldı kamu halk aña şikâr

4383.Halk anı ehl-i imâmet sandılar
Sâhib-i zühd ü kerâmet sandılar

4384.Zâhirinde görmediler hiç ayb
Bâtını kim bile cüz' allâm-ı gayb

4385.Ol kadar islâmda kıldı direng
Kim halîfe hem-demi oldı fireng

4386.Oturur-iken halîfe-y-le_ol laîn
Bir gün eydür k'iy emîrü'l-mü'minîn

4387.Şâh İskendeer k'anuñdur bu cihân
Bu menâr altındadır genc-i nihân

4388.Ger elüñe gire ol pür-mâye genc
Leşkerüñ-ile saña yoh dahı renc

4389.Dutasın ol mâl-ıla bî-had sipâh
Olasın İrân-ıla Tûrân'a şâh

4390.Ger bu mâlı kim didüm sen bulasın
Ol Sikender bigi sultân olasın

- 4391.Dîn-i İslâm ala senden bûy u reng
Kılıcuñdan yog ola gebr ü fireng
- 4392.Mâlî anlar kim koyuban gitdiler
Bî-gümân kendülere hayf itdiler
- 4393.Sen olalar yimedügin yi vü yidür
K'ehl-i dâniş olanuñ işi budur
- 4394.Zer-durur her ukdeye müşkil-küşây
Mâl-durur kamu işe reh-nümây
- 4395.Mâl ni'metdür anı sarf idicek
Lîki mihnetdür koyuban gidicek
- 4396.Yiyicek dirlikde koyuban gidicek
Ölice kalsa azâb-ı gûr olur
- 4397.Başarıcah mâl-ıla çoh iş biter
Lîki başarmıyacak çoh baş yiter
- 4398.Çünki işitdi halîfe genc-i zer
Kıldı gencüñ hırsı cânına eser
- 4399.Ol menâr altında sandı genc var
Bilmedi kim anda derd ü renc var
- 4400.Niçeleri yüregın hûn eyledi
Niçelerün yüregın hûn eyledi
- 4401.Âdemîyi hırsdur güm-râh iden
Câh ehlinüñ yirini çâh iden
- 4402.Çün heves itdi hazîne çıhmaga
Kıldı fermân ol menârı yıhmaga
- 4403.Çün menârun rub'ı yihıldı temâm
Ol tılısm oldı harâb u sındı câm
- 4404.Nâ-gehân bir gıce kaçdı ol fireng
Şöyle kim yadan çıhar tîr-i hadeng
- 4405.Şöyle gitdi ol halâyıkdan nihân
Kim dahı andan belürmedi nişân
- 4406.Üşbu mekr-ile yihıldı ol tılısm
Şimdi andan bir sıfat kaldı vü ism
- 4407.Ne imâret var-ısa virân olur
Hâdise bünyâdı muhkemdür kalur

4408.Oldı virân ol ele girmedî genc
Fikrsüz işde netîce n'ola renc

4409.Renc olur râysuzlar hâsılı
Rây-ıl' olur hal her işüñ müşkili

FÎT-TEMSÎLÎ VE'L-MEV'İZETÎ

4410.Didügüm şehri ki yapıdı şehriyâr
Bu vücûduñ şehrine kıl i'tibâr

4411.Ol halîfe nefis-durur bî-gümân
Kim bu şehir ne hükmi ol ider hemân

4412.Câm kim dirler aña gitî-nümây
Göñlüñüñ gözgüsidür iy pâk-rây

4413.Akldur sûret ki cümle hayr u şer
Zâhir olur anda itdükde nazar

4414.Akreb ü peşşe ne-durur mûr u mâr
Nefsde evsâf-ı Şeytânî ki var

4415.Zînet-i dünyâdur ol fettân fireng
K' içi jeng ü taşıdur pür-tûy-reng

4416.Dileseñ ol şehri kim ma'mûr ola
Hem göñül câmı halelden dûr ola

4417.Sûreti akluñuñ âfet görmeye
Nefsüñe azl-i hilâfet irmeye

4418.Zînet-i dünyâyâ magrûr olmagıl
Aña uyup Teñrıdan dûr olmagıl

4419.Kim ziyânı çoğ u nef'i az-durur
Nefsi telbîs-ile yoldan azdurur

4420.Aña aldanma ki nâ-dânlıh olur
Âkıbet işüñ peşîmânlıh olur

4421.Çün görürsin bu cihânı kim gider
İ'timâduñı düriş andan gider

4422.Her ki dünyî sevdi râhat bulmadı
Dünyadan illâ cerâhet bulmadı

4423.Nesne k2aslı ânuñ âb u bâd ola
Dahı âteş anda ne bünyâd ola

4424.Üşbu dördi-durur asl-ı kâinât
Gökler âbâ vü bulardur ümmühât

4425.Ol ki bu ezdâddan terkîb ala
Bellüdür kim ne kadar bâkî ola

4426.Cem' olup bir arada bu dörd i yâr
İ'tidâl olduhda bulurlar karâr

4427.İ'tidâl ol dem k'aradan ola kem
Birbirinden ayrılurlar lâ-cirem

4428.Bâtıl olup bozılır terkîb-i ten
Muhkem ola sanma bu tertîbi sen

4429.Dörd zıd nice bulalar i'tidâl
K'itmeyeler birbirinden intikâl

4430.Bûy u renge garre olma kim cihân
Pîre-zendür gerçi rengidür cüvân

4431.Çohlaruñ akdindedür bu pîre-zen
Lîki dah'ebkârdan bil anı sen

4432.Ol er-idi aña ragbet kılmadı
Ol ki innîn idi dadın almadı

4433.Dünya-y-ıçun ne gerek bu hırs u âz
Dünya çoğı n'assı çün ömr ola az

4434.Çün koyuban gidilür bu mülk ü genc
Pes eyit kim ne gerekdür bunca renc

4435.Dünyayı ko ukba-y-ıçun it amel
Tâ ki tedbîründe olmaya halel

4436.Mülk oldur anuñ-ıçun eyle cehd
Tâ murâd-ıla mezakuñ tola şehd

4437.Mülk ol k'anda tezelzül olmaya
Devlet ol k'anda tebeddül olmaya

4438.Mülk midür ol ki anı nâ-gehân
Düşmene koyup gideler râyigân

HÂTİME-İ DÂSİTÂN BE-DU'Â

4439.AHMEDÎ'yi iy Kerîm-i Lâ-Yezâl
Dünyanuñ hırsına itme pâyimâl

- 4440.Anı sen ehl-i kanâ'at eylegil
Zikrũñi añã sanâ'at eylegil
- 4441.Hâtırından ıŖkıñı dũr itmegil
Göñlini dünyâya magrũr itmegil
- 4442.Kime ûmîd oldı-y-ısa mũlk ü mâl
Sensin ûmîdi anuñ yâ Zũl-Celâl
- 4443.Her ki umîdi saña togru kıla
Rahmetũñden hâŖa kim mahrũm ola

**DÂSİTÂN-I İSKENDER BÂ-KAYDÂFA MELİKE-İ MAGRİB VE
HİLE-İ Ū BÂ-KAYDÂFA**

- 4444.Bir mübârek gice kim kamr ay-ıdı
Anda ıyŖumuz yüzi hamrâ-y-ıdı
- 4445.Yâr olmuŖ-ıdı benümle hem-kadah
TolmuŖ-ıdı cânım u göñlüm ferah
- 4446.KalmıŖ-ıdum hatt u hâlinde anuñ
Mahv olmuŖdum cemâlinde anuñ
- 4447.Gamzesi ohı câna kâr itmiŖ-ıdı
Göñlümi zũlfi Ŗikâr itmiŖ-ıdı
- 4448.Gâh yüzinden gözüm alurdı nũr
Geh meŖâmum zũlfi müŖginden buhũr
- 4449.Gicemũñ kadri Berât olmuŖ-ıdı
Zũhre ıyŖumuza mât olmuŖ-ıdı
- 4450.Bir yanumdan Ŗaçar-iken mâhitâb
Bir yanumdan rũŖen olmuŖ âfitâb
- 4451.Tayyibũ'l-vakt itmiŖ-ıdı anı kadah
Baña anuñ yüzi virmiŖdi ferah
- 4452.Ben añã kılordum ol aya nazar
Ben sorardum andan ol aydan habar

SŪÂL EZ-HÂL MÂH VE BEDR VE HİLÂL

- 4453.Didi kim Ŗerh it bu ay niçũn müdâm
Gâh eksilür ü geh olur temâm
- 4454.Geh siper neyçũn olur u geh gũmân
Geh ayân neyçũn olur u geh nihân

CEVÂB

- 4455.Didüm iy zülfi iy zülfi benefşe yüzi gül
Belki ayuñ nûrı kendüden degül
- 4456.Nûrı anuñ kendüden olsa yakîn
Dâ'imâ bir vasfa ola-y-dı hemîn
- 4457.Nesne kim bi'z-zâtdur nice ola
Kim tagayyür irmek aña yol bula
- 4458.Nûrı günden kesb ider ol mâh u sâl
Lâ-cirem geh bedr olur geh hilâl
- 4459.Ne kadar kim günden ol olursa dür
Ol kadar artar anuñ cirminde nûr
- 4460.Ne kadar kim güneşe yahın gelür
Nûrı anuñ ol kadar eksük olur
- 4461.Mâh çünkim nûrını günden ala
Pes görinen anda gün nûrı ola
- 4462.Sûretâ ol nûr ayuñdur hemin
Lîki ma'nide günüñdür ol yakîn

DER-İSTİDLÂL BER-TEVHÎD-İ SÂNİ'

- 4463.Şöyle kim nûr aya güneşden gelür
Nûrı zâhir kendüsi bâtın olur
- 4464.Bu cihânuñ dahı varlığı ayân
Hakdan oldı vü kamudan ol nihân
- 4465.Cümle âlem andan almışdur vücûd
Kamusına ol kılupdur feyz-i cûd
- 4466.Pes bilindi k'Evvel Oldur Âhir Ol
Şöyle kim hem Bâtın Oldur Zâhir Ol
- 4467.Ger mü'essir gözden oldı-y-sa nihân
Bu eserlerden anı görgil ayân
- 4468.Bir işâret dahı eydeyim saña
Ger kulah dutar-ısañ bir dem baña
- 4469.Ay güne niçe kim yahın gelür
Varlığı günden gün'az az eksilür

- 4470.Güneş-ile ol ide çün ictimâ'
Varlığını kendünüñ ider vidâ'
- 4471.Eyle mahv ider orada kendüzin
Kim ne gice bulunur ne gündüzin
- 4472.Pes bilinür k'ol kişi Hakka ire
K'evvel ol varlığınıñ terkin ura
- 4473.Urmasa pervâne terk-i bâl ü per
Bulmaya-y-dı şem'a irmege zafer
- 4474.Kendünüñ bî-çâre çün terkin kılur
Lâ-cirem irmege nûra yol bulur
- 4475.Cism vîrân olsa cân ma'mûr olur
Şem2 çünkim oda yana nûr olur
- 4476.Bil ki senden gitmeyince bu sıfât
Rûşen olmaz saña hergiz keşf-i Zât
- 4477.Tâ ki kişi varlığını virmeye
Bir nefes mahbûbına ol irmeye
- 4478.Hüccet-i rûşen bu söze iy ulu
Len tenâlü'l-birre hattâ tünfikû
- 4479.Hak dir-iseñ mâ u menligi gider
Anı diyen kişi kendüyi n'ider
- 4480.Çünkü üşbu sözleri diñledi ol
Sırr-ı Tevhîdi temâm añladı ol
- 4481.Didi gerçi mestsin baña cevâb
Hoş didüñ "vallahü a'lem bi's-savâb"

SUÂL-İ EZ-UTÂRİD

- 4482.Üşbu sözi söyler-iken nâ-gehân
Oldı bir ferzâne Maşrıkdan ayân
- 4483.Söyler-idi bî-zübân u savt u dem
Yazar-ıdı bi-devât u bî-kalem
- 4484.Çünkü ol ferzâneyi gördi nigâr
Didi bu kim olur iy dâna-yı kâr

CEVÂB

- 4485.Didüm eflâkuñ dibîri bu-durur
Ol yidi Seyyâre biri bu-durur

SÜÂL EZ-ZÜHRE

4486. Bu söz içinde ol aradan girü
Çıhdı bir hâtun-ı pâk ü la'l-rû
4487. Bir elinde dutmuş-ıdı ol rebâb
Bir elinde lâle-gûn câm-ı şarâb
4488. Çünkü ol dil-ber aña kıldı nazar
Didi bu kimdür baña virgil habar

CEVÂB

4489. Didüm aña kim bu hâtûn Zühredür
Yidi encüm arasında şöhredür

SUÂL EZ-MERRÎH

4490. Çıhdı soñra bir saru hûn-hâr merd
Kim hemîşe işi kîn-durur neberd
4491. Gürzi zahmı taga tohınsa yahar
Kılıcı hem sahrayı oda yahar
4492. Çünkü görd'anı didi bu kim olur
Kim bu resme hışm u heybetle gelür
4493. Didüm ol rîz-ende-i hûn bu-durur
Pür-dil ü cellâd-ı gerdûn bu-durur

SUÂL EZ- MÜŞTERÎ

4494. Çıkd'anuñ ardınca bir dâna-yı kâr
Âlem-i gayb olmuş aña âşikâr
4495. Kamu hükmi adl-ile kılur-ıdı
Fikrsüz her nesneyi bilür-ıdı
4496. Çünkü gördi haceyi ol sim-ber
Didi bu kimdür bana virgil habar

CEVÂB

4497. Didüm oldur Sa'd-ı Ekber Müşterî
Cümle-i ehl-i saâdet serveri

SUAL EZ-ZÜHAL

4498.Çıkd'anuñ ardınca bir Hindû-yı pîr
Hendese ilminde gāyet bî-nazîr

4499.Hem hisâbında anuñ kevn-i fesâd
Hem nihâdında anuñ zulm ü inâd

4500.Çünkü gördi anı ol sîmîn-zekan
Didi bu kimdür eyitgil baña sen

CEVÂB

4501.Didüm aña kim Zühal budur yakîn
Kim yiri-durur sipihr-i heftümîn

4502.Didi daniş ehli hergiz ölmesün
Bu cihân birgün bularsuz olmasun

4503.Didüm aña k'ehl-i ilm ölmez yakîn
Fâniti kor bâkıye varur hemîn

4504.İlme düriş ilmdür Âb-ı Hayât
İlm-ile olur hal cümle müşkilât

4505.Câhil olan kûr u âlimdür basîr
Ol her işden bi-haber budur habîr

4506.İlm ehli zindedür câhil ölü
Kandasa dâna yşg câhil alu

4507.Cehl zulmet olur u bu ilm nûr
Nûra gir zulmetden it kendüñi dûr

4508.Pes didi bildüm seni iy dost ben
Kim bilürsin kamu fende nesne sen

4509.Söz çü bir nev' ol'irer andan melâl
Bir söze dahı gel eyle intikâl

4510.Didüm aña çohdur envâi sözüñ
Ne-durur sözden gereklüñüz sizüñ

4511.Didi ol kim düşmenine bula dest
Pes anı toprag-ıla itmeye pest

4512.Âkıbet anuñ ser-encâmı n'olur
Düşmeninden başına ne iş gelür

4513.Sendedür şerh-i mülûk basîtân
Fasl it bu bâbda bir dâsitân

- 4514.Tâ işidevüz ola ol bize pend
Olavuz sinüñ sözüñden sûd-mend
- 4515.Didüm ölmese ele girdükde mar
Şâyed ide ejdehâ_anı rûzigâr
- 4516.Almayan fırsatda düşmenden damar
Bislemişdür ceybinüñ içinde mâr
- 4517.Düşmene eylük mürüvvet olmaya
Akreb ogşamah fütüvvet olmaya
- 4518.Ol kişi kim düşmene fırsat bula
Pes mürüvvetden aña eylük kıla
- 4519.Gör'anı kim gördi Kaydâfa yakîn
Şâh Zülkarneyn'den itdükde kîn

MATLA-I DÂSİTÂN-I KAYDÂFE

- 4520.Var-ıdı Magribde bir hoş şehriyâr
Mülki bî-hadd ü çerisi bî-şümâr
- 4521.Lîki hâtun-ıdı Kaydâfa be-nâm
Hükmi altında anuñ magrib temâm
- 4522.Kâr-dân-ıdı vühem pâkîze-rây
Akl-ıla her müşkile ukde-küşây
- 4523.Akl ider cümle müşkil işi hal
Akl olmayanda çoh olur halel
- 4524.Akldur ma'lûl evvel illete
Akl kuvvettür ü zînet devlete
- 4525.Ol kişi kim aklı kemdür dûn olur
Her ne işde kim döne magbûn olur
- 4526.Göricek Kaydafa k'İskender müdâm
Kılıcı-y-la dutdı illeri temâm
- 4527.Şâh işinde fikr idüp kaldı aceb
Kıldı bir nakkâş kim agrib-zemîn
- 4528.Buldı bir nakkâş kim Magrib-zemîn
San'atından tolmiş-ıdı nakş Çîn
- 4529.İtmiş-idi ömrini ol işde sarf
Dutar-ıdı Mâni-yi Nakkâşa harf

- 4530.Aña Kaydâfa buyurdu kim vara
Nicedür İskenderüñ yüzün göre
- 4531.Nakş idüp vasfın u şekl ü hey'etin
Heykel ü resmin ü reng ü sûretin
- 4532.Mısrđan Magrib-zemîne irgüre
Tâ anı Kaydâfa nicedür göre
- 4533.Çünkü varup görd'anı Nakkâş-ı Çîn
Buldı cândan nâzügirek nakş için
- 4534.Didi kim zî devlete layık cemâl
Kim buña virmiş-durur ol Zül-Celâl
- 4535.Pes kalemle resm kılup yengini
Nakş kıldı şekl ü vaz' u rengini
- 4536.Çün Sikender sûretin kıldı nigâr
Vardı girü Magribe sûret-nigâr
- 4537.Sûrete Kaydâfa çün kıldı nazar
Kaldı hayrân düşdi cânına hatar
- 4538.Didi bunuñ Maşrık u magrib temâm
Oldı vü olasıdur hükmine râm
- 4539.Ger neheng ü şîr ger bebr ü peleng
Çengi künd ola bunuñla itse ceng
- 4540.İşid imd'ol sûretüñ hâli n'olur
Şâha vü Kaydâfa'y'andan ne gelür
- 4541.Mısrda birgün iđerken şah şâd
Kıldılar Kaydâfayı katında yâd
- 4542.Aldılar anuñ cemal ü hışmetin
Zikr itdiler kemal ü rütbetin
- 4543.Şâh anuñ vasfın çün işitdi temâm
Diledi k'ol dah'ola hükmine râm
- 4544.Pes aña bir ilçi saldı nâmever
İlçi-y-ile böyle virbidi haber
- 4545.Kim bize virbi harâc u mâl u bâc
Dileseñ kim saña kala taht-ı âc
- 4546.Şâh Zülkarneyn İskender benem
Hasm pamâl idici server benem

- 4547.Maşrık u magrib benümdür la-muhâl
Baña virbinmek gerekdür pâc u mâl
- 4548.Kılıcumdan seyl-i Tûfân toldı Hind
Hancerümden toptolu kan oldı Sind
- 4549.Şâh Dârâ dârını yahan benem
Fûr-ı Hindün ferrini yıhan benem
- 4550.Ger peleng ü şîr-i ner ger ejdehâ
Kılıcumdan olmadı olmaz rehâ
- 4551.Leşkerin cinnüñ benem k'itdüm helâk
Hem ben itdüm Ye'cûci hâk
- 4552.Âhir işitdün bunu kim mülk-i şark
Oldı binüm kılıcumdan kana gark
- 4553.Kûh-ı Kâfi gürzümüñ darbı yihar
Kulzümi kılıcumuñ odı yahar
- 4554.Her ki diler bahtı pâyende ola
Devlet ehline gerek bende ola
- 4555.İricek Kaydâfa'ya üşbu hitâb
Böyle virbidi şehinşâha cevâb
- 4556.K'iy cihan-dâr u şeh-i hurşîd-fer
Kim senüñdür şark u garb u bahr u ber
- 4557.Seyr idüp encüm döneli asümân
Görmedi sinüñ bigi sâhib-kırân
- 4558.Pâdişehsin ü felek bende saña
Şâhlar cümle ser-efgende saña
- 4559.Sen ki olduñ devlet-ile feylesûf
Bulmaduñ mı dünya haline vukûf
- 4560.Bilmedüñ mik'anda yoh-durur karâr
Geh azîz ider kişiyi gâh hâr
- 4561.Gah ider pest âdemîyi gâh bülend
Gâh dil-şâd ider ü geh müstemend
- 4562.Çün cihân tolu hatar oldı vü bîm
Aña teky'itmek hatâ-durur azîm
- 4563.Ne revâdur garre olmah dûr-bîn
Aña kim aldı Süleymândan nigin

- 4564.Mâl u genc-içün gerekmez bunca renc
Âkîbet çün ayruguñdur mâl u genc
- 4565.Düşmen öldüğine olma şâdumân
Sen dahı çün ayruguñdur mâl u genc
- 4566.Saltanat çün âkîbet zâyil olur
Biñ yıl-ısa dahı bî-hâsıl olur
- 4567.Fûrı sen m'öldürdüñ iy şâh-ı ecel
Fûrı öldüren ecel-durur ecel
- 4568.Bulmadı kimse ecelden hiç emân
Bulası dahı degüldür bî-gümân
- 4569.Fûr-ı Hindîyi Hak öldürdi yakîn
Arad'İskender bahânedür hemîn
- 4570.Nedür İskender Süleymân kim ola
Kim Hak emrinsüz elinden iş gele
- 4571.Ne revâdur saña iy sahib-nazar
Kim bu hikmetle olasın kej-nazar
- 4572.Ne revâdur pâdişeh olana lâf
Yâ bir iş tutmah kim ola ol güzâf
- 4573.Fûr senden kem degüldi lîki baht
Andan alup saña virdi tac u taht
- 4574.Girü ol tâcı vü tahtı bi-gümân
Senden alup ayruga virür cihân
- 4575.İtme tekve kılıca k'ol saht-rûy
Bî-vefâ-durur be-gâyet tünd-hûy
- 4576.İki yüzlüden taleb itme vefâ
İki sözlüden bulam dime safâ
- 4577.Şâh Mısrî kılıcın itdi-y-se tîz
Tîg-i Hindî ider anuñla sitîz
- 4578.Şeh gelür-ise giyüp pûlâd-ı Çîn
Toludur peykân-ıla magrib-zemîn
- 4579.Gerçi şeh pür-dildür ü pîrûz-ceng
Bizde dahı var-durur nâmûs u neng
- 4580.Kişi k'anda nâm u nâmûs olmaya
Ölüden kemdür egerçi ölmeye

- 4581.Serv bigi ser-firâz olmaz kem er
Ney bigi yüz yirde baglansa kemer
- 4582.Devletüñ tonunu ol kişi geyer
K'ola adı halk içinde gey er
- 4583.Fûrdan alınduđı-y-çun taht u tâc
Saña Kaydâfa neçün virsün harâc
- 4584.Behmen ü Kâvûs u şâh İsfendiyâr
Rüstem-i Destân u hem Sâm-ı Süvâr
- 4585.Pâdişeh Keyhüsrev ü Lühresb şâh
Behmen-i Şîr-efgen ü Güstâsb şâh
- 4586.Magribe kimse bulardan gelmedi
Kimse bu yirüñ harâcın almadı
- 4587.Şâha budur maslahat kim bu kelâm
Gelmeye dahi dilinden ve's-selâm
- 4588.Kendüzinden bizi bîzâr itmeye
Konşıyı_özinden dil-âzâr itmeye
- 4589.Düşmen olmah koñşıya âyin degül
Koñşıy'âzürd'iden ehl-i dîn degül
- 4590.Şâha ol-kıssa çün irdi bu cevâb
Kalmadı anda dahi ârâm u hâb
- 4591.Kıldı Kaydâfa sözi aña eser
Hak söz ac'olur eger ola şeker
- 4592.Yahdı şâhuñ yüregın gayret odı
Akl aña "en-nârü lâ el-âr" didi
- 4593.Ol ki anuñ gayreti yoh olmaz er
Bî-hamiyyet kişiden gelmez hüner
- 4594.Bir çeri düzdi Sikender bi-hisâb
Kılmaga Kaydâfanuñ mülkin harâb
- 4595.Cevşen-i pûlâd-ıla toldı zemîn
Kanda baksañ gürz ü tîg-idi hemîn
- 4596.Azmi magribden yaña_itdi râst şâh
Şâh-ıla bi-hadd cevşen var sipâh
- 4597.Toldı cümle güşeler âvâz-ı kûs
Oldı tozdan çarh yüzi âbnûs

- 4598.Var-ıdı şâhuñ yolında bir hisâr
Burcu bes yüce esâsı üstüvar
- 4599.Kulles'irişmiş Süreyyâya temâm
Handakı itmiş serâ ka'rın makâm
- 4600.Bir melik var-ıdı anda nâm-dâr
Adı Varka anuñ ol şehr ü diyâr
- 4601.Kızını Kaydâfe oğlu Kanderûş
Varkanuñ almışdı dut bu söze gûş
- 4602.Çünki ol şehre irişdi şehriyâr
Çevre alıban anı itdi hisâr
- 4603.Mancnîk u ra'd zahmı-y-ıla şâh
Burcu yihup şehre girdiler sipâh
- 4604.Bir kişiye k'adı-y-ıdı Şehr-gîr
Kanderûş ol şehrde oldı esîr
- 4605.Dimegil kim mihr ide baña sipihr
Mihr itmez kimseye bu mâh u mihr
- 4606.Bu felekden isteme emn ü emân
Çünki adı oldı çarh-ı âsümân
- 4607.Hatt-ı tersâ bigi kej-revdür felek
Tersden peyveste ters itmek gerek
- 4608.Tâli'in çarhuñ çü Sertân buldılar
Râst kej-revligin andan bildiler
- 4609.Kej olanuñ kej olur kamu işi
Râstlıh nice bulur andan kişi
- 4610.Tâli'ün sânsi bulındı Esed
Lâ-büd oldı âfet-i cân u cesed
- 4611.Zâlim ü hûn-hâr u hem hûn-rîz ü dûn
Kamular çengâline anuñ zebûn
- 4612.İtdi üçincide delâlet Sünbüle
K'anda biten kuryup tîz dökile
- 4613.Şöyle kim otlar ter ü tâze biter
Kuruyuban topraga düşüp yiter
- 4614.Çünki Mîzân oldı dördinci aña
Dime kim çoh nesne vire ol baña

- 4615.Çün terâzû ehli gâyet dîn olur
Kardaş olsa andan ol magbûn olur
- 4616.Virilen kim ol Terâzû-y-ıl'ola
Bellüdür andan kişi ne hazz ala
- 4617.Çün terazûda ola tussûc u cev
An'eşek ola iden cânın girev
- 4618.Virdügi tussûc u cevdür bî-gümân
Lîk'alur anuñ bahâsın nakd-i cân
- 4619.Dönelüm girü didüğümüz söze
Şerh idelüm kalanın dahı size
- 4620.Çün bular dutuldugını bildi şâh
Fikrle tevbîri böyle kıldı şâh
- 4621.Kim vezîr otura tahta şâh-vâr
Urınu başına tâc-ı zer-nigâr
- 4622.Pes getirüp Kanderûşu buyura
Bî-emân cellâda k'anı öldüre
- 4623.Pes gelüp nöker-sıfat şeh söyleye
Yalvarup aña şefâat eyleye
- 4624.Ol şefâatle anı âzâd ide
Göñlin ölüm gussasından şâd ide
- 4625.Cânına mâlına itmeye ziyân
Pes anı Kaydâfaya oğlu-y-ıla
- 4626.Şâhı dahı sûretâ ilçî kıla
Virbiye Kaydâfaya oğlu-y-ıla
- 4627.Kasdı bu k'anuñla ol mülke vara
Girecek yollarını anuñ göre
- 4628.Her ne kim şeh didi-se dutdı vezîr
Çünkü ol me'mûr-ıdı vü bu emîr
- 4629.Pes buyurdı şeh vezire k'otura
Ol gelince leşkere fermân süre
- 4630.Leşkere dahı didi şeh kim vezîr
Ben gelinc'olmah gerek size emîr
- 4631.Bini görince idüñ birlik temâm
İkilik itmeñ kim iş olmaya hâm

4632. Birlik eyleñ kim ikilik dîn degül
İkiligi terk idüñ k'âyin degül
4633. Dirlik anda isde kim birlik ola
İkilik olduhda ne dirlik ola
4634. Bu işi çün böyle tedbîr itdi şâh
Kanderûşu alup itdi azm-i râh
4635. Şeh geliben şehri aldugı haber
Kıldı-dı Kaydâfayı zîr ü zeber
4636. Dutmuş-ıdı yola dâyim çeşm ü gûş
Aglar-ıdı kanda diyü Kanderûş
4637. Na-gehân Kaydâfaya irdi haber
Kim gelür uş Kanderûş-ı nâm-ver
4638. Şâdilıhdan oldı yüzi lâle-reng,
Kanderûşa karşı vardı bî-direng
4639. Anuñ-ıla bî-kerân hayl ü haşem
Çetr-i sultânî vü hem kûs u alem
4640. Gördi Kaydâfa ki geldi Kanderûş
İtdi şefkatden yüregi kanı cûş
4641. Çünki Kaydâfa gelür gördi ayân
Kanderûş oldı piyâde ol zamân
4642. Baş koyup öpdı ayagını anuñ
İzzeti hem böyle gerek ananuñ
4643. Anaya hürmet iden devlet bulur
Cennet ana ayagı altınd'olur
4644. Sordı birbir ana oğlı hâlini
Dahı ol şehr ü diyâr ahvâlini
4645. Ser-güzeştin didi bir bir Kanderûş
Dutdı anuñ sözine Kaydâfa gûş
4646. Son söz'ol oldı ki şeh bî-ters-nâk
Bini itdürürdi cellâda helâk
4647. Lîki binümler gelen bu nev-cüvân
Baña îsî bigi cân itdi revân
4648. Şâhdan dileyüben aldı beni
Ölmiş-iken ol diri kıldı beni

- 4649.Çünkü Kaydâfa işitdi bu sözi
Agladı şöyle ki kan toldı gözi
- 4650.Pes didi minnet aña kim ol Ganî
Sag irgürdi girü baña seni
- 4651.Dönüp andan girü şehre girdiler
İlçiyi dahı ohıdup gördiler
- 4652.İlçiyeye Kaydâfa çün kıldı nazar
Gördi anda padişahlıktan eser
- 4653.Yazılı alnından devlet âyeti
Dikilü öñinde nusret râyeti
- 4654.Zâhir ü Bâtın kamu fazl u kemâl
Sûret ü Sîret kamu hüsn ü cemâl
- 4655.Didi kim ilçi bu resme olmaya
Kimseden bu nev'a ilçi gelmeye
- 4656.Pes didi bir kula k'ol Çînî harîr
K'anı nakş itmişdi ol nakkâş pîr
- 4657.Mahzen içinden anı bulup getir
Kim gümânım oldı k'ol sûret budur
- 4658.Çün getürdiler anı Kaydâfâ şâh
Bir aña bir ilçiyeye kıldı nigâh
- 4659.Bildi kim bu sûret anuñdur yakîn
Fark ara yirde bir cândur hemîn
- 4660.Didi k'İskender bu-durur bî-gümân
İlçi resmine gelüp-durur ayân
- 4661.Geldi bu vaz'-ıla kim ile gire
Mülkümüzüñ resm ü âyînin göre
- 4662.Yollar u der-bendin illerüñ bile
Pes aña lâyıık yarak neyse kıla
- 4663.Eyle fettân-durur üşbu hîle-ger
K'ider ins ü cinn mekrinden hazer
- 4664.Şîr-dildür bu velî dimne-füsûn
Belki biñ dimne elindedür zebûn
- 4665.Bu kamusın göñl' içinde dir nihân
Kimseye hergiz anı itmez ayân

- 4666.Pes did'ilçiye ki şâh-ı nîg-nâm
Ne buyurdu nicedür bize peyâm
- 4667.Didi şeh eydür ki ser-tâ-ser zemîn
Hükmüme binüm müsahhardur yakîn
- 4668.Taht-ı zer binüm-durur la'l-tac
Râst virsün baña Kaydâfa harâc
- 4669.Kim mukarrer ol'aña magrib-zemîn
Ol diyâra şâh ol ola hemin
- 4670.Yohsa bir leşker ile dem bî-şümâr
Komayam magribde deyyâr u diyâr
- 4671.Ol diyârûñ kimini oda yaham
Kimini suya viribenüñ yıham
- 4672.Çünki Kaydâfa bu söze tutdı gûş
Eyledi tende gazabdan kanı cûş
- 4673.Didi kim İSKENDERİ dîv-i gurûr
Aldayıban akldan eyledi dûr
- 4674.Fıkr kılmaz mı aceb kim hırs-ı mâl
Âkıbet kişiyi ider pâyimâl
- 4675.Renc-ile niçe ki direr genc ü zer
Dahı hırsın yinemez ol nâm-ver
- 4676.Kızıl altun hırsına olan rehîn
Kara toprah toyurur anı hemîn
- 4677.Öldise Dârâb u yâhud Fûr-ı Hind
Oldısa Tûrân anuñ yâ mülk-i Sind
- 4678.Bunca fahr kibr ne kılmah gerek
Bî-sebâta böyle ne kalmah gerek
- 4679.Leşkeri var-ısa anuñ bî-şümâr
Biz dahı Bahr-ı Muhîtüz bî-kenâr
- 4680.Diyüben bu sözi Kaydâfa aña
Virbidi anı vesâkından yaña
- 4681.Virbidi ardınc'anun ol nâm-ver
Şâhid ü şem' ü şarâb u hem şeker
- 4682.Hem zarîf ashâb u hem çeng ü rebâb
Dahı dürlü nukl ü ni'met bî-hisâb

- 4683.Ol gice ol nûş idüp câm-ı mey
Subh olunca gûş kıldı çeng ü ney
- 4684.Subh-dem çünn yandı ol rûşen-çirâg
Geldi tâvûs u perîşân oldu zâg
- 4685.Âlem-i zulmâni oldu tolu nûr
Cünbüşe geldi yirinden mûrg u mûr
- 4686.Düzdi ol ilçî-y-içün Kaydâfa şâh
Hâs devlet-hânesinde bezm-gâh
- 4687.Bir serâyı var-ıdı Firdevs nâm
Topragı müşg ü agacı ûd-ı hâm
- 4688.Biñ kenîzek hizmet-içün hûb-çihir
K'anlara hayrân olurdu mâh u mihr
- 4689.Yüz dahı mutrib kamu bülbül-nüvâ
Bâg-ı îşe her biri berg ü nevâ
- 4690.Hazır idüp kamusun Kaydâfa şâh
Düzdi oldem Huld bigi bezm-gâh
- 4691.Tahta oturup getürdi nâm-ver
İlçî-y-içün dahı bir kürsî-i zer
- 4692.Geldi ilçî vü oturdu şâd-kâm
İçdi Kaydâfa elinden tolu câm
- 4693.Câm-ı zerden içdi yâkût-ı revân
Nicesi yâkût kim kût-ı revân
- 4694.Çünki nûş eylediler birkaç kadah
Gitdi göñlinden gam u geldi ferah
- 4695.Yanın'alup ilçiyi Kaydâfa şâh
Didi kim togrı eyit iy nîg-hâh
- 4696.Kimsin ü aduñ nedür eyle beyân
İtme pinhân anı k'olmuşdur ayân
- 4697.Didi adum Kaytufân-durur i şâh
Çâkerem İskender'e vü nîg-hâh
- 4698.Didi sen hâşâ ki çâker olasın
Toğrı söylerseñ Sikender olasın
- 4699.Şâhsın aduñı çâker eyleme
Girçegin di sözi yalan söyleme

- 4700.Togrı söyle kim yalan erlik degül
Dirliđi yalancınun dirlik degül
- 4701.Râst günün tâzedür dâim yüzi
Nâ-kabûl olur yalancınun sözi
- 4702.Pâdişâhlıhdan yüzünde uş nişân
Âyet-i rûşen-durur olmaz nihân
- 4703.Didi İskender nice ilçi ola
Tâc u tahtını koyup bunda gele
- 4704.Didi Kaydâfa sözi çođ eyleme
Nesne k2işidilmez anı söyleme
- 4705.Göstereyim ben saña senden misâl
Kim dahı kalmaya inkâra mecâl
- 4706.Arz ideyim ben saña senden nişân
K'añlayasın kim seni bildüm ayân
- 4707.Pes getürdi anı kim Nakkâş-ı Çîn
Yazmış-ıd'anda Sikender sûretin
- 4708.Vird'eline didi kim key kıl nazar
Kim ola bu nakşun ıssı vir habar
- 4709.Bahdı gördi kendüzinden bir misâl
K'anda inkâr itmege yohdur mecâl
- 4710.Gördi düşmiş cânı düşmen dâmına
Lerze düşdi korhundan endâmına
- 4711.Oldı ol sâat peşimân işine
Dahı bî-fıkr iş idenün işi ne
- 4712.Her ki olmaz işe ikdâm eyleye
Kend'eliyle kendüye dâm eyleye
- 4713.Râysuz iş işleyen mezmûm olur
İş ki fıkr olmaya anda şum olur
- 4714.Şeh belâ dâmında olmışdı esîr
Kimseden yog-ıdı aña dest-gîr
- 4715.Lîki çün anda yog-ıd'aña ecel
Gelmedi ol vartada aña hâlel
- 4716.Pes didi Kaydâfa k'iy şâh-ı cihân
Gam yime kim saña benden yoh ziyân

- 4717.Bâde eyle nû tut göñlüñi şâd
Kıssasını gussanuñ hiç itme yâd
- 4718.Memleket sinüñ-durur u taht-ı âc
Uş ayaguña fidî zerrîne tâc
- 4719.Sana benden yoh-durur u taht-ı âc
Gam yime iy pâdişâh-ı nâm-ver
- 4720.Oglum elünde-y-di kıymaduñ âña
Ben dahı lâ-büd kıyamazam saña
- 4721.Çün senüñ ben eylügüñ gördüm yakîn
Ben dah'eylük eylerem saña hemîn
- 4722.Eylük işlemek kişiye key olur
Eylügi iş idene eylük gelür
- 4723.Liki cehd it sini kimse bilmesün
Saña nâ-geh mekr ü hîle kılmasun
- 4724.Şâh öñinde çoh gerekdür ihtiyât
K'arzûsıdur kamunuñ ol bisât
- 4725.Tahtı sensüz koma dahı bir nefes
Pâdişehsin dahı nesn'itme heves
- 4726.İlçilik nedür k'anı resm ideler
Her yire yil bigi herze gideler
- 4727.Şâh olana kaçan lâyık ola
K'ulu adın kendünüñ ilçi kıla
- 4728.Pes didi kim gel kasem yâd eylegil
Dostlıh binümle bünyâd eylegil
- 4729.Kim bizümle yagılıh kılmayasın
Mülküme leşker çeküp gelmeyesin
- 4730.Dostumı dost bilesin hemîn
Düşmenüne düşmen olasın yakîn
- 4731.İtmeyesin kasd mülk ü mâluma
Hem hasâret leşker ü a'mâlüme
- 4732.Üstüme gelmeyesin tezvîr-ile
Baña mekr itmeyesin tedbir-ile
- 4733.Çünki bu andı idesin yâd sen
Sini virbiyem yirüñe şâd ben

- 4734.Şah bu sözi işidüp oldı şâd
Şöyle kim didi kaseş eyledi yâd
- 4735.İşbu kamu sözleri aña nihân
Didi vü kimseye itmedi ayân
- 4736.Âşikâre söz bu kim bizden selâm
Vir Sikender şâha vü digil peyâm
- 4737.Kim cihân kamu senüñdür şark u garb
Hâşa kim biz idevüz sinüñle harb
- 4738.Mülk sinüñ taht u tâc u hân ü mân
Hânümân n'olur fidî yoluña cân
- 4739.Pes an'ilçi sûretinde göndürür
Şâha tuhfê diyü çoh nesne virür
- 4740.Virdi aña bir murassa' tâc-ı zer
Ucdan uca tolu pür-mâye güher
- 4741.Dahı bir zerrîne-taht-ı şâh-vâr
Tolu yâkût-ıla la'l-i âb-dâr
- 4742.Dahı çoh dünyâ-y-ıla dürr-i semîn
Şafalu çok nâfe tolu müşg-i Çîn
- 4743.Virdi bişyüz tahta dahı ûd-ı hâm
Elli ester bârı sîm ü zer temâm
- 4744.Biñ dahı at virdi kamu bâd-pây
Biñ dahı it kamusı zencîr-hây
- 4745.Cümlesini virdi ana vü nihân
Böyle pend itdi ki iy şâh-ı cihân
- 4746.Gice gündüz yûri hîç itme karâr
Kendü tahtuña irince zînhâr
- 4747.Kim ulu oglum benüm Taynûs şâh
Ser-keş ü câhil-durur hem kîne-hâh
- 4748.Fûr-ı Hindüñ kızın almışdum aña
Fûr olalı düşmen olmışdur saña
- 4749.Korkaram kim senden ol âgâh ola
Leşkeri-y-le yûriyüp yoluñ ala
- 4750.Nâ-geh andan irişe saña zarar
Başuña hem mâluña düşe hütâr

4751. Böyle idicek yakîndür k'ol amel
İdesidür ömrine anuñ halel
4752. Şah olana kasd iden budur ayân
K'olasıdur iki kevn içre ziyân
4753. Çünkü "es-sultânü zıllu'llâh" ola
Ömr'aña kasd idenüñ kûtâh ola
4754. Şâh mâlı aldı vü oldı revân
Geldi girü tahtına rûşen-revân
4755. Gel işit imdi ki zülkarneyn şâh
N'itdi ol mülke çün oldı kîne-hâh
4756. N'eyledi Kaydâfanuñ peymânını
Nice vîrân itdi hân ü mâhını
4757. Katı gayretlü-y-di Zülkarneyn şâh
Hem dahı cebbâr-ıdı vü kîne-hâh
4758. Diler-idi magrib ü maşrık bile
Cümle aña bende vü çâker ola
4759. Aña çünkim olmadı Kaydâfa râm
Kullığınd'anuñ bulunmadı temâm
4760. Gayret odı yahdı anuñ cânını
Tamarında huşk kıldı kanını
4761. Gayret odından eridi şâh-ı Rûm
Nitekim ocaga karşıu ola mûm
4762. Ahdi dahı muhkem itmiş-idi şâh
K'itmeye leşkerl'anuñ mülkin tebâh
4763. Varuban anuñ diyârın almaya
Aña karşıu dahı kılıc salmaya
4764. Fikri Kaydâfa-y-dı anuñ rûz u şeb
Aña bir hîlet kılur-ıdı taleb
4765. Soñra fikri buña irdi kim vara
Bahr-ı Rûmun sâhilin bir bir göre
4766. K'ola bir yol bulına anda kim vara
Oradan garba su-y-ıçun ide yol
4767. Tâ ki bahruñ suyn ayırup ala
Oradan Kaydâfa mülkine sala

- 4768.Bir mühendisdi Sikender kim cihân
Cev cev olmuşdı kıyâsından ayân
- 4769.Hem mesâhatda ana cirm-i zemîn
Ne kadardur cev cev olmuşdı yakîn
- 4770.Bir yiri bulup kıyâs itdi dürüst
Kim oradan ol su anda vara cüst
- 4771.Pes memâlikde ser-â-ser her ki var
Ol araya cem' itdi şehriyâr
- 4772.İRte gice dimedin pîr ü cüvân
Ol arada işlediler çoh zamân
- 4773.Bir zamân işleyecek oldu temâm
Ol ki İskender Bogazıdur be-nâm
- 4774.Çün gerekce yiri kazup deldiler
Ayırup deryâyı ana saldılar
- 4775.Rûm yüce Magrib alçahdur ayân
Lâ-cirem su ol yaña oldu revân
- 4776.Çün revân olmaga bula su mecâl
Olur anı girü döndürmek muhâl
- 4777.Bahrdan olup revân deryâ-yı âb
Eyledi Kaydâfanuñ milkin harâb
- 4778.Gark oldu cümle ol şehr ü diyâr
Fikr-ile gör meger k'itdi şehriyâr
HÂTİME-İ DÂSİTÂN VE MEVÂİZ
- 4779.Fursatında düşmene viren emân
Ola ol Kaydâfa bigi bî-gümân
- 4780.Gerçi kim Kaydâfa ulu şâh-ıdı
Akl'anuñ her nesneden âgâh-ıdı
- 4781.Oldı İskender işinde kûr u ker
Lâ-şek "İzcâel-kazâ amyi'l-basar"
- 4782.Çün bulasın düşmeniñe dest-res
Fursatı te'hîr itme bir nefes
- 4783.Bir nefes nedür dime kim rûzigâr
Bir nefesd'ider besî-nakş âşikâr
- 4784.Düşmenüñi bulıcah olma zaîf

Bulmadın kuvvet kayusun yi harîf

4785.Bü'l-acebdür mihr ser-keşdür sipihr
Gâh kîndür itdügi vü gâh mihr

4786.Düşmenüñyalvardugin işitmegil
Anuñ eyü sözi-le iş itmegil

4787.Saña şeker virse anı zehr bil
Lutf gösterürse anı kahr bil

4788.Kiçi görüp akreb esen sanmagıl
Yılana yumşah diyü el sunmagıl

4789.Dime düşmenden baña ayluk gelür
Sanma zehri cehd-ile tiryâk olur

4790.Dostlıh anuñla it k'ola kerîm
Cehd it olmasun saña hem-reh le'îm

4791.Kim le'îmüñ işi bî-bünyâd olur
Her ne işlerse kerîm ol dâd olur

4792.Câhile nesne_ola diyü itme cehd
Hîle-y-ile hanzalı kim ide şehd

4793.Râzuñı gizle ki düşmen bilmeye
Diler-iseñ k'ol saña el bulmaya

4794.İşüñi avretlere tarh itmegil
Hâlüñi oğlanlara şerh itmegil

4795.Kim olaruñ dîni aklı az-durur
Sehl nesne bunları tîz azdurur

4796.Fâsıkı yâr ola diyü itme cehd
Fâsık olan nicesi sahlaya ahd

4797.Ol ki Hâlık emrine itmez vefâ
Halk andan ne kadar bula safâ

4798.La'li n'ider nedür yâkût u dür
AHMEDÎ'nüñ sözi kulaguñdadur

4799.Sözleri öğüt-durur dinle anı
Didügi hikmet-durur añla anı

4800.Subh geldi bu söz olunca temâm
Oldı rûşen âlem ü gitdi zulâm

4801.Rahmet esnâsından ürdi subh dem
Zulmet-i şeb gitdi geldi subh-dem

4802.Gitdi yârum ben yana kaldum çü şem'
Ser-güzeştüm bu didüm dutduña sem'

DÂSİTÂN-I CÜSTEN-İ İSKENDER MİLKÎ DİGER-BÎRÛN-IHEFT-İKLÎM Kİ FETH KÜNED

4803.Söyle fırsat geçmesün iy andelfb
Kim saña söz oldı dünyâda nasîb

4804.Cûş-ıla her perdede itgil hurûş
K'ola birgün nâ-geh olasın hamûş

4805.Düşüp âlet sınımadın cehd eylegil
Ne eyü söz kim bilürsin söylegil

4806.Çün bilürsin böyle kalmaz rûzigâr
Söyle kim söz kala senden yâdigâr

4807.Var-iken fırsat sözi irişdür dile
Dahı fırsat girmeye tâ hod ele

4808.Tarfetü'l-aynuñ içinde rûzigâr
Gaybdan biñ nakş kılur âşikâr

4809.Mihr kıla dimegil saña sipihr
Kim bekâsuzdur sipihr ü mâh u mihr

4810.N'ide saña bu siyeh kâse cihân
K'anda ne hakk-ı nemek vardur ne nân

4811.Aña virilen gönül şâd olmadı
Gussadan bir lahza âzâd olmadı

4812.Cehd şöyle kıl var-ısa sende baht
K'iltetin Firdevs Gülzârına raht

4813.Çünkim ol-durur görecek mülk pes
Râhat isdeyen aña kıla heves

4814.Âlem-i rûh oldur u yenbû'-ı nûr
Hem na'îm ü revh ü reyhân u sürûr

4815.Gül yiridür mugaylân-gâh-ı hâk
Nice ârâm itsün anda rûh-ı pâk

- 4816.Mürg-ı cân kudsî-durur u ten kafes
Anda durmaga neçün itsün heves
- 4817.Bu kafesden dileseñ olup halâs
Kuds bağında idesin anı has
- 4818.Dâne-i hikmetle bisle anı sen
K'olmaya pâ-bend aña dâm-ı ten
- 4819.Kâni' ol Hak virdüğine bîş ü kem
Dünyâ-y-ıçun hâtıruña dutma gam
- 4820.Kim niçe kim arta mülk ü mâl u genc
Aña göre artar enduh-ıla renc
- 4821.Bu cihânuñ çün bekâsı oldı az
Ne gerekdür pes bu kamu hırs u âz
- 4822.Bî-bekâdur ömr çün durmaz gider
Mâl u mülki devşürüp kişi n'ider
- 4823.Kimseyi toyurmamışdur mâl u genc
Pes uyuban hırsuña çoh çekme renc
- 4824.Varına itgil kanâat iy refik
Yogına yirinme kim budur tarîk
- 4825.Kim cihân milkini tutan ser-te-ser
Toymadın kıldı cihândan hep güzer
- 4826.Bu söz üzre bir hikâyet eydeyim
Şöyle k'ışitdüm rivâyet ideyim
MATLA'-I DÂSİTÂN
- 4827.Şeh çü Kaydâfa işin itdi temâm
Heybetinden havfa düşdi hâs u âm
- 4828.Gördiler ne resme kılup mekr ü âl
Eyledi Kaydâfayı ol pâyimâl
- 4829.Nicesi tûfâna virdi tahtını
Nice giderdi başından bahtını
- 4830.Çün şecâatde_anı gâyet gördiler
Hîlede hem bî-nihâyet gördiler
- 4831.Cümle ser-keşler aña râm oldılar
Pâdişahlar kullığına geldiler
- 4832.Ne Habeş kaldı vü ne Magrib-zemîn

Ne Yemen kamu anuñ oldı hemîn

4833.Kalması Maşrıkdı Magribde mekân
K'and'anuñ fermânı olmadı revân

4834.Olmadı ol mülke kâni' himmeti
Dahı yücelmek diledi rütbeti

4835.Pes didi birgün vezîre tâc-ver
Kim gerek hükmümde âlem ser-te-ser

4836.Kılıc-ıla gerçi çoh mülk almışam
Dah'alam diyü hevesde kalmışam

4837.Dahı mülk almaga itmişem heves
Bu sebebden râhatum yoh bir nefes

4838.Hiç yir var m dahı key soruñuz
Kim ana fermânum irmez görüñüz

4839.K'anı dahı feth idem ben yakîn
Bu cihân cümle benüm ola hemîn

4840.Bu sözi şehden işidicek vezîr
Didi câvîd ol i şâh-ı mülk-gîr

4841.Tâcuñ itsün ser-firâz ol Kirdikâr
K'itdi bahtuñı cihânda pâyidâr

4842.Ömrüñüñ gül-zârı hergiz solmasun
Devletüñ bâğı tagayyür bulmasun

4843.Feth itdün rub'-ı meskûnı temâm
Halk cümle oldılar hükmüñe râm

4844.Dünyada ne şehir vardır ne diyâr
Kim senüñ olmadı ol iy şehriyâr

4845.Rub'ı meskûn yidi kişverdür yakîn
Hükmi külline sen idersin hemîn

4846.Cümle kabzuñda-durur iy şehriyâr
Toludur ucdan uca şehir ü diyâr

4847.Bu yidi iklimde kim ber-durur
Yidi dahı ulu deryâ var-durur

4848.Bahr-ı Hind ü Fâris ü deryâ-yı Rûm
Bahr-ı Cürcân Kulzüm iy dâna-yı Rûm

- 4849.Bahr-ı Okyânûs ki olupdur Muhît
Merkez bahr u hem girü aña ahar
- 4850.Bahr-ı Okyânûs ki olupdur Muhît
Merkez-i arza ki topahdur basit
- 4851.Bahr-ı Magrib ol-durur andan çihar
Kamu bahr u hem girü aña ahar
- 4852.Kamu sular mâdde andan alur
Hem kamu dönüp girü ana gelür
- 4853.Var-durur biñüçyüz altmış temâm
Hind Bahrında cezîre bî-keâm
- 4854.Rûm bahrında yüzaltmış dahı var
Cümle ma'mûr u tolu şehri diyâr
- 4855.Bu kamuda hükümün iy şâh-ı cihân
Tende cân hükmi big'olmuşdur revân
- 4856.Rub'-ı meskûn bu-durur k'aldun hemîn
Dahı var mı mülk bilmezem yakîn
- 4857.Çünkü tutdun yidi iklimi temâm
Bir iki gün hoş otur nüş eyle cân
- 4858.Yi yidür kesbün kim bu rûzigâr
Bî-vefâdur gâyet ü nâ-pâyidâr
- 4859.Ser-firâz olduğuna hiç olma şâd
Ser-nigûn düşmekligün eyle yâd
- 4860.Dime kim irdüm bugün eflâke ben
Çünkü yarın girisersin hâke sen
- 4861.Çün bugün devrân senündür şâd ol
Dünyadan kim çihar elden yâd ol
- 4862.Bülbülün yazın olursa yiri bâg
Çünkü kış ola tutar ol yiri zâg
- 4863.Gül bahâr olduhda şeker-handedür
Çün hazân irişe ser-efgendedür
- 4864.Ni'metün çoh şükr it çekme ta'ab
Eksügün yoh dahı nesn'itme talab
- 4865.Şeh didi kişide çün himmet ola
Gözine bu çoh didüğün az gele

4866.Çoh diyüben sayduguñ mülk-i zemîn
Kamusı bir nokta rub'ıdur hemîn

4867.Pes vezîr ana didi k'iy tâc-bahş
Bu saâdet k'oldı Hakdan sana bahş

4868.Bu-y-ıdı kim rub' aña maksûmdur
Her birisi bir hatt-ı mevhûmdur

4869.Dahı yir var mı taleb kılmah gerek
Rûzi oldı-y-sa varup almah gerek

4870.Dahı çoh-durur Hakuñ mülki yakîn
Sanma kim zabt itdüğüñ-durur hemîn

4871.Pes vezîr aña didi iy tâc-bahş
Bu saâdet k'oldı Hakdan saña bahş

4872.Senden öñdin kimseye olmuş degül
Kimsene bu mansıbı bulmuş degül

4873.Vaktıdur kim şükr-i ni'met kılasın
Mün'imi ol ni'met-ile bilesin

4874.Ni'meti-y-çün kılasın Hakka senâ
Ni'metüñ arta an'itdükce edâ

4875.Genc-içün çekdüñ cihânda bunca renc
Yi yidür imdi k'elüñe girdi genc

4876.Hâr tutup virmegil ömri yile
Degme gez girmez azîz olan ele

4877.Bu cihânuñ cümle câh u hışmeti
Çün geçer bir habbe degmez kıymeti

4878.Dahı dünyî isteyü çekme ta'ab
Bî-bekâyi âkıl itmeye talab

4879.Şeh didi çün kişiye yüz duta baht
Kürsi-yi çarhı gerek kim ide taht

4880.Kâni' olan âza dîn-himmet ola
Himmeti yoh âdemîden ne gele

4881.Aza bî-himmet kanâat eyleye
Aczi kendüye sanâat eyleye

4882.Kişide çün ola himmetden eser
Ulu iş aña görünür muhtasar

- 4883.Dil il'ider űkrini Hakuñ avâm
Ben dil ü cân-ıla iderem müdâm
- 4884.Dil-ile űkrini anuñ söylemek
Ni'metinedür mükâfât eylemek
- 4885.Ni'metine çünki yohdur hiç had
Dil-ile űkre nice bulına ad
- 4886.Ben ki cân-ıla_anda-durur gözlerüm
Ni'mete bakmazam anı gözlerüm
- 4887.űkr ehli olayım diseñ yakîn
Ni'meti ko mün'imi gözle hemîn
- 4888.Çün vezîrûñ sözün itmedi kabûl
Aña görindi kamu fazl u fuzûl
- 4889.Ne nasîhat kim didi işitmedi
Hiç anuñ sözi-y-ile iş itmedi
- 4890.Kişi kim âza uyup yoldan aza
Gerçi çoh nesne bula sayar aza
- 4891.Pes buyurdu kim düzeler bir gemi
K'olmaya anuñ gereklüden kemi
- 4892.Çün gemiyi düzdiler űâh-ı cihân
Aña bir mellâh buldu kâr-dân
- 4893.Kim bilürdi hendese-y-le kılsa farz
Bahr u ber mîkdârı nedür tûl u arz
- 4894.Dahı her milletden itdi ihtiyâr
İki dânende kişiyi űehriyâr
- 4895.Kim her işüñ hayr u űerrin bileler
Fikr-ile her müşkili hal kılalar
- 4896.Dürlü ni'metden kişi ne kılsa yâd
İki yıllıh virdi űeh anlara zâd
- 4897.Tâ ki bir ıl bahr içinde gideler
Dahı yir var mı tefahhus ideler
- 4898.Dahı bir yıl dönderüben bâd-bân
İdeler keştîyi bu yaña revân
- 4899.Her ne kim gördiler-ise hayr u űer
Ucdan uca vireler űâha haber

- 4900.Söz öküş çünkim Muhîte girdiler
Bir yıl ol suda gemiyi sürdiler
- 4901.Bahr-ıdı her yaña oldılar revân
Bulmadılar berden hergiz nişân
- 4902.Dilediler girü avdet ideler
Pes gelüp ahvâli şâha eydeler
- 4903.Bir gemi görind' irahdan nâ-gehân
Dönderüp bunlara karşı bâdıbân
- 4904.Bu yañadın bir gemiyi sürdiler
Ugraşiban birbirini gördiler
- 4905.Ne bular añladı dilin anlaruñ
Ne hod anlar bildi sözin bunlaruñ
- 4906.Var-ıd' İskender gemisinde ayân
Yitmiş iki dil-içün üç tercümân
- 4907.Yitmiş iki dilden ayru dahı dil
Söyler-idi_ anlar ne kudretdür bu bil
- 4908.Bilmedi anlar bularuñ hâli ne
Hem bular dah' anlaruñ ahvâli ne
- 4909.Remz-ile âkılları söylediler
Birbiri-y-le böyle rây eylediler
- 4910.Kim gele bir kiş' olardan bunlara
Bir dahı vara bulardan anlara
- 4911.Kim bu varup ögrene nutk u beyân
Pes kıla bu cânibüñ hâlin ayân
- 4912.Ol dahı bunda geliben dil bile
Ol yanaruñ hâli ne şerhin kıla
- 4913.Birbirine oldı ol iki bedel
Oldı ol müşkilleri rây-ıla hal
- 4914.Bir gemi ol yaña sürüp bâ-bân
Birisi bu cânibe oldı revân
- 4915.Pes yañılıban şâh virdiler haber
Her ne kim gördiler-ise hayr u şer
- 4916.Ol geminüñ hâlini söylediler
Ol kişiyi şâha arz eylediler

4917. Kiři bir müddet tutıbanuñ makâm
Bildı Yûnânîlerüñ dilin temâm
4918. Çünki dil öğrendi anı nâm-ver
Okıyıban Kıtına sordı haber
4919. K'eydeler řâha kankı kiřverden gelür
Anlaruñ iline fermân kim kılur
4920. Böyle virdi ol kiři řâha haber
K'ol yañada dahı var bir tâc-ver
4921. Aña dahı dirler İskender be-nâm
Şekl ü vaz'ı hem saña benzer temâm
4922. Yidi kiřver dahı vardur ol yaña
Yidisi dahı müsahhar eyledi
4923. Çün kamusun ol müsahhar eyledi
Dahı artuh pâdiřahlıh diledi
4924. Kalmamıřdı ol yaña hergiz mekân
K'olmamıřdı anda_ anuñ hükmi revân
4925. Pes iki yıllıh bizüm-çün zâd u âb
Bir gemide kodı idüben hisâb
4926. Tâ gezüp bir yıl tefahhus kılavuz
Dahı kiřver varsa anı bulavuz
4927. Pes oradan dönderiben bâd-bân
Girü mülkümüze olavuz revân
4928. Pes varıban virevüz řâha haber
Ser-te-ser her ne ki gördük huřk ü ter
4929. Bir yıl olduh bahr içinde biz revân
Berrden hergiz bulamaduh niřân
4930. Çün dönecek vaktümüz oldı temâm
Bu gemiye uğraduh iy nîg-nâm
4931. Ol gemiden uř gelüp virdüm haber
Kıssamız budur ki didüm ser-te-ser
4932. Bu haberden çünki âgâh oldı řâh
Kaluban hayrân didi kim iy İlâh
4933. Pâdiřahlıh saña yarařur hemîn
K'âferîniř cümle sinündür yakîn

- 4934.Mülküñe yohdur senün hergiz kerân
İzzetüñüñ haddine irmez gümân
- 4935.Pâdişah sensin ki sana hergiz kerân
Hükm ü kudret sinüñ izz ü celâl
- 4936.Senden artuh ger Sikender ger Kubâd
Hâkdur tozıdur anı yirde bâd
- 4937.Bildi şeh kim uludur ol kârıgâh
Vehm irişür degül ol bârıgâh
- 4938.Kısmetinden taşra nesn'iden taleb
Kendüye bî-fâyide ider ta'ab
- 4939.Varına râzı gerekdür her kişi
Kim terâzû-y-ıladur âlem işi
- 4940.Zerre zerre yir ü gökde her ne var
Kamu Hakk ilminde-durur âşikâr

DER-MEVÂİZ VE TAHRİS BER-İKTİSÂB-I FEZÂYİL

- 4941.Herbirine ne gerekdür ol bilür
Hakka nice dilese kısmet kılur
- 4942.Âferînişde ne kim var az u çoh
Kamu anun nesne andan ayru yoh
- 4943.Kişiye her nesne kim rûzî ola
İsdemezse dahı hem girü ala
- 4944.Rûzi olmayan ele girmez yakîn
Cehd bir bî-nef' zahmetdür hemîn
- 4945.Dünyanuñ mihrine olma mübtelâ
Olur ol soñra sana renc ü belâ
- 4946.Çün eyü yavuz cihân durmaz gider
Cehd it mihrini gönülünden gider
- 4947.Cehd-il'irdüñ dut Sikender yirine
N'assı çün gitdükde gönülün yirine
- 4948.Zinetine dünyanun itm'iltifât
Çün bilürsin k'anda yoh hergiz sebât
- 4949.Munkatı' ol dünya ehlinden temâm
K'evliyâullâhdan olasin imâm

4950. Her ki dilerse ki Allâh'a ire
Ana irenlere otura tura
4951. Her kim eyülele ola hem-nişîn
Ol dah'anlaruñ bigi olur yakîn
4952. Katre deryaya irer deryâ olur
Hem sadefde lû'lü-yi lâlâ olur
4953. Güneşe irdükde şeb-nem nûr olur
Topraguñ âlâyışinden dûr olur
4954. Şem' niçe kim fidâ-yı nâr ola
Zulmeti gidüp kamu envâr ola
4955. Lokma k'anı âdemî yir kan olur
Belki dirlih bulubanuñ cân olur
4956. Taşa güneş nûrı-çun kılur nazar
Sürme düzüp an'ider nûr-ı basar
4957. Karga çün insân-ıla bir yıl kalur
Âdemi bigi lisân ehli olur
4958. Topraga encümden olduhda nazar
La'l ü yâkût olur u dürr ü güher
4959. Sen dahı cehd idüp eyle kıl heves
K'olasın ehlu'llâh-ile hem-nefes
4960. Çü-n olaruñ-ıla hem-dem olasın
Ol safâyı k'anlaruñdur bulasın
4961. Gil ki birkaç gün gül-ile yâr olur
Sohbetinde gör ne hoş sîret bulur
4962. İt kim oldı _ehlullah ile hem-nişîn
Âdemînüñ sîretin tutdı yakîn
4963. Olma uyup şehvete hayvân-sıfat
Ol riyâzetle melâik-ma'rifet
4964. K'iresin bir yire k'anda yoh fenâ
Olmaz anda olana hergiz anâ
4965. Ol felekde _olan güne yohdur zevâl
Andağı yılduzlara irmez vebâl
4966. Hırsı terk it kim yavuz hasletdür ol
Yoga yirinme varına kâni' ol

- 4967.Mâlikj olmah cümle âlem gencine
Togrı fikr itdükde degmez rencine
- 4968.Çünki durmaz gider elden mâl u genc
Ne gerekdür pes anuñ-çun bunca renc
- 4969.Çün Sikender kıldı yid'iklîmi râm
Yirde her ne genc var dirdi temâm
- 4970.Ârzû eyledi dahı mâl u genc
Mâl u genci gör nic'olur mâr u renc
- 4971.Renc çoh çekdi vü râhat görmedi
Genc çoh dirdi tena''um sürmedi
- 4972.Cehd-ile yaptı İrem Bâgını Âd
Bir dem anda oturup olmadı şâd
- 4973.Çün cihân mülkine Dahhâk oldu şah
Mârlar günini itdiler siyâh
- 4974.Dime Cimşide cihânı virdiler
Anı gör k'erre-y-le iki yardılar
- 4975.Çün Süleymân yiryüzin tutdı temâm
Dîv oldu yıl-ile hükmime râm
- 4976.Hâtemin alup elinden dîv ele
Tahtını gör nice virdiler yile
- 4977.Çün yakîn bildüñ ki hâyindür sipihr
Mihr itmez kimseneye mâh u mir
- 4978.Aldanup rengine meftûn olmagıl
İnanup mehdine magbûn olmagıl
- 4979.Yüz aña dutgıl ki feyz itdükde cûd
Buldı her mevcûdsun'ından vücûd

DER-İSTİDLÂL BE-TEVHÎD VE TEMSÎL

- 4980.Bahr-ı A'zamdan ki deryâlar çıhar
Girü dönüp hem aña girü ahar
- 4981.Hem bulıtlar mâddeyi andan alur
Rûd u çeşme hem vücûd andan bulur
- 4982.Hem dönüben ol girü bahra gider
Kendüzini varup anda mahv ider

4983. Bil k' işâretdür ki bu kevn ü mekân
Kamu Hakdandır Hak'a varur ayân
4984. Pes gerek varduğuñ aña bilesin
Hem aña lâıyk yarađuñ kılasın
4985. Bahr ki aña şeh gemi saldı ayân
Ma'rifet deryâsı-durur bî-gümân
4986. Anuñ içinde acâib çoh-durur
Lîk'anuñ hergiz kerânı yoh-durur
4987. Üşbu deryâya Resûlullâh yakîn
Bir gemicidür be-gâyet dūr-bîn
4988. Kamu dilleri bilen üç tercümân
Akl u ilm ü fikrdür bilgil ayân
4989. Bu kerânsuz bahr keştîsi hemîn
Mustafânun şer'idür bilgil yakîn
4990. Ma'rifet deryâsı bî-pâyân olur
Anda fikr ü akl ser-gerdân olur
4991. Yidi deryâ anda müstagra-k-durur
Akl-ı Kül dah'anda bir zevrak-durur
4992. Dileseñ bu bahr nedür bilesin
Evvel ol keştîyi hâsıl kılasın
4993. Çünkü hâsıl ola ol keştî saña
İrişesin maksad u maksûduña
4994. Mevc-ile girdâba gark olmayasın
Hem dahı hayrân olup kalmayasın
4995. Olmasun diseñ bu deryâda hatar
lengerin cîmüñ ara yirden gider
4996. kim inâyetden esüp bâd-ı nesîm
irmesün maksûda bî-teşvîş ü bîm
4997. Şöyle cehd eyle ki tâ kable'l-memât
Bulasın kayd-ı Heyûlîden necât
4998. Tab' dâmından kalıbanuñ halâs
Olasın Kuds ehlinüñ katında hâs
4999. Olmasun dir-iseñ işüñde hâlel
AHMEDİ'nün sözi-le eyle amel

5000.Kim bugün sözini bildüñ delîl
Varduñ-ısa yolını bulduñ sebîl

5001.Añladunsa sözini bildüñ delîl
Varduñ-ısa yolını bulduñ sebîl

DER-HÂTİME-İ DÂSİTÂN VE MÜNÂCÂT

5002.İy ki her muztarra itdükde du'â
Hâcetini bilüp idersin revâ

5003.V'iy kamu bî-çâreye çâre kılan
V'iy kamu sırruñ nedür sırrın bilen

5004.Cünbişin mûruñ karanuda gören
Peşşenüñ göñlinde râzına iren

5005.Zâhir ü Bâtın beni lutfuñla sen
Tâhir eylegil be-küllî aybdan

5006.Her sıfatdan kim degül lâyıık saña
Pâklik bağışlagıl Yâ-Rab baña

5007.Işkuñ-ıla cânımı ma'mûr kıl
Ma'rifetle göñlümi pür-nûr kıl

5008.Koma bende mâ u menlikden eser
Senden artuh bende ne varsa gider

5009.Göñlüme dünyâyı mergûb itmegil
Gayruñı cânuma mahbûb itmegil

5010.Şöyle lutf it yâ İlâhe'l-âlemîn
K'ide rûşen göñlümi nûr-ı yakîn

SÜAL-İ İSKENDER EZ-AHVÂL-İ MÜLÛKÎ Kİ NİŞ EZ-Û BÛDEND VE BA'D-EZ VE BA-ŞEND

5011.Söylegil iy tûti-yi şîrîn-kelâm
K'oldı sözüñ zevkine şekker gulâm

5012.Geh hakâyık sırrını keşf eylegil
Geh ma'âniden dekâyık söylegil

5013.Çünki sözüñ sûz-ıla gelür dile
Ûd-veş ider eser cân u dile

5014.Sûzdur ûdı ki düzer hoş-nefes
Söz ider ney savtına cânı heves

- 5015.Çünkü oldı hâtıruñ deryâ-yı dür
Dünyî mâlından tama' nat'ını dür
- 5016.Hikmete cehd it ki ol-durur çerâg
Terk it dünyâyı dilerseñ ferâg
- 5017.Mâr-durur mâl terk eyle anı
Yohsa yudar ejdehâ olup seni
- 5018.Koma kim tagıda anı hâdisе
Yi yidür billâh kom'anı vârise
- 5019.Çekme zahmet mâl-ıçun kim mâl u genc
Âhıretdedür belâ dünyâda renc
- 5020.Pîr-zendür dünya yigit sanmagıl
Zehrdür zinhâr aña el sunmagıl
- 5021.Dünyayı ko kim degül ol pâyidâr
Ukbiy'isde k'ol-durur Dâru'l-karâr
- 5022.Lezzet ü hem rûh u reyhân andadur
Zevk u şevk u revh u Rıdvân andadur
- 5023.Toludur ol mülk ucdan uca nûr
Râhat-ı dil anda vü iş ü sürûr
- 5024.İrmez ol dâruñ finâsına fenâ
Fakrdan yohdur gınâsına anâ
- 5025.Ne tebeddül vardur anda ne zevâl
Ne tagayyür vardur anda n'intikâl
- 5026.Mülk oldur aña it itseñ heves
Nice pâ-bend ola saña bu kafes
- 5027.Bu kafesden ger sen âzâd olasın
Kuds bâgına varup şâd olasın
- 5028.Nesine kalduñ bu vîrân menzilüñ
Ne bekâs'ola didüñ âb u gilüñ
- 5029.Dut ki server olup alduñ genc ü mâl
N'assı çün âhir olursın pâyimâl
- 5030.Dut ki dutup mülki sultân olasın
Nef' ne yatup çü nâlân olasın

- 5031.Saltanatda kiři ger Sencer ola
N'assı bir endâmi çün sancar ola
- 5032.Çetri sancar Sencer'e n'oldı hâlel
Çünki sancar old'anı rumh-ı ecel
- 5033.Nef' ne kiři Kader-hân itmek ad
Çün kader hânlıkdan ider anı yâd
- 5034.N'assı sîm ü zer dirüp olmah Temür
Çün ecel zahmına mûm olur demür
- 5035.Ol melik adını urgıl Tohtamış
Kim ecel zahmına ola tohtamış
- 5036.Fâyide ne ad urınmah Hân Murâd
Çünki dünyâdan gidilür bî-murâd
- 5037.Devlete inanma k'ol nâ-pâyidâr
Çok meliklerden kalupdur yâdigâr
- 5038.İdeyim bir dâsitân saña beyân
Kim bilesin dünyanuñ işin ayân

MATLA'-I DÂSİTÂN

- 5039.Çün Sikender şâhuñ oldı şark u garb
Kimse kalmadı k'ide anuñla harb
- 5040.Tahta oturup başına urdı tâc
Her yañadın Mısr'a çekdürdi harâc
- 5041.Mülki hâli gördi düşmenden temâm
Çeng ü ney isdedi vü sâkî vü câm
- 5042.Varmayınca hasm ecel câmı-y-la hûş
Sâgar-ı mey ola dime saña nûş
- 5043.Kiři ol vaktin gerek nûş ide câm
Kim ola hasm u kala ol şâd-kâm
- 5044.Bâdeden ol demde ola kiři şâd
Kim tozıda düşmenin kahrı-y-la bâd
- 5045.Hasma sunmayınc'e cel sâkîs'ayah
Ne el âsûde gerekdür ne ayah
- 5046.Var-iken Dahhâk içse Cem kadah
Câm-ı meyden bula mı cânı ferah

- 5047.Otururken tâc-ıla Efrîdûn u Key
Gaflet-ile içe mi Dahhâk mey
- 5048.Dünyada diri olduğınca Selm ü Tûr
Ne gerekdi İrac'a selm ü sürûr
- 5049.Ne gerekdi Yûsuf'a sevdâ-yı bâğ
Var-iken nkardaşları Ken'ânda sag
- 5050.Kardaşuñ düşmenligi yavuz olur
Kardaşuñ mekri-y-le kardaş tîz ölür
- 5051.El-ekârib ke'l-akârib amm ü âh
Bu biri gamdur u olbirisi laḥ
- 5052.Amm ü ah hâlin çü böyle bilesin
Ayruga bârî ne tekye kılasın
- 5053.Sende bulunur saña bulınsa hayr
Bellüdür saña ne hayr eyleye gayr
- 5054.Çünkü did' "el-ebbü Rabb"Dânâ-yı kâr
İ'timâd itme dahıya zînhâr
- 5055.Şâh Ârestû-y-la birgün şâd-kâm
Taht üzre oturur elinde câm
- 5056.Didi Ârestû'ya k'iy dâna-yı kâr
Kim saña her râz olupdur âşikâr
- 5057.Bu kırânâtuñ k'olur gökde ayân
Baña ahvâlini eylegil beyân
- 5058.Kankısından fitne kopup âşikâr
Dahı dürlü hâle döner rûzigâr
- 5059.Çün Arestû şeh sözün bildi temâm
Didi kim işit cevâb iy nîg-nâm
- 5060.Çün yigirmi yıl ider devr âsümân
Müşterî-y-ile Zühâl ider kırân
- 5061.Ol kırân te'sîri-y-ile rûzigâr
Dönüben bir fitne olur âşikâr
- 5062.Bu oniki burcdan añlar ayân
Herbirinde çün ideler bir kırân
- 5063.K'ol ikiyüzkırh yıl içinde olur
Bir kişi sâhib-kırân olup gelür

- 5064.Nireye yürise alur mülkü şeh
Kahramânları kılur kılıcı kahr
- 5065.Eski devletlere irer inkılâb
Fitne yüzinden götürilür nikâb
- 5066.Dört kez olsa ol bürûc üzre kırân
Kim tokuzyüz yıldur u altmış ayân
- 5067.Dünyada bir vâkı'a kopar azîm
K'olur andan ucdan uca ters ü bîm
- 5068.Âlemün işi kamu tagyr olur
Dahı dürlü resm-ile tedbîr olur
- 5069.Nesh ü edyân u şerâyi' and'olur
Hem dahı dürlü vakâyi' and'olur
- 5070.Bunı andan işidüp şâh-ı cihân
Döndi girü didi kim iy kâr-dân
- 5071.Ol zamândan k'Âdem-idi hâk-i tîn
Şimdiye dek noldı bilürsin yakîn
- 5072.Kim okumuşsın İlâhî Suhfi sen
Kim tolu ahbârdur ol gaybdan
- 5073.Sendedür İdrîs itdügi hisâb
Dahı hem Câmâsb düzdügi kitâb
- 5074.Dâniyâluñ hem kitâbı sendedür
Kim nekim geldi geliser andadur
- 5075.Dahı tesyîr-ile ahkâm-ı kırân
Hâtıruñda gün big'olmuşdur ayân
- 5076.Şerh it kim benden öñdin bunca şâh
Geldi gitdi dünyaya iy nîg-hâh
- 5077.Herbiri n'itdi cihânda söylegil
Nice gelüp gitdi takrîr eylegil
- PÂDİŞÂHÎ KEYÛMERS Kİ EVVEL-İ MÛLÛK BÛD**
- 5078.Didi şâha ol hakîm-i nîg-hâh
Kim Keyûmers oldı evvel pâdişâh
- 5079.Âdemün oğlıdur ol budur sahîh
Gerçi var-durur hilâf anda sarîh
- 5080.Ba'zı anı böyle iderler sıfât

Kim bitüpdür eyle kim yirden nebât

- 5081.Bitdi yirden beñzeyü yebrûha ol
Bir zamândan kâbil oldı rûha ol
- 5082.Buldu dirlik rûh-ı hayvânî-y-ile
Oldı kâmil nefs-i insânî-y-ile
- 5083.Ba'zı eydürler bu Âdem gelmedin
Yiryüzinde nesli zâhir olmadın
- 5084.Ol bir ulu tagda çün olur-ıdı
Anda Hakkuñ tâatin kılur-ıdı
- 5085.Kim bu insândan ilerü Kirdikâr
Bir dah'insân itmiş-idi âşikâr
- 5086.Lîki Tûfândan helâk olmuş-ıdı
Yiryüzi_ anlardan tehî kalmış-ıdı
- 5087.Tagda bir gâr içre olmuşdı nihân
Ol Keyûmers olmadın Tûfân ayân
- 5088.Anda tâat kılur-ıdı rûz u şeb
Hâlıkuñ Rıdvânın iderdi taleb
- 5089.Çünki soñra oldı bu Âdem ayân
Ol bulara geld'ulaşdı nâ-gehân
- 5090.Çün her işi bilür-idi ol nîg-rây
Geldi vü oldı bulara kedhüdây
- 5091.Her iş'itdi bunları âgâh ol
Âkıbet oldı bulara şâh ol
- 5092.Çün Keyûmers oldı halka kedhüdây
Cümle halk itdiler anı reh-nümây
- 5093.Lutfi-la halka imâret eyledi
Adli-le mülki 'imâret eyledi
- 5094.İtdi halka ilm-i tevhîdi beyân
Hem nübüvvet hâlini kıldı ayân
- 5095.Didi kim çün göstere mu'ciz Resûl
Vâcib olur hükmini kılmah kabûl
- 5096.Dahı haşr u neşrden söyledi ol
Âhret hâlin beyân eyledi ol

5097.Hükmi oldu dünyada otuz yıl revân
Pes anuñ menşûrını dürdi cihân

PÂDİŞÂHÎ-Yİ HÛŞENG

5098.Oldı ardınca anuñ Hûşeng şâh
Kim sezâ-vâr-ıd'aña taht u külâh

5099.Halka ol öğretti resm-i kişt-kâr
İlm-i tıbb hem andan oldu âşikâr

5100.Bildi nedür her gıdâ keyfiyyetin
Añladı hem her devâ hâsıyyetin

5101.Evvel oldur yazuyı tasnîf iden
Dahı bunca san'ati te'lîf iden

5102.İbri vü Yûnânî dili söyledi
Pârsiyi dahı tasnîf eyledi

5103.Kırh yıl dünyâda hüküm itdi temâm
Soñra gitdi kaldı ansuz bu makâm

5104.Dünyaya aldanma k'anda yoh safâ
Olma garre ahdine k'itmez vefâ

5105.Niceleri bu makâm itdi helâk
Niçelerden kaldı ıssuz işbu hâk

5106.İşbu işde akl ser-gerdân olur
Fehm ü vehm ü fikr hem hayrân olur

5107.Bu makâma çün gelen girü gider
Pes getüren bunları bârî nider

5108.Yavuz-ısa bunu ne yapmah gerek
Eyü-y-ise ne işe yihmah gerek

5109.Ol ki sun'ından bunu zâhir kılur
Nişe giderür getürür ol bilür

5110.Anuñ işini kimesne bilemez
Akl işbu ukdeyi hal kılamaz

5111.Lîki zâhir işbu durur bî-hilâf
Kim bu hengâma dirilmedi güzâf

5112.Çünkü zâtıdur anuñ deryâ-yı cûd
Mevci deryânuñ bu kamusı vücûd

- 5113.Sun' deryâsı niçe kim ura mevc
Dürlü mevcûdât irişür fevc fevc
- 5114.Ne bu bahruñ sâhiline var nişân
Ne görinü mevcine hergiz kerân
- 5115.Üşbu masnû'ât kim vardur kamu
Sâni'üñ sun'ına mazhardur kamu
- 5116.Lutf-ıla çün bir tecellî kıldı ol
Bu vücûdâta ademden oldı yol
- 5117.Bir tecellî dahı kıldı kahr-ıla
Yahdı yıhdı yohlıg ili şehr-ile
- 5118.Her sıfatda kim tecellisi olur
Aña lâyıık bir eser andan gelür
- 5119.Her sıfat bir nesne ider iktizâ
Hayr u şer tolu anuñ-çundur Kazâ
- 5120.Çünki ihyâdan tecellî ide zuhûr
Rûhdan ire çürimiş cisme nûr
- 5121.Çün tecellisi emânetden ola
Bu nefesde her-çi diri var öle
- 5122.Bâkı-yı evsâfınuñ re'sen-be-râs
Kıl tecellisini bu resme kıyâs
- 5123.İdüben Hûşeng ecel câmını nûş
Gıtdi başından anuñ akl-ıla hûş
- 5124.Öldi Hûşeng ecel câmını nûş
Kaldı andan soñra üçyüz yıl temâm
- 5125.Assı ne Hûşeng olmah çünki hûş
Gider idicek ecel câmını nûş
- 5126.Toldı andan soñra âlem dâr u gîr
Her yañadın kopdı feryâd u nefir
- 5127.Halk birbirini idiben helâk
Toptolu Tûfân u âteş oldı hâk
- 5128.Yahın oldı k' Âdemüñ nesli temâm
Dükeniben kala ıssuz bu makâm
- 5129.Dirliği yiryüzinüñ ser-ver olur
Halk ser-ver olmasa bî-ser olur

5130.Padişahdur bî-gümân Hak sâyesi
Kamu halkuñ ol olur ser-mâyesi

5131.Oluban üçyüz yıl âşûb-ıla harb
Toldı fitne ucdan uca şark u garb

PÂDİŞÂHÎ-Yİ TAHMÛRES-İ DÎV-BEND

5132.Âkıbet Tahmûres olup pâdişâh
Old'otuz yıl şehr ü iklîme penah

5133.Halka adl-ile imâret eyledi
Yiryüzin cümle 'imâret eyledi

5134.İtdi bürhân-ıla tevhîdi beyân
Haşr ü neşrün hüccetin kıldı ayân

5135.Didi kim ölü dirilmezse yakîn
Pes hakîm işi abes ola hemîn

5136.Çün hakîmedür abes işler muhâl
Pes gerek k'ölen dirile lâ-muhâl

5137.Pes ölü dirilmegüñ imkânını
Bilüben kıldı beyân bürhânını

5138.Şöyle didi k'eydiserüz biz anı
Sıhhat-ıla tutsa Hak cân u teni

5139.Halka didi kim ibâdet ideler
Kendülere anı âdet ideler

5140.Didi gönüle nic'olur tasfiye
Câna ne resme gerekdür tezkiye

5141.Olalar kamusu ihvânü's-safâ
Şöyle k'olur ola hullânü'l-vefâ

5142.Birbiri-y-le cümle hem-dem olalar
Birbirine yâr u mahrem olalar

5143.Olalar anlarda zerk-ıla riyâ
İşleri lutf ola vü cûd u sehâ

5144.Hüsn-i ahlâk-ıla mevsûf olalar
Kim eyü ad-ıla ma'rûf olalar

5145.Bileler tevhîd ilmini yakîn
K'ol-durur evvel ki olur ehl-i dîn

- 5146.Ola ihlâs-ıla itseler amel
Kim amel ihlâssuz olur dagal
- 5147.Tâatına kimse magrûr olmaya
Rahmetinden Hâlıkun dûr olmaya
- 5148.Garre olmah tâata küfrân olur
Ko anı kim âdet-i Şeytân olur
- 5149.Ni'metini mün'imün fikr ideler
Dâim anı şükr-ile zikr ideler
- 5150.Kuru zühd ü kara ton-ıla hemîn
Kendüleri sanmayalar ehl-i dîn
- 5151.İzzet ü devlet bileler uzleti
Kendüye âfet bileler şöhreti
- 5152.Dahı Tahmûres çoğ işler işledi
Dürlü revnak illere bağışladı
- 5153.Oldı devrinde şeyâtîn âşikâr
Anlaruñla kıldı ol çoh gîr ü dâr
- 5154.Şeh Siyâmek adlu oğlu var-ıdı
K'aña âlem âşık-ı dîdâr-ıdı
- 5155.Birgün ol şehzâdı bir dîv-i pelîd
Nâ-gehânî kapup oldu nâ-bedîd
- 5156.Ol şeyâtîn-il'anuñ-çun çoh cidâl
İdüben anları kıldı pâyimâl
- 5157.Kimini öldürdi kimin kıldı bend
Tâ ki urdılar adını dîv-bend
- 5158.Oldı evvel dîvi teshîr eyleyen
Reml eşkâlin yazup söz söyleyen
- 5159.Âhir ol dahı gidüp oldu nihân
Dürdi anuñ dahı menşûrın cihân

PÂDİŞÂHI-İ CEMŞİD

- 5160.Geldi ardınca anuñ Cimşîd şâh
Kim yidi iklîme oldu pâdişâh
- 5161.İns-ile cinn oldılar hükmüne râm
Yidiyüz yıl dahı elli yıl temâm

5162.Hem müsahhar olmuş-ıdı aña bâd
Yürür-idi ol heva üstinde şâd

5163.Ol-durur Hammâmı te'lîf eyleyen
Dürlü dürlü pîşe tasnîf eyleyen

5164.Tıbb ilmin ol-durur iden temâm
Hem nücûmuñ ilmi ana oldu râm

ZUHÛR-I İDRÎSİ'N-NEBİ ALEYHİ'S-SELAM

5165.Rûzigârınd'oldı İdris âşikâr
Virdi peygambarlıh aña Kirdikâr

5166.Dîne da'vet itdi Cimşîdi resûl
Kıldı anuñ da'vetini ol kabûl

5167.Kendüye anı mukarreb eyledi
Her işi anuñla müretteb eyledi

5168.Her ne san'at k'itdi ol öñdin soña
Kamu İdris öğredür-idi aña

5169.Zâhir andan oldu hey'etle nücûm
Dahı usturlâb u her-güne ulûm

5170.Bir zamân bu resme döniben sipih
Mihr gösterdi ana mah-ıla mihr

5171.Bir zamandan soñra devr-i rûzigâr
İtdi bir dürlü dahı nakş âşikâr

5172.İşbu-durur âdet-i devr-i felek
Dâyimâ bir resme olmamah gerek

5173.Devlet-ile sürdi birkaç rûzigâr
Çeşm zahmı irdi_aña pâyân-ı kâr

5174.Devlete magrûr olup Cimşîd şâh
Sâni'a isyân idüp güm kıldı râh

5175.İtdi küfrân ni'metine Râzıkuñ
Oldı âsî tâatına Hâlıküñ

5176.İt n'iderseñ itme küfrân ni'mete
Tâ ki irişmeye noksân devlete

5177.Çünkü azdurdı anı İblîs La'în
Göge çıhardılar İdrîsi yakîn

5178.Uyuban İblîse ol Cimşîd-i şâh
Devletinüñ nâmesin itdi siyâh

5179.Her kimüñ kim reh-beri İblîs ola
Sûr-ıla ol La'net ü telbîs-ile

5180.Gitdi devlet ferri gözinden temâm
Çıhdı fermânından anuñ hâs u âm

PÂDİŞÂHÎ-İ DAHHÂK

5181.Yirine Dahhâk oldu şehriyâr
Ana vardı her ne var şehir ü diyâr

5182.Çünkü Dahhâk'e irişdi tâc u taht
Kalmadı Cimşîdde ikbâl ü baht

5183.Korhudan yüzyıl yürüdi ol nihân
Hâr olup gör kim neler kılur cihân

5184.Gâh kaldurup irürür tâ-simâk
Geh yire urup ider kişiyi hâk

GİRİHTEN-İ CEMŞİD EZ-DAHHÂK VE ÂKİBET-Û

5185.İşid imdi hâki Cimşîdüñ n'olur
Kaçuban ol Zâvil-istân'a gelür

5186.Zâvil-istân şâhı çün bildi anı
Kendü ivinde nihân kıldı anı

5187.Anuñ-ıçun k'arada var-ıdı ahd
Eyledi ol ahdi sahlamaga cehd

5188.Ol zamandagı rüsûm u dîn-ile
Kızını virdi aña kâbîn-ile

5189.İvi içinde _anı gizler-idi ol
Şöyle k'aña kimse bulamazdı yol

GÜFTÂR DER-MEZEMMET-İ NAKZ-I AHD

5190.İlerü kâfirler eyledükde ahd
Hıfzına bu resme iderlerdi cehd

5191.Şimdi îmân da'vi _idenler iy aceb
Nişe _iderler ahd bozmagı taleb

- 5192.Yalan and oldı kamunuñ pîşesi
Hîle vü tezvîr ü mekr endîşesi
- 5193.Lâ-cirem âşûb toldı uş cihân
Zâhir oldı fitne-i âhir-zemân
- 5194.Çünki kâfir sahlar ola andını
Mü'min olmaya sıyan sevgendini
- 5195.Üşbu iş üstine çün birkaç zemân
Oldı Cemşîd ol memâlikde nihân
- 5196.Düşdi anda gussa vü teşvîşe ol
Hâtırında böyle itd'endîşe ol
- 5197.K'ışidüp Dahhâk anı andan ala
Dürlü cevr-ile elind'anuñ ola
- 5198.Kimsene düşmen elinde ölmesün
Kâfire dahı bu hâlet olmasun
- 5199.Hakdur ölmek her ne sûretle k'ola
Vây aña kim düşmen elinde öle
- 5200.Biñ cefâ vü cevr-ile ölmekden er
Düşmenüñ dâmına düşdügi biter
- 5201.Olmadı encâmı hayr anuñ k'anı
Gördi kendü dilegince düşmeni
- 5202.Tamuda görseñ azâbı gûne gûn
Yig ki olmah düşmene bir dem zebûn
- 5203.Gitdi bu havf-ıla andan dahı hem
Cevrdür bu devr işi vü sitem
- 5204.Üşbu müddetde ki ol Cemşîd şâh
İtmiş-idi Sîstân milkin tebâh
- 5205.Kopdı bir oğlu anuñ Esrat be-nâm
Her hünerde kim cihânda var temâm
- 5206.Ol urukdandur Nerîmân-ıla Sâm
Dahı Zâl ü Rüstem-i Destân temâm
- 5207.Kendü oğlum diyü halk içre ayân
Esratı sahlardı şâh-ı Sîstân
- 5208.Kandadur Cemşîdi bilmezdi kişi
Dâyimâ gizlenmeg-id'anuñ işi

- 5209.Buldı yüz yıl olıcah Dahhâk anı
Bıçgu-y-ıla bıçdı ol bî-bâk anı
- 5210.Bîveresb-id'adı Dahhâkuñ ayân
Nisbeti Nûha irerdi bî-gümân
- 5211.Kâfir ü bî-dîn ü hem bî-bâk-idi
Sâhir ü bed-kâr u hem nâ-pâk-idi
- 5212.Dutmuş-ıdı yidi iklîmi temâm
Sihir-ile aña sibâ' olmışdı râm
- 5213.Degşürüp İblîs birgün sûretin
Geldi Dahhâküñ katına ol La'în
- 5214.Gösteriben ana ol bed-fi'l dîv
Dürlü dürlü mekr-ile telbîs ü rîv
- 5215.Kendüzini düzdi hidmetkâr aña
Tâ mukarreb ola ol mekkâr aña
- 5216.Her ne varsa dünyada şerr ü fesâd
Cümle öğretti aña ol bed-nihâd
- 5217.Çün anı kendü bigi İblîs eyledi
İçini pür-mekr ü telbîs eyledi
- 5218.Birgün opdı_ anı omuzından nihân
Bitdi iki omuzında_iki yılan
- 5219.Ol iki yılan kopıcah ol pelîd
Oldı oldemde oradan nâ-bedîd
- 5220.Yimege kasd itdi yılanlar anı
Böyle işitdüm müverrihden bunı
- 5221.Bir yañadan dahı geldi ol recîm
Kendüyi sûretde düzmiş bir hakîm
- 5222.Hergün iki oğlan dimâgını yakîn
Tu'me buyurdı yılana ol la'în
- 5223.Var-ıdı Ermâyil adlu bir kişi
Nesne bişürmekdi Dahhâk'a işi
- 5224.Ol yılanlara dahı ol-ıdı hem
Kim gıdâ terkîb iderdi bîş ü kem
- 5225.Ol iki_oglanlar ki magzı anlaruñ
Kûtı olmuş-ıdı ol yılanlaruñ

5226. Birisinüñ magzını alur-ıdı
Ol yılanlara gıdâ kılur-ıdı
5227. Âdemî beynîsine ol nîg-nâm
Bir koyun beynisi katardı temâm
5228. Tâ gıdâ kâmil ola yılanlara
Dahı kût olmaya hâcet anlara
5229. Birin oglanuñ nihân kılur-ıdı
Andan Elbürz'e revân kılur-ıdı
5230. Zîra ol tag ıssuz-ıdı ol zemân
Anda varandan belürmezdi nişân
5231. Pâdişâhlıh itdi ol biñ yıl temâm
Hükmine olup yidi iklîm râm
5232. Çün aña irmege yahlaşur ecel
Kim anuñ def'ine yoh-durur hiyel
5233. Birini düşde melâikden görür
K'inüp anı bir amûd-ıla urur
5234. Korhudan düşer anuñ içine cûş
Uyanur nâle idüp kılur hurûş
5235. İlm ehline sorar tefsîrini
Bilmeg-içün ol düşüñ ta'birini
5236. Dirler aña kim bir oğlan üşbu yıl
Anadan togası-durur bellü bil
5237. Kim elinde anuñ olıarsın helâk
Anuñ olısar bu taht u tâc hâk
5238. Böyle geldi vü gider bu rûzigâr
Kimseye kalmadı kalmaz pâyidâr
5239. Bu sözi çün aña didi reh-nümây
Korhudan Dahhâk böyle kıldı rây
5240. K'ideler ol yıl toğan oğlanı hâk
K'olmaya Dahhâk'a andan ters ü bâk
5241. Öldürürlerdi toğanlardan eri
Korlar-ıdı kız togıçagaz diri
5242. Bilmedi ol nesne kim takdîr ola
Def' olmaz hîle vü tedbîr-ile

5243.Çün Mukaddirden mukadderdür Kazâ
Çâre nedür aña teslîm ü rızâ

5244.Çün mukadder bî-gümâm kâyin-durur
Def'ine hîle iden hâyin-durur

5245.Kiy işit işbu sözi kim ol zamân
Ana karnındaydı Efrîdûn ayân

5246.Atasınıñ adı-y-ıdı Âbtîn
Lîki kavmindendi Cemşîdüñ yakîn

VİLÂDET-İ FERİDÛN-I FERRÛH

5247.Hâmîle-y-di anası hamli ikiz
Biri er ol ikinüñ ü biri kız

5248.Aña degin ikiz olmazdı yakîn
Bir karnından bir togar-ıdı hemîn

5249.Çün vilâdet agrısı oldu ayân
Kız-ıdı evvel ki togdı bî-gümân

5250.Ol işe mensûb olanlar geldiler
Âbteyin ivin tefahhus kıldılar

5251.Çün togan kız-ıdı ma'lûm itdiler
Oradan korhusuz olup gitdiler

5252.Togdı kız ardınca Efrîdûn-ı şâh
K'aladı Dahhâküñ elinden taht-gâh

5253.Şöyle kıldı anası anı nihân
K'olalinc'andan belürmedi nişân

5254.Anasından çünki ayru düşdi ol
Kûh-ı Elbürz'e iletđi anı yol

5255.Terbiyet bulıban anda bir zamân
Oldı bir şîr-i ner ü nev-pehlevân

5256.Çün yigirmi yaşına irişdi şâh
Lâyık-ı mülk oldu vü taht u külâh

5257.Memleket gire diyübenüñ ele
Kûh-ı Elbürz'i koyup indi yola

5258.Halk anı mülke lâyıık gördiler
Ragbet-ile tâatına girdiler

5259.Ol zamândan kim omuzında yılan
Bitüben Dahhâküñ olmışdı ayân

5260.Kurtılan şerrinden anuñ hâs u âm
Varuban Elbürz'i itmişdi makâm

5261.Rûzigâr-ıla_ oldıladı çoh gürûh
Şöyle kim oldı olardan tolu kûh

5262.Çün işitdiler ki Efrîdûn-ı şâh
Kasd kıldı k'ide Dahhâk'i tebâh

5263.Kamu Efrîdûn katına geldiler
Dirilüp anuñla bey'at kıldılar

ZUHÛR-I FERÎDÛN-I FERRUH

5264.Oldı Efrîdûn bir ulu pâdişâh
K'urdu dem mihrinden anuñ mihr ü mâh

5265.Isfahânda Gâve adlu bir dilîr
Kim anuñ çengâline döymezdi şîr

5266.Tir-endâz-ıdı vü şimşîr-zen
Nîze-dâr u gürz-gir ü saf-şiken

5267.Bber-zûr u ejdehâ-girdâr-ıdı
Isfahân mülkinde key er-dâr-ıdı

5268.Çoh cefâ görmiş-idi Dahhâkdan
Korhulu-y-dı dâim ol nâ-pâkdan

5269.Sayda varmış-ıdı birgün ol dilîr
Çıhdı nâ-geh õñine bir nerre-şîr

5270.Hâtırında Gâve eyle dutdı fâl
Kim bu arslanı idersem pâyimâl

5271.Öldürem Dahhâki dahı bî-gümân
Bulam anuñ zulmı şerrinden emân

5272.Sıdk-ıla dutup bu fâlı ol dilîr
Eyledi ol arslan-ıla dâr u gîr

5273.Kılup arslanuñ ciger-gâhını çâk
Kılıcı-y-la eyledi anı helâk

5274.Çün ecel çengâlımı ser-tîz ider
Ne ejdehâ döyer aña ne şîr-i ner

5275.Öldi ol arslan u Gâve oldı şâd
Sanasın Dahhâkdan ol oldı dâd

5276.Çün kişinüñ bahtı rûz-efzûn ola
Fâlı kutlu tâli'i meymûn ola

5277.Düzüp arslanuñ derisin bir direfş
Bizedi anı yeşil saru benfş

5278.Gâveye mensûb-durur ol ayân
Lâ-büd ad'oldı direfş-i Gâviyân

5279.Ol direfşi düzdi bir ulu 'alem
Kînide Dahhâkuñ urdı ol kadem

5280.Çün Ferîdûn adını işitdi ol
Aña tâbi' olmagı iş itdi ol

5281.Varubanuñ aña çâker oldı ol
Âkıbet katında ser-ver oldı ol

5282.Her ki devlet ıssına çâker ola
Devlete irişüben ser-ver ola

5283.Cehd aña itgil ki sen er olasın
Yâ-hud er olana çâker olasın

5284.Hidmete âdâb-ıla itgil kıyâm
Kim gönülde cân big'idesin makâm

5285.Çünkü gönüllerde makbûl olasın
Her ne kim gönlünde vardur bulasın

5286.Hidmet-ile gönül ehline irer
Hidmet iden tîz ululığa irer

CENG-İ FERİDÛN U DAHHÂK-İ TÂZİ

5287.Çünkü leşker oldı Efrîdûna cem'
Yüridi kim eyleye Dahhâk'i kam'

5288.Yürüyüp Dahhâk-ile çün itdi ceng
Oldı Dahhâk'a cihân pehnâsı teng

5289.Çünkü usanmışdı andan tâc u taht
Kaçdı yirinde koyup bün-gâh u raht

5290.Kimse bulunmadı aña dst-gîr
Nâ-geh anı bulup itdiler esîr

5291.Baglayup şâh âhenîn-bende anı

Virbidi kûh-ı Demâvend'e anı

5292.Pes anı bir gârda habs itdiler
Kapusın gâruñ uruban gıtdiler

5293.İy niçe Dahhâki kim devr-i sipihr
Kahr-ıla agladur itmez hiç mihr

DER-TEMSÎL VE MEV'İZE

5294.Nefs-i emmâre-durur Dahhâki bil
Sini yılana yidürür çâre kıl

5295.Ol iki yılan nedür kibr ü gazab
Kim olardur Tañrı kahrına sebeb

5296.Nefs-i levvâme bil ol Ermâyili
Geh sevâb u geh günehdür hâsılı

5297.Mutma'inne nefis Efridûn-sıfat
İşi anuñ cümle ilm ü ma'rifet

5298.Nefs-i emmâre seni ider helâk
Virüben yılanlara agzından ala

5299.Mutma'innedür dürüşen cehd-ile
Kim seni yılanlar agzından ala

5300.Geh sunar levvâme yılana seni
Gâh senden def' ider girü anı

5301.Hayr-ıla mahv olur andan zünûb
Vasfi anuñ Hakdan "asa'llah yetûb"

5302.Defter-i a'mâldur Elbürz kûh
Hem cezâ-yı fi'l andağı gürûh

5303.Kim çihup Dahhâk'i itdiler helâk
Oda yahup kıldılar tahtını hâk

5304.Kahr itmedin bu emmâre seni
Mutmainne kıl riyâzetle anı

5305.Nefsi ger sen mutmainne kılasın
Her ne mihnetden ki kurtulasın

5306.Şöyle k'Efrîdûn olasın pâdişâh
Kuds mülkinde bulasın destigâh

- 5307.Kılıcuñdan yite mâr-ı şeytanat
Saña kala tâc u taht u saltanat
- 5308.Pâdişahlıhda kalasın pâyidâr
Tâc u tahtuñ yitmeye Dahhâk-vâr
- 5309.Çün yüzin Dahhâkdan döndürdi baht
Degdi Efrîdûna ol tâc-ıla taht
- 5310.Tutdı İrân-ıla Turânı temâm
Bahr u berr oldı kamu hükmine râm
- 5311.İlm tevhîd-idi söz kim söyledi
Kamu halkı dîne da'vet eyledi
- 5312.Yiryüzini adl-ile pâk eyledi
Her sitemden k'anıDahhâk eyledi
- 5313.Oldı _anuñ ahdinde zâhir her ulûm
Kîmiyâ vü tıbb u ta'bîr ü nücûm
- 5314.İlm erkân u dahı anda kıldılar
Ne-durur mâhiyyetini bildiler
- 5315.Nefs bahtın dahı anda kıldılar
Ne-durur mâhiyyetini bildiler
- 5316.Bildiler k'ol cism ü cismânî degül
Varlığı cüz'-lutf-ı Rabbânî degül
- 5317.Cevher-i kudsî-durur ol Zât-ı pâk
Gün bigi pür-nûr-durur tâb-nâk
- 5318.Nûrı olmuş bu bedende'anuñ ayân
Lîkin olmuş kamudan kendü nihân
- 5319.Gerçi hâdisdür aña virmiş Kadîm
Bir bekâ kim yoh fenâdan anda bîm
- 5320.Anuñ-ıla ten arasında ayân
Âşık u ma'sûklıh var bî-gümân
- 5321.Kim kemâlâtı-durur mevkûf anuñ
Yog-iken var olmagına bu tenüñ
- 5322.Nefs ü cismüñ arasında bil yakîn
Bu ta'alluk bir izâfetdür hemîn
- 5323.Ol izâfet kim taallukdur hemân
Ez'af-ı a'râzdur bilgil ayân

5324.Çün araz zâyil ola cevher kalur
Nefs bākī-durur ölmez ten ölü

5325.Mülkinüñ otuz yılında ol Halîl
Togdı k'anı kıldı peygamber Celîl

KISSA-İ FERÎDÛN VE İRAC VE TÛR VE SELM

5326.Var-ıdı üç oğlı anuñ bahtıyâr
İrac u Tûr-ıla Selm-i tâc-dâr

5327.Tûr'a Türk ü Çîni bildürmiş-idi
Selm'e Rûm u Magrib'i virmiş-idi

5328.Fârs kalmışdı İrac'a vü hem Irâk
Lîki bu iş geldi Tûr u Selm'e şâk

5329.Kici kardaş'itdiler anlar hased
Ne hased şöyle k'aña yog-ıdı had

5330.Üşbu kîn üstine Selm ü Tûr u şâh
İrac'ı katl eylediler bî-günâh

5331.Gör hased kim nice yavuz pîşedür
Terk id anı kim yavuz endîşedür

5332.Ululih isder-isen ola hasûd
Çün işitdün "el-hasûd u lâ-yesûd"

5333.İrac-ıçun oldı Efrîdûn gamîn
Bagladı göñlinde Selm ü Tûr'a kîn

5334.İracuñ neslinde Efrîdûn-ı şâh
Bir yigit buldı sezâ-yı tâcugâh

5335.İrac-ıdı diye-y-düñ ol pâk-zâd
Atası aña Menûçehr urmuş ad

5336.Altıyüzbiñ kişi koşup aña şâh
Didi var kıl Tûr-ıla Selm'i tebâh

5337.Kişinüñ çünkim ola oğlı halef
Ata kanın komaya k'ola telef

5338.Her yañadın yürüyü bî-had sipâh
Oldı tozdan gün yüzi yig-ser siyâh

5339.Selm ü Tûr-ıla Menûçehr itdi ceng
Kıldı âlem vüs'atin anlara teng

- 5340.Düşdiler ol ceng içinde Selm ü Tûr
Tenden oldu cânları zâr-ıla dûr
- 5341.Çün Ferîdûna irişdi bu haber
K'irdi Hâlıkdan Menûçehre zafer
- 5342.Hâlık'a şükr eyleyiben oldu şâd
K'İracuñ kâtillerinden aldı dâd
- 5343.Pes Menûçehre kayıban tâc u taht
Gitmeg'Efrîdûn dahı bağladı raht
- 5344.Oldı bişyüz yıl cihânda tâc-dâr
Adl-ile hoş hoş geçürdi rûzigâr
- 5345.Dünya âhir aña dahı kalmadı
Şöyle gitdi kim sanasın gelmedi
- 5346.Çün Ferîdûn gördi vü bildi ayân
Anı kim sevgülü-durur bu cihân
- 5347.Bî-vefâlığı-y-ıla mergûbdur
Düşmen-i cân dur velî mahbûbdur
- 5348.Bild'anuñ-çün nice kardaş kardaşa
Düşmen olup kasd ider cân u başa
- 5349.Üşbu korhu-y-ıla kim çün ol öle
Birbirin'oglanları düşmen ola
- 5350.Kahr-ıla birbirini öldüreler
Tâc u tahtı ayruga alduralar
- 5351.Diledi bir iş kıla tedbîr-ile
K'olmaya düşmen olar birbir-ile
- 5352.Hendese-y-le kıldı tedbir-ile
Şöyle kim artuh degül-idi biri
- 5353.Herbirin bir oğluna virdi temâm
K'arada olmaya dahı ihtisâm
- 5354.Gerçi hoş fikr eyledi tedbîr-ile
Lîki togru gelmedi takdîr-ile
- 5355.Hakk anı kim dilegidür işledi
Mülki dahı kişiyi bağışladı
- 5356.Sa'yi Efrîdûnuñ oldu cümle bâd
Dünyadan kim oldu vü kim ola şâd

5357.Yil-durur toprahdan olanuñ işi
Od u sudan ne bekā bula kişi

5358.Çün her işi işleyen takdîrdür
Pes nekim tedbîr var tezvîrdür

PÂDİŞÂHÎ-İ MENÛÇEHR VE SÎRET-İ Û

5359.Gitdi Efrîdûn Menûçeher oldı şâh
Başına urdı murassa'dan külâh

5360.Her ne gördi-y-se Ferîdûndan temâm
İtmed'anı_ayruhsı sahladı müdâm

5361.Çün oturdı tahta ol nev-hâste
Old'anuñla tâc u taht ârâste

5362.Eyle itdi adli ol nîgû-sirişt
K'oldı hoşlıhdan cihân hurrem-behişt

5363.Ol zamânda kim Menûçeher oldı şâh
Mûsiyi itmişdi peygâamber İlâh

5364.Görmedin itmişdi aña ıktidâ
Kim degüld'ol şer'den dönmek revâ

5365.Çün hidâyet virmişdi aña Kerîm
Bildî anı togru mürseldür Kelîm

5366.Bir işitmekkl'oldı aña nerm mûm
Oldı taş görür-iken Fir'avn şûm

5367.Hak çü Fir'avne hidâyet virmedi
Lâ-büd îmân devletine girmedi

5368.Kime kim tevfik ola hem-tarîk
Dünya vü Ukbâ anuñdur iy refik

5369.Çün Menûçeher oldı devlete müdâm
Şâd u hurrem yüzyigirmi yıl temâm

5370.Âhirü'l-emr ol dahı oldı helâk
Hâkden olan olur hem girü hâk

5371.Çün Menûçeher_irdi çengâl-i ecel
İtdi bu dünyâyı ukbâyeye bedel

5372.Oglı Tüder old'anuñ ardınca şâh
Lîki bî-adl idi vü aklı tebâh

PÂDİŞÂHÎ-İ NÛZER VE HELÂKÎ-İ Û BER-DEST-İ EFRÂSYÂB

- 5373.Nâ-sezâ kişiler ü çekd'ilerü
Pes sezâlar düşdiler andan girü
- 5374.İRte gice işrete sâz eyledi
Dürlü dürlü bid'at âgâz eyledi
- 5375.Siretini atanuñ degşürdi ol
Kendüzinden dahı bünyâd urdı ol
- 5376.Oldı katında mukarreb her le'îm
Sohbetinden dur düşdi her kerîm
- 5377.Andan old'ehl-i hüner bî-mertebe
Bî-hünerler cümle irdi mansıba
- 5378.Şâh her-geh kim hüner-perver degül
Halka istihkâk-ıla server degül
- 5379.Çün siyeh itdi kelîmini Kerîm
İtmedi tâat Kelîme ol leîm
- 5380.Kıldı her dûn sohbetini ihtiyâr
Lâ-cirem olmadı aña baht yâr
- 5381.Sâm u Rüstem andan i'râz itdiler
Koyup anı Sîstân'a gitdiler
- 5382.Kâren ü Kûderz ü Kîy ü Güstehem
Girdiler katından anlar dahı hem
- 5383.Tûr neslinden bir ulu pâdişâh
Koyup olmış-ıdı Türk ü Çîne şâh

ZUHÛR-I EFRÂSİYÂB

- 5384.Key cihân-gîr ü adı Efrâsiyâb
Leşkeri çoh şöyle kim deryâ-yı âb
- 5385.Tûzerüñ çün bahtını gördi siyâh
Sürdi İrândan yaña hayl ü sipâh
- 5386.Âteşinüñ kînine Efrâsiyâb
Geldi İrân kişverin kıldı harâb
- 5387.Yahdı vü yıhdı vü gâret eyledi
Memleketde çoh hasâret eyledi
- 5388.Kırdı kavminden Menûçehrüñ kamu

Her kimi kim buldı-sa kiçi ulu

5389.Avret ü kız kamusun itdi esîr
Kıldı erden bulduğun umâc-ı tir

5390.Tüderi dahı hem ol itdi helâk
Kıldı'anı ber-dâr ol bî-ters ü bâk

5391.Çarha bahgıl kimleri ber-dâr ider
Şehleri gör ne belâ bürd-bâr ider

5392.Birini mihr-ile ider tâc-dâr
Birini kahrı-y-la kılur tâc-ı dâr

5393.Böyle kim didüm idüp halkı tebâh
Oniki yıl oldı ol İrânda şâh

5394.Şeytanat irte gice endîşesi
Yahmag u yihmahdı dâim pîşesi

5395.Zâlim ü bî-bâk ü bed-âyîn-idi
Müşrik ü güm-râh u hem bî-dîn-idi

5396.Kılıcından her k'anuñ buldı emân
Sîstân'a varuban oldı nihân

5397.Söz öküş anlar ki diri kaldılar
Rüstem-i Zâla tazallüm kıldılar

5398.Kim bugün sensin bu iklîme ümîd
Sendedür her baglu kapuya kilîd

5399.Halka sen dermân irür k'Efrâsiyâb
Kalmadı yir k'anı kılmadı harâb

5400.Def' itmezseñ anuñ şerrini tîz
Koparur halk üstine ol rüstahîz

5401.Çünkü İrân mülkine sensin penâh
Koma İrân'ı k'ide yik-ser tebâh

5402.Zulm şerrin her ki def' idibile
Pes tehâvün eylese zâlim ola

5403.Üşbu sözi çün işitdi pehlevân
Oldı gayretten gözinden yaş revân

5404.Her kişi kim anda gayret olmaya
Zen-sıfatdur andan erlik gelmeye

5405. Bu söz-ile Rüstem-i İrân-penâh
Şâh-ı Tûrân üstine sürdi sipâh
5406. Bir neberd itdi anuñl' Efrâsiyâb
K'oldı gül-gûn kan-ıla deryâ-yı âb
5407. Âkıbet İrân'a rahm idüp İlâh
Basılıban kaçdılar Tûrân-sipâh
5408. Çünkü kaçup gitdi Tûrân leşkeri
Buldı revnak girü İrân kişveri

PÂDİŞÂHÎ-İ TAMHASB ŞÂH

5409. Bir kişi var-ıdı adı Tamhâsb şâh
Lâyık-ı taht u sezâvâr-ı külâh
5410. Âkıl u hem kâr-dîde pîr-idi
Âdil ü hem sâhib-i tedbîr-idi
5411. Leşkerüñ sâlârı çünkim ola pîr
Her ne iş kim itse olur dil-pezi
5412. Kıldı anı Rüstem-i leşker-penâh
Mülk-i İrân'a ser-â-ser pâdişâh
5413. Bu-y-ıdı şâh oldugın' anuñ sebeb
Âbtin'den bulmuş-ıdı ol neseb
5414. Biş yıl anda şâh-ıdı ol bîşü kem
Öldi biş yıl olıcah ol dahı hem
- ### **ZİKR-İ PÂDİŞÂHÎ-İ KEYKUBÂD**
5415. Şâh old'ardınca anuñ Keykubâd
Kim kamu halk andan olmuş-ıdı şâd
5416. Âkıl u dîn-dâr u key dâna-y-ıdı
Sâhib-i tedbîr ü ehl-i rây-ıdı
5417. Memleketde diyedüñ Cem-şîd-idi
Ma'diletde sanaduñ Hûrşîd-idi
5418. Her yiri k' Efrâsiyâb almış-ıdı
Çünkü Tûrândan çihup gelmiş-idi
5419. Kamusını feth idüben Keykubâd
Saltanat tahtında tâc urındı şâd
5420. Oldı yüz feth idüben Keykubâd

Saltanat tahtında tâc urındı şâd

PÂDİŞÂHÎ-İ KEYKÂVÛS BİN KEYKUBÂD

5421.Çünkü Kâvûs'a mukarrer oldu taht
Kamu yird'anı muzaffer gördi baht

5422.Her neyi kim kıldı-y-ısa ârzû
Oldı âsânlıhl'aña rûzî kamu

5423.Âkıbet baht anı magrûr eyledi
Rahmetinden Hâlıkun dûr eyledi

5424.Diledi kim bir binâ bünyâ ura
Kim anı yücelde göklere ire

5425.Çünkü Kâbûlda anı başlatdı ol
Elli yıl peyveste anı_ışletdi ol

5426.Elli yıl çün devr itdi bu felek
İndi Hakk emri-y-le yire bir melek

5427.Bir ulul kamçı elinde var-ıdı
Sûretâ kamçı velîkin nâr-ıdı

5428.Ol binâyâ urdı bir kamçı melek
Şöyle kim kaldı taña andan felek

5429.Ol biña üç pâre old'anda ayân
Birisi kaldı yirind'anuñ hemân

5430.Biri Câbalkaya düşdi pârenüñ
Biri câbalsaya sıçradı anuñ

5431.Çünkü Kâvûs oldu eyle bî-edeb
Lâ-cirem itdi aña Hâlık gazab

5432.Bî-edeblik itmegil kim şûm olur
Bî-edeb her hayrdan mahrûm olur

5433.Bî-edeb halkı kamu oda yahar
Sanma kim kendüyi yaluñuz yıhar

5434.Halk anı çün Haka tâgî buldılar
Her yanâdın aña yağı oldılar

5435.Yağı oldu aña suştân-ı Yemen
Her yañadın kopdı yüz dürlü fiten

5436. Pes yemenden yaña oldı ol süvâr
Kim ide şâhg-ı Yemenle kâr-zar
5437. Varup anda ider-iken kâr-gîr
Nâ-gehân dutiluban oldı esîr
5438. Saldılar San'ânda bir câha anı
Kim yanard'oda anuñ cân u teni
5439. Kişiden çünkim yüzün döndüre baht
Bî-gümân olur bedel zindâna taht
5440. Böyle geldi hâl-i çarh-ı nîl-gûn
Geh ser-efrâz eyler ü geh ser-nigûn
5441. Bir zamândan Rüstem-i cengî-süvâr
Vard'anuñ-çun anda itdi kâr-zâr
5442. Söz öküş cehd eyleyüp her bâb-ıla
Kurtarup iletdi anı Bâbil'e
5443. Urdı girü başına zerrîn-külâh
Oldı girü kişver-i İrân'a şâh
5444. Âdemînuñ çünki başı sag ola
Taht girü bî-gümân girür ele
5445. Genc ü mâl elden giderse yime gam
Bulnur sag olsa mâl u genc hem
5446. Olma gam-gîn gitse elden kadr ü câh
Bâş sag olduhda bulnur külâh
ZİKR-İ VÂKI'A-İ SİYÂVÛŞ SİPER-İ KEYKÂVÛS
5447. Oglı var-ıdı Siyâvûş nâm anuñ
Şifte ışkına hâs u âm anuñ
5448. Çünki Kâvûs irdi yüz yaşa temâm
İtdi gönlin bir kızuñ ışkı makâm
5449. Adı Su'dâ hûb-rûy u pâk-ten
Atası-y-ıdı anuñ şâh-ı Yemen
VASF-I DUHTER-İ ŞÂH-I YEMEN SU'DÂ-NÂM
5450. Virmiş-idi Sâni' aña bir cemâl
Kim güne ışkıdan irmişdi zevâl
5451. Zülfi Kadr ü yañağı Nev-rûz-ıdı
Vasl'anuñ ıyd-ı cihân-efrûz-ıdı

- 5452.Mât-ıdı yüzi Süheyline Yemen
La'l olamazdı akîkıa semen
- 5453.Ol Süleymânî saçındağı girih
Olmış-ıdı cümle Dâvûdî-zirih
- 5454.Hande iderdi yüzi rengi güle
Ta'n ururdu zülfi tâbı sünbüle
- 5455.Agzı dürci lü'lü-yi lâlâ-y-ıdı
Tutagı yâkût-ı cân-efzâ-y-ıdı
- 5456.Habsden çıhdıkd'anı almış-ıdı
Mülk-i İrân'a bile gelmiş-ıdı
- 5457.Ol cüvân oldugı-çun Kâvûs pîr
Olmaz-ıd'anıñla hergiz göñli bir
- 5458.Ol kişi-y-le k'adı köhne-pîr ola
Nev'cüvâna göñli kaçan bir ola
- 5459.Nev'cüvâna âşık olmahdur kemâl
Lîk'olur pîr olana naks u zevâl
- 5460.Çün kocala kişi vü ten ola süst
Yigid işin itmek olmaya dürüst
- 5461.Çünkü kâfûr ola müşgüñe atâ
Ko mu'anber zülfi k'olmaya hatâ
- 5462.Görüben Su'dâ Siyâvûş'ı ayân
Göñlini virüp fidâ' itd'aña cân
- 5463.Işk odı cânına düşdi anıñ
Şem'-veş varlığı dutışdı anıñ
- 5464.Işk eri cân milkini yıhmah gerek
Göñli ivini oda yahmah gerek
- 5465.Niçe kim aglayuban dökdi-y-se yaş
Virmedi hergiz Siyâvûş aña baş
- 5466.Su'da aña soñra töhmet eyledi
Baña kasd itdi diyüben söyledi
- 5467.Girçek erseñ avrete inanmagıl
Togrı-y-ısañ egriye aldanmagıl

- 5468.Mekrin anlaruñ çü didi Hakk azîm
İmin olm'andan ki oldur cây-ı bîm
- 5469.Gerçi avret sözi olur pür-hatar
Lîk'erenler cânına kılur eser
- 5470.Çünki avret gözlerin giryân ider
Yüregın arslanlaruñ biryân ider
- 5471.Çünki avret nâz-ıla ider füsûn
Zâl bigi Rüstemi kılur zebûn
- 5472.Ol ki gönli bu cihândan sır-idi
“Kellemînî yâ Humeyre” dir-idi
- 5473.“Züyyine li'n-nâs” olaradur bezek
anlara meyl itdügine cân ne şek
- 5474.İ'timâd idüp anuñ sözine şâh
Kasd kıldı kim ide oğlın tebâh
- 5475.Çün Siyâvûş bild'ata kasdın aña
Kaçd'oradan gitdi Tûrân'dan yaña
- 5476.Varıcah Tûrân'a şâh Efrâsiyâb
Virdi aña mâl u genc bî-hisâb
- 5477.Virdi kendü kızını dahı aña
Kim varup gitmeye İrândan yaña

SIFAT-I DUHTER-İ EFRÂSİYÂB KI BE-SİYÂVÛŞ-DÂDE

- 5478.Ol kızuñ^adı Firengîs-idi bil
Ay u gün hüsninden olmışdı hacil
- 5479.Zülfinüñ ca'dında Dâvûdî-zirih
Biñ Süleymân cânına olmış girih
- 5480.Saçlarından okınur “ve'l-mürselât”
Kaşlarından yazılı “ve'n-nâziât”
- 5481.Bende-y-idi kaddine serv-i çemen
Fitne-y-idi zülfine müşg-i Hoten
- 5482.Gün yüzinden nûrı vâm alur-ıdı
Ây hüsninden taña kalur-ıdı
- 5483.İsdeyene hüsn-i vechinden zekât

Kaşî dird “el-bâkıyâtü’s-sâlihât”

5484.Zülfine hayrân anuñ reyhân-ıdı
Yüzine vâlih gül-i handân-ıdı

5485.Çün Siyâvûş’a Firengîs oldı cüft
Lâ-cirem düşdi arada hâb u huft

5486.Kopdı bir oğlu anuñkim tâc-gâh
Ârzû anı iderdî sâl u mâh

5487.Tâli’ini çünki dutdılar anuñ
Adını Keyhusrev itdiler anuñ

5488.Çün Siyâvûş buldı anda âb-rûy
Oldılar hâsidler aña kîne-cûy

5489.Gerçi kişi muslih ü hoş-hûy ola
Hâsidüñ rencine ne dermân bula

5490.Aña töhmet eylediler bî-hisâb
Tâ ki öldürdi anı Efrâsiyâb

5491.Girü işit n’itdi ol Kâvûs şâh
K’adı her defterde olmışdur siyâh

KASD-I VE HÎLE-İ KEYKÂVÛS KI BÂ-SEMÎN-REVED

5492.Kasd eyle itdi kim göge ire
Hükm iden kim-durur anda göre

5493.Çünkü keh-rây oldı kerkesler dirüp
Bir zamân bisletdi çoh tu’me virüp

5494.Tu’me-y-ile çünki kuvvet buldılar
Uçuban degmeye kâdir oldılar

5495.Çünkü göge çıhmaga oldı çâre-cûy
Düzdi bir sandûk günden çâr-sûy

5496.Bagladı kerkeslere sanduğı cüst
Vây ol kişiyi k’ola rây-ı süst

5497.Sancuban birkaç cıda üstine it

Bagladı sandûga bu sözi işit

5498.Çünkü ol kerkesleri açıhdurdu key
Girdi sandûk içine Kâvûs Key

5499.İte hamle itdi kerkes şol kadar
Kim belürmez oldı yirden hiç eser

5500.Tu'me-y-içün dökdi kerkes şol kadar
Kim belürmez oldı yirden hiç eser

5501.Aşagıdan görinen deryâ-y-ıdı
Yuharudan günbed-i hadrâ-y-ıdı

5502.Bahuban Kâvûs yiri görmedi
Uçuban kerkes bu çarha irmedi

5503.Kuşlar arıp çünkü girü döndiler
Bi'z-zarûre girü yire indiler

5504.Düşdi bir mülke dahı Kâvûs şâh
Yüzi kara devlet ü bahtı tebâh

5505.Çoh zamân yürüdi ol hûr u zebûn
Girü tahtına bulınca reh-nümûn

5506.Câhil-idi fikri togru kılmadı
Çarh kand yir nirede bilmedi

5507.Sandı kim Kerkes kanadı-y-ıla ol
Vara bula çarha çıhmahlığa yol

5508.Bilmedi k'anda hired bî-ser ola
Fikr kuşu orada bî-per ola

5509.Ol araya varmaga yohdur sebîl
“Cezbe Allâhü ve bâlî Cebraîl”

5510.Didi ba'zî bu tevârîhi düzen
Dürlü defterlerde nazm idüp yazan

5511.K'ol-durur Nemrûd kim aña Halîl
Geldi çünkim virbidi anı Celîl

5512.Ol ki bu hâli hikâyet eyledi
Bize bu resme rivâyet eyledi

5513.K'adı Nemrûd-ıdı Kâvûsuñ yakîn
Kâfer-idi yog-ıdı_anda hiç dîn

5514. Virbid'İbrâhîmi Nemrûda İlâh
Kim gele dîn yolına ol dil-siyâh
5515. Râst anı dîne da'vet itdi ol
Nicedür gösterdi aña togrı yol
5516. Ol Halüñ sözün itmedi kabûl
Kim tolu-y-ıdı başı kibr ü fuzûl
5517. Pes Halîli mancınıka urdı ol
Hışm idüp anı oda urdurdı ol
5518. Çünkim irişdi hevâya ol Halîl
Râst geldi didi aña Cebraîl
5519. Hâcetüñ var mı-durur digil anı
Didi eydeyim unıtdı-y-sa beni
5520. Didi Hakka var-ısa digil anı
Didi eydeyim unıtdı-y-sa beni
5521. Çünki azmi böyl'olmuş-ıdı temâm
Lâ-büd od oldı aña berd ü selâm
5522. Çünki İbrâhîm oddan çıhdı sag
Düşdi Nemrûduñ içine derd ü dâg
5523. Tâata kılmadı tугyânın bedel
Devletine lâ-cirem düşdi zelev
5524. Niçe kim yaşadı yola gelmedi
Âkıbet fikrin n'olısar kılmadı
5525. Soñra çün aña yakîn olur ecel
Kim anuñ def'ine yoh-durur hıyel
5526. Bir kanatlu bir ayaklu uvaz gelür
Süriniben yüzine konar ölür
5527. Uşalayup gitmez ol peşşe varur
Râst burnından dimâgına girür
5528. Hergün anuñ beynisini tu'me_ider
Başınuñ içinde her yaña gider
5529. Kibr-idi işi anuñ öñden soña
Ol dimâg u kibr gör n'itdi aña
5530. Kişi kim kerkes kanadına uya
Lâ-cirem beynisini peşşe yiye

- 5531.N'itdi Kâvûsa işitdûñ kerkesi
Cehd it başlama hergiz nâ-kesi
- 5532.İrişür Kâvûsa andan çoh elem
Cânına düşer anuñ dürlü sakam
- 5533.Ferri gider kalmaz anda gir ü dâr
Her yañadın düşmen olur âşikâr
- 5534.Çün müdebbirler bu hâli bildiler
Def'ine_anuñ çâre bunı buldılar
- 5535.Kim gele Keyhüsrev İrân'a penâh
Mülk-i Tûrân'dan ola anlara şâh
- 5536.Tâ eli ilden adûnuñ dûr ola
Girü mülk ucdan uca ma'mûr ola
- 5537.Var-ıdı ol tahtda bir pehlevân
Adı Key ü kendü nev-baht u cüvân
- 5538.Gîvi çün dâñâ dilâver buldılar
Anı ol işe muayyyen kıldılar
- 5539.Pes varıban anı ol cengî-süvâr
Buldı İrân'a getürdi merdivâr
- 5540.İricek Keyhüsrev İrân'a yakîn
Öldi Kâvûs oluban hâk-i zemîn
- 5541.Ol ki Kâvûda didi Nemrûddur
Kizbe yahındur sözi iy aslı hûr
- 5542.Oluban yüzelli yıl Kâvûs şâh
Gitdi vü Keyhüsrev oldı pâdişâh
- 5543.Memleketden zulmı ol dûr eyledi
Adl-ile iklîmi ma'mûr eyledi
- PÂDİŞÂHÎ-İ KEYHUSREV**
- 5544.İy niçe Kâvûs kûsın çarh-ı dûn
Yırtup itdi râyetini ser-nigûn
- 5545.Kûs u râyet âyet-i mihnet-durur
Sanm'anı kim âyet-i minhat-durur
- 5546.Pâk-dîn kopdı oluban nîg-rây
Halka Hakdan yaña oldı reh-nümây
- 5547.Atası kanı-y-ıçun on yıl kitâl

Kıluban Tûrân'ı itdi pâyimâl

5548.Âkıbet Efrâsiyâba buldı dest
Kanını topraga döküp itdi pest

5549.Devr-çün Keyhüsrevüñ oldı temâm
Halkı birgün da'vet itdi hâs u âm

5550.Pes hazâyinden çıhardı sîm ü zer
La2l ü yâkût u dahı dürr ü güher

5551.Hak yolına kıldı mecmû'in sebîl
Virmeg-içündür gereklü mâl bil

5552.Var-ıdı Lührâsb adlu bir süvâr
Şeh Ferîdûn urugından yâdigâr

5553.Anı ohıdı katına vü durup
Tahta geçürdi başına tâc urup

5554.Didi bini Hak katına ohıdı
Size binüm yirüme bunı kodı

5555.Halk anuñ işinde hayrân kaldılar
Sözini nisbet cünûna kıldılar

5556.Üşbu sözi diyüben oldı süvâr
Halk anuñ ardınca bî-hadd ü şümâr

5557.Varıcah bir az mesâfet durdılar
Karşuda on atlu durur gördiler

5558.Didi şeh siz duruñuz ben gideyim
Bunları kimdür tefahhus ideyim

5559.Çünki varup anlara irişdi ol
Bir bir anlaruñ-ıla görışdi ol

5560.Dönüp andan anı bile aldılar
Bir iki_adım gidiben gayb oldılar

5561.Dahı anlardan bulunmadı nişân
Ne aceb işler kılur görgil cihân

5562.Çünki dîn düşmenlerin kıldı helâk
Küfrden yiryüzini eyledi pâk

5563.Öldi kılıcınd'anuñ Efrâsiyâb
Kim yog-ıdı leşkerin'anuñ hisâb

5564.Yâ'cüc ü Mâ'cücü idüp cümle cem'
Yahuban yihup iderdi halkı kam'

5565.Gerçi kim ol sûretâ insân-ıdı
Lîki ma'nîde la'în şeytân-ıdı

5566.Giderüp anı cihânı kıldı pâk
İtdi dînüñ cevherini tâb-nâk

5567.Yiryüzin adli-y-le ma'mûr eyledi
Âlemi ilmi-y-le pür-nûr eyledi

5568.Sünnet ü farzı müretteb itdi ol
Nefs ahlâkın mühezzeb itdi ol

5569.Çünki buldı nefsi ilm-ile kemâl
Rûşen oldı aña envâr-ı cemâl

5570.Kuds bâğından nidâ geldi aña
Kim gözüñ açup nazar kıl bu yaña

5571.Kim göresin memleketler tolu nûr
Bî-nihâyet râhat u zevk u sürûr

5572.Hem heyûlî âfetinden ol berî
Hem tabîat mihnetinden ol arı

5573.Ol yaña çün rûşen olmuş gördi yol
Şavk-ıla sem'an ve tâ'a didi ol

5574.Pes idiben ol hitâba imtisâl
Terk itdi tâc u taht u mülk ü mâl

5575.Terk idiben bu mükedder külhanı
Vardı tutdı ol münevver gülşeni

5576.Kayd-ı cismânîden idüp infisâl
Buldı rûhânîler-ile ittisâl

5577.Olup âfât-ı bedenden ol berî
Oldı ol dahı melâyikden biri

5578.Zî melik kim dutdı yiri tâ-felek
Âhirü'l-emr oldı bir arı melek

5579.İkilikden geçüp irdi birlige
Fâni olup vardı bâkî dirlige

5580.Böyle olsa pâdişeh olan kişi
Şehvet-i nefis olmasa dâim işi

5581.Şöyle itse kim gidicek buradan
Kuds gül-zârı ola aña vatan

5582.Vây aña kim dünyada sultân ola
Buradan gitdükde ol şeytân ola

5583.Vây anı kim bulduğında saltanat
İrte gice ola işi şeytanat

PÂDİŞÂHÎ-Yİ LÜHRÂSB

5584.Oluban altmış yıl ol İrâna şâh
Gitdi vü Lührâsb oldı pâdişâh

5585.Olıcah Lührâsb mülke hükm-rân
Old'anuñ Tûrân'a fermânı revân

5586.Katı cebbâr oldı vü gerden-firâz
Her yañadan kıldı halka türkü-tâz

5587.Yıhuban ol kudsi gâret eyledi
Halkı kırup çoh hasâret eyledi

5588.Tâ ki Tevrît ü Kelîmi koyalar
Varup anuñ milletine uyalar

5589.Ol zamân Hak dîn-idi dîn-i Kelîm
Kim aña Tevrît virmişdi Kerîm

5590.Belh yapdurdı k'ide-y-d'anda makâm
Vakt telh oldı ol olduhda temâm

5591.Zulm-ıla yapılmış-ıd'ol ulu şehir
Lâ-cirem yapan oturmad'oldı kahr

5592.Her neye kim zulm-ıla bünyâd ola
Ger Süleymân tahtıs'anı yıl ala

5593.Pâdişeh çünkim ide cevr ü sitem
İnmeye gökden yire bârân u nem

5594.Pâdişahuñ zulmıdur mülki yıhan
Kendüyi vü âlemi oda yahan

5595.Pâdişeh kim ma'diletde kem ola
Devleti vü ömri nâ-muhkem ola

5596.Zulmdur şehlere azlûñ sâyesi
Adl-durur baht u devlet pâyesi

5597.Mülk isdeyen gerek adl eyleye
Kamu halka hulk-ıla hoş söyleye

5598.Hulkı olmaya dürüş eyle ki hâr
Kim anı yil topraga salmaya hâr

5599.Adl nedür râstlıhdur ol i yâr
Râstlıh it kim olasın reste-gâr

5600.Oh bigi togru işi âsân olur
Yay big'egri lâyıık kurbân olur

5601.Yüzyigirmi yıl olup Lührâsb şâh
Öldi vü Güştâsb oldı pâdişâh

PÂDİŞÂHÎ-Yİ GÜŞTÂSB VE ZUHÛR-I ZERDEŞT

5602.Old^'anuñ ahdinde zer-deşt âşikâr
İtdi anuñ dînini ol ihtiyâr

5603.Ol-ıdı âteş-gede bünyâd uran
Halkı ikrâh-ıla oda tapduran

5604.Didi ol kim Hâlık-ı hayr oldı nûr
Zulmet oldı Hâlık-ı cümle şürûr

5605.Vahydur diyü getürdi bir kitâb
Adı Zend ü sözleri çoh bî-hisâb

5606.Suhf-ı İbrâhîmdür dirler ayân
Anı k'anda kamu işden var beyân

5607.Nûr u zulmetden eger ürđi-y-se dem
Komamışdur ilm-i tevhîde kadem

5608.Bî-şek ölmeye Birâhîmü'l-Halîl
Kim gül-istân itd'aña odı Halîl

5609.Ürmedi-y-se nûr u zulmetden nefes
Mümkin olur k'ola İbrâhim pes

5610.Kopdı bir ođlı adı İsfendiyâr
Hüsñine âşik anuñ şehr ü diyâr

5611.Nâmdâr ü leşker-ârâ vü dil-sîr
Görse cengin küñd olurđı çeng-i şîr

5612.Nîze-endâz oldı vü şimşîr-zen
Hem dil-âver kopdı vü leşker-şiken

- 5613.Bâzu-yı mülk-idi vü püşt-i peder
Leşkere hem ol-ıdı sâlâr u ser
- 5614.İtmez-idi aña _eser şimşîr ü tîr
Gerçi peyveste işi-y-di dâr u gîr
- 5615.Dir-idi ger ben ola-y-dum şehriyâr
Komaya-y-dum kimseye şehr ü diyâr
- 5616.Kıla-y-ıdum şehleri hükmüme râm
Şark u garbı feth ideyidüm temâm
- 5617.Atası anuñ sözinden havf-nâk
Oluban kasd itd'anı k'ide helâk
- 5618.Dil niçe kim dek dura baş sag olur
Deprenicek dil yürek pür-dâg olur
- 5619.Sahla dili râzuñı bildürmesün
Kes anı kim ol seni öldürmesün
- 5620.Dutuban habs itd'anı Güştâsb şâh
İşidiben bu işi Ercâsb şâh
- 5621.Kim dedesi-y-di anuñ Efrâsiyâb
Bir sipeh cem' itdi kim deryâ-yı âb
- 5622.Yüridi Güştâsbuñ üstine tiz
Başına kopardı anuñ rüstahîz
- 5623.İdemezlerdi anuñ-ıla dâr u gîr
Kimini kırdı kimin itdi esîr
- 5624.Saluban yirinde raht u bârigâh
Kaçdı öñinden anuñ Güştâsb şâh
- 5625.Dutuban Ercâsb İrânı temâm
Geldi vü Bâbilde dutdı ol makâm
- 5626.Korhısından düşmenü Güştâsb şâh
Vardı vü bir kal'ayı itdi penâh
- 5627.Çünkü nâ-çâr oldu eyle itdi rây
K'ideler İsfendiyârı kedhüdây
- 5628.Bend-i zindândan idüp anı halâs
Pâdişahlığı vireler aña hâs
- 5629.Kim yürüyüp düşmeni ol götüre
Pes urinup tâc tahta otura

5630. Pes getürüp oldılar halk añâ cem'
Kim ideler düşmeni anuñla kam'
5631. Çünkü çıhdı habsden leşker-şiken
Kim kader-endâz-ıdı vü tîg-zen
5632. Leşker-i İrân'ı cem' itdi temâm
Ulu kiçi her nekim var hâs u âm
5633. Çoh viriben halka genc ü hâste
Leşkerini eyledi ârâste
5634. Virmeh-ile olur kavî püşt-i sipâh
Virmeyince kimse olmaz pâdişâh
5635. Her ki virmege bulamaz dest-res
Pâdişahlığa iremez bir nefes
5636. Yasayıban leşker-i İsfendiyâr
Yürüyüp Ercâsbı kıldı şikâr
5637. Germ süriben irişdi nâm-ver
Kıldı Tûrân leşkerin zîr ü zeber
5638. Çünkü pîrûz oldu şâh İsfendiyâr
Heft-hâna kasd itd'ol nâm-dâr
5639. Heft-hân bir kal'a-y-ıdı ser-bülend
İns ü cinden yog-ıdı añâ güzend
5640. Sedd-i İskender bigi-y-di ol hisâr
Hendekî-y-ıdı vü bürci pâyidâr
5641. Kerpici_anuñ âhen-i pûlâd-ıdı
Haşvı kal'ay zî aceb bünyâd-ıdı
5642. Kullesine Nesr iremez-id'anuñ
Hendekına cin giremezdi anuñ

REFTEN-İ İSFENDİYÂR BE-FETH-İ HEFT-HÂN

5643. Kendüzini düzdi bir bâzâr-gân
Heft-hândan yaña ol oldu revân
5644. İkiyüz sandûk düzetdi hâce-veş
Yüz katır rehvâr u muhkem bâr-keş
5645. Kodı her sandûk içinde bir dilîr
Kim dutamazdı anuñla pençe şîr
5646. Sâyis ü har-bende kamu pehlevân

Hâcenüñ adı Nasîr-i Nev-cüvân

- 5647.Yükledüp sandûkî bagladı katâr
Kal'adın yaña yüridi berk-vâr
- 5648.Heft-hâna çünki yahın kıldı yol
Virbid'ilçi kal'anuß issına ol
- 5649.Didi kim bâzâr-gânam ben ayân
Olmışam Tûrân'a Îrândan revân
- 5650.yüklerümde çoh nefâyis var-durur
tolu sandûkum zer ü gevher-durur
- 5651.Lîki Îrândan harâmî düşmenüm
Var-durur uş irdi ardumca benüm
- 5652.Kal'ada düzmek gerek baña makâm
Kim kumâşum anda sahlana temâm
- 5653.Çünki mâl adın işitdi kal'a-dâr
Kal'aya çıhardı anı şâh-vâr
- 5654.Niçe server bî-ser itdi hırs-ı mâl
Niçeler oldı tama'dan pâyimâl
- 5655.Hâce geldi kal'aya rûşen-revân
Virdi kal'a issına çoh ermagân
- 5656.Şâh u hâce gice sohbet itdiler
Esriyüp yirlü yirine gitdiler
- 5657.Hâce varup menziline ol gice
Ol kumâşını açup ucdan uca
- 5658.Pes geyüp kaftân u baglanup kemer
Kıldılar ol kal'ayı zîr ü zeber
- 5659.Atasın kardaşların k'anda esîr
Oldılard'itdi halâ ol şîr-gîr
- 5660.Üşbu rây-ıla ki itdi pehlevân
Feth oldı aña hısn-ı Heftühân
- 5661.Çün müyesser oldı üşbu feth aña
Döndi girü mülk-i Îrândan yaña
- 5662.Atası itdügi ahde durmadı
Memleket kim didi aña virmedi

5663.Dünya câhını idemez kimse terk
Olmaz her kiři peymânında berk

DESTÂN-I GÜŞTÂSB VE İSFENDİYÂR BE-CENG-İ RÜSTEM

5664.Düzdi bir resm-ile dahı mekr ü âl
Kim ide İsfendiyârı pâyimâl

5665.Virbid'anı Sîstân'a kim vara
Rüstem-i Destânı dutup öldüre

5666.Yâ dutıban dest-beste getüre
Pes alup İrânı hurrem otura

5667.Kasdı ol kim id'anı Rüstem helâk
Kıla hancerle ciger-gâhını çâk

5668.Mülk-içün gör kim ne mekr itdi ata
Diledi oğlını kim yardan ata

5669.Pâdişahlıhda karâbet kem olur
Kavm düşmanlığı pes muhkem olur

5670.Atası fermânı-y-ıla gitdi ol
Geldi vü Rüsteme çoh ceng itdi ol

5671.Kesmez-id'anı kılıc itdükde ceng
İtmez id'aña eser tîr-i hadeng

5672.Rüstemi oh zahmıl'itdi ol zebûn
Şöyle kim bîm oldı düşe ser-nigûn

5673.Bir iki gün itdiler bu resme ceng
Rüstemi kıldı zebûn tîr-i hadeng

5674.Zâl u Rüstem bir gıce dirildiler
Def'ine anuñ tefekkür kıldılar

5675.Didi Rüstem yarın ohı gezleyü
Ataram bunuñ gözini gözleyü

5676.Ger teni rGer teni rûyînse k'oh itmez eser
Göz hod etdür olur aña kâr-ger

5677.Fikr idüp üşbu iş üstine çoh
Düzdiler yılgun agacından bir oh

5678.Ol ohuñ bir ucı-y-ıdı iki tal
Ara yiri açuh ol resme ki dâl

5679. Herbirine ol iki şâhuñ dürüst
Urdılar peykân-ı zehr-âb-ıla cüst
5680. Düzdiler Sî-mürgden ol oha per
Tîz olsun diyü hem kâr-ger
5681. Kıldılar bu resme mekr ü âl
Subh olıcah urdılar kûs-ı kıtâl
5682. Kûs ünin işitdi çünk'İsfendiyâr
Didi dirildi mekre Sâm-ı Sûvâr
5683. Rüsteme geldi ki ol yarı kıla
Cehd idiben anı elümden ala
5684. Yohsa kanda var bugün anda mecâl
Kim ide binümlle ol ceng ü cidâl
5685. Dün ki anuñ-ıla cenge durmuşam
Oh-ıla_aña yüzotuz zahm urmuşam
5686. Bunı diyüp cevşenin İsfendiyâr
Geydi vü oldı hem ol demde sûvâr
5687. Rüstem-i Destânı gördi kim kemân
Dutmuş elde cenge yürür bî-gümân
5688. Korhu düşüp gönline didi ki şîr
Bîşeden çılmaya bu resme dilîr
5689. Didi Rüstem kim şehâ sulh idelüm
Dirilüp atañ katına gidelüm
5690. Bini diler uş sinüñle gideyüm
Her ne kim buyursa anı ideyüm
5691. Özüñe rahm eylegil iy pehlevân
Kim melik-zâdesin ü hem nev-cüvân
5692. Niçe kim yalvardı ol işitmedi
Câhil-idi aklı-la iş itmedi
5693. Akl neylesün kişiye yâ hıyel
Ol zamân kim irişe ayn-ı ecel
5694. Rüsteme bir oh dah'urdu nev-cüvân
Dönd'aña Rüstem didi iy pehlevân
5695. Bunc'ohuñdan sinüñ oldum zahm-dâr
Sen dahı benden bir oh al yâdigâr

- 5696.Görgil imdi oh nice atmah gerek
Oh yiyen kiři nice yatmah gerek
- 5697.Sini mekr-ile atañ dimne-misâl
Şîr çengâlina kıldı pâyimâl
- 5698.Rüstem eyl'atdı kemândan ohı cüst
K'irdi demrenler gözin'anuñ dürüst
- 5699.İki peykân dahı eyle itdi kâr
K'âh idüp düşdi yire İsfendiyâr
- 5700.Dünyanuñ ahvâli uşbudur müdâm
Hîç kimse dutamaz bunda makâm
- 5701.Rüstem ohında ölüp İsfendiyâr
Oglı Behmen kaldı andan yâdigâr

DER-BEYÂN-I VEHÂMET-İ ÂKIBET-İ ZULM

- 5702.Üşbu Destân hâlin idenler beyân
Kim tevârîh oldu anlardan ayân
- 5703.Didiler k'İsfendiyâr-ı nâm-ver
Oglan-iken k'añlamazdı hayr u şer
- 5704.Oynayu herbir yaña giderdi ol
Hem-ser oğlanlara seyr iderdi ol
- 5705.Düzedüp ol bir agaçdan oh u yay
Atışurdu oğlanlar-ıla kış u yay
- 5706.Yılgun agacından ol bir oh düzer
Birgün ol nâ-geh anı pertâb ider
- 5707.Ol ohı çün çiharur yadan hatâ
İrgürür bir yohsul oğlına kazâ
- 5708.Çıharu gözin anuñ ol çûbe-tîr
Olur ol bî-çâre miskîn ü hakîr
- 5709.Ol oh agacı yire düşüp beter
Têñgrı takdîri-y-ile anda biter
- 5710.Ol agaç zahmı-y-ıdı bil bellü sen
Gözine İsfendiyârıñ irişen
- 5711.Zulm itmedüğüñ budur encâmı pes
Adle düriş itmegil zulme heves

5712. Bir kiři kim yog-ıdı aña kalem
Oglan-iken k'añlamazdı bî ü kem

5713. Bir oh atduğı-y-çun idüben hatâ
Kim çıhardı bir göz anuñla kazâ

5714. Zahm yiyüben iki gözi bile
Gitdi cân u baş hem vardı yile

5715. Ol ki dâyim kasd-ıla kurup kemân
Zulm ohın atmah-durur işi hemân

5716. Ne aceb ger yile virüp baş u cân
Yıhdururp yahdurur-ısa hân ü mân

5717. Ana karnında ki oğlan cân bulur
Altı ay yidügi hûn-ı hayz olur

5718. Soñra ol kan âb-ıla olup çıhar
Sûretini oğlanuñ bozup yıhar

5719. Çünki ol hüsni k'olur reşk-i mâh
Altı aylıh hûn-ı hayz eyler tebâh

5720. Altı yıllıh kan k'içer zâlim aceb
Nicesi olmaya tâ'ûna sebep

5721. Kerkes olmaduğı-çun bî-dâd-ger
Ömri anuñ yıl-ıla biñe irer

5722. Olduğı-y-çun zâlim ü hûn-rîz bâz
Ömri olmışdur kamu kuşlardan az

5723. Zâlim encâmı yavuz olur azîm
Âhiri zulmüñ vahîm olur vahîm

5724. Oğlınuñ öldüğini Güştâsb şâh
İşidicek kıldı halk içinde âh

5725. Başını yire urup aglayu zâr
Dir-idi kim iy dirîg İsfendiyâr

5726. Lîki gönülden katı dil-şâd-ıdı
Câñı kamu gussadan âzâd-ıdı

PÂDİŞÂHÎ-İ BEHMEN BİN İSFENDİYÂR

5727. Yüzyigirmi yıl ölüp Güştâsb şâh
Gitdi ardınc'oldı Behmen pâdişâh

5728. Behmen'e irişicek mülk-i Acem

Hânedânın Rüstemüñ kıldı adem

5729.Rüstem ölmüş-idi ol olduhda şâh
Lâ-büd oldı fursat-ıla kîne-hâh

5730.Fursat-ıla her ne iş kim var biter
Fursat olmaduhda iş bitmez yiter

5731.Sîstânı yıhdı vü yahdı temâm
Kırdı anda her ne buldı hâs u âm

5732.Ne imâret varsa vîrân eyledi
Hâk-ile ol mülki yik-sân eyledi

5733.Niçe kim diri-y-idi ol şehriyâr
İşi ceng-idi hemîn ü kâr-zâr

5734.Fitne vü âşûb-ıdı işi dün ü gün
Şark u garbı itmek isterdi zebûn

5735.Hânedân var mıki vîrân olmamış
Hâne mi var hâne hundi ölmemiş

5736.Taht mı var kim yile virmez cihân
Tâc mı var yire urmaz âsümân

5737.İy niçe Kavûs-ıla Efrâsiyâb
K'anı öğütüdi bu gerdân-âsiyâb

5738.İy ki niçe Rüstem ü İsfendiyâr
K'oda urd'İsfend bigi rûzigâr

5739.Şâhididür Bâyezîd-ile Temür
Bugün anı mâr yire ü bunı mûr

5740.Mîr Sûlmân-ıdı dün mülke penâh
Bugün oldı yirde uş hâk-i siyâh

5741.Her kişiye k'anda var ola basar
Mîr Sûlmândan bugün ibret yiter

5742.Çünkü böyle çekdi çarh aña kemân
Ayrugı koya diyü var mı gümân

5743.Aña kim halk'ol-ıdı feryâd-res
Çarh emân virmedi gördüñ bir nefes

5744.Aña k'andan her kişi feryâd ider
Var kıyâs it kim vefâlar yâd ider

- 5745.Hâtim-i Tâÿÿ'iden kahr u cefâ
Bir bahîle ide mi mihr ü vefâ
- 5746.Pehlevândı Behmen ü hûn-rîz-idi
Çarh bigi saht fitne_engîz-idi
- 5747.Âhir-i ömrinde_anuñ bir ejdehâ
Kopdı k'olmazdı kimesn'andan rehâ
- 5748.Kopıcah ol ejdehâ-yı heft-ser
İrdi andan Behmen-i şâha haber
- 5749.Cem' eyledi sipâh-ı bî-şümâr
K'ejdehâyı ide ol yirde şikâr
- 5750.Katına varıcah anı ejdehâ
Dem ürüben çekdi itmedi rehâ
- 5751.Yuddı sâz u cevşen ü derkı-y-ile
Kaldı mülki garbî vü şarkî-y-ile

DER-TEMSÎL VE HÂTİME-İ DÂSİTÂN

- 5752.Nefsdür ol ejdehâ-yı heft-ser
Sini Behmen bigi bulduhda yudar
- 5753.Bir başı şehvet-durur biri hased
Birisi cehl ü birisi hûy-ı bed
- 5754.Birisi hışm u biri tûl-ı emel
Biri dahı halk-ıla olmah dagal
- 5755.Başların tîg-i riyâzetle anuñ
Kes ki andan kurtıla cân u tenüñ
- 5756.Yohsa komaz sini üşbu ejdehâ
Kim olasın dürlü mihnetden rehâ

PÂDİŞÂHÎ-Yİ HÜMÂ-Yİ DUHTER-İ BEHMEN

- 5757.Behmen olıban yüzon yıl pâdişâh
Öldi vü oldı hümâ yirinde şâh
- 5758.Kızı-y-ıdı Behmen-i şâhuñ Hümây
Key hired-mend-idi vü hem pâk-rây
- 5759.Resm-i Zer-düş-idi dîni Behmenüñ
Bir İlâhî dîni yog-ıdı anuñ
- 5760.Küfr ü ilhâd anda bi-had çog-ıdı

Mezhebinde hıll ü hurmet yog-ıdı

5761.Oglı var-ıdı hümâdan Behmenüñ
Adını Dârâ komışlardı anuñ

5762.Kiçi-y-ıdı ol ulalınca Hümây
Memleketde_ıldı otuz yıl kedhüdây

5763.Ol irişdükte anı itdi şehriyâr
Aña virdi her ne var şehr ü diyâr

5764.Tahta oturup çün ol urındı tâc
Rûm ilinden istedi mâl u harâc

5765.Leşkeri-y-le yüriyip çoh kıldı ceng
İtdi Rûm ehline yiryüzini teng

PÂDİŞÂHÎ-Yİ DÂRÂ PÜSER-İ BEHMEN

5766.Oniki yıl taht ıssı ıldı ol
Pes ecel irişübenüñ öldi ol

5767.Gân tahta irürür çarh-ı bülend
Geh ider tâbût içinde tahta-bend

5768.Çünki başdan gidecekdür soñra baht
Ne gerekdür kimseye pes tâc u taht

5769.Ölmek olmaduhda hoşdur mâl u genc
Yohsa n'olur kişiye ol mâr u renc

5770.Öldi dârâyı çü dehr itdi tebâh
Oglı Dârâb ibni Dârâ pâdişâh

PÂDİŞAHÎ-Yİ DÂRÂB BİN DÂRÂ

5771.K'andan irişdi saña bu tâc u taht
Şehr ü iklîm ü diyâr u mülk ü baht

5772.Senden öñdin pâdişahlaruñ kamu
Kıssası budur ki didüm iy ulu

5773.Bunlaruñ hâlini çün bildüñ temâm
Garre olma devlete iy nîg-nâm

5774.K'anlara ne itdi-y-ıse bu cihân
An'idiser saña dahı bî-gümân

5775.Ger dilerseñ saña câvîd ola baht

İtmesün garre seni bu tâc u taht

5776.Çünkü kişi ölecek-durur yakîn
Pes nedür dünya-y-ıçun bu kibr ü kîn

5777.Baht var dut çünkü yoh ömre direng
Tahtdur pes tahta-i tâbût-ı teng

5778.Çün bu sözleri işitdi tâc-ver
Oldı gönli gussadan zîr ü zeber

5779.Bildi kim kimseye kalmaz tâc u taht
Âkıbet itdi kendüye hüsn-i amel

5780.Cân u gönülden perîşân oldı ol
İtdügi işe peşimân oldı ol

5781.Hâtırından giderüp hırs u amel
Âdet itdi kendüye hüsn-i amel

5782.Tenğrınıñzikri-y-le durdı oturdı ol
Bid'at ü zulmı kamu götürdi ol

5783.AHMEDÎ çün mâl u mülküñ hâlini
Bildüñ ol sultanlaruñ ahvâlini

5784.Olayum diyü ganî kılma heves
Kendüzüñe fakrı kılğıl fahr pes

5785.Fakr bilgil pâdişahlığı yakîn
Fakrdur var-ısa sultanlıh hemîn

**DÂSİTÂN-I SÜ'ÂL-İ İSKENDER EZ-AHVÂL-İ MÜLÛKÎ PİŞ EZ-Û
BÛDEND VE BA'D EZ-Û H'ÂSTEND BÛDEN**

5786.Söylegil iy andelîb-i nagme-gûy
Kim sen iletdüñ kamudan sözde gûy

5787.Sözlerüñ tûtî-sıfat şîrîn-durur
Kim saña şekker yimek âyîn-durur

5788.Söylegil bir dâsitân-ı ma'nevî
Kim sözüñden cân u dil ola kavî

MATLA'-I DÂSİTÂN

5789.Çünkü nicedür işitdi tâc-ver
Kendüden öñdin geçenlerden haber

5790.Didi_Arestû'ya iy dâna şâd ol

Her kayudan dünyaya âzâd ol

5791. Bir dahı var hâcetüm binüm saña
Anı dahı hem beyân itgil baña

5792. Çarh ben gitsem kimi getüriser
Saltanat tahtında kim oturisar

5793. Didi_ Ârestû kim bunı ben bilmezem
Bilmedügüm işde da'vî kılmazam

5794. Bilmedügin bilürem diyen kişi
Yañlış olur her ne işlerse işi

5795. Hızr-durur Hızr bu ilmi bilen
Ol-durur bu ukdenüñ hallin kılan

5796. Cidd ü cehd ü sa'y-ile ol tâc-ver
Hızra irişmeklige buldı zafer

5797. Didi aña her ne ki_ olısar it ulu
Levh-i Mahfûz içre-durur yazılı

5798. Anda ne varsa melâik bildiler
Enbiyâya cümle şerhin kıldılar

5799. Enbiyânuñ suhfinı sen ser-te-ser
Yâ itmişsin ey_sâhib-nazar

5800. Suhf-ı İbrâhîm ü Âdem lâ-muhâl
Sendedür dahı kitâb-ı Dâniyâl

5801. Levh-i Mahfûza dahı idüp nazar
Hıfz idersin oradan dürlü habar

5802. Evliyânuñ yohdur öñinde hicâb
Gayb nesne itmez olardan ihticâb

5803. Hem dahı İlm-i Ledünnî sendedür
Kim kamu gaybuñ kilîdi andadur

5804. Baña şerh it kim ben ölicecek cihân
Memleket-çün kimleri_ idiser ayân

5805. Hızr Zülkarneyn şâha söyledi
Ölicecek ol n' olısar şerh eyledi

5806. Did'anı aña k'ol öldükde ayân
Fitne tolduğın ser-â-ser bu cihân

5807.Didi_anı k'ardınca_ anuñ çoh rûzigâr
Oldı halkuñ arasında gîr ü dâr

5808.Kimseye İrân mukarrer olmadı
Zulmden hergiz imâret kalmadı

5809.Her kişi bir şehirde oldı emîr
Toldı yiryüzi ser-â-ser dâr u gîr

5810.K'anlara dirler Tavâyif begleri
Kamunuñ Eşgânilerdi ser-veri

5811.K'anlar-ıdı dâr-ı mülk içre kalan
Taht u tâcı dutuban fermân kılan

ZİKR-İ MÜLÛK-İ TAVÂYİF-İ BA'DE EZ-İSKENDER

5812.Oldı_olardan Eşk on yıl mülk-gîr
Oldı altmış yıl Şâbûr emîr

5813.Old'anuñ ahdinde İsi âşikâr
Virdi peygambarlıh aña Kirdikâr

5814.İtdi Cevder zin dah'on yıl hükm-ile
Pîjen irişdi yigirmi bir-ile

5815.Hâkim olmahlıh temâmet ol yire
Hem yigirmibir yıl oldı Cevder'e

5816.Çünkü Cevder öldi degdi ol yöre
Ontokuz yıl Cevder ibn-i Cevder'e

5817.Kırh yıl Kıs-idi anda şehriyâr
Onyidi yıl Hürmüz-idi tâc-dâr

5818.Oniki yıl dahı dutdı Erdevân
Kırhdört yıl dahı Kısâ bil ayân

5819.Pes Belâş irdi yigirmibir yıla
Erdevân idi melik on yıl ile

5820.Oldı eyyâmında_ anuñ çoh gîr ü dâr
Ne vilâyet kaldıne şehir ü diyâr

5821.Âkıbet düşmen murâdınca_ oldı ol
Kahr-ıla nâ-çâr u nâ-kâm oldı ol

5822.İy niçe Şâbûr u niçe Erdevân
Kim gelüp bundan gider iy er devân

5823.Ol mülûküñ kim Tavâyifdür be-nâm
Erdevânda ahdi olmışdur temâm

5824.Üşbu müddetde imâret itdiler
Pes helâk olup ser-â-ser girdiler

Fİ'L-MEV'İZE VE'L-İ'TİBÂR

5825.İy niçe tolu tavâyif kim cihân
Zâhir idiben kılur girü nihân

5826.Gürg-tab' olup muhâbâsuz bu yir
Ger gedâ vü ger melik ne bulsa yir

5827.Şahlaruñ yasin dutar bahgıl göge
Kim tonı nice boyanupdur göge

5828.Çarh kim irte gice döner devân
Bunda ne Hürmüz kor u ne Erdevân

5829.Kişi ger Kistrâ ola vü ger Belâş
Ömri kesr olıbanuñ gider belâş

5830.Dünyanuñ kahr u belâsı çoh-durur
Kimseye mihr ü vefâsı yoh-durur

5831.Pes aña âkıl olan inanmaya
Âb u gildür hiç aña tayanmaya

5832.İy bugün tekye iden âb u gile
Düşer-iseñ yarın itmegil gile

5833.Bunda gelen çünki bilürsin gider
Gel sürilmedin buradan gid er

5834.Göñlüñi bağlamagıl sen bu yire
Âkıl ol kim buni ögmeye yire

5835.Çün işitdi İskender üşbu sözleri
Kan yaş içre gark oldı gözleri

5836.Pes didi anlar gidicek kim gele
Mülk-i İrânı müsahhar kim kıla

ZİKR-İ MÜLÛK-İ SÂSÂN EVVEL-İ PÂDİŞÂHÎ ERDEŞİR

5837.Hızr didi anı kim Eşgâniler
Gidübenüñ geldiler Sâsâniler

5838.Evveli-y-idi olaruñ Erdeşir

Kârdân u âdil-idi vü dilîr

5839.Mihr idüp aña sipihr ü mihr ü mâh
Oldı İrân'a ser-â-ser pâdişâh

5840.Sâhib-i insâf-ıdı vü âdil ol
Memleket işinde-y-ıdı kâmil ol

5841.Kamu vîrânı 'İmâret eyledi
Adl-ile halka imâret eyledi

5842.Mülki hükmine mukarrer kıldı ol
Kanda ser-keş var müsahhar kıldı ol

5843.İtmedi hergiz himâyet müfside
Komadı yirüñ yüzinde mefsede

5844.Olup ondört yıl u altı ay pâdişâh
Gitdi Şâbûr oldı_ anuñ ardınca şâh

PÂDİŞÂHÎ-İ ŞÂBÛR BİN ERDEŞÎR

5845.Erdeşîrüñ oğlı-dı ol nîg-baht
Kim sezâ-vâr-ıdı aña mülk ü baht

5846.Devletinden gidicek ân rûzigâr
Mâni-yi Zendîk oldı âşikâr

5847.Zendeka-y-la dürlü sözler söyledi
Halkı bâtil dîne da'vet eyledi

5848.Ehremen var didi Yezdân-ıla ol
Egrilikle didi şerre togrı yol

5849.Didi hayruñ Hâlîkı Yezdân-durur
Lîki şerrüñ fâili Şeytân-durur

5850.Mezheb andan aldı ehl-i i'tizâl
Oradandur anlara bu kıl ü kâl

PÂDİŞÂHÎ-Yİ HÛRMÛZ BİN ŞÂBÛR

5851.Oluban Şâbûr otuz yıl pâdişâh
Gitdi degdi Hürmüz taht u külâh

5852.Atadan çün Hürmüze irişdi baht
Buldi ârâyiş anuñla tâc u taht

- 5853.Mâni-yi Zendîkî ol kıldı helâk
Anuñ etbâ'mı cümle itdi hâk
- 5854.Hucceti-y-le_ itdi beyân tevhîdi ol
Halka gösterdi nicedür togrı yol
- 5855.Dînüñ asl u fer'ini kıldı beyân
Haşr u neşrüñ hâlini itdi ayân
- 5856.Saltanat tahtında gönli şâd-iken
Cânı derd ü rencden azâ-iken
- 5857.İrdi ecel çengâlini nâ-geh Hürmüze
Şöyle kim telh oldı aña her meze
- 5858.Ne meze umısar ol kim akı var
Oradan kim ola_ anuñ tiryâkı mâr
- 5859.Çün cihânda dirilen bî-şekk ölür
Pes kamu şîrînligi anuñ telh olur
- 5860.Kahrı var dehrüñ eyü âyîni yoh
Telhi b-had çoh velî şîrîni yoh
- 5861.Ne-durur bu çarh-ı lu'bet-bâz pes
Dürlü lu'bet zâhir ider her nefes
- 5862.Sen ki sûretçe bugün uş dirisin
Bi-şek ol lu'betlerüñ hem birisin
- 5863.Diridür sûretçe lu'bet iy ulu
Lîki_ölüdür ol hakîkatde ölü
- 5864.Debreden anı dahı ayruh-durur
Varlıh oldur bu arada yoh-durur
- 5865.Pes bu dirligüñ senüñdirlik degül
Buña tekye itdügüñ erlik degül
- 5866.Ulu ol kim zinde-i câvîd ola
Hiçdür ölen eger Cemşîd ola
- PÂDİŞÂHÎ-İ BEHRÂM BİN HÜRMÜZ**
- 5867.On yıl u bir ay olup pâdişâh
Çarh anuñ dah'itdi eyyâmın siyâh
- 5868.Dutdı tâc u tahtını Behrâm anuñ
Mülk fermânına oldı râm anuñ
- 5869.Memleket tahtında çün oturdı ol

Dünyadan bid'atleri götürdi ol

5870.Yüriyüp Tûrân'a itdi kâr-zâr
Aldı ol ilden besî şehri ü diyâr

5871.Rûzigârında ser-efrâz oldu tâc
Şâm u Mısr u Rûm'dan aldı harâc

5872.Memleketden zulmü ol dûr eyledi
İl ü şehri cümle ma'mûr eyledi

5873.Dönicek biş yıl murâdınca felek
Anı dahı eyledi ol hâk-i yek

5874.Çarh dülâbınuñ işi bu-durur
Geh irürür göge geh yire urur

PÂDİŞÂHÎ-İ BEHRÂM BİN BEHRÂM

5875.Olıcah Behrâmuñeyyâmı siyâh
Kıldılar Behrâm bin Behrâmı şâh

5876.Saltanat tahtında çün oturdu ol
Ma'delet kânûnını götürdi ol

5877.Devlet erkânına itmedi nazar
Oldı ahinde zelif ehl-i hüner

5878.Lâ-cirem dörd ay hemîn diri_ oldu ol
Pes müfâcâ irişiben öldi ol

5879.Çarhı sorarsañ k' işi ne ol-durur
Kim diri komaz kamuyı öldürür

5880.Getüriben giderür bî-ihtiyâr
Pes anı sevmeyenedür baht yâr

5881.Baht yâr olmah diler-iseñ saña
Olmagıl magrûr sen hergiz aña

PÂDİŞÂHÎ-İ PÜRSÎ-İ BEHRÂM

5882.Degdi oğlu Pürsi'ye soñında taht
Yidi yıl biş ay aña yâr oldu baht

5883.Pes cihân andan dahı yüz döndürüp
Azl itdi anı menşûrın dürüp

5884.Her ki dirlik ivine girdi ölür

Yaluñuz Hakdur ki ol bākī kalur

5885.Ne getirürsin yirüñ adın dile
Diler-iseñ Kuds gül-zârın dile

5886.K'anda olan kişi râhatda olur
Burada kalan cerâhatla ölür

PÂDİŞÂHÎ-İ ŞÂBÛR BİN PÛRSÎ

5887.Pürsi ardınca gelüp Şâbûr şâh
Oldı İrân kişverine pâdişâh

5888.Âkıl u hem sâhib-i insâf-ıdı
Adı anuñ Şâbûr-ı Zül'l-Eknâf-ıdı

5889.Kanda müfsid buldı-sa kıldı helâk
Yiryüzini fitneden ol itdi pâk

5890.Çünki müfsid ola gider mefsede
Muslih-iseñ rahm itme müfside

5891.İtdi ahdine hurûc anuñ Arab
Katl ü gâret eylediler bî-sebeb

5892.Kâzime-y-le ol kalâyıldan eyâd
Dürlü dürlü itdiler şerr ü fesâd

5893.Kamusın Şâbûr idiben helâk
Fitneden yiryüzini cümle pâk

PÂDİŞÂHÎ-İ YEZDCERD ZÜ'L-EKNÂF

5894.Yitmiş iki yıl sürüp ol mülk ü baht
Öldi degdi Yezdecird'e tâc u taht

5895.Müfsid ü bed-ahd ü bî-dîn-idi ol
Zâlim ü şûm u bed-âyîn-idi ol

5896.Halka itdi bî-kerân cevr ü cefâ
Yiryüzinde komadı hergiz safâ

5897.Kanda kim irdi hasâret eyledi
Yahdı vü yihdı vü gâret eyledi

5898.Ulu kiçi aña nefrîn itdiler
Adın anuñ şâh-ı bî-dîn itdiler

5899.Az zamân anuñ olıban tâc u taht

Nâ-geh andan dahı yüz döndürdi baht

PÂDİŞÂHÎ-İ BEHRÂM-I YEZDCERD

5900. Geldi ardınca anuñ Behrâm-ı Gûr
K'aña arslan râm-ıdı itdükde zûr

5901. Bir kader-endâz-ıdı kim çarh-ı pür
Salmadı ohı bigi bir çarha tîr

5902. Adl-ile olmışdı dillerde mesel
Bezî içinde yog-ıdı aña bedel

5903. Mülk içinde adle bünyâd eyledi
İlleri lutfi-y-la âbâd eyledi

5904. Olıcah Behrâm'a Hakdan behre tâc
Râm olup Rûm aña virdiler harâc

5905. Hem Hazar halkı-y-ıla ol itdi ceng
Kıldı pehnâsın yirüñ anlara teng

5906. Her yaña kim yürüdi Behrâm-ı Gûr
Lîki düşüp oldı nâ-geh râm-ı gûr

5907. Oldı İrân ucdan uca aña râm
Aldı Tûrânuñ dahı nısfın temâm

5908. Gerçi ser-keş kopdı Behrâm-ı Gûr
Lîki düşüp oldı nâ-geh râm-ı gûr

5909. İder-iken gûrı ol peyveste sayd
Gûrı gör kim anı nice kıldı kayd

5910. Gûrdur ol gürg kim ne bulsa yir
Şîr ü bebr'illâ ki olmaz hiç sır

5911. Yir bu yir ne bulsa ider nâ-bedîd
Dahı sözi işbu kim "hel min-mezîd"

5912. Gûre girür çün ecel şîr'ide zûr
Çarh Behrâmına kim Behrâm-ı Gûr

PÂDİŞÂHÎ-İ YEZDCERD-İ PÜSER-İ BEHRÂM

5913. Çün yigirmi_üç yıl sürüp Behrâm baht
Öldi oğlu Yezdcerd'e degdi taht

5914. Kopdı ol dâna vü hem perhîz-kâr

Mülk-gîr ü pür-dil ü düşmen-şikâr,

5915. Atası resmini tagyîr itmedi
Ma'diletde hîç taksîr itmedi

5916. Hayr-ıdı halka müdâm endîşesi
Lutf u hüsn ü hulk-ıdı hem pîşesi

5917. Lâ-büd efzûn oldu hergün devleti
Yücelüp çarha irişdi rütbeti

5918. Virdi añâ Şâm u Mısr u Rûm bâc
Aldı Fagfûr-ıla Hakândan harâc

5919. Onsekiz yıl oldu vü dörd ay şâh
Pes anuñ dah'oldı eyyâmı siyâh

5920. Kimi komışdur müselleme rûzigâr
Yâ kimi eylememişdür dil-figâr

5921. İrte gice dönderüp ay u günin
Bu kamu halkuñider kara günin

5922. Assı ne olmah Kubâd u Yezdigird
Çün gidüp bunda kalur itdügi gird

5923. İy ki niçe Yezdecird ü Keykûbâd
Topragın od u suya savurdu bâd

PÂDİŞÂHİ-İ PİRÛZ BİN YEZDCERD

5924. Tâc u tahtı çün koyup ol gitdi zâr
Mülk tutdı oğlu Pîrûz'a karâr

5925. Memleketde çünki Pîrûz oldu şâh
La'l-ıla pîrûzeden düzdi külâh

5926. Âdil-idi itdi hoş dâd u dihiş
Râst düşdi her nekim dutdı-y-sa iş

5927. Pâdişâhlıh ne-durur dâr u dihiş
Yoh-durur serverlere andan yig iş

5928. Kişi kim halka dihişle dâdı yoh
Memleketde hîç anuñ bünyâdı yoh

5929. Kanda kim vardı-y-sa Pîrûz oldu ol

Nireye yüz dutdı-y-ısa buldı yol

5930.İl ü gün ahdinde_anuñ ma'mûr-ıdı
Cümle âşûb u belâdan dûr-ıdı

5931.Çünki yigirmi tokuz yıl ol temâm
Saltanat sürdi cihânda şâdu-kâm

5932.Nâ-geh öliben ümîdi oldu lâş
Kaldı_iki oğlu Kubâd-ıla Belâş

5933.Mülk çünk'oldı anuñ bünyâdı bâd
Çoh nizâ' itdi Belâş-ıla Kubâd

5934.Yitiben bî-had kılıcda cân u baş
Memleketde soñra baş oldu Belâş

PÂDİŞÂHI-İ BELÂŞ BİN PİRÛZ

5935.Çün Belâş oldu cihânda şehriyâr
Kaht toldı her ne var şehr ü diyâr

5936.İnmedi gökden yire bir katre âb
Ucdan uca yiryüzün tutdı serâb

5937.Olduğı-y-ıçun Belâş ehl-i ziña
Oldı zâhir mülk-i İrânda vebâ

5938.Zâni olma zînhâr iy pâk zât
Kim vebâ tolar zinâdan bu cihât

5939.Zâni olan kişi olur bed-küniş
Yoh-durur hergiz zinâdan bed-ter iş

5940.Her ki zânî ola ömri kem olur
Devleti bünyâdı nâ-muhkem olur

5941.Çünki düşe halkuñ içinde zinâ
Zâhir olur dünyada kaht u vebâ

5942.Çün zinânuñ adı ola fâhişe
Mü'min-i pâk itmeye meyl ol işe

5943.Şâh olup dört yıl u resm-ile belâş
Gitdi birgün nâ-geh aradan Belâş

5944.Memleket çün kimseye kalur degül
Kimsene bunda karâr alur degül

5945.Ger Kubâd ola vü kişi ger Belâş
Bâd bigi aradan gider belaş

5946.Pes anuñ-çun ne gerekdür iy acab
Bunca derd ü mihnet ü renc ü taab

5947.Nesne kim durmaz gider ol an-karîb
Aña ne ragbet gerekdür iy rakîb

PÂDİŞÂHÎ-İ KUBÂD BİN PİRÛZ

5948.Çünkü ûmıdı Belâşuñ oldı bâd
Saltanat tahtında oturdı Kubâd

5949.Oldı yir ser-sebz iniben âb u nem
Hoş yeşerdi sebze vü gül-zâr hem

5950.Kûh u sahrâoldı bâg u mürg-zâr
Söyledi her şâhda yüz mürg zâr

5951.Yiryüzi oldı tâze şöyle kim Behişt
Kûh u sahrâ toldı ucdan uca kişt

5952.Oldı Mezdek rûzigârında bedîd
Kıldı da'vî-yi nübüvvet ol pelîd

5953.Küfr ü ilhâd-ıla çoh söz söyledi
Mülki bid'atla müşevveş eyledi

5954.Dîn diyü kıldı çoh söz söyledi
Uydılar müfsidler aña bî-şümâr

5955.Toldı kişver zulm u zâyil oldı dâd
Şöyle kim def'in idemedi Kubâd

5956.Her yañadın düşdi fırsat müfside
Zendaka toldı cihân u mefsede

5957.Kırhiki yıl şâh olup öldi Kubâd
Old'anuñ dahı kamu ûmîdi bâd

PÂDİŞÂHÎ-İ NÛŞÎN-REVÂN-I ÂDİL

5958.Çünkü anda kalmadı hûş-ı revân
Dutdı yirin ogl'anuñNûşîn-Revân

5959.Kamu işde çünkü kâmil geldi ol
Adı-la sultân-ı âdil oldı ol

5960.Adli eyl'itdi cihânda âşikâr

K'adı kaldı tâ-kıyâmet yâdigâr

5961.Ol kişi_ola dünya vü ukbâda şâd
Kim ide Hakkı añıban halka dâd

5962.Mezdeki dutıban oda yahdı ol
Ol yavuz dînüñ binâsın yıhdı ol

5963.Aldı Rûm-ıla Hazardan mâl u bâc
Hindden İrâna çekdürdi harâc

5964.Adı-ile olup cihânda şâd-kâm
Kırhyidi yıl saltanat sürdi temâm

CÜLÛS-I ÂRZÛ ÜMMİD BER-TAHT

5965.Çünkü Tûran Duhtden dûr oldu baht
Andan ârzû ümmîde taht

5966.Mülk ucdan uca toldı gîr ü dâr
Fitnesüz ne şehr kaldı ne diyâr

5967.Ol alâyimden ki görmişdi Acem
Zâhir oldu her eser bî-bîş ü kem

5968.Pes zafer bulup Arab kıldı zuhûr
Taht u baht oldu Acemden cümle dûr

5969.Ârzû ümmîd olup dörd ay şâh
Gidüp oldu taht u eyyâmı siyâh

5970.Ol ölice Ferruha irişdi taht
Ol dahı bir ayda bağladı raht

5971.Buraya kim geldi kim ol gitmedi
Çarh-güster kimi dil-rîş itmedi

5972.Kaygu odına sala biñ Ferruhı
Kahr yiline virür biñ gül-ruhı

PÂDİŞÂHİ-İ YEZDECİRD-İ ÂHİR EZ-MÜLÛK-İ ACEM

5973.İtdiler pes Yezdecird'i şehriyâr
K'ol-ıdı Pervîze şehden yâdigâr

5974.Anda hatm oldu selâfîn-i Acem
Gitdi_olardan mülk ü tâc u taht hem

5975.Zâhir olıban Halîlüñ milleti

Tutdı İrânı Muhammed ümmeti

5976.Mu'cizâtın çün Resûl itdi ayân
Girdi gönlinden kamu halkın gümân

5977.Feyz-i rahmet indi Hakdan mevc mevc
Dîne girdiler halâyık fevc fevc

5978.Râyeti İslâmuñ oldu ser-firâz
Dîne girdi Mısır u Şâm-ıla Hicâz

5979.Hem-reh oldu feth-ile nusret aña
Emri vü nehyi yürüdi her yaña

5980.Şer'ine girdiler anuñ hâs u âm
İns ü cinn ü maşrık u magrib temâm

5981.Altmış üç yasına çün irdi Resûl
İsdedi maksûdına râh-ı vusûl

5982.Kasd itdi mebd'e' âyîne_irmege
Varup anda Hak likasın görmege

5983.Mahv olmah diledi andan sıfât
Tâ ki gidüp gayr aradan kala Zât

5984.Her murâdı çünkim olurdı kabûl
Ol murâda dahı hem irdi Resûl

ZİKR-İ HİLÂFET-İ EBÛ BEKR-İ SİDDK (R.A)

5985.Gidüben Sıddîkı kodı pîşivâ
Kim ideler ümmet aña iktidâ

ZİKR-İ BİAT-I ALİ-Yİ MURTAZÂ BÂ-EBİ BEKR-İ SİDDİK

5986.Bî'at itmedi_evvel anuñla Ali
Olmadugı-y-çun aña hüccet celf

5987.Çünki Bû Bekr itdi rûşen hüccetin
Ol dahı akd itdi_anuñla bîatin

5988.Lâ-cirem aña sahâbe iktidâ
İdüben kıldılar anı pîşivâ

5989.Yoldaşı-y-dı sıdk-ıla tevfiik anuñ
Adı oldu dünyada Sıddk anuñ

5990.İki yıl üç ay hem on gün ü temâm
Ol hilâfet mesnedinde_oldı imâm

ZİKR-İ HİLÂFET-İ ÖMER BİN EL-HATTÂB

5991.Çünkü Sıddîk itdi dünyâan güzer
Yirine anuñ halîfe_oldı Ömer

5992.Bir halîfe kopdı ol sâhib-şükûh
İlmde bahr-ıdı vü hilm içre kûh

5993.Dirre salduhda Medîne'de Ömer
Kaysaruñ cânına düşerdi hatar

5994.Fazlına anuñ yiter bî-kâl ü kîl
El-cebel yâ sâriye rûşen-delîl

5995.Bâtıluñ Hakdan çü farkın kıldı ol
Adı-la dillerde Fârûk oldı ol

5996.Virbidi leşker Medâyinden yaña
Oldı feth ol memleket cümle aña

5997.Hem Nehâvend ü Dımışk u Mısır u Şâm
Dahı Beyte'l-Makdis etrâfi temâm

5998.Altı ay on yıl çü vâlî oldı ol
Nâ-gehân bir kul elinde öldi ol

ZİKR-İ HİLÂFET-İ OSMÂN BİN AFFÂN

5999.Pes hilâfet oldı Osmânuñ yakîn
Girdiler hükmüne anuñ ehl-i dîn

6000.Rûzigârında_oldı anuñ Yezdecird
Kim Acem olmışdı aña cümle gird

6001.Anda alındı kamu mülk-i Acem
Feth oldı_Astahr u dahı mülk hem

6002.Dîne giricek Mu'âvye_anı Resûl
İtmiş-idi vahy yazmaga kabûl

6003.Vahy yazarken hıyânet düzdi ol
Âl-i İmrânı_Âl-i Mervân yazdı ol

6004.Çünkü peygamber hıyânet gördi_anı

Lâ-cirem kim ol yöreden sürdi_anı

6005.Oradan merdûd olmuşdı müdâm
Tâ olunca ümmete Osmân imâm

6006.Çün hilâfet tahtına oturdı ol
Anı yüce mansıba yitürdi ol

6007.Anuñ-ıçun halk bed-dil oldılar
Katline_anuñ cümle kâil oldılar

6008.Çoh bahâne dahı_idüp n'idem saña
Katli vâcibdür didi cümle aña

6009.Girdiler evinde anı dutdılar
Hancer ü kılıc-ıla katl itdiler

6010.On iki yıl çün hilâfet itdi ol
Yirini virüp Alî'ye gitdi ol

ZİKR-İ HİLÂFET-İ ALİ İBN EBİ TÂLİB (K.V)

6011.Ümmete çünkim Alî oldu imâm
Hall ü akd-i şer' aña kaldı temâm

6012.Hâricîler itdiler aña hurûc
Memleket tahtına itmege urûc

6013.Ol Mu'âvîye-y-di âgâz eyleyen
Halkı birbirine nâ-sâz eyleyen

6014.Çünki buldı mekr itmeklige yol
Çohları kıldı Alî'ye düşmen ol

6015.Amr ibn-i Âsa çok nesne virüp
Tâbi' itdi kendüzine uydurup

6016.Fâsık u müfsid nekim vardı_anlara
Uydılar düşmen olıban Haydara

6017.Ol havâric çünki kuvvet buldılar
Haydar-ıla çoh husûmet kıldılar

6018.Haydaruñ işi-y-di şîr-âne kıtâl
Anlaruñdur dimne bigi mekr ü âl

6019.Üşbu nev'-ile hilâfetde Alî
Dâr u gîr içinde-y-idi ol velî

6020.Biř yıl olıcah hilâfetde temâm
Gitdi vü halka Hasan oldu imâm

6021.Çünki gördi ol havâricden inâd
Ümmet içinde_olmasun diyü fesâd

6022.Oturup biř ay hilâfetde hemîn
Kendüzin azl itdi ol pâkîze-dîn

6023.Pes Mu'âvye kim degüldi sıdkı pâk
Ol imâmı zehrle_itdürdi helâk

6024.Dört Yâruñ müddeti_olduhda temâm
Âl-i Mervân oldılar halka imâm

ZUHÛR-I MU'ÂVİYE MÜTEGALLİB VE ADÂVET Ü BÂ-ALÎ VE BE-CEMİ'-İ HÂNEĐÂN-I NÛBÛVVET

6025.Evveli-y-idi Mu'âvîye_anlaruñ
Hânümânlar düşmeni vü cânlaruñ

6026.Ol işe_istihkâksuz vurdı kadem
Memleketde kıldı çoh cevr ü sitem

6027.İrdi andan ümmete bî-had ziyân
Oldı dürlü fitneler andan ayân

6028.Dimne bigi dürlü efsûn kıldı ol
K'Âl-i Haydardan hilâfet aldı ol

6029.Ol-ıdı terk-i emânet eyleyen
Ol-ıdı dînde hıyânet eyleyen
ZİKR-İ İMÂRET-İ YEZÎD BİN MU'ÂVİYE

6030.Çün yigirmi yıl imâret itdi ol
Yirini virüp Yezîde gitdi ol

6031.Çün hükûmet mansıbın buldı Yezîd
Halka şerri dem-be-dem oldu mezîd

6032.Yog-ıdı göñlinde Hakdan ters ü bâk
Kıldı evlâdın nebînüñ ol helâk

6033.Hem Hüseyñ üstine deřt-i Kerbelâ
Oldı şerrinden anuñ kerb ü belâ

6034.Gerçi dirler yoh-durur la'net aña
La'netu'llâhî aleyh kerb ü belâ

6035.Gerçi dirler yoh-durur la'net aña

La'netu'llâhî aleyh öñden soña

6036.Yidi ay üç yıl imâret eyledi
Halka çoh dürlü hasâret eyledi

6037.Zulm u bid'atde olıban ol pelîd
Kaldı soñında Mu'âveyh ibn Yezîd

ZİKR-İ MU'ÂVIYE BİN YEZİD VE İ'RÂZ-I Ū EZ-İMÂRET

6038.Nevbet-i mülk iricek aña yakîn
İtmedi anı kabûl ol pâk-dîn

6039.Diidi kim bu halka olmah pîşivâ
Mekr ü tezvîr-ile nice_olur revâ

6040.Çünkü ben bu işe lâyük olmayam
Bunu dutmahlığa ragbet kılmayam

6041.Âl-i Mervândan irişüp zulm eli
Âl-ila Haydardan aldılar ili

6042.Nic'ola halka halîfe ol kişi
Kim ola tezvîr ü mekr anuñ işi

6043.Çünkü oldı mekr şeytân pîşesi
Olmaya ol mü'minüñ endişesi

6044.Ol kişiye k'ışı ola şeytanat
Lâyık olmaz da'vi itmek saltanat

6045.Çünkü kalmaz memleket elden gider
Kişi nâ-hak dutuban anı n'ider

6046.Memleket Hakdan hilâfet oldı pes
Müşkil aña nâ-hak itmeklik heves

6047.Memleket sadrına ol lâyük ola
Kim kamu halk üstine fâik ola

6048.Ola akl u ilm-ile mevsûf ol
Lutf u adl ü afv-ıla ma'rûf ol

6049.Râyı sâyib ola vü fikri dürüst
Cenkde çâlâk ü sulh içinde cüst

6050.Hulkda pest ola himmetde bülend
İtmeye nâ-hak yire halka güzend

6051. Tâat ola irte gice pîşesi
Hâlıkun zikri ola endîşesi
6052. Ulu kiçi dâim andan şâd ola
Dâdı-y-ıla memleket âbâd ola
6053. Bile evvel her işi tahkîk-ile
Pes şerîatla anuñ hükmin kıla
6054. Hükm itse kimseye meyl itmeye
Düşmene oğlını râcih dutmaya
6055. Hak rızâsın isdemekde_ola hemîn
Olmaya nefsi hevâsına rehîn
6056. Devletüm var diyü magrûr olmaya
Kendüzini kimseden yig bilmeye
6057. Üşbu fikretle ol işi itdi terk
Pes yapışdı zühd-ile takvâya berk
6058. Dünya Ukbîde saâdetlü kişi
Dutmaya hergiz başarılmaz işi
6059. Her işi başarabilem sanmagıl
Hiç işe bî-tecribe el sunmagıl
6060. Duttı_ anuñ yirini Mervân-ı Hakem
Zulm-ıla yidi ay yâhûd bî ü kem

İMÂRET-İ HAYT-I BÂİL MERVÂNÜ'L-HAKEM

6061. Zâlim oldugı-y-ıçun ol bî-edeb
Hayt-ı Bâtil urdılar aña lakab
6062. Aybdan seçmezdi kim nedür hüner
Sûretâ âdem tabîatda-y-dı har
6063. Çün ecel çenginde oldı ol esîr
Oğlı_ anuñ Abdu'l-Melik oldı emîr

İMÂRET-İ REŞHÜ'L-HACER ABDU'L-MELİK BİN MERVÂN

6064. Buhl-ıla_ oldı dünyada_ eyle nâmaver
Kim adını urdılar Reşhü'l-Hacer
6065. Koptı ahdinde anuñ Haccâc-ı şûm
Kıldı âbâd anları me'vâyı bûm

- 6066.İtdi ol cümle Irākkeyni harâb
Kıldı mecmû-ı Horâsânı yebâb
- 6067.Mü'min ü kâfirde kimse_andan beter
Görmedi vü görmeye bir bed-güher
- 6068.Sûret ü sîretde-y-idi tolu ayb
Atası urmışdı adını Külayb
- 6069.İRte gice halka cevri-idi işi
Oldı zulmı-y-ıla nâ-hak hak kişî
- 6070.Altıyüzbiñ kişî iderler kıyâs
Kim eli-y-l'öldürdi ol nâ-hak-şinâs
- 6071.Gördi_anuñ zulmından Âl-i Mustafâ
Katl ü nehb ü mihnet ü cevri ü cefâ
- 6072.Âkıbet sil-renc-ile ol bed-siyer
La'netullah gitdi fî-nâru's-sakar
- 6073.İki yıldan soñra k'öldi ol la'în
Gitdi hem Abdu'l-Melik dahı hemîn
- 6074.Onsekiz yıl halka hâkim oldı ol
Pes ecel çengâlı irüp öldi ol
- 6075.Kimseye dünyâda bir cev virmedi
Ukbaya bir kâh anuñla varmadı
- 6076.Mâl çün sen gidicek elden gider
Kom'anı ayruga yi yidür gider
- 6077.Sinüñ ol kim yidürüben yiyessin
Yohsa anı nişe binüm diyessin
- 6078.Zî yavuz kim aduñ idessin bahîl
Olası mâluñ ola halka sebîl
- 6079.Çün ecel irişüp öldi ol pelîd
Yirine_oturdı anuñoglı Velîd
- İMÂRET-İ VELÎD BİN ABDU'L-MELİK**
- 6080.Çün hilâfet mesnedinde oturdı ol
Zulm u bid'at buldugın götürdi ol
- 6081.Leşker-i Türk idüp anuñla inâd

Kıldılar çok fitne vü şerr ü fesâd

- 6082.İlleri gâret idüben yıhdılar
Çoh diyâr u şehri oda yahdılar
- 6083.Hem Buhârâ ehli olup bed-gümân
Mürted oldılar dönüp dînden ayân
- 6084.Pes Velîdi _itdi Buhârâyâ revân
İbn-i Müslimle sipâhı bî-kerân
- 6085.İbn-i Müslim varup anda kıldı ceng
İtdi yiryüzini ol iklîme teng
- 6086.Yıhdı vü yahdı Buhârâyı temâm
Urdı kırdı ol diyârı hâs u âm
- 6087.Oradan oldı Semerkanda revân
Ol nevâhîde _iller aldı bî-kerân
- 6088.Hem Semerkandı dah'ol pîrûz-ger
Feth idüp buldı küffâra zafer
- 6089.Türk hânı-y-la dahı hem itdi ceng
Âhir öldürdi anı ol cengî peleng
- 6090.Hem dahı Fergânayı feth itdi ol
Oradan Hârezme varup gitdi ol
- 6091.İkiyüz biñ âdemi itdi esîr
Mâde vü ner kamu hûb u dil-pezîr
- 6092.Üşbu müddetde ki hükm itdi Velîd
Bu kamu feth ü zafer oldı bedîd
- 6093.Oldı ahdinde dahı çoh iş anuñ
Düşdi soñra bahtına teşvîş anuñ
- 6094.Ontokuz yıl yidi ay olup imâm
Çarh anuñ dahı işin itdi temâm
- 6095.Kimseye dünya vefâ kılmış degül
Kimse cevrinden emân bulmış degül
- 6096.Devri dehrüñ kahrur u cevr ü kîn
Pes hayâl ü hâdur devlet yakîn
- 6097.Çün Velîdi itdi devrân nâ-bedîd
Aldı yirini Süleymân bin Velîd

VİLÂYET-İ SÜLEYMÂN BİN VELÎD BİN YEZÎD

6098.Dâd-ger kopdı vü gâyet zâhid ol
Fâzıl u hem kâmil ü hem âbid ol

6099.Oldı ahdinde hüner her başa tâc
Buldı ilm ü fazl bâzârı revâc

6100.Memleketde hîç vîrân kalmadı
Kima anuñ devrinde ma'mûr olmadı

6101.Üç yıl olduhda melik ol nâm-aver
Gitdi vü dutdı anuñ yirin Ömer

ZİKR-İ VİLÂYET-İ ÖMER BİN ABDU'L-AZİZ

6102.K'atası Abdü'l-Azîz-idi_adıla
İtdi her hükmi cihânda dâd-ıla

6103.Buldı andan izzet Âl-i Mustafâ
Hîç kimse görmedi andan cefâ

6104.Az zamânda k'ol imâret eyledi
Çoh harâb ili imâret eyledi

6105.Fitneden hâlî-y-idi ahdinde dehr
İmin ü ma'mûr-ıdı il-ile şehri

6106.İki yıl biş ay hilâfet itdi ol
Pes ecel çengine düşüp gitdi ol

6107.Bu felek bir ejdehâdur ol nev-cüvân
Yâ bu âlimdür ü ol nev-pehlevân

6108.Yâ bu âdil pâdişâhdur nîg-baht
Kim anuñla zînet alur tâc u taht

6109.Yâ budur tedbîr-i mülk iden vezîr
Kim kamu üftâdeyedür dest-gîr

6110.Ya bu bir hayr ehlidür maksûd-bahş
Halka ider geh zer ü geh sîm bahş

6111.Mihri yoh kahrı-y-la_ ider küllin helâk
Hâkden olan n'olur soñucı hâk

6112.Bu felek tab'ında olsa-y-dı kerem
Keylerüñ olmaya-y-ıdı ömri kem

6113.Gör kızıl gül nice solar tıfl-iken
Sag-durur yaz u kış kara diken

6114.Çarh çün itdi anuñ devrin temâm
Oglı_anuñ Abdülmelik oldı imâm

ZİKR-İ VİLÂYET-İ ABDU'L-MELİK BİN ABDU'L-MELİK

6115.Memleketde ol dahı dâd eyledi
Ulu kiçi göñlini şâd eyledi

6116.Rûzigârında anuñ kânûn-ı şer'
Muhkem oldı vü müberhen asl u fer'

6117.Dört yıl bir ay imâret itdi ol
Pes ecel irişübenüñ gitdi ol

6118.Dünyanuñ işi budur didüm saña
Âkıl-ısañ magbûñ olmagıl aña

6119.Olıcah Abdülmelik ahdi temâm
Dutdı yirin kardaşı anuñ Hişâm

ZİKR-İ VİLÂYET-İ HÜŞÂM BİN ÖMER BİN ABDU'L-AZİZ

6120.Âkıl u dâna-y-ıdı ol nâm-aver
Pâk-dîn ü fâzıl u nîgû-siyer

6121.Ma'dilet vaktinde Nûşirvân-ıdı
Harb içinde Rüstem-i Destân-ıdı

6122.Hâkim olup ontokuz yıl onbir ay
Nakl itdi dünyadan ol pâk-rây

6123.Çün Hişâm öldi vü oldı nâ-bedîd
Dutdı yirini Velîd ibn-i Yezîd

ZİKR-İ VİLÂYET-İ VELİD BİN YEZİD

6124.Kopdı ol ehl-i fesâd u bî-vera'
Kıldı zâhir dünyada dürlü bida'

6125.İRte gice işi hezl ü levh-idi
Her ne kim itse hatâ vü sehv-idi

6126.Bir yıl iki_ay oldı ol vâlî hemîn
Bî-bekâdur bahtı bed-râyuñ yakîn

6127.Her melik kim ola anuñ işi lehv

Mülk elden vire idüp işde sehv

6128.Cidd-ile işle her işi itme hezl
Hezl-durur devlete menşûr-ı azl

6129.Geldi ardınca Yezîd İbnü'l-Velîd
Rây-ıla her müşkile buldı kilîd

ZİKR-İ İMÂRET-İ YEZÎD BİN VELÎD

6130.Âkıl u dâhî vü nîg-âyîn-idi
Âdil ü pâk ü hem ehl-i dîn-idi

6131.Bulmuş-ıdı fazl ahdinde revâc
Olmuş-ıdı ilm ehli başa tâc

6132.Gitdi biş ay hâkim olup ol sa'îd
Mansıbın dutdı Birâhî biñ Velîd

ZİKR-İ İMÂRET-İ İBRAHÎM BİN VELÎD

6133.Çıhdı ahdinde anuñ Mervân-ı har
Memleket dutmaga bağlanmış kemer

6134.İlleri alam diyü tevbîr-ile
Halkı tâbi' eyledi tezvîr-ile

6135.Ney bigi bağlansa yüz yirde kemer
İşleyemez key erüñ işin kem er

6136.Gerçi geh geh mekr-ile hem iş biter
Lîki bî-bünyâd olur tîzde yiter

6137.Key er-iseñ aduñı kem itmegil
İş kim ol olmaya muhkem itmegil

6138.Er olan mekri neçün pîşe ide
Yâhud olmaz işi endîşe ide

6139.Çün Birâhîm işine düşdi hâlel
Bildî kim tahtına irişür zelel

6140.Bi'z-zarûre ol işi elden koyup
Vardı bey'at itdi Mervân'a uyup

ZİKR-İ VİLÂYET-İ MERVÂN-I HAR Kİ ÂHİR-İ MÛLÛK-İ BENÎ ÜMMÎD-BÛD

6141.İki yıl altı_ay hilâfetde hemîn
Kaluban terk itdi ol işi yakîn

6142.Pes hilâfet degdi Mervân-ı Har'e

Hükmi anuñ oldı ilde yiksere

6143.Zâlim-idi zulma âgâz eyledi
Memleket işini nâ-sâz eyledi

6144.Gidicek târîhden yüz yıl dürüst
Oldı Mervânîlerüñ ikbâlî süst

6145.Devlete çün irişür ola halel
Bulınur her işde yüz dürlü zelev

6146.Fitne deryâ bigi oldı mevc-zen
Tehlûke ka'rına düşdi merd ü zen

6147.Merveden bir nev-cüvân kopdı dilîr
Kim anuñ çengâlına döymezdi şîr

6148.Ad-ıla Bû Müslim-idi ol pâk-zâd
Aña olmış-ıdı müsellemler adl ü dâd

ZİKR-İ HURÛC-I SÂHİB-KIRÂN EBÛ MÜSLİM

6149.Âkıl u dânâ-y-ıdı vü pâk-rây
Hasm-bend-idi vü hem kal'a-küşây

6150.Cümle Kur'ânı ta'allüm eylemiş
Fıkhdâ asl-ıla fer'i söylemiş

6151.Harb vaktinde musâf-ârâ-y-ıdı
Âhenîn-bâzû vü âhen-hâ-y-ıdı

6152.Saldı mülke kılıcı bir dâsitân
K'unıdıldı Rüstem-ile Dâsitân

6153.Feth miftâhı-durur kılıc yakîn
Feth andan iste isterseñ hemîn

6154.Halk anı her işde kâmil buldılar
Lâ-cirem hükmine mâyil oldılar

6155.Kılıcî-zahm-ıla ol nerr-eydehâ
Kim deminden kimse olmazdı rehâ

6156.Merveden çıhdı aña uydı hâs u âm
Dutdı ol mülki Horâsânı temâm

6157.Pes oradan kıldı ol azm-i Hıtâ
Kim varup küffâr-ıla ide gazâ

AZM-İ EBÛ Bİ-GAZV-İ HITÂ VE TAHRİZ BER-CİHÂD

- 6158.Hak yolına baş koya islâm-ıçun
Ura cân terkini neng ü nâm-ıçun
- 6159.Hazretinde Hâlîkuñ kurb ol bula
K'ışı Hak yolında cân virmek ola
- 6160.İnne fi mevtî hayâtî diye pes
Kıla Hak yolında ölmegi heves
- 6161.Câhidû' fi'llâhi ma'nîsini yâd
İdüben ola ol öldüğine şâd
- 6162.Usanup cânndan heves ide memât
Gözine zindân görine bu hayât
- 6163.Her ki fânî dirligüñ terkin kıla
Hak yolında câvidân bâkî kala
- 6164.Her ki cânın vire cânân yolına
Aña andan dahı yig cân bulına
- 6165.Şem' ki_anuñ varlığını nâr alur
Şems-vâr ucdan uca envâr olur
- 6166.Dâne çün varlığını virür yire
Lâe_olur reyhân olur ol yiksere
- 6167.Kankı dâne düşdi yire bitmedi
Yâ Hak anı lâle vü gül itmedi
- 6168.Nefs anuñdur itme_anı dirîg
Nişe bu cân ola cânâñdan dirîg
- 6169.Yâre her-geh kim gereklü ola cân
Yolına itmek gerek anı revân
- 6170.Cânda Hakk ışkını berkitmek gerek
Cân anuñdur aña terk itmek gerek
- 6171.Bahtulu ol cân ki Hakkuñ yolına
Her ne vaktin k'isdeyeler bulına
- 6172.Varup el-kıssa Hatâya ol dilîr
Kıldı küffâr-ıla anda dâr u gâr
- 6173.Şöyle itdi kâfir-ile anda harb
K'adı-y-ıla toldı cümle şark u garb

6174. İkiyüz biñ kâfiri kıldı helâk
Şirk çirkinden ol ili itdi pâk
6175. Bî-hisâb oldu ganîmet sîm ü zer
La'l ü yâkût u zümürüd hem güher
6176. Aldı Hâkândan dahı bün-gâh u raht
Hem silâh u hayl ü genc ü tâc u taht
6177. Oldı ol feth idicek bir şehriyâr
Kim çerisi toldı şehr-ile diyâr
6178. Çün nireye varsa gâlib oldu ol
Dahı ulu işe tâlib oldu ol
6179. Kasd kıldı k'âl-i Mervânı kıra
Mülki alup âl-i Abbâsa vire
6180. Yüz Horâsâña dutup ol nîg-nâm
Âl-i Mervânı helâk itdi temâm
6181. İtdi Mervânîler-ile çoh cidâl
Anları kıldı ser-â-ser pâyimâl
6182. Kimse olardan idemezdi anuñla ceng
Kim olar rûbâh-ıdı ol şîr-i ceng
6183. Ol havâricden kime kim buldı dest
Bî-emân hâk-ile itdi anı pest
6184. Çün olardan bulduğun kırdı temâm
Heybeti dutdı gönüllerde makâm
6185. Uydılar aña helâyık bî-kerân
Râst kıldı Fârsdan yaña 'inân
6186. Fârs ikliminde dahı ol pâk-dîn
Kıldı Mervânîleri hâk-i zemîn
6187. Fârsdan itdi Irâka azm-i râh
Anuñ-ıla bî-kerân hayl ü sipâh
6188. Ol diyârı dahı urup yıhdı ol
Kimi kim Mervânı buldı yahdı ol
6189. Pes Benî Abbâsdan bir pâk-bîn
Buluban itdi hilâfet-çün güzîn
6190. Adı anuñ Seffâh-ı Bû'l-Abbâs-ıdı
Ol zamân halkında hayru'n-nâs-ıdı

6191.Çün her işde anı kâmil buldı ol
Ahdi anuñla mü'ekked kıldı ol

6192.Pes anı mülke halîfe eyledi
Tâatin halka vazîfe eyledi

6193.Yüz otuz yıl sâl-i hicretten temâm
Gidicek oldu Ebû'l-Abbâs imâm

DER-ZİKR-İ HİLÂFET-İ EBÛ'L-ABBÂS-I SEFFÂH EVVEL-İ BENİ ABBÂS

6194.Pes varup Mervân-ıla ceng itdiler
Yiryüzini gözine teng itdiler

6195.Ol kadar Bû Müslim anda kıldı ceng
K'aña hayrân kaldı şîr-ile peleng

6196.İşledi bir iş k'anuñ Sâm-ı süvâr
Diñlese destânını kala-y-dı zâr

6197.Ekserin Mısr ehlinüñ kıldı helâk
Kamusın ehl-i Dımıškuñ itdi hâk

6198.Pes Mu'âvye-y-le Yezîdi çıharup
Dûd-ıla hâk eyledi oda urup

6199.Çünki Mervânîler işi oldu temâm
Oldı Seffâh-ı Ebû'l-Abbâs imâm

6200.Gerçi hoş-hulk u sehî-girdâr-ıdı
Lîki bî-rahm u katı hûn-hâr-ıdı

6201.Halk anuñ hûnîlığını gördiler
Lâ-cirem adını Seffâh urdılar

6202.Pâdişah kim kâhır u hûn-rîz ola
Düşmegi Hak kahrına_anuñ tîz ola

6203.Ol kişi kim Tañgrı bünyâdın yıhar
Hâñümâñın kendünüñ oda yahar

6204.Ölene gerçi kim ol-ıdı Kader
Kimsenüñ kanını Hak kılmaz heder

6205.Mülke dört yıl sekiz ay ol temâm
Oldı cümle ehl-i islâa imâm

6206.Çün anı itdi ecel kahrı esîr
Oldı anuñ yirine Ca'fer emîr

HİLÂFET-İ CA'FER-İ DEVÂNİKÎ VE KATL-İ EBÛ MÜSLİM

6207.Olıcah ol işde ol fermân revân
Oldı Bû Müslim hakkında bed-gümân

6208.Töhmet ü bühtân idiben bî-günâh
Eyledi Bû Müslimüñ günin siyâh

6209.Eylük itdi bunca dürlü bu aña
Ol yavuzlıh itdi bu resme buña

6210.Yavuz olur sûret-i nefsi le'îm
Zâyi' olur eylük itse_aña Kerîm

6211.Kimseye sen bî-günâh itme ziyân
Her söz-ile halka olma bed-gümân

6212.Tâ ki Hak hışmından îmîn olasın
Olmaya dûzah yirüñ çün ölesin

6213.İntikâm anda_it k'ola zâhir günâh
İnne ba'za'z-zınnı ismü dir İlâh

6214.Dûn-ıdı Bû Ca'fer ü gâyet sefîh
Sîreti-y-le zişt ü sûretde kerîh

6215.Mâlî çoh devşürdi illâ yimedi
Ölem ü ayruga kala dimedi

6216.Mâl u genci ol kadar dirüp kodı
K'oldı Mansûr-ı Devânîkî adı

6217.Mülkde yigirmi_iki yıl oldı ol
Pes ecel zahmı irişüp öldi ol

6218.Oğlı Mehdî dutdı yirin ser-te-ser
Bir halîfe kopdı ol pes mu'teber

HİLÂFET-İ MEHDÎ BİN CA'FER-İ DEVÂNİKÎ

6219.Âkıl u dâna vü hem dîn-dâr-ıdı
Munsıf u hoş-hû vü nî-gû-kâr-ıdı

6220.Dirdügi gencin atasınuñ temâm
Hayrı yolında tagıtdı ol imâm

6221.Ka'beye varup edâ itdükde farz
İtdi ol evde niyâzın halka arz

6222.her ne genc ü mâ var-ıdı temâm

ka'bede Hk yolına viridi_ol imâm

6223.Mâl oldur k'anı hayra vireler
Yohsa ne hâsıl kim anı direler

BE-GAZÂ FİRİSTÂDEN-İ MEHDÎ-PİSERŞER EBÂ LEŞKER

6224.Oğlı Hârûnı idiben server ol
Gazv için virbidi Rûma leşker ol

6225.Rûmdan yañâ çü Hârûn kıldı azm
Kim varup kâfirlerle ide rezm

6226.Rûmda cem' oldı bir bî-had sipâh
Şöyle kim örtildi tozdan mihr ü mâh

6227.Ol iki leşkerle toldı deşt ü kûh
Yüridi herbir yañadın yüz gürûh

6228.Bir neberd oldı ki çarh-ı köhne-sâl
Görmemişdi_anuñ bigi hergiz kıtâl

6229.Yiryüzi tolu ser-â-ser kan-ıdı
N'ireye kılsañ nazar tûfân-ıdı

6230.Kırhbiş biñ kişi kâfirden helâk
Oldı vü kandan akîka döndi hâk

6231.Kaçtı kâfir leşkeri olup zebûn
Râyet-i küfr oldı anda ser-nigûn

6232.Anda k'ola zâhir islâm âyeti
Pest düşer yire küfrüñ râyeti

6233.Ol kadar kim aldı anda genc ü mâl
Kim idemezlerdi harcın mâh u sâl

ZİKR-İ HİLÂFET-İ YÛSUF-I MÛLHİD

6234.Kopdı devrinde anuñ bir bed-nihâd
Adı Yûsuf Mülhid ü nâ-pâk-zâd

6235.Kıldı da'vî-yi nübüvvet ol ayân
Uydılar bî-hadd aña pîr ü cüvân

6236.Kopdı bir kişi dahı ahdinde hem
Kim Tenâsüh Mezhebinden urdı dem

6237.Böyle da'vîyi_itdi k'insân çün ölür

Rûhı anuñ bir dahı kâlib bulur

6238.Kankı cismi müsta'id bulsa varur
Ol olan kâlibdan ol cisme girür

6239.Dahı dürlü zendaka ehli ayân
Oluban islâma itdiler ziyân

6240.İtmeg-içün mülk tahtına urûc
Cem' olup itdiler nâ-geh hurûc

6241.Mehdi anları kamu idüp helâk
Yiryüzini fitnelerden itdi pâk

6242.Çünki Mehdîyi ecel itdi esîr
Oldı anuñyirine Hâdî emîr

ZİKR-İ HİLÂFET-İ HÂDÎ VE ZUHÛR-I MELÂHİDE

6243.Girü Mülhidler olup bir yirde cem'
Dilediler Hâdiyi kim ola kam'

6244.Yüriyüp ıklîmi gâret itdiler
Kanda ki_irdiler hasâret itdiler

6245.Anlaruñ ser-dârı bir bîdîn-idi
Müfsid ü bed-asl adı Yaktîn-idi

6246.Mekr-ile cem' idüben bî-had sipâh
Yüridiler Hâdiyi_itmege tebâh

6247.Oldı_olara Hâdi-y-ile itdükde ceng
Çeşm-i sûzen bigi bu yiryüzi teng

6248.Eyle kırdı anları ol nâmaver
Kim cihândan kalmadı_anlardan eser

6249.Her kişi kim ola ol zındîk-ı dâl
N'ola işi Hâdi-y-ile_itse kîtâl

6250.Cem' kim başı anuñ Yaktîn ola
Bî-gümân hâk oluban vara yile

6251.Bid'at ü Sünnet nice_ola müstevî
Mübdeti' Sünnî bigi_olur mı kavî

6252.Sünni olana olur ol Hak Mu'în
Mübdeti' olan kişi hôr u la'în

6253.Kişi kim bed-kî ola vü mübdeti'
Feth ü nusret olur aña mümteni'

6254.Mübdeti' olma ki mansûr olasın
Sünni olgıl tâ ki nusret bulasın

6255.Bellüdüdür şeytân-ıla Rahmâna yol
Hizb-i şeytân olma hizbu'llah ol

6256.Hükm idüp bir yıl u bir ay ol saîd
Öldi yirin aldı Hârûnü'r-Reşîd

ZİKR-İ HİLÂFET-İ HÂRUNÜ'R-REŞÎD

6257.Oldı aña halka olduhda emîr
Yahya İbn-i Hâlid-i Bermek vezîr

6258.Bermekîler anda izzet buldılar
Ucdan uca ehl-i mansıb oldılar

6259.Âl-i Bermek ehl-i hayr u adl-idi
Dost-dâr-ı ehl-i ilm ü fazl-ıdı

6260.Oldı ilmüñ kamu bâñî fasl fasl
Anlaruñahdinde rûşen fer' ü asl

6261.Şöyle kim vâcib-durur dâd itdiler
Dürlü dürlü hayra bünyâd itdiler

6262.Çün hilâfette_oldı Hârûn müstakıl
İşrete bağladı dün gün cân u dil

6263.Bâde vü nâBâde vü nâ ü sürûdı sandı iş
Sâgarı komadı elden yaz u kış

6264.bilmedi_ol kim beglik idene müdâm
bir nefes gafletde urmahdur harâm

6265.Bâdeden çün şâh ola bî-haber
Zâhir olur memleketde dürlü şer

6266.Rûzigârında anuñ şâh-ı Hazar
Çıhdı vü islâma itdi çoh zarar

6267.Bâbü'l-ebvâbı açıban çıhdı ol
Yakuban mülk-i Irâkı yıhdı ol

6268.Bir fesâd oldı ki hergiz ne sipihr
Görmemişdi aña hem-tâ vü ne mihr

- 6269.Yüzbiñ ü kırhbiñ kişi idüp esîr
Bî-hisâb öldürdiler bürnâ vü pîr
- 6270.Viremezdi anlara Hârûn cevâb
Gör ki neyler kişiye şerr-i şerâb
- 6271.Çünki yihup illeri gitdi Hazer
Girü Hârûn nûş itdi câm-ı zer
- 6272.Bir sebeble olmaz anı itse yâd
Bermekîlerden komadı bûd u zâd
- 6273.Yog-ıdı gönlinde Hakdan ters ü bâk
Bî-sebeb mecmû'ını itdi helâk
- 6274.Üşbu nev'a şerri çoğ itdi şerâb
Pes güzâf olmadı_anuñ adı şer âb
- 6275.Var-ıdı anuñ üç oğlı bil yakîn
Uluları-y-ıdı ad-ıla Emîn
- 6276.Birisi Me'mûn u biri Mu'temen
Kamısı leşker-keş ü düşmen-şiken
- 6277.Ohiyup üç oğlını Hârûn-ı şâh
Dahı kamu halk-ı şehri vü sipâh
- 6278.Böyle ahd itdürdi kim çün ol öle
Memleketde ol Emîn vâî ola
- 6279.Ola andan soñra Me'mûn pâdişâh
Mu'temin ola anuñ ardınca şâh
- 6280.Diri olduhda_âşikâre vü nihân
Birbirine itmeye anlar ziyân
- 6281.Çün onüç yıl hükm sürdi ol yakîn
Gitdi vü tutdı anuñ yirin Emîn
- 6282.Memleketde çün Emîn oldu imâm
Atası ahdini nakz itdi temâm
- 6283.Kardaşı Me'mûna düşmen oldu ol
Rây anuñ öldürmegine kıldı ol

ZİKR-İ HİLÂFET-İ EMÎN VE AHVÂL-İ Ū

- 6284.Halk anı ahdine durmaz buldılar
Lâ-büd aña cümle bed-hâh oldılar
- 6285.Her taraftan oldu bir düşmen ayân

Devletine andan iriřdi ziyân

6286.Toldı fitne cümle Őehr-ile diyâr
Böyle_olur bed-fi'l olıcah Őehriyâr

6287.Pâdiřâh k'olmaya ahdinde dürüst
Halkuñ anuñ-ıla mihri ola süst

6288.Dört yıl u dörd ay halife oldı ol
Fitne vü teřvîř-ile âhir öldi ol

ZİKR-İ HİLÂFET-İ İBRAHİM MÜHDÎ

6289.Çünki oldı fitnede maktûl Emîn
Yirin İbrâhîm-i Mehdî_aldı yakîn

6290.Râstlık hîç itmedi halk-ıla ol
Lâ-büd ıkbâline buldı_idbâr yol

6291.Râstlıh-durur necâtuñ pâyesi
Râstlıhdur devletüñ pâyesi

6292.Her kiři kim diler ola rest-kâr
Oh bigi olsa gerekdür râst-kâr

6293.Çünki bir yıl u bir ay geçdi dürtüst
Devleti iři anuñ dahı_oldı süst

6294.Halk i'râz idüben andan temâm
Eylediler mülke Me'mûnı imâm

ZİKR-İ HİLÂFET-İ ME'MÛN

6295.İkiyüz dördincisinde hicretüñ
Urdılar başına tâcın devletüñ

6296.Âkıl u dîndâr u dâna kopdı ol
Kamu işlerde tüvânâ kopdı ol

6297.Musavî-ferr-idi vü Yûsuf-cemâl
İsevî-yümn ü Süleymânî-kemâl

6298.Fazl erbâbın idiben bî-niyâz
İlm a'lâmını kıldı ser-firâz

6299.Ma'dilet idüp yigirmi yıl temâm
Öldi ardınca_oldı Bû İřhak imâm

6300.Çün hilâfet tahtına_itdi ol urûc

Hurremîler kıldılar nâ-geh hurûc

HÛRÛC-I HAR-MİYÂN

6301.Zendaka da'vâ idiben çıhdılar
Çoh diyârı gâret idüp yıhdılar

6302.Leşker-ile azm idüp Mu'tasım
Kıldı anları ser-â-ser münhezim

6303.Pes sekiz yıl u sekiz ayda dürüst
Ömr bünyâdı anuñdahı_oldı süst

6304.Ol ölüp çün kaldı ansuz bu makâm
Oldı halka Vâsıku Billâh imâm

ZİKR-İ HİLÂFET-İL-VÂSIKU BİLLÂH

6305.Çün hilâfet mansıbını aldı ol
Dürlü dürlü fitne buldı mülke yol

6306.Devleti ahdinde anuñ nâ-gehân
Oldı yıl tûfânı maşrıkdan ayân

6307.Şöyle esdi hışm-ıla ol katı yıl
Kim yihıldı_anuñ-ıla çoh şehr ü il

6308.Çünkü yıl tûfânı geçdi nâ-gehân
Bir ulu od oldı maşrıkdan ayân

6309.Müşta'il oluban ol od berk-vâr
Yahdı ilden bî-kerân şehr ü diyâr

6310.Kopdı_anuñ ahdinde hem bir zelzele
Kim cihâna toldı andan velvele

6311.Oldı ıssuz çoh bilâd u çoh kılâ'
Hem yihıldı çoh zıyâ' u çoh bikâ'

6312.Olıcak biş yıl u tokuz ay temâm
Gitdi_ol u oldı Mütevekkil imâm

6313.Hûb-âyîn-idi ol u hûb-rûy
Pâk-dîn-idi vü gâyet nîg-hûy

ZİKR-İ HİLÂFETİ'L-MÜTEVEKKİL ALELLAH

6314.Başına devletden urunduhda tâc
Buldı andan ilm bâzârı revâc

6315.Çoh kütüb ahdinde te'lif itdiler

Kamusın adına tasnif itdiler

6316.Kopdı_anuñ üç oğlu biri Muntasır
Oldı ad-ıla Mü'eyyed dahı bir

6317.Kiçisi bil Mu'tez oldı ad-ıla
Hoş büyüdiler kamu irşâd-ıla

6318.İtdi ulusun Irâka pâdişâh
Hem Hicâz-ıla Yemen mülkine şâh

6319.Virdi Mu'tezze Horâsânı temâm
Hem Kûh-istâna anı itdi imâm

6320.Kıldı ortancı oğlını ser-leşker ol
Tâ ki_ola gâzîler üzre ser-ver ol

6321.Çünkü geçdi_ondört yıl on ay temâm
Ol öliben Muntasır oldı imâm

6322.Çün hilâfet tahtına oturdı ol
Âdetin atasınuñ götürdi ol

ZİKR-İ HİLÂFET'L MUSTANSIR-I BİLLAH

6323.İki kardaşını ma'zûl eyledi
Kendüyi_olmaz işe meşgûl eyledi

6324.Çün anuñ bed-ahdlığın bildiler
Halk aña cümle düşmen oldılar

6325.Ata resmin sahlamayan bed-nihâd
Atadan soñra aceb ger ola şâd

6326.Altı aydan soñra azl olup yirin
Aldı Ahmed k'aña dirler Müsta'in

ZİKR-İ HİLÂFETİ'L-MÜSTA'İN Bİ'LLAH

6327.Gelmedügi-y-çün elinden iş anuñ
Kopdı eyyâmında çoh teşvîş anuñ

6328.İki yıl tokuz ay olduhda temâm
Sürdiler anı hilâfetden avâm

6329.Yirine Mu'tezz oldı şehriyâr
Dört yıl tokuz ay anuñdı diyâr

ZİKR-İ HİLÂFETİ'L-MAKARR Bİ'LLAH

6330.İşi dün gün olduğu-y-çun câm-ı mey
Şâhid ü şem' ü şarâb u çeng ü ney

6331.Oldı çoh fetret zamânında âşikâr
Fitne vü âşûb toldı rûzigâr

6332.Anı dahı azl idibenüñ avâm
Mühtedîyi itdiler halka imâm

ZİKR-İ HİLÂFETİ'L-MÜHTEDÎ Bİ'LLAH

6333.Çünkü oldı Mu'temid halka imâm
Fitne toldı kişver-i İrân temâm

6334.Her taraftan kıldı bir ser-keş zuhûr
Fitne toldı memleket emn oldı dûr

6335.Mâverâü'n-nehr ilin şâhân-hüdây
Aldı vü serkeşlige bagladı rây

6336.Her yañadan fitne yagdı_eyle ki gays
Sîstânı aldı Ya'kûb İbn-i Leys

6337.Kîş ü Bahreyn ü Aden hem Isfahân
Hem Horâsân dahı_anuñ oldı ayân

6338.İşbu fitne-y-le yigirmi üç yıl temâm
Oldı ol dâru'l-hilâfetde imâm

6339.Çünkü Hakk emrine vardı Mu'temid
Aldı andan soñra yirin Mu'tezid

ZİKR-İ HİLÂFET-İ MU'TAZİD BE-AVNI'LLAH

6340.Hûb-şekl-idi vü hem nîgû-siyer
Cengde bebr-idi belkim şîr-i ner

6341.Rây-ıla iklîmi ma'mûr eyledi
Bid'at ehlin mülkden dûr eyledi

6342.Altı yıl u altı ay olup emîr
Oldı_ecele çengâline nâ-geh esîr

6343.Mu'tazid toprahda çün oldı hafî
Yirine oturdu anuñ Müktefi

ZİKR-İ HİLÂFETİ'L-MÜKTEFÎ BİLLAH

6344.Bir halîfe kopdı ol sâhib-kemâl

Hâtem-i ihsân velî Yûsuf-cemâl

6345.Sâhib-i ilm ü dirâyet oldu ol
Fazl bâbında bir âyet oldu ol

6346.Bir acîb iş ittifâk oldu aña
Gûş dut şerh ideyim anı saña

6347.Birgün elinde dutarken âyine
Gördi anda yüzini her-âyine

6348.Âyine içinde gördi bir cemâl
Kim aña yog-ıdı âlemde misâl

6349.Şöyle olmuş ol yüz-ile âyine
Kim ururdu ta'ne çarhuñ ayine

6350.Kaldı kendü hüsnine hayrân u zâr
Pes du'â idüp didi ol bende-vâr

6351.K'istedi-y-ise Süleymân iy İlah
Rabbi heblî diyü senden izz i câh

6352.Ben ne mansıb isderem ne mülk ü mâl
Ömr virgil baña sen yâ Zü'l-Celâl

6353.Nev-cüvânlıhda beni kılma helâk
Tâze-y-iken bu cemâli itme hâk

6354.İtme pejmürde yañağumuñ gülin
Yire dökme saçlarumuñ sünbülün

6355.Nev bahâruma hazân saldurmagıl
Sebze-zârın hattumuñ soldurmagıl

6356.Bu sözi dirken iki kişi meger
Birbiri-y-le söyler andan bî-haber

6357.Ol birine birisi dir kim yakîn
Arada altı_ay-durur mühlet hemîn

6358.İşbu sözi Müktefî çün kıldı gûş
Şöyle havfa düşdi k'andan gitdi hûş

6359.Dutup ol demde bu yavuz sözi fâl
Dil-şikeste oldu vü âşüfte-hâl

6360.Derd-mend oldu bu sözden Müktefî
Lîkin itdi derdin içinde hafî

6361.Bu söz üzre çünkü geçti_ altı_ ay temâm
Nâ-gehânî hasta düşdi_ ol nîg-nâm

6362.Oldı ol derd-ile bî-çâre helâk
Oldı ol nâzük-ten ü endâmı hâk

6363.Gürg-i köhnedür terahhumsuz bu yir
Ger cüvân ger pîr her ne bulsa yir

6364.Niçe geldi ol du'âda fâlı gör
Niçe düşdi_ aña münâsib-hâlı gör

6365.İy besâ k' açıldı bâzîçe-y-le fâl
Kim aña nâ-geh muvâfik düşdi hâl

6366.Biş yıl u yidi_ ay halîfe_ olup temâm
Ol gidiben Muktedir oldu imâm

ZİKR-İ HİLÂFET'L-MUKTEDİR BİLLAH

6367.Oldı ahdinde hilâfet işi süst
Her nekim itdi-y-se düşdi nâ-dürüst

6368.Her yañadan kopdı yüz dürlü fütûr
Yiryüzinden oldu adl ü emn dûr

6369.Az zamân çoh havf-ıla dirildi ol
Çün yigirmi dördine_ irdi öldi ol

6370.Baş çeküp gerçi_ olmuş-ıdı zûd mîr
Ol şerer bigi_ oldu soñra zûd-mîr

6371.Oldı Kâhir anuñ ardınca imâm
Memleketde bir yıl u altı_ ay temâm

ZİKR-İ HİLÂFETİ'L-KÂHİR BİLLAH

6372.İşi dâyim lu'b-ıdı vü şerr ü lehv
Her ne tedbîr itdi lâ-büd düşdi sehv

6373.Devletüñ erkâmı çünkim ola süst
Ne dürüst iş varsa olur nâ-dürüst

6374.Kıldılar azl anı şehrî vü sipâh
Çünkü gördiler olamaz halka şâh

6375.Pâdişahlîh şartı çohdur bî-gümân
Sanma_ anı kim yimek içmekdür hemân

6376.Oldı yirinde anuñ Râzî imâm
Biñ gam u gussa-y-la yidi ay temâm

ZİKR-İ HİLÂFETİ'R-RÂZİ BİLLAH

6377.Toldı İrân cümle âşûb-ıla ceng
Oldı halkuñ gözine yiryüzi teng

6378.Gitdi emn ü lutf geldi havf u kahr
Gâret oldı_il ü yihıldı dîh ü şehr

6379.Ol gidüp oldı halîfe Müttakî
K'ehl-i ilm ü fazl-ıdı ol hem takî

ZİKR-İ HİLÂFETİ'L-MÜTTAKÎ BİLLAH

6380.Gerçi vardı anda çok ilm ü amel
Adl ü cûd içinde-y-idi bî-bedel

6381.Kamu fazlı-y-ıla ol dârâ-yı dîn
Bir yıl u altı_ay-ıdı hâkim hemîn

6382.Ol dahı yüz fitne vü âşûb-ıla
Nicedür takdîr sırrın kim bile

6383.Çün bilürsin hükm Allâhuñdur
Ömr ü mülki kime dilerse_ol virür

6384.Pes gerekdür saña teslîm ü rızâ
Hîle vü cehd-ile redd olmaz Kazâ

ZİKR-İ HİLÂFETİ'L-MÜSTEKFÎ BİLLAH

6385.Ol gidicek oldı Müstekfî emîr
Bir yıl u dörd ay idüp çoh dâr u gîr

6386.Hergiz anda yog-ıdı dâd u dihiş
Mülkde lâ-büd başarmadı ol iş

6387.Kişi k'andan dâd u isted gelmeye
Lâyık-ı mülk-i imâret olmaya

6388.Pâdişahlıh dâd u isteddür yakîn
Rîş ü seblet sanma anı sen hemîn

6389.Rîş ü sebletle olamaz kimse ner
Ner aña dirler k'ola anda hüner

6390.Ger sakalla er ola-y-ıdı kiři
Mâde-büz ola-y-dı_erenlerüñ başı

6391.Bıyığ-ıla olsa-y-ıdı olan er
Gürbe-i mâde ola-y-dı şîr-i ner

6392.Ne-durur erlik fütüvvetdür yakîn
Kişilik dahı mürüvvetdür hemîn

6393.Dünyada şimdi mürüvvet kalmadı
Gitdi bir ehl-i fütüvvet kalmadı

6394.Ger mürüvvetden kala-y-dı bir eser
Zâyi' olmaya-y-dı hergiz bir hüner

6395.Bu fütüvvet bir görünmez mürügdür
Sanki Kûh-ı Kâfda Sîmürgdür

6396.Oldı Müstekfî' de mülk erkânı süst
Dükeli tedbîri düşdi nâ-dürüst

6397.İRte gice oldugı-y-çun işi hezl
İtdiler mansıbdan anı tîzde azl

6398.Çünkü ol gitdi Mutî' oldı imân
Oldı hoş ahdinde anuñ hâs u âm

ZİKR-İ HİLÂFETİ'L-MUTİ' Lİ-EMRİ'LLAH

6399.Sâhib-i insâf u adl-idi Mutî'
Ehl-i takvâ-y-ıdı vü Hakka mutî'

6400.Oldı eyyâmında anuñ lâ-cirem
Cümle âsûde diyâr u şehr hem

6401.Kamu ser-leşker aña lâ-cirem
Ragbet-ile kullığına geldiler

6402.Çünkü yigirmi tokuz yıl ol temâm
Dahı dörd ay memleketde_ oldı imâm

6403.Gitdi ol dahı cihândan yirine
Tâyi' ü Lillâhi geldi yirine

ZİKR-İ HİLÂFETİ'L-TÂYİ' Lİ-EMRİ'LLAH

6404.Dünyada yirinmemiş yohdur kiři
Çâre ne çünkü budur çarhuñ işi

- 6405.Geçdi eyyâmı menâhîde anuñ
Ömri sarf oldı menâhîde anuñ
- 6406.Olmadı âkıllar-ıla hem-nişîn
Sohbetin her câhilüñ kıldı güzîn
- 6407.Memleket ahdinde ragbet bulmadı
Kimse eyyâmında hoş-dil olmadı
- 6408.Bu sebebden memleket toldı fesâd
Gâlib oldılar aña ehl-i inâd
- 6409.Hem hurûc idiben Oguz leşkeri
Yıhuban yahdılar ucdan kişveri
- 6410.Kırdılar halkı vü gâret itdiler
Kanda k'irdiler hasâret itdiler
- 6411.Mâverâü'n-nehr Horâsânı_aldılar
Fârs ıklîminde vâlî oldılar
- 6412.Çünki Tâyi' nevbetin sürdi temâm
Gitdi oldı yirine Kâdir imâm

ZİKR-İ HİLÂFETİ'L- KÂDİRÜ BİLLAH

- 6413.Akl-ıla oldı_işledügi iş anuñ
Oldı eyyâmında kem teşvîş anuñ
- 6414.Her kişinüñ kim işi akl-ıla_ola
Her ne kim işleye ol togru gele
- 6415.Bî-hıredde gelmeye hergiz key iş
Dûr olmahlığa andan key düriş
- 6416.Bî-hıredde nicesi beglik gele
Yâ ne-y-ile halka ol beglik kıla
- 6417.Kırh yıl üç ay olıban ol imâm
Memleketde hüküm itdi şâd u kâm
- 6418.Çünki Kâdir gitdi Kâyim oldı şâh
K'ol-ıdı mecmû'-ı ıklîme penâh

ZİKR-İ HİLÂFETİ'L-KÂYİMÜ Bİ-EMRİLLAH

- 6419.Âdil-idi gâyet ü nîgû-siyer
Her yaña kim yürüdi buldı zafer

6420.Düzdi tedbîr-ile Selçûk âlini
Lâ-büd itdi râst mülk ahvâlini

6421.Her kimüñ kim ola tedbîri dürüst
Devletinüñ olmaya erkâm süst

6422.Dost-durur düşmenüñ ivin yihan
Dost-durur düşmeni oda yahan

6423.İtdi eyü tedbîr-ile anları yâr
Anuñ-ıçun oldı bahtı üstüvâr

6424.Rây-durur rây bahta reh-nümây
Biñ çeriden yig-durur bir togrı rây

6425.Kırh yıl u dörd ay olduhda temâm
Gidüben ol Muktedir oldı imâm

ZİKR-İ HİLÂFET'L-MUKTEDİRÜ BİLLAH

6426.Âdil ü zer-bahş-ıdı vü pâk-rây
Akl-ıla her müşkile ukde-küşây

6427.Ol dahı olup âl-i Selçûk-ıla dost
Müttehid oldı nice kim lahm ü post

6428.Lâ-büd eyyâmında ma'mûr oldı mülk
Kamu cevr ü fitneden dûr oldı mülk

6429.Gitdi yigirmi yıl olup pâdişâh
Oldı Müstazhir anuñ mülkinde şâh

HİLÂFET-İ MÜSTERŞİDÜ BİLLAH

6430.Oldı ahdinde imâret il ü şehir
Fitne vü âşûbdan hâli_ oldı dehr

6431.Ol dahı oldı_ âl-i Selçûk-ıla yâr
Tâ ki îmin kaldı şehir-ile diyâr

6432.Çün yigirmi biş yıl u altı_ ay dürüst
Hükm sürdi oldı ömri rükni süst

6433.Geldi anuñ devri olduhda temâm
Yirine Müsterşidü Billâh imâm

ZİKR-İ HİLÂFETİ'L-MUSTAZHIRÜ BİLLAH

6434.Oldı ahdinde hilâfet işi süst

Her ne kim dutdı-y-sa düşdi nâ-dürüst

6435.Olıcah onbir yıl andan dahı baht
Dönüben Müstencide irişdi taht

HİLÂFET-İ MÜSTENCİD BİLLAH

6436.Kimse ahdinde anuñ şâd olmadı
Kaygudan ol dahı âzâd olmadı

6437.Çün kaderde var-ıdı ayruh dürlü hâst
Memleketde düşmedi tedbîri râst

6438.Hoş olmadı âl-i Selçûk-ıla ol
Her yañadın buldı aña fitne yol

6439.İki yıl iki_ay halîfe_olup temâm
Gitdi oldı yirine Râşid imâm

HİLÂFETİ'R-RÂŞİDÜ BİLLAH

6440.Mülk anuñ ahdinde revnak bulmadı
Halka anuñ hükmi nâfiz olmadı

6441.Her ne kim düşdi-y-se düşdi nâ-savâb
Memleket ahdinde_anuñ oldı harâb

6442.Başlıyacah k'ola devlet rükni süst
Her ne iş dutılsa olur nâ-dürüst

6443.Çünkü ikbâl işine düşe fütûr
Bulur idbâruñ alâmâtı zuhûr

6444.Memleket bünyâdına düşe hâlel
Her ne fikr idilse olur pür-zelel

6445.Dünyada bir lahza ol şâd olmadı
Memleket ahdinde âbâd olmadı

6446.Çün müsâidd olmamışdı_eyyâm aña
Cehd-ile olmadı kimse râm aña

6447.Bir yıl u bir ay halîfe oldı ol
Müsta'zî yirine geldi öldi ol

ZİKR-İ HİLÂFETİ'L-MÜSTAZİE Bİ-ENVÂRİLLAH

6448.Döndi eyyâmında anuñ rûzigâr
Dutdı revnak mülk oldı kiştikâr

6449.Âl-i Selçûk aña dem-sâz oldılar
Memleketde_ anuñla enbâz oldılar

6450.Ol dahı oldı_ anlaruñla sâzıkâr
K'iktızâ eyle iderdi rûzigâr

6451.Çünki her işde ola dâna kişi
Halk-ıla olur müdâm anuñ işi

6452.Oldı yigirmi yidi yıldan temâm
Ol Hak emrine varup Nâsır imâm

HİLÂFETİ'N-NÂSİRÜDDÎN Bİ-EMRİLLAH

6453.Çünki Nâsır oldı Bagdâda emîr
Emn zâhir oldı gitdi dâr u gîr

6454.Âl-i Selçûk aña ragbet itdiler
Her yaña kim vardı nusret itdiler

6455.İki yıl altı_ ay çün ol oldı emîr
Anı dahı kıldı_ ecel çengi esîr

HİLÂFETİ'L-KAHİRÜ Bİ-EMRİLLAH

6456.Böyle-durur çarh-ı gerdânuñ işi
Bulmaz andan ten-âsâlıh kişi

6457.Çün cihândan gitdi Nâsır yirine
Geldi vü oturdu Kâhir yirine

6458.Munsıf u dâna vü nîgû-rây-ıdı
Âdil ü dîn-dâr u mülk-ârây-ıdı

6459.İlm bulmuş-ıdı zamânında revâc
Olmış-ıdı_ ehl-i hüner her başa tâc

6460.Hâtim-ıdı idicek ol sâz-ı bezm
Rüstem-ıdı kılıcah âgâz-ı rezm

6461.İki yıl u altı ay çün sürdi baht
Sürülüp bu mülkden giderdi raht

6462.Mu'tasım dutdı anuñ yirin temâm
Ol gidüp nevbetle bu oldı imâm

HİLÂFETİ'L-MU'TASIMU Bİ-EMRİLLAH

6463.Olduğı-y-çün şuglı_ anuñ dâyim şarâb
İli vîrân oldı vü şehri harâb

6464.On tokuz yıl altı ay ol mîr-idi
Memleket toptolu dâr u gîr-idi

6465.Altıyüz otuz tokuz yıl çün dürüst
Geçdi hicretten işi_ anuñ oldu süst

6466.Şarkdan çoh fitneler oldu ayân
Çıhdı bir leşker oradan bî-kerân

***ZİKR-İ İNKIRÂZ-I HİLÂFET VE HURÛC-I ÇİNGİZ HÂN VE
TEVÂRİH-İ MÛLÛK-I MUGOL***

6467.Yog-ıdı Hakdan olarda ters ü bâk
Kıldılar İrânı ser-tâ-ser helâk

6468.Âl-i Selçûk u Oguzı sürdiler
Ucdan uca illerini urdılar

6469.Pâdişâh-ıdı_ anlara Çingiz Hân
Kâfir-idi ol velîkin kâr-dân

6470.Bezmde âyîn nedür bilür-idi
Rezmde hîle nedür kılur-ıdı

6471.Saltanatdı_ ırte gice endîşesi
Hem riyâset hem kiyâset pîşesi

6472.Zâlim ü bed-sîret ü hûn-hâr-ıdı
Hîle-engîz-idi vü bed-kâr-ıdı

6473.Kanda irdilerse gâret itdiler
Halka çoh dürlü hasâret itdiler

6474.İtdiler halka olar bî-had kahr
Komadılar yihmaduhil-ile şehr

6475.Her diyâra k'ugradılar yıhdılar
N'ireye kim irdilerse yahdılar

6476.İtdiler evvel Semerkandı harâb
Kıldılar Hârezmi dahı hem yebâb

6477.Pes Horâsân u Irâka geldiler
İl ü şehr anda ne kim var aldılar

6478.Âkıbet kâsd itdiler Bagdâda hem
Aldılar anı dahı ehl-i sitem

6479.Mu'tasım ol fitnede oldu helâk
Kim-durur k'anı yile virmez bu hâk

6480.Böyle-durur kim didüm ahvâl-i dehr
Mîhr yoh hergiz velî çoh anda kahr

6481.Kendüzini fikr idüben dirdi ol
İlleri oğlanlarına virdi ol

6482.Oğlınıñ biri Çagâtâ Hân-ıdı
Biri dahı Berke Türk sultân-ıdı

6483.Biri Kopçak-ıdı sorarsañ be-nâm
Virdi bu illeri anlara temâm

6484.Kâfîr-i bî-rahm-ıdı Çingîz Hân
Lîkin oldı devleti böyle ayân

6485.Virdi İrânı Hülâgûya temâm
Uydılar nâ-çâr aña hâs u âm

PÂDİŞÂHÎ-İ HÜLÂGÛ PİSER-İ MEHİN-İ ÇİNGİZ HÂN BESİ-SÂL BÛD

6486.Komadı hîç atasınıñ sîretin
Vaz' u kânûnın u resm ü âdetin

6487.Her nireye ugradı-y-sa yahdı ol
Kanda kim irişdi-y-ise yıhdı ol

6488.Didi bir uslu aña k'iy ulu hân
N'îşe yiharsın anı bilsem ayân

6489.İl hazîneñdür ü sen yihma anı
İl serâyüñdur senüñ yahma anı

6490.Didi kim sen bilmez-iseñ bil yakîn
Kim senüñ sen yapduğın olur hemîn

6491.Dahılar yapduğı neñ olur senüñ
Kim seve_anı cânüñ u yâhud tenüñ

6492.Ayruguñ yapduğunu yihmah gerek
Bîh ü bünden koparup yahmah gerek

6493.Pes dönüp yapmah gerekdür girü hem
K'urmaya kimse benümdi diyü dem

6494.Mülki dutmah kahr-ıla olur hemîn
Mîhrledür mülk sahlamah yakîn

6495.Pâdişâhuñ pîşesi_evvel oldı kahr
Tâ müsahhar ola aña il ü şeh

- 6496.Çün ola kişver mukarrer kahr-ıla
Ger yihılsa tiz yapılır mihr-ile
- 6497.Çünkü Bagdâda varup oturdı ol
Halkı_ohıyup katına getürdi ol
- 6498.Her birinüñ sordı kâr u pîşesin
Kim aña lâıyk ide endîşesin
- 6499.Pîşesi olana ol hoş söyledi
Yirin ü işin mukarrer eyledi
- 6500.Ehl-i Tebrîz soñra çünkim irdiler
Korhu-y-ıla karşusına durdılar
- 6501.Añladı nedür olaruñ hâlini
Pes didi bilibenüñ ahvâlini
- 6502.Bîş-ter çünkim etibbâdur Yahûd
Pes bularuñ-ıla tâzedür vücûd
- 6503.Hem nasârâdur ikinci renc-ber
Bunlara kimsene itmesün zarar
- 6504.Şeyh ü dânişmend ü seyyidler kamu
Arz buldıgında aña rû-be-rû
- 6505.Sordı_olaruñ pîşesin ü san'atin
Mekseb ü ıyşın ü resm ü sîretin
- 6506.Bilicek bunları didi_ol tünd-rû
Kim bular varlıhda iderler telef
- 6507.Çün yog-ıdı anda Hakdan havf u bâk
Şatta salup kıldı kamusun helâk
- 6508.Üşbu hâl-ıla otuz yıl ol temâm
Pâdişâh-ıdı vü halk aña gulâm
- 6509.Şeyh ü dânişmend ü seyyidler kamu
Bû Saîd irdükde oldılar ulu
- 6510.Terbiyet buldı kamu vü nan ü nâm
Oldılar devrinde anuñ şâd u kâm
- 6511.Padişahlığı sekiz yıldı hemîn
Ol dahı biñ zahmet-ile-y-di yakîn
- 6512.Bu ne hikmetdür ki kimse bilemez
Hiç âkıl çâresini kılamaz

6513.Ol ki evvel nakş eyledi kalem
Olımaz bir zerre ne bîş ü ne kem

6514.Kamu hâle çün muhavvildür kazâ
İktizâsına gerek anuñ rızâ

6515.Nâ-hoş u hoş âsüman takdîrine
Sabrdur çâre dahı tedbîri ne

6516.Çün inân-keş aña takdîr oldı pes
Çâresi teslîmdür ü sabr pes

6517.Hikmet-ile maslahatdur Hakk işi
Gerçi kim bilemez ol râzı kişi

6518.Hızr işin niçüندی bilmedi Kelîm
Pes Hak işini nice bile hakîm

6519.Hakkuñ işinde masâlih çoh-durur
Hikmet ayruğ u abes ayruh-durur

PÂDİŞÂHÎ-İ KEYHUTÛ HÂN PİSER-İ HÛLAGÛ

6520.Çün Hülâgûdan yüzün döndürdi baht
Keyhutû Hâna irişdi tâc u taht

6521.Her yaña leşker salıban bî-şümâr
Kal'a aldı vü il ü şehri diyâr

6522.Bâbü'l-ebvâb oldı il ile temâm
Tenge geldi_ anuñ elinden Rûm u Şâm

PÂDİŞÂHÎ-İ KEYHUTU HÂN-ZÂDE ABAKA HÂN

6523.On iki yıl oluban ol pâdişâh
Gitdi yirine Abaka oldı şâh

6524.Küfri terk itdi müsülmân oldı ol
Dîne girüp ehl-i îmân oldı ol

6525.Ehl-i insâf-ıdı vü nîgû-siyer
Hem raiyyet-perver ü hem dâd-ger

6526.Ceddinüñ zulmını ol dûr eyledi
Niçe vîrânları ma'mûr eyledi

6527.Adli kim kişverüñ ma'mûr ola
Kamu âfet devletüñden dûr ola

6528.On yidi yıl oluban İrâna şâh
Çarh anuñ dahı_itdi menşûrın siyâh

6529.Abaka Hânuñ ik'oglı var-ıdı
İkisi dahı ser ü ser-dâr-ıdı

6530.Ulısınıñ adı Ahmed Hân-ıdı
Kiçisi Argun şeh-i İrân-ıdı

PÂDİŞÂHI-İ AHMED HÂN

6531.Çün Abaka Ahmed oldı şâh
Aña degdi atadan taht u külâh

6532.Çünkü Ahmed Hânuñ oldı il ü şehir
Gör ne bâzîçe getürdi girü dehr

6533.Ol Ziyâü'l-Mülk k'ol-ıdı vezîr
Ahmede birgün didi kim iy emîr

6534.Bir arada iki server olımaz
Bir il ikiye müsahhar olımaz

6535.Baş iki_olsa birisi gitmek gerek
Server iki olsa biri yitmek gerek

6536.Ol vezîrûñ sözine virmez cevâb
Bir hayâl-ıdı meger ol söz ne hâb

6537.Ol sözüñ kıldı cevâbını sükût
Gör nider takdîr-i Hayy-i Lâ-Yemût

6538.Düşdi birgün bu söz anuñ ögine
Okıd'Ergün Hânı geldi öñine

6539.Bahdı Argun Hânda gördi bir cemâl
Kim aña dünyâda yog-ıdı misâl

6540.Sûret ü sîret kamusı hûb-ıdı
Kamu gönüllerde ol mahbûb-ıdı

6541.Kaynadı kanı terahhum eyledi
Dönübenüñ halka böyle söyleydi

6542.Kim bu hüsni nice ideyim helâk
Hayfdur bu sûretâ kim ola hâk

6543.Memleket-çün öldüremezem buni
Mülkden bîzâram añañuz beni

- 6544.Memleket çünkim girü elden gider
Kişi böyle yavuz iş idüp nider
- 6545.Üşbu resme nakş yazmış Zü'l-Celâl
Yihup anı nice_ideyim pâyimâl
- 6546.Âdemi çün Sâni'e bünyâd ola
Anı yihanuñ işi bî-dâd ola
- 6547.Virile bu dünyada aña sezâ
Âhiretde yâr ola aña cezâ
- 6548.Hak binâsın ol ki yıha bî-günâh
Dünya Ukbâda kilîmi_ola siyâh
- 6549.Baňa gerekmez-durur bu tâc u taht
Buňa lâyıkdur bu kamu mülk ü baht

PÂDİŞÂHÎ-İ ARGUN HÂN BÎST-SÂL

- 6550.Oldı Argun Hân bir ulu pâdişâh
Kim cihân itdi anı püşt ü penâh
- 6551.İşbu hâli görüben kaçdı vezîr
Lîki kaçmah olmadı_aña dest-gîr
- 6552.İrişiben itdiler anı helâk
Gör ne fitneler ider bu tîre-hâk
- 6553.Dili gör kişiyi neye yitürür
Dile bah kim nice başlar yitürür
- 6554.Ger benefşe_olmaya-y-ıdı bu dil
Böyle kesilmezdi başı eyle bil
- 6555.Uzun olursa dilüñ sûsen-misâl
Baş gerekse_it anı gonca bigi lâl
- 6556.Çün kazâ ire anı itmege def
Göge çıhsañ kaçup itmez hiç nef
- 6557.Üşbu iş üzre geçiben az zamân
Düşdi Argun gönline_Ahmedden gümân
- 6558.Evvel itmedi-y-se ol bunı helâk
Âhirü'l-emr anı bu eyledi hâk
- 6559.Âkılıñ pendin işitmeyen kişi
Ne aceb gider olur-ısa başı

- 6560.Üşbu sözi kim didüm yâd eylegil
İşe bu söz üzre bünyâd eylegil
- 6561.Sâde olup kimseye inanmagıl
Saña kimse dost ola sanmagıl
- 6562.Her kişi kendüzini sever hemîn
Kendü-y-içün dostdur saña yakîn
- 6563.İşbu mansıb k'adı-durur saltanat
Elde durmaz ölmeyince şeytanat
- 6564.Saltanatla şeytanat bir lafzdur
Fark iki harf arada iy sözi dür
- 6565.Laz-ıla ma'nî arasında yakîn
Çoh tenâsüb vardur iy pâkîze-dîn
- 6566.Mülk ü silk ü fehm ü vehmi it kıyâs
Hısm u hasmı ki_ aňlana üşbu kıyâs
- 6567.Âkıl-ısañ saña üşbu söz yiter
Akl pâyânına her işüñ yiter
- 6568.Oldı Argun Hân bir ulu pâdişâh
Kim pâyânına yürürdi mihr ü mâh
- 6569.Şâmdan Mısr-ıla aldı ol harâc
Hind mülkünden hem aldı mâl u pâc
- 6570.Cûd u adl-ile imâret eyledi
Kanda vîrân var 'imâret eyledi
- 6571.Zulm anuñ kişverinde yog-ıdı
Lîki insâf u mürüvvet çog-ıdı
- 6572.Ehl-i ilmi ol-ıdı evvel diren
Bunlara mersûm u hem icrâ viren
- 6573.Sordı ehl-i ilme kim n'idem k'Îlâh
İtmeye binüm kilîmümi siyâh
- 6574.Didi ol kim ola ehl-i memleket
Farz aña oldur ki ide ma'dilet
- 6575.Memleketde adl itse pâdişâh
Af olur bâkî neki_ iderse günâh
- 6576.Çünkü adlün gâyetindedür ümîd
Bu-durur k'ola yüzüñ yarın sipîd

6577.Didi Hak tanuh ki adli arturam
Memleketden zulmı küllî götürem

6578.Aldden soñra ne gerek bileyüm
Şöyle kim var çâresini kılayum

6579.Didiler kim ulu iş-durur gazâ
Kim aña ehl-i sa'âdetdür sezâ

6580.Gâzi olan Hâlikuñ kılıcıdur
Düşmen-i dîne zafer bulıcıdur

LEŞKER-FİRİSTÂDEN-İ ARGUN BE-GÜRCİSTÂN

6581.Çünkü Argun kıldı bu sözleri gûş
Kıldı ol dem tamarında kanı cûş

6582.Saldı Gürcistâna üçyüz biñ çeri
Ola diyü küfrden ol yir arı

6583.Ne çeri kim cümle âhen-pûş-ıdı
Kamu gerdûn-gûş u deryâ-cûş-ıdı

6584.Dürlü a'lâm-ıla elvân-ı direfş
Yaşıl u saru kızıl âl u benefş

6585.Çün nefir ü kûs eyledi hurûş
Ol çeri itdi_ anda deryâ gibi cûş

6586.Kafir-i Gürciye çün irdi haber
Kim irişdi leşker-i feth ü zafer

6587.Bî-kerân leşkerle karşı vardılar
Berkidüp derbendi anda durdılar

6588.İtdiler ol sa'b derbendi siper
Kim adû anlara bulmaya zafer

6589.Çünkü derbende_irdi Argun leşkeri
Lâ-cirem kim ceng itdi iki çeri

6590.Varuban derbende itse-y-düñ nazar
Diyedüñ Sedd-i Sikenderdür meger

6591.Seddi ardında sipâhî bî-şümâr
Cümle tîr-endâz u cevşen-süvâr

6592.Sa'b-ıdı derbend ü tolu tîr-ıdı
Feth ol derbende bî-tebîr-ıdı

- 6593.Liki girü dönemedi ol çeri
Şîr-gîr iderdi dönse kâfiri
- 6594.İki ay ol arada ceng itdiler
Birbirine yiryüzin teng itdiler
- 6595.Leşkerine virbidi Argun meded
Kankı ni'metden ki dirseñ bî-aded
- 6596.Âkîbet irişüben lutf-i İlah
Basılıban kaçdılar Gürcî-sipâh
- 6597.Her ki_aña te'yid-i Hak yârî kıla
Kanda kim varur-ısa mansûr ola
- 6598.Râyet-i islâm olur ser-firâz
Ger çeri çog ola vü yâ ola az
- 6599.Leşkeri küfr olsa sağışda füzûn
Olur az leşkerle kamu ser-nigûn
- 6600.Ol dem ol derbendi oda urdılar
Yanuban söynince anda durdılar
- 6601.Girdiler Gürcî'yi gâret itdiler
Kıruban halkın hasâret itdiler
- 6602.Şehr ü kal'a bulubanuñ yıhdılar
Kışt-kâr u bâg u hâne yahdılar
- 6603.Yürüyüp Encâsa degin urdılar
Kim kim buldılar-ısa kırdılar
- 6604.Kul u karavaş yüz elli biñ esîr
Aldılar çün oldı nusret dst-gîr
- 6605.Hem koyun-ıla sığır onbiñ sürü
Alubanuñ döndi ol leşker girü
- 6606.Çün ganîmetleri cümle sürdiler
Soñı gelüp kavışınca durdılar
- 6607.Hasmdan bunca ganîmet aldılar
Girü dönüp dâr-ı mülke geldiler
- 6608.Devletinden çün yigirmi yıl temâm
Oldı gitdi kaldı ansuz bu makâm
- 6609.İki oğlu var-ıdı şimşîr-zen
Şîr-gîr ü hasm-bend ü saf-şiken

6610.Ulu oğlunuñ adı Gâzân-ıdı
Birinuñ adı Muhammed Hân-ıdı

6611.Ol ki dirler-idi Harbende aña
Gûş ol bu söze kim direm saña

ZİKR-İ GÂZÂN HÂN VE SÎRET-İ Ū

6612.Çünkim Argun öldi Gâzân oldu hân
Dilegince oldu devr-i âsümân

6613.Ol sehâ vü sâhib-i ihsân-ıdı
Hâk ü sîm ü zer aña yiksân-ıdı

6614.Ol kişi kim sâhib-ihsân olmaya
Ölüden kemdür egerçi k'ölmeye

6615.Her ki bula virmeye zerr ü direm
Hâşa anı âdemî midür direm

6616.Çün bilürsin k'âdemî girü gider
Koma mâlı yi vü yidür ü gider

6617.Dünya ukbâ hâsıl eyle mâl-ıla
Ömri yile virme çoh âmâl-ıla

6618.Maluñ-ıla ayru ad it iktisâb
Yol budur v'Allâhü a'lem bi's-savâb

6619.Andan İbrâhîmüñ adı oldu Halîl
Kim sehâvet yolına buldı sebîl

6620.Cevne adı virmeg-ile tâzedür
Kamu halk anuñ adına bendedür

6621.Virmeg-ile Hâtim adı tâzedür
Âferînler aña bî-endâzedür

6622.Şâh-ı Gâzân Mekkeye çoh genc ü mâl
Virbidi bî-hadd genc ü sîm ü zer

6623.Hindi birbidi cihâd-ıçun çeri
Vardı vü Pîruz geldi leşkeri

6624.Dilleye dek Hindi gâret itdiler
Yıhuban yahup hasâret itdiler

6625.Çün şecâatde _anı iller bildiler
Rûmı kal'a kal'a anda kıldılar

6626.Çevürüp he rşehri itdiler hısâr
Lîkin aldı cümlesin ol nam-dâr

ZIKR-İ PÂDİŞÂHÎ-İ HÜDÂBENDE MUHAMMED HÂN

6627.Ol ölüp oldu Hüdâbende emîr
Kim ol-ıdı ehl-i ilme dest-gîr

6628.Key tevâzu' ehl-idi ol pâdişâh
İşi hayr itmekdi halka sâl u mâh

6629.Ol-ıdı evvel imâma sarınan
Gürcüvânedden çlıhiban arınan

6630.Anda Selçûka_ol zamân irdi zevâl
Kimi öldi kimi oldu pâyimâl

6631.Kalması ol hânedândan hiç eser
Çâre ne çün çarhdur bî-dâd-ger

6632.İşi bu kim cân u hâñları yahar
Şuglı bu kim hânedânları yihar

6633.Rûm ilinde hiç gûşe kalmadı
Kim Hüdâbende_aña fermân kılmadı

6634.Bir kızını var-ıdı adı Olcayitû
Oglı-y-ıdı Bû Saîd-i nâm-cû

6635.Saltanatda olıcah on yıl temâm
Gıtdi kaldı Olcayitû'ya_ol makâm

ZIKR-İ PÂDİŞÂHÎ-İ OLCAYİTU VE SIFAT-I Û

6636.Gerçi hâtûn-ıdı ol dâna-y-ıdı
Kâr-dân-ıdı vü nîgû-râ-y-ıdı

6637.Her ne işi dutdı-sa bitürdi ol
Padişahlığı başa yitürdi ol

6638.Niçe avret var-durur erden ulu
Niçe er vardur ki avretten alu

6639.Ne-durur erlik sehâ vü akl u dîn
Kimde kim var bu üçü erdür hemîn

6640.Ol ki yohdur anda bu ucdan eser
Kahbe avretten olur dahı beter

6641.Hâye vü kîr-ise erlige nişân
Pes erenler başıdır eşşek ayân

6642.Çünkü avret ola adl-ile sehî
Fî'l-hakîka erdür ol nedür dahi

6643.Şimdi avret var ki anuñmi'ceri
Çohlaruñdur taylasânından arı

6644.Nef'süz er niçe kim olsa ulu
Hayrlu avretten olur ol alu

6645.Çün cemâlü'l-mer'i fî tayyi'l-lisân
Didiler nişe gelür bu taylasân

6646.Ger namâz u rûze ger ilm ü amel
Kamu bir nân-pâreye olmaz bedel

ZIKR-İ PÂDİŞÂHÎ-İ SULTÂN EBÛ SA'İD

6647.Çünkü Olcaytûya pençe_ urdı kazâ
Bû Saîd oldu cihânda pâdişâ

6648.Bû Saîde virmiş-idi Zü'l-Celâl
İlm ü fazl u hem cemâl ü hem kemâl

6649.Şekli bigi hattı_ anuñ mahbûb-ıdı
Şi'ri dahi yüzi bigi hûb-ıdı

6650.Hem utârîd bigi key dâna-y-ıdı
Tâli' ıssı zühre-i zehrâ-y-ıdı

6651.Olmaz-ıdı bir nefes bî-câm-ı mey
Gitmez-idi_ öñinden anuñ çeng ü ney

İSYÂN-I ÇÛPÂN VE HELÂKÎ-Yİ Û

6652.Eyledi ol her işe Çûbân-ı hâs
Çünkü Çûbân buldı andan ihtisâs

6653.Oldı Çûpân şöyle bir ulu emîr
Server ü kişver-güşâ vü mülk-gîr

6654.Şah kendü işretinde-y-di müdâm
İtdiler Çûbâna_ itâat hâs u âm

6655.Dükedicek dehr çağını anuñ
Dîv azdurdı dimâgını anuñ

- 6656.Ne ki ayruhsı_oldı_anuñ endîşesi
Kendüyi arturmag oldı pîşesi
- 6657.Virdi bir oğlına ol Rûma temâm
Kim Temürtaş ana dirlerdi be-nâm
- 6658.Birini Bagdâda itdi şehriyâr
Fârsda birini itdi tâcidâr
- 6659.Her yañadın begleri devşürdi ol
Kamusını azl idüp degşürdi ol
- 6660.Kendü kulın kodı olaruñ yirine
Zâhir oldı işi ne tedbîri ne
- 6661.Hâm-ıdı Çûpân işi vü râyı süst
Lâ-cirem düşmedi itdügi dürüst
- 6662.Ol ki kuldur kul bigi olmah gerek
Aldugını maslahatça_almah gerek
- 6663.Virdügin hem maslahatça viresi
Virmeg ü almahda aklı diresi
- 6664.Padişâh kulın eger sultân kıla
Kul gerek kim kul-idugını bile
- 6665.Ola endâze-y-le her iş k' işleye
Ger ala ger vire ger bağışlaya
- 6666.Bû Saîde didiler Çûbân kamu
İlleri_adlı ussuñı devşür ulu
- 6667.Kanı ulus kanı şehir-ile diyâr
Kanı mülk ü kanı il kanı hısâr
- 6668.Kendüzine dönderüp düzer temâm
Sen içersin bâde işüñ kaldı hâm
- 6669.Bâde-durur bâda viren devleti
İçmeye anı ol ola devletî
- 6670.Çünkü gafletdür kamu bâde işi
Nicesi devlet bula andan kişi
- 6671.Bâde-y-ile kimse mülk almış degül
Baht u mey bir arada olmuş degül
- 6672.Bâdedür bünyâdını dînüñ yıhan
Bâde-durur izzeti oda yahan

- 6673.Bâde içen dâyimâ rencûr olur
Taht u baht u memleketden dûr olur
- 6674.Pâdişâha üşbu söz idüp eser
Göñli oldı gussadan zîr ü zeber
- 6675.Virbidi Çûbânı_ohıdı gelmedi
Buyrugına_anuñ itâat kılmadı
- 6676.Bû Saîd-i şeh k'ulu sultân-ıdı
Adı dillerde Bahâdur Hân-ıdı
- 6677.Komadı oturmaga_anı nâm u neng
Az kişi-y-le yürüdi Çûbâna teng
- 6678.Er gerek kim bezm günü bezm ide
Bezm günind'ana göre rezm ide
- 6679.Halk kim Çûbâna kanda var-ıdı
Kim ümîdi dâyimâ anlar-ıdı
- 6680.Bû Saîdüñ adını k'ışitdiler
Orada Çûpânı koyup gitdiler
- 6681.Kaçuban Çûbân Horâsâna varur
Raht u bahtın cümle târâca virür
- 6682.Ol dahı ol fitnede oldı helâk
Anı dahı yidi hem bu tîre-hâk
- 6683.Böyle olur ol ki işin bilmeye
Elde-y-iken işe çâre kılmaya
- 6684.Diledi Çûpân k'ol-ıdı tâc-dâr
Lîkin oldı kendü eli-y-le tâc dâr
- 6685.Kendüyi bilse gerekdür her kişi
Tâ murâdınca ola anuñ işi
- 6686.Çünkü Çûpânuñ işi oldı temâm
Bû Saîd aldı eline girü câm
- 6687.Ûd u çeng ile geçürdi gündüzin
Câm-ı Cem içüp unudı kendüzin
- 6688.Bu-durur ancak şarâb içene nef'
Kim olur renc ü azâb anuñla şef'
- 6689.Câm-ı meydür kim virür câna safâ
Câm-ı meysüz ne-durur dirlik cefâ

- 6690.Rûma leşker birbidi kim varalar
Fitnesin Timurtaşun gidereler
- 6691.Rûm dahı yağı olmışdı aña
Zâlim olanuñ işi niçe oña
- 6692.Aña uyanlar koyuban gitdiler
Anı şöyle hâr u meftûn itdiler
- 6693.İder eylükde sadâkat her kişi
Ol yavuzluhda degül kimse işi
- 6694.Çün Temürtaş gördi kim hâm oldu kâr
Kendü kendüzine didi el-firâr
- 6695.Şâma şöyle diyü gitdi Rûmdan
Korhar-ıdı yolda râg u bûmdan
- 6696.Gitdi vü andan belürmedi nişân
N'oldı encâmı bilinmedi ayân
- 6697.Neler ider bu sipih-r-i mihri gör
Kimseneye hiç var mı mihri gör
- 6698.Çünkü Timurtaşuñ işi-oldı temâm
Girü sultân Bû Saîd isdedi câm
- 6699.Lu'b-ıdı işi vü nûş-â-nûş mey
Hem semâ'-ı erganûn u çeng ü ney
- 6700.Memleket işine meşgûl olmadı
Hiç kimseden nasîhat almadı
- 6701.Hâsılı ne bâdenüñ şerr ü fesâd
Bâde içen pend mi eyleye yâd
- 6702.Lâ-cirem her yaña düşdi şeytanat
Süst düşdi anda şugl-ı saltanat
- 6703.Çün şebân mest ola yata uyıya
Kurd u ugrı aña koyun mı koya
- 6704.Bâde-y-ile memleket cem' olımaz
Ol olan yirde dah' iş yir bulımaz
- 6705.Gördiler kim mülk kaygusın yimez
Meyden artuh nesneyi binüm dimez
- 6706.Halk anuñ işinden âzâr aldılar
Belki andan cümle bîzâr oldılar

- 6707.Âkîbet Bagdâ anuñ avreti
K'ol-ıdı mahbûbı vü hem sohbeti
- 6708.Bir kaç-y-la düzülüp virdi_aña zehr
Gör neler itdi vü ider işbu dehr
- 6709.Zî aceb iş kim bir ulu pâdişâh
Mekr-ile bir kahbenüñ oldı tebâh
- 6710.Ger er-iseñ avrete inanmagıl
Saña eylük idesidür sanmagıl
- 6711.Kim olardur fâtişâtün fâcirât
Sâhirâtün kâzibâtün mâkirât
- 6712.Ol ölincek toldı âlem dâr u gîr
Bu anı itdi vü ol bunı esîr
- 6713.Niçeler tahta oturdı k'ola şâh
Tahta-i tâbûta gird'olup tebâh
- 6714.Niçeler kasd itdi k'ola zûdmîr
Oldı şöyle kim şererdür zûd mîr

PÂDİŞÂHI-İ ŞEYH HASAN-I NEVİN

- 6715.Âhirü'l-emr irişüp emr-i İlâh
Şeyh Hasan oldı ol ile pâdişâh
- 6716.Oğlı-dı Olcayatû sultânuñ ol
Kahrı eksük mihri vü in'âmı bol
- 6717.Niçe k'ol şâh-ıdı il ma'mûr-ıdı
Bid'at ü cevr ü sitemden dûr-ıdı
- 6718.Şâh Dil-şâdı_aldı ol kâbîn-ile
Şöyle kim ââik-durur âyîn-ile
- 6719.Ol Dımışk Hâce kızı-y-dı kim sipihr
Yüzine bahduhda sanur-ıdı mihr
- 6720.Niçeler gül yüzine hayrân-ıdı
Niçeler ışkında ser-gerdân-ıdı
- 6721.Anuñ-ıçun adı_anuñ Dil-şâd-ıdı
K'andan ulu vü kici dil-şâd-ıdı
- 6722.Sûret ü sîretde-y-ıdı dil-pezîr
Bahşış ü ihsânda-y-ıdı bî-nazîr

6723.Şeyh Hasan ondört yıl olup pâdişâh
Anı dahı yuddı bu hâk-i siyâh

PÂDİŞÂHÎ-İ ŞEYH HASAN-I TEMÛRTAŞ

6724.Ol öliceğ geldi kici Şeyh Hasan
Kim Temürtaş oğlı-y-ıdı aña sen

6725.Kamu Çûpânîler aña uydılar
K'anda devletden alâmet tuydılar

6726.Yidi yıl sultân olup Îrâna ol
Buldı_eceç çengâlı aña dahı yol

PÂDİŞÂHÎ-İ MELİK EŞREF

6727.Eşrefe kim kardaşıdur irdi baht
Anuñ oldı mülk ü mâl u tâc u taht

6728.Oldı bir sultân Melik Eşref ki mihr
Görmedi_anuñ bigi döneli sipihr

6729.Nice gerek bilür-idi saltanat
Lîki anda gâlib-idi şeytanat

6730.Katı bî-rahm-ıdı vü bî-dâd-ger
Adlden yog-ıdı anda hîç eser

6731.Dünyada her ne ki var fîsk u fesâd
Vardı anda hem dahı kibr ü inâd

6732.Döyemedi hergiz aña il ü şehir
Kim nihâyetsüz iderdi halka kahr

6733.Bir haremde komadı bir perde sag
Komadı kim ola rûşen bir çirâğ

6734.Halkuñ oğlı kızına sundı ol el
Devletine lâ-cirem düşdi halel

6735.Halk zulmından çü câna yitdiler
Hân u mânlar terk idüben gitdiler

6736.Deşt iline şâh-ı cânî hân-ıdı
Kim ten-ıdı kişver ü ol cân-ıdı

6737.Adl-ile insâf-ıdı işi anuñ
Nice diye vasfını kişi anuñ

- 6738.Kaçuban Eşrefden aña geldiler
Yalvarıban aña zârî kıldılar
- 6739.Didiler kim sini itmişüz penâh
Kim halîfesin sen iy zıll-ı İlâh
- 6740.Ehlümizi kurtarı virgil bize
Çâker ü bende_olalum cümle size
- 6741.Bunca nefsi ger sen ihyâ kılasın
Hak katında kurb-ı menzil bulasın
- 6742.Ol müsülmânları itmeklik halâs
Çünki farz olmışdur ol sultâna hâs
- 6743.Altıyüzbiñ kişi cem' idüp temâm
Yüridi Tebrîze şâh-ı nîg-nâm
- 6744.Var-ıdı Eşrefde toksan biñ kişi
Kim kamunuñ ceng itmekdi işi
- 6745.Durdı Eşref anda bir yire çıhup
Kim göre düşmen sevâdını bahup
- 6746.Çün ırahdan gördi bir deryâ gelür
Kim neye kim ugrasa yıhar alur
- 6747.Cümle kaçdılar diyüben el-firâr
Kimsene idemedi bir dem karâr
- 6748.Anda dutup Eşrefi_ itdiler esîr
Olmadı kimsene aña dest-gîr
- 6749.Anı dutanlar ki hâna vardılar
Anı hânuñ kullarına virdiler
- 6750.Hân gelüp Tebrîze kurdı bârıgâh
Bir zamân Tebrîzde oturdu şâh
- 6751.İlleri cümle müsahhar eyledi
İstimâlet virüben hoş söyledi

SEBEB-İ HELÂK-İ MELİK EŞREF

- 6752.Eşrefüñ bir kızı var-ıdı meger
Kim kamu hüsn-idi ol tâ-pâ vü ser
- 6753.Kaşları-y-ıdı anuñ mihrâb-ı cân
Zülfî sevdâsında yanardı cihân

- 6754.Sûretin sorsañ ne-y-idi âfitâb
Ger tenin añsam ne diyem mâhitâb
- 6755.Agzı mîm-i la'l-ıdı ol dahı nihân
Mîmden ayn-i hayât olmış revân
- 6756.Aldı anı pâdişâh kâbîn-ile
Halvetine birbidi âyîn-ile
- 6757.Mihr bulamadı anda pâdişâh
Oldı ol işden anuñ göñli tebâh
- 6758.Didi bu iş nireden-durur saña
Didi atamdur bunı iden baña
- 6759.Eşrefi ol gice itdürdi helâk
Böyle olur kişi k'anda_olmaya bâk
- 6760.Ko yavuz işi ki ol dirlik degül
Hâyin olmagıl ki ol erlik degül
- 6761.Şehvete uyma ki âfet-durur ol
Dünya ukbâda mahâfet-durur ol
- 6762.Öldi Eşref buldı halk andan halâs
Hâna cânlardan duâlar oldı hâs
- 6763.Çün musahhar oldı ol kişver aña
Döndi girü gitdi ilinden yaña
- 6764.Virdi Birdi Hâna Tebrîzi temâm
K'anda ol şâh ola halk aña gulâm
- 6765.Gider-iken yol hevâsından meger
İtdi bir illet mizâcına eser
- 6766.Bir iki gün hasta düşdi şehriyâr
Sandılar ki_ayruhsıdur nâ-gâh kâr
- 6767.Birdi Hâna bir kişi birbidiler
Atañuñ hâli yavuzdur didiler
- 6768.Birdi Hân kim işbu peygâma uyup
Göç itdi deşte Tebrîzi koyup
- 6769.Ol irince atası bulup ilâc
Başladı kim sıhhate döne mizâc
- 6770.Birdi Hân u ulu begler uş temâm
Bildiler kim kamu işler oldı hâm

6771. Ayag üstine durıcah pâdişâh
Cümlesini idiser bî-şek tebâh

6772. Hâmı anda bogup itdiler helâk
Ejdehâdur kimleri yir gör bu hâk

6773. Altı aydan k'oldı Birdi Hân revân
Gitdi_Ahîçuk adlu kişi_oldı ayân

ZUHÛR-I AHIÇUK DER-TEBRÎZ VE İNHİZÂM-I VE HELÂKET-İ Û

6774. Yog-ıdı anda pâdişahlıhdan neseb
Kimse yog-ıdı_itdi sultânlıh taleb

6775. Şöyle kim âdet idüpdür âsümân
Anı dahı aldadı birkaç zamân

6776. Cem' idiben Muzaffer çoh sipâh
Yüridi k'ide Ahîçugı tebâh

6777. İde Tebrîzi dahı kendüye râm
Kim Acem mülki anuñ ola temâm

6778. Ol yaña Bagdâddan Sultân Üveys
Yüridi üstine anuñ Hân Üveys

6779. Çün Muzafferle Ahîçuk düzdi saf
K'ideler ceng-ile birbirin telef

6780. Şâh Üveys urdı orada bir yiri
İhtiyâr idüp yasadı leşkeri

6781. Ol arada düzdi leşker şâh hem
Basmadı ayruh yire ol bir kadem

6782. Gözedür-idi ol iki leşkeri
Göre kim basılır ikiden biri

6783. Basılan ardınca çün basan vara
Atı yorıla vü kendüzi ire

6784. Vara bu anuñ-ıla ceng ide tîz
Başına kopara anun rüstahîz

6785. Kûs-ı harb urıldı çalındı nefir
İtdiler birbiri-y-ile dâr u gîr

6786. Her yañadın tîr bârân itdiler
Yayı ebrû ohı bârân itdiler

6787. Tîg-i ser-tîz ejdehâ-girdâr-ıdı
Süñüyi diye-y-düñ ef'î-mâr-ıdı
6788. Baş-ıdı her yaña kim itseñ nazar
Gevde-y-ıdı nireye kılsañ güzer
6789. Yiryüzi kandan buhâr olmış-ıdı
Kan buhârı-y-la hevâ tolmış-ıdı
6790. Atlar ayagı tozından âsümân
Şöyle-y-ıdı kim görünmezdi ayân
6791. Geh süñü-y-ile iderler-ıdı harb
Geh kılıc-ıla ururlar-ıdı darb
6792. Dâm u dedd anda ziyâfetde idi
Cân u ten orada âfetde idi
6793. Çünki germ oldı tenûr-ı kâr-zâr
Anda basıldı Ahîçuk hâr u zâr
6794. Kaçdı Ahîçuk ardına düşdi çeri
Şol kadar kim kaldı at ardı eri
6795. Şâh Üveys açıban oradan kemîn
Kim Muzafferle ide ol ceng ü kîn
6796. İtdi Üveys anda bir ulu kâr-zâr
Kaçdı öñinden Muzaffer hâr u zâr
6797. Yezd ü Şîrâz u Sıfâhân leşkeri
Şöyle kaçdılar ki kalmadı biri
6798. Niçe öldi niçeler oldı esîr
Basılan kişiye kimdür dest-gîr
6799. Ol Muzaffer k'irmiş-ıdı aña şikest
Şeh zafer bulıban anı itdi pest
6800. Key bahâdurdı Üveys-i tîg-zen
Leşker-râ-y-ıdı vü hem saf-şiken

***PÂDİŞÂHÎ-İ SULTÂN ÜVEYS(A.R) VE CENG-İ Û BÂ-VELÎ Kİ VÂLÎ-İ
HORÂSÂN BÛD***

6801. Şeh velî anuñla idem didi ceng
İtdi lîkin oldı âlem aña teng
6802. Cem'idiben Horâsân leşkerin
Geldi kim ide anuñla ceng ü kîn

- 6803.Vâli-yi mülk-i Horâsândı velî
Cengde Sâm u Nerîmândı velî
- 6804.İtdi _Uveys anuñ-ıla şöyle neberd
Ki _at ayagından göge irişdi gerd
- 6805.Atılan oh k'ef'î-yi bî-cân-ıdı
Korhısından ejdehâ bî-cân-ıdı
- 6806.Sûret-i mevt-idi kılıcı anuñ
Kim alurdı cânımı ol düşmenüñ
- 6807.Kılıcı-y-ıdı anuñ bir tîz-berk
Kim yanardı tâbişinden garb u şark
- 6808.Çünkü gâret germ oldı kâr-zâr
İndi atından orada şehriyâr
- 6809.Çünkü sultânı piyâde buldılar
Cümle ol leşker piyâe oldılar
- 6810.Şeh ohın döküp eline aldı yay
Yüz göge dutup didi kim iy Hüdây
- 6811.Ben hak üzre-y-sem mu'âvin ol baña
Hakk eger hasmuñsa yârî kıl aña
- 6812.Bu sözi diyüp ele yay aldılar
Düşmeni oha nişâne kıldılar
- 6813.Hasmı ol dem tir-ile _itdiler helâk
Zahm-ı peykân itdi _oları tîre-hâk
- 6814.Âkıbet râyetleri olup ser-nigûn
Kaçdılar başdan ayaga gark-ı hûn
- 6815.Oh ucından basılıban ol sipâh
Virdiler târâca raht u bârıgâh
- 6816.Âdeti çarhuñ bu resm-ile olur
Gâh ider şâd u geh gam-gîn kılır
- 6817.Kalma çarhuñ mâlına vü mihrine
Kahrını gör virme gönül mihrine
- 6818.Üşbu sultânlar ki şerh itdüm saña
Noldılar âhir eyitgil sen baña
- 6819.Durmayacah yir-içün ceng itdiler
Yiriyirinde koyuban gitdiler

6820.Pâk-dâmendi Üveys-i dâd-ger
Var-ıdı anda vilâyetden eser

6821.Pâdişâh kim adl ü bî-âzâr ola
Ne kerâmet dirseñ anda var ola

6822.Onyidi yıl oldı ol İrâna şâh
Bir kişi itmedi andan hergiz âh

***VEFÂT-I SULTÂNÜ'L-MERHÛM MAGFÛR SULTÂN ÜVEYS BERREDALLAHÛ
MADCAEHÛ VE MİSVÂHÛ***

6823.Çünkü ölümü anuñ geldi yakın
Sag-iken öldüğünü bildi yakîn

6824.Çün ölümünü hakîkat bildi ol
Halkı ohıdı vasıyyet kıldı ol

6825.Şeyh Hüseyin olsun didi yirüme şâh
K'ol-durur mecmû'-ı halka nîg-hâh

6826.Pes diri vü sag-iken rûh u beden
Kazdı gûr u düzdi kendüye kefen

6827.Pes varup bir kûşede oturdı ol
Begligüñ eşgâlımı götürdi ol

6828.İRte vü gice ibâdet eyledi
Hakka ihlâs-ıla tâat eyledi

6829.Tâatı ihlâs-ıla it iy refik
Kim ola Tevfik saña hem-tarîk

6830.Ne-durur tâat beden ihlâs-ı cân
Cânsuz olur mı beden rûşen-revân

6831.Saltanatla dünyayı dutdı Üveys
Dünyadan bu resm-ile gitdi Üveys

6832.Kanı ol İzz ü Celâl u ol Kemâl
Kanı ol Lutf-ıla ol Hüsn ü Cemâl

6833.Cümle oldı toprah altında nihân
Veh ki ne hûn-hâr-durur bu cihân

6834.Dünyada görgil ki ne işler olur
Pâdişahlar başına neler gelür

6835.Niçe kim döndi döniser âsümân
Âdemîleri ögidür âs-mân

6836. Bir degirmendür bu çarh-ı tîz-gerd
Kim öğütdüğünü ider tîz gerd
6837. Çün degüldür baht u devlet pâyidâr
Anuñ-ıçun ne gerek bu gîr ü dâr
6838. Çün gidersin bunda kalur mâl u genc
Ne-durur pes bu kamu bî-hûde renc
6839. AHMEDÎ hâlini dünyânuñ saña
Didi ger gûş olduñ-ısa sen aña
6840. Sözüni anuñ eger diñleyesin
Niçe bilmedüğünü añlayasın

*PÂDİŞÂHI-İ SULTÂNÜ'D-DEVLETİ VE'D-DİN HÜSEYN HÂN
TÂBE SERÂHÜ VE MERKADEHÜ*

6841. Öldi_Üveys ü şâh oldı Şeyh Hüseyin
Kim cemâlî-y-ıdı_anuñ dünyâda zeyn
6842. Var-ıdı ol pâdişâhda bir cemâl
Kim yog-ıdı aña âlemde misâl
6843. Yañağı_anuñ lâle-i hamrâ-y-ıdı
Gözleri hod nergis-i ra'nâ-y-ıdı
6844. Akl dahı zülfine mecnûn-ıdı
Gamzesine cân u dil meftûn-ıdı
6845. Cân bigi ol kamuya mahbûb-ıdı
Ömr bigi cümleye mergûb-ıdı
6846. Halk alurlardı yolını gündüzin
Kim giderken görelerdi gün yüzün
6847. Yüzi şem'i âleme virürdi tâb
Aña pervâne olurdu âfitâb
6848. Çün imâret oldı_atadan aña behr
Oldı adli-y-le imâret il ü şeh
6849. Oldı eyyâmında_anuñ ehl-i hüner
Server-i ser belki cümle tâc-ı ser
6850. Key sehâ-y-ıdı v ü ehl ü pâk-dîn
Sünnetüñ yolını dutardı yakîn
6851. Cevneden yig olmaga_ıderdi heves
Lîki anda yog-ıdı ol dest-res

- 6852.Hinde ot bigi yirden zer biter
Bu vücûh ol virmege nice yiter
- 6853.Dir-idi kim Cevnedeki genc ü zer
Binüm olsa görelerdi kimdür er
- 6854.Sâde-dil oldugı-çun ol pâk-dîn
Dutmaz-ıdı kimseden gönlinde kîn
- 6855.Kimse baña kasd ide dimez-idi
Kimse dir-ise dahı uymaz-ıdı
- 6856.Gâfilâne olur-ıdı ol müdâm
Gafleti-y-di hõd anuñ işi temâm
- 6857.Çün sekiz yılda düketdi müddeti
Buldı Sultân Ahmed aña fursatı
- 6858.Fursatı fevt itmedi dutdı anı
Öldürüp hâk-i zemîn itdi anı
- 6859.Hâkden olan gerek kim hâk ola
Kadr ü rütbetde eger eflâk ola
- 6860.Gül bigi hâk oldı bî-vakt ol_likâ
Nâzük olanlarda kem olur bekâ
- 6861.Çâre ne çün böyle geldi rûzigâr
Kim dökilür gül kalur yirinde hâr

PÂDİŞÂHÎ-İ SULTÂN BİN SULTÂN ÜVEYS

- 6862.Çünki Sultân Ahmed oldı pâdişâh
Girü nâle oldı halk işi vü âh
- 6863.Şöyle kim Merrîh bed-girdâr-ıdı
Zâlim ü bî-rahm u hem hûn-hâr-ıdı
- 6864.Gice yog-ıdı ki itmez-idi kan
İşi gündüz zulm ü cevr-idi hemân
- 6865.Hûb oğlanları ol itdürdi hâs
Çünki katında bulurlardı_ ihtisâs
- 6866.Bî-sebeb kamusın öldürür-idi
Yirlerine dahı buldurur-ıdı

- 6867.Rûzigârında hurûc itdi Temur
Eyledi dünyâyı añâ çeşm-i mûr
- 6868.Aldı Bagdâdı Temur u itdi hâk
Kıldı Sultân Ahmedüñ halkın helâk
- 6869.Kaçdı Sultân Ahmed âvâre olup
Düşdi Rûm u Şâma bî-çâre olup
- 6870.Halk anı dirler ki oldı dâd-ger
Ben direm bu söze kim Leyse'l-haber
- 6871.Bislenürse şîr ü şekerle yılan
Zehr pâ-zehr oldugı olur yalan
- 6872.Kevserüñ suyu-y-la suvarılsa pîş
Cism ü câna olur ziyânı dahı bîş
- 6873.Âkıbet bir fitne vü yeng eyledi
Dutmaga Tebrîzi âheng eyledi
- 6874.Kara Yûsuf mîr-idi Tebrîzde
Kim Tehemtendi hurûş u hîzde
- 6875.Karşuladı râst Sultân Ahmedî
Basdı vü eyledi tâlân Ahmedî
- 6876.Dutdı vü katl itdi âsânlıg-ıla
Dimnelikle degül arslanlıg-ıla

EVÂRÎH-İ MÜLÛK-I ÂL-İ OSMÂN VE GAZV-İ İŞÂN BÂ-KÜFFÂR

- 6877.Bu tevârîhi çün eyledüm beyân
Gönlüme bir nesne düşdi nâ-gehân
- 6878.Dahı sözler vesvese_ol ilhâmdur
Çâresi anuñ nedür itmâmdur
- 6879.Ol melikler k'anları zikr eyledüm
Hâletini ü sîretini söyledüm
- 6880.Kimi kâfirdi kimi ehl-i sitem
Kahr-ıdı anlarda bîş ü lutf kem
- 6881.Ol Mogol sultânlarınıñ adlini
Nice-y-idi işit imdi şerhini

- 6882.İtmediler anı kim Cingîz Hân
Zulmdan halka ider-idi ayân
- 6883.Zulm itdiler velî kânûn-ıla
Ellerin boyamadılar hûn-ıla
- 6884.Zulm kim kânûn u zabt-ıla ola
Adl bigi halka ol âsân gele
- 6885.Vardur ol sözlerde bize çoh zelev
Eydelüm şimd'anı k'anda yoh halel
- 6886.Çün añıldı ol kamu ehl-i sitem
Zikre getürelüm ehl-i adli hem
- 6887.Añalum ol begleri kim ser-te-ser
Hem müsülmân-ıdılar hem dâd-ger
- 6888.Kamusınuñ işi kâfirle cidâl
Geydügi vü yidügi mâl-ı halâl
- 6889.Bu kitâba eydelüm anı hitâm
K'anuñ-ıla ola bu nâme temâm

GAZAVAT-NÂME

- 6890.Bir Gazâvet-nâme düzeyim saña
İşid illâ i'tirâz idüp baña
- 6891.Gâziler soñra nişe añıldı dime
Anlar aşğa neçün geldi dime

İSTİ'ZÂR-I TE'HİR-İ KAZIYYE-İ GÂZİYÂN

- 6892.Soñra gelen öñ gelenden yig olur
Fikri olan bunı kim direm bilür
- 6893.Virdi Hakk insâna feyz itdükde cûd
Kudret ü akl u hayât u hem vücûd
- 6894.Akl ol üçden yigreg-idi bî-gümân
Lâ-cirem soñra_ oldı anlardan ayân
- 6895.Soñra geldi enbiyâdan ol Resûl
Hâtem oldı vü kamudan eşref ol
- 6896.Dört Kitâbuñ soñı Kurândur gelen
Fazl-ıla_ oldur anlara nâsih olan

6897.Kamudan çün soñra geldi âdemî
Fazl-ıla oldu kamunuñ hâtemi

6898.Pâdişâh aşğa yuharu alem
Ol alemden pâdişâh olur mı kem

6899.Dürr-i meknûn bahr ka'rında olur
Hâr u has hâşâk yuharu kalur

6900.Tebbet-ile Kulhüvallahü ahad
Bu söze hüccet ki yohdur aña red

ÂGÂZ-I DÂSİTÂN

6901.Birgün ol Sultân Alâüddîn Saîd
Sordı n'olur hâl-i gâzî vü şehîd

6902.Bildi anı kim gazâ key iş olur
Gâzi_olanuñ haşri bî-teşvîş olur

6903.Gâzi_olan Hak dîninüñdür âleti
Lâ-cirem hôş olasıdur hâleti

6904.Gâzi olan Tanğrınuñ ferrâşıdur
Şirk çirkinden bu yiri arıdur

6905.Gâzi olan Hak kılıcıdur yakîn
Gâzi_olur püşt ü penâh-ı ehl-i dîn

6906.Anı k'ola Tanğrı yolında şehîd
Öldi sanma kim diridür ol saîd

6907.Hak katında rızk içindedür olar
Ölmediler belki zindedür olar

6908.Pes heves itdi k'ide ol bir cihâd
Ola kim gâzî uralar aña ad

6909.Leşkerini cem' idüp girdi yola
Gündüzalp Ertogrıl anuñla bile

6910.Dahı Gökalp u Oguzdan çoh kişi
Olmış-ıdı_ol yolda anuñ yoldaşı

6911.Konyadan çün geldi Sultân yükine
Katına geldi halâyık yükine

6912.Baylara i'zâz u ikrâm eyledi
Yohsula ihsân u in'âm eyledi

- 6913.Dâr-ı küfre saldı oradan çeri
K'iller urup öldüreler kâferi
- 6914.Anda Ertogrıl çoğ itdi kârı-zâr
Lâ-cirem oldı cihânda nâm-dâr
- 6915.Urdı bî-hadd il ü aldı genc ü mâl
İtdi leşker-dâr-ı küfri pâyimâl
- 6916.Ol yörede durdı birkaç vakt şâh
Tâ kim ola kâfirüñ işi tebâh
- 6917.Sulh-ıdı Tâtâr anuñla ol zamân
İşidicek kâfere_ olduğın revân
- 6918.Buluban fırsat girü il urdılar
Ahdi bozup girü kîne durdılar
- 6919.Bu haberden irdi çoh teşvîş aña
Lâ-büd oldı girü dönmeğ iş aña
- 6920.Virdi ol etrâfı Ertogrula şâh
K'ide def'in ehl-i küfrüñ sâl u mâh
- 6921.Bu kadar feth oluban rûzî aña
Döndi gitdi girü Konyadın yaña
- 6922.Uydı anca çoh kişi Ertogrıla
Oldur iş kim dâniş-ile togrıla
- 6923.Ol gelenlerle gönül berkitdi ol
Hak yolına cânını terk itdi ol
- 6924.Yüridi Sögüt iline geldi ol
Kılıc-ıla ol yöreyi aldı ol
- 6925.Bunuñ üstine çü geçdi az zamân
Yüzini dönderdi andan bu cihân
- 6926.Gitdi Ertugrıl cihândan yirine
Oğlı Osmân kaldı anuñ yirine

İMÂRET-İ OSMÂN VE SIFAT-I KÂR-I VE SİRET-İ Ū

- 6927.Oldı Osmân bir ulu gâzî kim ol
Nireye kim vardı-y-ısa buldı yol
- 6928.Her yaña birbidi bir bölük çeri
K'il uralar katl ideler kâferi

6929.Bilecüki itdi feth ol nâm-dâr
Eynegöl-ile İznîki eyledi hısâr

6930.Eyle takdîr itdi Hakk Azze ve Cell
K'almadın ol ikisin irdi ecel

PÂDİŞÂHÎ-İ ORHAN BİN OSMÂN

6931.Ol öliceğ aldı yirin Urhân
Aña didi_ehl-i kerâmet k'ur hân

6932.Her yañadın yürüyüben bir çeri
Rûz u şeb târâc itdi kâferi

6933.Avret oğlan bulduğın itdi esîr
Kırdılar bâkî ne var bürnâvü pîr

6934.Kâfir üzre ahdılar a'vân-ı dîn
Andan itdiler gazâ adın ahın

6935.Kâferi karşı yirinden sürdiler
Küfri yire sohuban yitürdiler

6936.Her yañadın il ehli yitdiler
Dîn nedür ü şer'i takrîr itdiler

6937.Nirede kim var-ıdı âsâr-ı şirk
Yudı tevhîd anı vü kalmadı çirk

6938.Ol zamândan kim farîza_oldı gazâ
Bâri anlar bigi kim kıldı gazâ

6939.Key ulu gâzî_aldı biş altı hısâr
Bunlar aldı bunca_ il ü şehr ü diyâr

6940.Çünkü Hakk Urhânı itdi pâdişâh
Oldı ol dîn ehline püşt ü penâh

6941.Oldı âlî-câvidân râyât-ı dîn
Oldı zâhir tâ-ebed âyât-ı dîn

6942.Munsıf-ıdı Urhânı u dâd-ger
Unıdıldı anuñ-ıla adl-i Ömer

6943.Kanda kim Osmânîler adli ola
Orada adl-i Ömer nişe_añıla

6944.Mescid ü mihrâb bünyâd eyledi
Niçe dâr-ı hayr âbâd eyledi

6945. Her yaña kim birbidi ol bir çeri
Yıhuban yahdılar oda kâferi
6946. Togru geldi her ne k'ışledi-y-se ol
Yirine yitdi ne başladı-y-sa ol
6947. Geldi her yirden aña çoh sîm ü zer
Kul u karavaş latîf ü sîm-ber
6948. Râyet-i küfr oldı anda ser-nigûn
Kâferüñ beglerin itdiler zebûn
6949. Az zamânuñ arasında ol bölük
Yohsul-iken cümlesi oldı mülûk
6950. Çünki nusret buldı Hakdan nâm-dâr
Bursayı aldı idiben ol hısâr
6951. Yıhuban anda kelisyâ-y-ıla deyr
Mescid eyledi binâ vü dâr-ı hayr
6952. Vâr-durur şimdi hayr ol dârda
Toludur ni'met der ü dîvârda
6953. İznik'i dahı çeküp renc ü ta'ab
Aldı çün fethini eyledi taleb
6954. Aldı anı kâfirin kıldı helâk
Şimdi mü'min yiridür ol â u hâk
6955. Gör ki nice dâr-ı islâm oldı ol
Gör nice ilm ehli-y-ile toldı ol
6956. Pâk-dîndi Urhân pâk-i'tikâd
İlm ehli buldılar andan murâd
6957. Geldi katına Sinân kim ol fakîr
Olmış-ıdı fakr elinde esîr
6958. Dir-iken ki_el-fakru kâdâne yekûn
Baht oldı aña gınâda reh-nümûn
6959. İlm adına itdi anı Paşa Sinân
Buldı andan mâl u câh u nâm u nân
6960. Bir bahâdur server-idi Urhân
K'aña dirlerdi Nerîmân-ı zamân
6961. Atduğı ohdan uşanurdu kader
Ejdehâ rumhından iderdi hazer

6962.Kılıcı_ anuñ bir musavver merg-idi
Sanasın ol bâd u cânlar berg-idi

6963.Gürzin alduhda ele ol nâm-dâr
Düşer-idi korhuya Sâm-ı Süvâr

6964.Bahşışı var-ıdı lîkin Hâtemî
Gûşışı var-ıdı lîkin Rüstemi

6965.Mü'mine rahmetdi âfet kâfire
Salmış-ıdı biñ mahâfet kâfire

6966.Mihri-y-idi mü'mine anuñ şifâ
Kahrı-y-ıdı kâfire anuñ şakâ

6967.Lâza düşmiş-idi andan velvele
Üngürüsün illerine zelzele

***FİRİSTÂDEN-İ URHAN SÜLEYMAN PAŞA-RÂ Bİ-İSREYAKA EZ-BERÂ-YI
GAZÂ VE CİHÂD***

6968.Ulu oğlu-y-dı Süleymân Pâşa nâm
Anda-y-ıdı şâh u serverlik temâm

6969.Hem şecâat hem sehâvet ehl-idi
Hem siyâset hem riyâser ehl-idi

6970.Hüb evsâf-ıla ol mevsûf-ıdı
Şöyle kim eltâf-ıla ma'rûf-ıdı

6971.Dâyimâ iderdi cehd ü ictihâd
Kim ölince dîn yolında ide cihâd

6972.Fikre düşdekde ol Âsaf-râ-y-ıdı
Cenge girdüğünde saff-ârâ-y-ıdı

6973.Ne fazîletdür gazâ bilür-idi
Hak yolında terk-i cân kılur-ıdı

6974.Şîr-gîr-idi vü hem şimşîr-zen
Hasm-bend-idi vü hem düşmen-şiken

6975.Birbidi_ İsregeçeye anı Urhân
Kim gazâ ide orada bir zamân

6976.Kim yüriye leşker-ile_ ol nâm-dâr
Memleket feth ide vü şehr ü diyâr

6977.Ne ki kâfirde bulur-ısa yıha
Hân ü mânların kamu oda yaha

- 6978.Da'vet-ile gelmeyeni öldüre
Leşker-i islâmı gâlib oldura
- 6979.Tangrı emri vü atası râyı-la
Vardı kâfir iline leşker bile
- 6980.Dîn-içün itdi orada çoh gazâ
Oldı gâzî olmaga adı sezâ
- 6981.Nireye kim vardı gâlib oldı ol
Çoh diyâr u şehr ü kal'a aldı ol
- 6982.Ol arada ol kadar eyledi ceng
K'andan uşanurdu magribde fireng
- 6983.Kanda kim irdi-y-ise nâm-dâr
Feth idüp iller aldı vü diyâr
- 6984.Her murâdı kim diledi buldı ol
Lâ-cirem bir ulu sultân oldı ol
- 6985.Kal'alar virdiler aña mâl u bâc
Aldı kâfir beglerinden çoh harâc
- 6986.Kanda kim buldı kelisyâ yıhdı ol
Nâkus u zünnârı oda yahdı ol
- 6987.Yire sohup eyledi küfri nihân
Lâilâhe_illallahı kıldı ayân
- 6988.Çoh kelisyâ yıhdı mescid yapdı ol
İkilik yog-ıdı bire tapdı ol
- 6989.Niçe kez eyledi anda ol kıtâl
Niçe küfr ehlini itdi pâyimâl
- 6990.Vîze vü Mîgalkara vü İpsala
Feth oldı aña bu üçi bile
- 6991.Anda kâfir leşkeri oldı zebûn
Râyet-i küfr anda düşdi ser-nigûn
- 6992.Az zamândan çünki geçdi ay u yıl
Toldı "Allâhu_Ekber"ile şehr ü il
- 6993.Îsî tapıldığı yirde ol zamân
Şimdi añılan Muhammeddür hemân
- 6994.Bir zamândan irdi_aña çeng-i ecel
Çâre ne Hakk emrine Azze ve Cel

6995.Fî'l-mesel nedür cihân bir reh-güzer
Üşbu menzilden k'emel-durur gider

6996.Çünkü adı yir-durur ne bulsa yir
Ögmegil anı niçe gerekse yir

6997.Dünyanuñ mihrini gönlüñden gider
Üşbu menzilden k'emel-durur gider

6998.Çoh emel dutup saña kim didi az
Çün bilürsin ömrüñi kim olur az

6999.Fikr it kimleri kahr itdi cihân
Kimler olmışdur yir altından nihân

7000.Topraguñ her zerresinden itseñ taleb
Bulina biñ zülf ü hâl ü hatt u leb

7001.Hûb yazar hûb nakş urur düzer
Çün temâm ider anı girü bozar

7002.Lutf u kahrı Hakkuñ olmah-çun ayân
Emr-ile geldi vücûda bu cihân

7003.Bisler ü arturur irdükde kemâl
Ol kemâle irgürür naks u zevâl

7004.Oglı-y-ıçun itdi nâle Urhân
Ölüye nef' eylemez âh u figân

7005.Bir zamân çünkim bu çarh-ı âb-gûn
Geh ser-efrâz oldı vü geh ser-nigûn

7006.Gündüz ü gece yürüdi mihr ü mâh
Geldi gitdi rûz u hafta sâl u mâh

7007.Geh hazân itdi vü geh tâze bahâr
Gâh tire-şeb gehî rûşen-nehâr

7008.Tangrıdan va'de iriben Urhan
Oldı bundan Huld bâgına revân

7009.Dutuban otuz tokuz yıl tâc u taht
Cennetüñ gül-zârına iletđi raht

PÂDİŞÂHI-İ MURÂD BEG GÂZİ Sİ-SÂL-BÛD

7010.Aldı anuñ yirini Gâzî Murâd
Kim cihâd u gazv-ıdı aña murâd

- 7011.Pâdişâh-ı kâmil ü dâna-y-ıdı
Sâhib-i tedbîr ü ehl-i rây-ıdı
- 7012.Göñli pest ü himmeti-y-ıdı bülend
Nef'i çoğ u yog-ıdı anda güzend
- 7013.Kaygusı dahı olsa ol şâdân-ıdı
Hâr içinde gül bigi hândân-ıdı
- 7014.Her k'aña irse fakîr ü yâ garîb
Ni'metinden bulur-ıdı çoh nasîb
- 7015.Niçe düşmişlere oldı desti-gîr
Niçeleri itdi yohsulken emîr
- 7016.Niçelerüñ başını götürdi ol
Yirden ü pes göklere yitürdi ol
- 7017.Bî-nevâlıkdan koyuban çandarı
Katına geldi Halîl-i Çandarî
- 7018.Bu kamusı-y-la ki ilmi az-ıdı
Her hünerde âri-î vü nâ-sâz-ıdı
- 7019.Gurbet ü hâlin ü fakrın bildi ol
Lutf-ıla_anı ehl-i mansıb kıldı ol
- 7020.Âkıbet kendüye itdi_anı vezîr
Ne vezâret k'itdi bir ulu emîr
- 7021.Şâh olanuñ işi böyle gerek
K'olmaya levh-i keremden adı hak
- 7022.Pâdişâha şöyle gerekdür nazar
Kim katında_ola berâber hâk ü zer
- 7023.Şâhda gerek k'ola yümn ü hümây
Kim melik ola irerse_aña gedây
- 7024.Çünkü ol Gâzî Murâda_ırince baht
Buldı ârâyış anuñla tâc u taht
- 7025.Nezr itdi kim ide dâyim gazâ
Anı ide kâfire k'oldur sezâ
- 7026.Var-ıd'anda kuvvet ü tâb u tüvân
Nev-cüvân-ıdı vü hem nev-pehlevân
- 7027.Ol bahâdurluhda key ma'rûf-ıdı
Hem gazâyâ himmeti masrûf-ıdı

7028.Oldılar yagı aña kardaşları
Kamunuñ yitdi elinde başları

7029.Kılıcından oldılar cümle tebâh
Olmış-ıdı aña Hak lutfi penâh

7030.Evvel ol-ıdı ki Rûma sundı el
Kaysara irürdi çoh dürlü zeled

7031.Aldı Engûriyyeyi ol harb-ile
Tutdı Sultân öñüni hem darb-ıla

***MUSÂF-I VE CENG-İ KARÂMÂNİYÂN BÂ-MURÂD BEG VE HEZÎMET-İ
LEŞKER-İ KARÂMÂN***

7032.İtdi anuñla Karâmân şâhı ceng
Lîkin oldı yiryüzi gözine teng

7033.Her yañadın isted'ol avn ü meded
Ol penâh oldı aña k'oldur Samed

7034.Her bahâdur kim Tatar da var-ıdı
Kamu aña leşker ü hem-yâr-ıdı

7035.Varsak u Turgud u Türk ü Rûm u Şâm
Anuñ-ıla bile-y-id'anda temâm

7036.Çün işitdi bu sözi Gâzî Murâd
Germ yürüdi idem diyü bir ad

7037.İstemedi kimseneden ol meded
Feth virdi aña tevekkül-çün Samed

7038.Barkıdı vü irişiben urdı darb
Düşmen-ile eyledi şîr-âne harb

7039.Cîdalar sındı uşandı tîg-i tîz
Sana-y-ıduñ kopdı rûz-ı rüstahîz

7040.Hem Tatar hem Türk olıban telef
Kılıcına oldılar anuñ alef

7041.Kaçdı öñinden Karâmân şâh anuñ
Oldı mihri-y-le sipihr ü mâh anuñ

7042.Raht u büngâhı kamu terk itdiler
Cân azîz olur alıban gitdiler

7043.Çün Karâmânluda bilürsin ne var
Varı dahı anda oldı târ u mâr

7044.Niçe begler anda oldılar helâk
Niçe yigitler düşiben oldu hâk

7045.Çün müyesser oldu üşbu feth aña
Kıldı azmin cezm kâfirden yaña

7046.Çün Karâmân leşkeri_ oldu târumân
Girü ol kâfirleri kıldı şikâr

REFTEN-İ MURÂD BEG-İ GÂZÎ BÂ-İSREYAKA CİHET-İ GAZÂ VE FETH-İ BİLÂD

7047.Nireye yüz dutdı-sa buldı zafer
Kılıcı sindâna oldu kâr-u ger

7048.Oldı peykânı_ohınuñ peyk-i kazâ
İrdügi yire irişdürdi fenâ

7049.Mülki sayd itdi bu kâfi nâm-dâr
Şöyle kim Kâfi_eyledi Sâm-ı Suvâr

7050.Çün gazâdan yog-ıdı anda garaz
Cüz rızâ-yı Hak k'ola aña ivaz

7051.Lâ-cirem kim kâfire buldı zafer
Kıldı dâr-ı küfri ol zîr ü zeber

7052.Tâata ihlâsdur şart-ı kabûl
Tâatuñ fazlı olur ansuz fuzûl

7053.Tâatından kişi anda bula hayr
Hakk ola gönlinde pes olmaya gayr

7054.Gayrdan gönlünde var-ısa eser
Hayr dime tâata kim oldu şer

7055.Bulmamışdur hayr her kim didi gayr
Gayr cândan mahv it k'ış ola hayr

7056.Hakdan ayruğı gönülde sür düriş
Diler-iseñ kim yavuz olmaya iş

7057.Bu söz üzre bir hikâyet eydeyim
Saña Kurândan rivâyet ideyim

HİKÂYET DER-BEYÂN-I ŞÛMÎ-Yİ ADEM-İ İHLÂS

7058.Çün Benî İsrâile gazv oldu farz
K'ödenecek nesnedür şöyle ki karz

- 7059.Hasmı_olaruñ leşker-i imlîk-ıdı
Kâfir-ıdı cümle vü zindîk-ıdı
- 7060.Lîki mecmû'ı bahâdur tîg-zen
Tir-endâz-ıdı vü leşker-şiken
- 7061.Ol gazâya korhudan varmadılar
Hakkuñ emrine boyun virmediler
- 7062.Düşmene kıldı Hak anları zebûn
Oldılar cümle zelîl ü ser-nigûn
- 7063.Kırdılar anları idüp dâr u gîr
Avret oğlan kamu itdiler esîr
- 7064.Komadılar nesne kamu urdılar
İllerinden dahı cümle sürdiler
- 7065.Çün Benî İsrâile irdi ol belâ
Oldılar mihnet elinde mübtelâ
- 7066.Bildiler kim terk-i emr-ıdı sebeb
Kim bulara irdi Tangrıdan gazab
- 7067.Avret ü oğlanlar oldılar esîr
Kalmad'anlara kişi k'ola emîr
- 7068.Oldılar bî-server ü bî-ser kamu
Kaldılar bî-kuvvet ü bî-fer kamu
- 7069.İçlerinde bir peyem-ber var-ıdı
K'ad-ıla_aña Urmiyâ dirlir-ıdı
- 7070.Didiler aña ki bize desti-gîr
Oluban bir kişiyi itgil emîr
- 7071.Kim biz anuñ katına cem' olavuz
Hasmdan ola ki bir kîn alavuz
- 7072.Urmiye didi k'emîr olursa siz
Girü şâyed kim gazâ itmeyesiz
- 7073.Didiler nice_itmeyevüz kâr-u zâr
Gitdi ogul u kız alındı diyâr
- 7074.Çün diyâr uy ogul u kız oldı yâd
Gazveden anı diyen olmadı şâd
- 7075.Hakdan artuh çün garaz düşe_araya
Şirk olur ol Hakka nice yaraya

7076.Dimediler kim idiben kâr-zâr
Cân virelüm çün buyurdı Kirdigâr

7077.Cân anuñdur yolına terk idelüm
Göñlümüze ıřkını berkidelüm

7078.Zî saâdetlü vü zî devletlü cân
K'ideler Hak yolına anı revân

7079.Ol-durur ihlâs kim ol Hak kala
Dahı ne varsa göñülde mahv ola

7080.Hâr görine gözine kâinât
Hakkı diyen gayre kılmaz iltifât

7081.İtdi Tâlûtı olara Hakk emîr
Kim ideler düşmen-ile dâr u gîr

7082.Yüridiler hasm üzre varmaga
Düşmene kendülerini urmaga

7083.İssi günde bir suya ugradılar
Kamusı dil-sûhte teşne-ciger

7084.Hakdan iriřdi olara ibtilâ
Oldılar su içmege çoh mübtelâ

7085.Vahy oldu k'ol suyu içmeye kiři
Ugrayup geçmek ola andan işi

7086.Her ki içe bir avuç içe hemîn
Eyle iden kiři ola pâk-dîn

7087.Bu gazâyâ ol-durur kim yaraya
Girmeye dahı kiři ol araya

7088.Ol ki ihlâs ehli degüldi kamu
Aldılar su içdiler kici ulu

7089.Orada mecmû'ı bîmâr oldılar
Hasta vü bî-çâre vü zâr oldılar

7090.Çog içenlerüñ olıban cânı süst
Az içenler kaldı cümle ten-dürüst

7091.Yog-ıdı_ihlâsından anlaruñ safâ
Lâ-büd oldılar belâyâ mübtelâ

7092.Üçyüz onüç kiři kalmışdı hemîn
Lîki cümle muhlis ü pâkîze-dîn

- 7093.Yüridiler Tañğrıdan feth isdeyü
Lâ-cirem kim oldı işleri eyü
- 7094.Anda Tâlût itdi Câlûtı helâk
Oldı ĩmlıkîler ucdan uca hâk
- 7095.Çog içenüñ çün degüldi_ıhlâsı süst
Lâ-büd oldı işleri cümle dürüst
- 7096.Üşbu sözden kim saña itdüm beyân
Bilinür Osmâniler hâi ayân
- 7097.Âl-i Osmânuñ çün ıhlâsı_oldı hâs
Buldılar Hak Hazretinde ihtisâs
- 7098.Kanda vardılar-ısa yol buldılar
İller alup halka gâlib oldılar
- 7099.Olsa ıhlâsında anlaruñ zelev
Düşe-y-idi_ışlerine bir kez halel
- 7100.İy tevârîhi bilen kişi ayân
Bilür-iseñ eylegil baña beyân
- 7101.Kim kopalıdan Muhammed ümmeti
Kim olar-durur Halîlüñ milleti
- 7102.Farz olalı bu halk üzre cihâd
Bunlaruñ bigi kim itdi ictihâd
- 7103.Kâfir elinden bu mıkdar il ü şehr
Aluban kıldı mülûkin cümle kahr
- 7104.Ümmetî ta'lû ve lâ-tu'lâ diyen
Bunlaruñ-çun didi_ola fikr eyle sen
- 7105.Söz öküşdür çünki ol Gâzî Murâd
Pâk-ıhlâs-ıdı vü pâk-i'tikâd
- 7106.Yapdı dâru'l-hayr u câmi' türbe hem
Bâri ölmekden aña dahı ne gam
- 7107.Ukba-y-ıçun yapdı dünyâda makâm
K'anda âsûde olurlar hâs u âm
- 7108.Diri-y-iken halka_irürdi râhatı
Öldi hem girü irişür ni'meti
- 7109.Rûmilini çün müsahhar eyledi
Beglerin kendüye çâker eyledi

7110.Lâza dahı _itdi tama' encâm-ı kâr
Ara yirde düşdi lâ-büd gîr ü dâr

7111.Gebr ü tersâ garba degin her ne var
Lâza leşker virbidiler bî-şümâr

***CENG-İ SULTÂN-I SAİD MURÂD BEG BÂ-LÂZ-I GEBR Ü ŞEHÂDET-İ Ü VE
İNTİZÂM-I KÜFFÂR***

7112.K'ideler Gâzî Murâd-ıla neberd
Kılalar anuñ vücûdın hâk u gerd

7113.İtdi Gâzî Hân olaruñ-ıla ceng
Şöyle k'oldı yiryüzi anlara teng

7114.Kopdı bir ceng arada kim rûzigâr
İtdi târîhini anuñ yâdigâr

7115.Baş-ıdı her yaña kim itseñ nazar
Gövde-y-ıdı nireye kılsañ güzer

7116.Kana gark olmuş-dı toprag-ıla taş
La'l-reng olmuş-ıdı her kuru yaş

7117.Yir tolu baş u ten-ıdı kat kat
Küştelere üstinde yürür-ıdı at

7118.Darbdan ol harbde olup zebûn
Kaçdılar küffâr oradan ser-nigûn

7119.Kova gitdi düşmeni hayl ü sipâh
Kaldı birkaç kul-ıla bir yirde şâh

7120.Durdı orada kim dönicegez çeri
Ol arada bulalar ol serveri

7121.Kana âlûde olup tâ-pâ vü ser
Yatur-ıdı anda bir kâfir meger

7122.Gevdeler içinde olmuşdı nihân
Lîki Gâzi Hânı görürdi ayân

7123.Çün kazâ irdi yaturken durdı ol
Sıçrayup hancerle şâhı urdı ol

7124.Ol arada _ol demde Sultân-ı sa'îd
Gâzi-y-ıdı mutlakâ oldı şehîd

7125.Çâre ne çün böyledür çarhuñ işi
Bâki olmaz dâyimâ zinde kişi

7126.Gāzi-y-idi vü gazâda ber-hak ol
Çün şehîd oldı şehîd-i mutlakk ol

7127.İsti'ânet dile rûhından anuñ
K'iresin fethe fütûhından anuñ

PÂDİŞÂHÎ-İ SULTÂN-I PİRÛZ BÂYEZİD BİN GÂZÎ MURÂD

7128.Çün şehâdet buldı Gâzî-yi şehîd
Yirine oturdı Sultân Bâyezîd

7129.Ata dede bigi âdil oldı ol
Dükeli işlerde kâmil oldı ol

7130.İlm ehlini severdi_ol nîg-nâm
Kılur-ıdı_in'âm iderdi ihtirâm

7131.Hoş görürdi anı kim âbid ola
Hoş dutardı anı kim zâhid ola

7132.Şeyh efendi geldi aña bî-nevâ
İtdi_anı mecmû'-ı halka pîşivâ

7133.Çoh menâsıb viridi_aña ol şehriyâr
İl ü kevn ü kal'a vü şehri diyâr

7134.Rûmdan Sîvâs u Tokatı_aldı ol
Cânîk'i_alup Samsun'a hem geldi ol

7135.Çünkü oldı feth ol dahı aña
Döndü girü dâr-ı mülkindin yaña

7136.Tâ-be-hadd-i Antaliyye şehri diyâr
Kamusını feth itdi_ol nâm-dâr

7137.Ne Alaşar kodı vü ne Saruhan
N'Aydın u ne Menteşe ne Germiyân

7138.Katamûniyye dahı feth oldı_aña
Böyle olur devlet işi çün oña

7139.Çün Karaman illerine geldi ol
Konya vü Lârende'yi dahı_aldı ol

7140.Komadı ol yörede şehri diyâr
Kamusını feth itdi ol nâm-dâr

7141.Geldi dâru'l-mülke vü oturdı şâd
Memleketde kıldı gâyet adl ü dâd

7142.Halk ol adli çünkü andan buldılar
Ulu kiçi işe meşgûl oldılar

7143.Bu kamu Rûm içre bir yir kalmadı
Kim anuñ adli-y-le ma'mûr olmadı

7144.Kalmadı kişverde ne sahrâ ne tag
K'olmadı ol kişt ü yâ bostân u bâg

7145.Bir zamândan zühd itdi_ol âşikâr
İşi tâat oldu_anuñ leyl ü nehâr

7146.Almadı hergiz eline câm-ı mey
Diñlemedi dahı hergiz çeng ü ney

7147.Şâh-ı Osmânî ki adli-y-di Ömer
Bildi k'olur kâdılar bî-dâd-ger

7148.İşleri rişvetdür ü tagyîr-i şer'
Hiç añmazlar ne-durur asl u fer'

7149.Dünya-y-ıçun k'aña gerekmez nazar
Hakkı bâtl bâtılı Hak dir bular

7150.Cem' itdi kamusını sordı ol
Ne ki aldılar girü virdürdi ol

7151.Geregince itdi anlara cezâ
Yavuz işlüye yavuzluhdur sezâ

7152.Cehd-ile bir zerre getürdi yola
Râst-ravlîh hod olardan nice_ola

HABER-ÂMEDEN EZ-VEFÂT-I SULTÂN BERKÛK BE-BÂYEZÎD BEG

7153.Bunuñ üstine çü birkaç rûzigâr
Gitdi vü geldi girü leyl ü nehâr

7154.Emri-y-ile Hâlıkûñ Azze ve Cell
Mısr sultânına irişdi ecell

7155.Bunı_ışidüp Şâma ol kasd eyledi
Mısr binüm oldu diyü söyledi

7156.Dimedi ol öldi ben dahı_ölürem
Şöyle kim ol oldu ben dahı_oluram

7157.Öldüğünden saña gerekse habar
Koñşılar öldüğine eyle nazar

- 7158.Nûş-revâna didiler müjde i şâh
Kim fülân düşmen ölüp oldu tebâh
- 7159.Didi oldur müjde kim ben ölmeyem
Şöyle kim ol oldu ben dahı olmayam
- 7160.Müjde neçün ben dahı öliserem
Şöyle kim ol oldu hâk olısaram
- 7161.Düşmen öldügi habarcıdur saña
Kim varursın sen dahı hem ol yaña
- 7162.Fursatıdur diyibenüñ dutdı yol
Leşkeri-y-le Mildenîye vardı ol
- 7163.Feth itdi _anı egfirdüp bir zamân
Girü dâru'l-mülke döndürdi inân
- 7164.Geldi kim kış otura yarak ide
Girü yazın Şâm fethine gide
- 7165.Bu kamu _itdügi anuñ tedbîr-idi
Bilemedi anı kim takdîri-idi
- 7166.Âdemi tedbiri gelmez hîç işe
Orada kim Tangrı takdîri _irişe
- 7167.Her ne kim takdîr-ise nâ-çâr olur
Pes bu tedbiri eyit nişe gelür
- 7168.Bu arada Rûma yüridi Temur
Mülk toldı fitne vü havf u fütûn
- 7169.Çün Temûruñ hîç adli yog-ıdı
Lâ-cirem kim zulm u cevri çog-ıdı
- 7170.Zikr-i vahşet çünki vahşetdür yakîn
Anı añmamah-durur hîle hemîn
- 7171.Ol fütûr içinde gitdi şehriyâr
Yihılup yahıldı çoh şehr ü diyâr
- PÂDİŞÂHI-İ SULTÂNÜ'S-SAİDÜ'Ş-ŞEHİD EMİR SÜLEYMÂN NEVVERALLÂHÜ
KABBREHÜ**
- 7172.Mîr Sülmân oldu _anuñ yirine şâh
Gün bigi rûşen ne hâcetdür güvâh
- 7173.Ol arada kim ola ol dâd-ger
Kim olur Nûşinrevân u yâ Ömer

- 7174.Himmeti katında_ anuñ bilgil ayân
Bir cevehdür Cevne vü Hindûsitân
- 7175.Mühri urduğında mûma hâtemî
Bir gedâya kul ider yüz Hâtimi
- 7176.Hulkınuñ hüsnine gâyet yoh-durur
Lutfına hergiz nihâyet yoh-durur
- 7177.Hüsninüñ vasfin işidüp Müşterî
Işkına_ oldu cân viriben müşterî
- 7178.Atınuñ na'lin görüp dir âfitâb
İmrenüp “yâ leytenî küntü türâb”
- 7179.Gerçi leşker vâ u genc ü dest-res
Lîkin itmez mülk almaga heves
- 7180.Himmeti katında;_ anuñ mülk-i zemîn
Bir uvazuñ kanadıncadır hemîn
- 7181.Mülk isdes'olmadın arada harb
Feth ola-y-ıdı aña şark u garb
- 7182.Ol mürüvvetlüdür ü ehl-i atâ
Ol fütüvvet issidür”ni'me'l-fetâ”
- 7183.Kibrden olup-durur nefsi berî
Hem yavuz ahlâkdandır ol arı
- 7184.Hûb evsâfına_ anuñ yohdur kerân
Pes anı ben nice eydeyim beyân
- 7185.Bî-kerân nesneyi kimdür kim bile
Yâ anuñ şerhini kim idibile
- 7186.Ömrden ger virilür-ise emân
Tangrınuñ fazlı-y-ıla birkaç zamân
- 7187.Bir kitâbe dahı bünyâd idevüz
Mîr Sülmân nitdi anda eydevüz
- 7188.Ol meliklerden ki zikr itdüm saña
Adların evsâf-ıla öñden soña
- 7189.Bu melik adı n'ola geldi-y-se soñ
Çün kamudan rütbet-ile oldur öñ
- 7190.Geldiler evvel hezârân enbiyâ
Pes Muhammed geldi tâc-ı evliyâ

- 7191.Lâ-büd oldu kamusunuñ hâtemi
Kim Hak anuñ-çun yaratdı âlemi
- 7192.Gerçi âhırdur semer evvel şecer
Lîki rütbetde şecerden yig semer
- 7193.Kim semer getürmeg-içün feyz-i cûd
Hakdan irürdi bu eşcâra vücûd
- 7194.Evvel İncîl indi Tevrît ü Zebûr
Soñra Kur'ân k'ol-durur yik-pâre nûr
- 7195.Gül benefşeden yig oldı bî-gümân
Lâ-büd andan soñra gelür ol ayân
- 7196.Tebbet öñdin sure-i İhlâsdan
Nişe yazıldı diyeyim diñle sen
- 7197.Anuñ-içun kim bile halk-ı cihân
Kim son öñden yigrek olur bî-gümân
- 7198.Çün bu şâh-ıdı_âferînişden murâd
Kamudan soñra geliben buldı ad
- 7199.Ben dahı_anuñ adını idüp hitâm
Eyledüm bu nazmı vasfi-y-la temâm
- 7200.AHMEDÎ hem hidmetine irdi_anuñ
Yolına cân u cihânı virdi_anuñ
- 7201.İrdi bu ikbâl ü ızze lâ-cirem
Zî hudâvendî vü sultân-ı kerem
- 7202.Nisyeye nakdin viren ebleh olur
Fikrsüz iş işleyen güm-râh olur
- 7203.Niçe kim âlemde sâye vâr u nûr
Devletine irmesün anuñ fütûr
- 7204.Eksük olmasun cihândan sâyesi
Çarh olsun rif'atinüñ pâyesi
- 7205.Ömri bâğına irişmesün hazân
Yirine kimse gtürmesün cihân
- 7206.Bu cihâna ol gereklüdür yakîn
Kim cihânuñ câñı ol-durur hemîn
- 7207.Çün tevârîhi bu resme_itdük beyân
Kim işiden kişi_anı añlar ayân

7208.Girü İskender sözini eydelüm
Âkıbet n'oldı anı şerh idelüm

SÛÂL-İ İSKENDER EZ-HIZR HİKMET-İ İ'DÂM-I HALK BA'DE'L-İCÂD

7209.Çün Sikender bildi kim üşbu kelâm
Niçe kim söylenür-ise_olmaz temâm

7210.Dahı dürlü söze bünyâd eyledi
Ol ki nef'i çokdur anı söyledi

7211.Didi işbu halkı Hâlık çün düzer
Niçün anı dutuban girü bozar

7212.Aybı var-ısa getürmek nişedür
Aybı yog-ısa yitürmek nişedür

7213.Didi Hakkuñ lutfi vü hem kahrı var
İkisi dahı_olsa gerek âşikâr

7214.Lutfinuñ ızhârı-y-ıçun çün düzer
Kahrı belürmeg-içün soñra bozar

7215.Nefse çünkim feyz idüp feyyâz-ı cûd
Virdi kendü lutf u cûdından vücûd

7216.Sâde-y-idi nefis bî-idrâk-idi
Gerçi kim her aybdan ol pâk-idi

7217.Birbidi bunda_anı kim kâmil ola
İlm ü idrâkât aña hâsıl ola

7218.Bu ten ü a'zâyı âlet itdi ol
Aña tâ kim bula idrâkâta yol

7219.Hazrete ilmi-y-le ol lâyık ola
Vara vü kuds ehline lâhık ola

7220.Çün ola hâsıl bu hilkatden murâd
Ne kala insân u ne insândan ad

7221.Girü bu endâma Hak neş'et vire
Tefrika_olan yirlü yirine vara

7222.Yoh-durur eczâ-yı aslıye fenâ
Tefrika_olur lîki kalmaz bî-bekâ

7223.Çün ol eczâyı ki aslıdur dire
Ol nüfûsı girü hem aña vire

- 7224.Çün bedenden tağılanın diriser
Rûhını Hakk aña girü viriser
- 7225.Aña haşr u hem kıyâmet oldı ad
Hakdur ol güne_itmek ayruhsı_i'tikâd
- 7226.Hızra didi ol güne nedür nişân
Şerh itgil kim anı bilem ayân
- 7227.Didi oldur kim cihânda şeytanat
Zâhir olup ola adı saltanat
- 7228.Hem vizâret vizrden müştakk ola
Her vezîr işledügi nâ-hakk ola
- 7229.Hem kocalarda mürüvvet olmaya
Hem yigitlerde fütüvvet olmaya
- 7230.Zulm ola vü ta'addî âşikâr
Fitne vü âşûb tola rûzigâr
- 7231.Hem meşâyih fakr yolın koyalar
Dürlü dürlü olmaz işe uyalar
- 7232.Müftiler kıl-ıla fetvâ vireler
Kim yimeyeceklerini direler
- 7233.Mezhebüñ zâhir olanın koyalar
Hâşiyede böyle gördüm diyeler
- 7234.İlm ehlinde çoğ ola hırs u âz
Niçe çoh dirseler ideler kim az
- 7235.Zühd ü takvâ ola kamusı riyâ
Sûfılarda kalmaya hergiz safâ
- 7236.Kalmaya bu dünyada ni'me'l-fakîr
Ka'be_ola fakr ehline bâbu'l-emîr
- 7237.Perdeler ehlinde kalmaya hayâ
Va'desine kimse itmeye vefâ
- 7238.Dünyada ehl-i emânet kalmaya
K'ol kimesneye hıyânet kılmaya
- 7239.Yohsul olanda kanâat olmaya
Bâya hayr itmek sanâat olmaya
- 7240.Zerk-çün kılına kılınsa salât
Ad-ıçun ola virilürse zekât

7241.Sünneti penhân idiben rûzigâr
Dürlü dürlü bid'at ide âşikâr

7242.Ata oğlanına şefkat itmeye
Oğlan atasına hizmet itmeye

7243.Ola halkuñ fi'li cümle nâ-dürüst
Düşe İslâmuñ kamu erkânı süst

TETİMME-İ KELÂM DER-CEVÂZ-I İÂDE-İ MA'DÛN

7244.Kalmaya iki kişide ittifâk
Tola âlem cümle tezvîr ü nifâk

7245.Haşre bunlardur alâmât âşikâr
El-hezâr ol sa'b günden el-hezâr

7246.Ol güne dirler abûsün kamtarîr
Kim anuñ adı-durur yevmün asîr

7247.Halk ol gün girü diri olısar
Her ne k'itdi-y-se cezâsın bulısar

7248.Câvidâne ger saña devlet gerek
Dutma ölenler dirilesine şek

7249.Nesneye kim gün bigidür ol ayân
Aklı olan dutmaya hergiz gümân

BEYÂN-I CEVÂZ-I İÂDE-İ MA'DÛM

7250.Şartı olanuñ dirilmege yakîn
İlm ü kudret kâbiliyyetdür hemîn

7251.İlm ü Kudret Hak'da hod hâsıl-durur
Ölü dahı dirlige kâbil-durur

7252.Bir kezin ma'dûm çün mevcûd ola
Kâbiliyyet nicesi mefkûd ola

7253.Kudretinde varmısa noksân anuñ
Olmaya-y-dı varlığı cân u tenüñ

7254.Çünkü oldı ilm-ile kudret kadîm
Lâ-büd olmışdur tagayyürden selîm

7255.Ol Hak'uñ ilmi ki var kâmil-durur
Şöyle kim her zerreye şâmil-durur

7256. Ger anuñ ilminde nesne olsa kem
San'atında dahı kem ola-y-dı hem
7257. Çünkü her işi anuñ muhkem-durur
Bil ki ilmi kâmil ü bî-kem-durur
7258. Çünkü ölüp tagıla eczâ-yı vücûd
Kandadır her zerresin bilür vedûd
7259. Çün irâdet ola cem' idüp anı
Diri_ide evvelki bigi ol Ganî
7260. İlm ü Kûdret kâbiliyyet uş ayân
Pes ölen girü dirilür bî-gümân
7261. Anladuñ-ısa bu sözleri temâm
Dime inkâr-ıla men yuhyi'l-izâm
7262. Key gereklü_olduğı-çun bu mes'ele
Kim olupdur çohlara ol velvele
7263. Anı her yirde ki vardur söylerem
Hüccetin lâ-büd mükerrer eylerem
7264. Var mükerrer vahyda tazvîh-içün
Ben dahı_itdümse nola tasrîh-içün
7265. Ol ider yaş u yeşil agacı nâr
Kudreti-y-le ter-gül olur huşk-hâr
7266. Kudreti-y-le yaradan yiri gögi
İdemez mi sini öldükde diri
7267. Ol ki anuñ adı-la bâd-ı bahâr
Ölmiş agaca hayât ider nisâr
7268. Sen dahı_ol ağaç bigi çün ölesin
Kudretinden girü diri olasin
7269. Nev-bahâr olduhda bu ölmüş nebât
Uş görürsin nicesi bulur hayât
7270. Fanzurî'l-âsâre kable fevtihâ
Keyfe yuhyî'l-arza ba'de mevthâ
7271. Dâne çünkim yire düşiben biter
Birisi artup yidi yüze yiter
7272. Sen dahı rûşen bu kim çün ölesin
Girü dirilüp dahı yig olasin

7273.Nâfe ger yire düşüp olmaya huşk
Sanma kim irüp kemâle ola müşk

TETİMME-İ KELÂM DER-İÂDE-İ MA'DÛM

7274.Tâ ki şeb-nem hall olup yitmeye
Ulvi olıban güneşe yitmeye

7275.Yanmayınca şem' ser-tâ-pây oda
Kendüzini nicesi ol nûr ide

7276.Kendüden insân dahı ger yitmeye
Ol melâyik rütbetine yitmeye

7277.Niçe kim diri kala ölmeye ol
Girü dirilüp melek olmaya ol

7278.Çünki insânda ola hüsn-i amel
Olur insânlıh melekliğe bedel

7279.Key düriş key hâsıl eyle ma'rifet
K'olasın öldükde rûhânî-sıfat

7280.Varasın sen dahı kudsî olasın
Kuds gül-zârında menzil bulasın

7281.Yirde her ne kim ekilürse biter
Râst ger hanzal ola ger ney-şeker

7282.Pes aña cehd it ki çünkim bitesin
Olmayasın telh şîrîn bitesin

7283.Sa'y kıl kim koyuban bu kül-heni
Ola menzil saña Kudsüñ gül-şeni

7284.Düriş ü rûhânîler cinsinden ol
Budur anlara irişmekliğe yol

7285.Dime hayvân nice rûhânî ola
Taht dağı nice fevkânî ola

7286.Üşbu zulmetle küdüretlü türâb
Hîle-y-ile hall iderler olur âb

7287.Çünki ol su kaynaya olur hevâ
Merkezinden topraguñ olur cüdâ

7288.Çün esîre irişür ol nâr olur
Zulmeti gidüp kamu envâr olur

7289.Çünkü toprah bunca sûretler bulur
Sifli-y-iken sâfi vü ulvî olur

7290.Saňa dahı şer' iderse tezkiye
Kim küdüretten bulasın tasfiye

7291.Ola gönlüñ tasfiye-y-le tâb-nâk
Kim melâyik bigi olasın tâ-be-nâk

7292.Rûz u şeb kesb itmez-iseñ ma'rifet
Cehl içinde kalasın şeytân-sıfat

7293.Çünkü ol cehlüñ içinde olasın
Bir sebü' yâ bir behîme olasın

7294.Geydüğüñ yahmûm ola yirüñ cahîm
Yidüğüñ zakkûm u içdüğüñ hamîm

7295.Rûh ölmez bî-gümân ger ten öle
Rûh cevân-gâhı bâg-ı kuds ola

7296.Çün ev ıssı mevte kâil olmaya
Ev harâb olduhda ol hiç ölmeye

7297.Cân müdebbir câna âletdür beden
Zindedür cân nola ger ölürse ten

7298.Söyleyecek sözi saňa söyledüm
Âhret sırrın dahı şerh eyledüm

7299.Ol gün-içün it iderseñ halka dâd
Cehd it kim olasın ol günde şâd

DER-TAHRÎZ BER-İKTİSÂB-I MEKÂRİM-İ AHLÂK

7300.Nefsüni kılığıl fezâyille arı
Tâ ki ola ol rezâyilden berî

7301.Ger rezâyilden selâmet bulasın
Huld içinde ehl-i kerâmet olasın

7302.Nefsdan çün gide evsâf-ı beşer
Kim bilâ-hayr ol olupdur saňa şer

7303.Rûh evsâfi idüp nefse zuhûr
Ol güneş bigi ucdan uca ola nûr

7304.Lâ-cirem kuds ehline hem-dem ola
Vara rûhânîlere mahrem ola

- 7305.Revh u reyhân bula vü zevk u sürûr
Ravz u rıdvân u dahı hûr u kusûr
- 7306.Varıban ol câvidânda şâd ola
Cümle derd ü gamdan âzâd ola
- 7307.Dünya ukbîde ne ki_olısar saña
Şerh itdüm gûş dutduña baña
- 7308.Eglenecek yir degüldür bu cihân
Bî-vefâlıgı degül-durur nihân
- 7309.Ol kişiler kim halife oldılar
Birbirinüñ kılıcında öldiler
- 7310.Bir yir içün k'anda yoh-durur vefâ
Birbirine itdiler yüzbiñ cefâ
- 7311.İşbu vâdide ki adı oldu hâk
Bî-sebeb birbirin itdiler helâk
- 7312.Sor ki burada ne hâsıl itdiler
Ne iletdiler çü bundan gitdiler
- 7313.Duracak yir sandılar bu menzili
Sevdiler cân-ıla bu âb u gili
- 7314.Az zamânda oldılar cümle helâk
Vây aña kim ola menzil-gâhı hâk
- 7315.Bu görinen reng ü bu berg ü nevâ
Şemse-i gül bigidür endek-bekâ
- 7316.Çünkü söz buraya irişdi ayân
Hızır gayb oldu oradan nâgehân
- 7317.Şâh çün fikr itdi üşbu sözleri
Yaş yirine kan ahıtdı gözleri
- 7318.Zühdi andan soñra adet tehzib ol
İtdi dîn esbâbını tertib ol
- 7319.Ol ki beglikde ubûdiyyet kıla
Dünyı vü ukbî aña rûzî ola
- 7320.Ahmedî'nüñ sözlerin diñle nedür
K'aña ne yâkût olur hem-tâ ne dür

- 7321.Ol degül üşbu kelâi söyleyen
Dahı kişidür bunı şerh eyleyen
- 7322.Ney nüvâsı ayruguñ-durur yakîn
Ney bir âletdür ara yirde hemîn
- 7323.Dürr-i ma'nî kim kalemden dökilür
Bî-gümân ol bir dahı yirden gelür
- 7324.Ahmedî hâr-ısa sözidür azîz
Bahmañ aña sözlerini diñleñiz
- 7325.Çünki ma'nîde azîz oldı kalem
Sûretâ ger hâr olur-ısa ne gam
- 7326.Rengine müşgün bahup kılma hatâ
Ma'nisin gör ki_ana olmışdur atâ
- 7327.Buldı ma'nî izzetin nahl-i asel
Sûreti hâr olur-ısa ne halel
- 7328.Gerçi kim pür-nakşdur tâvûs-ı ner
Nef'i ne çün dahı anda yoh hüner
- 7329.Cüssede nola kiçiyse andelîb
Çün sözi derd ehline oldı nasîb
- 7330.Çünki kamu tagdan alçah oldı Tûr
Gör tecellîde nicesi buldı dûr
- 7331.Ahmedî'nün sözidür sihr-i beyân
Dahılar sözi yalan kıssa ayân

DER-TA'RÎZ BER-BA'Zİ EZ-ŞU'ARÂ

- 7332.Er gerek erden hikâyet eyleye
Er nice avret sözini söyleye
- 7333.Ol ki nâkıs akl u nâkıs dîn ola
Adını kâmil getüre mi dile
- 7334.Dil ki Hak zikrine âlet oldı ol
Hayf k'anda avret adı buldı yol
- 7335.Avretüñ her kim sözini söyleye
Kendünüñ naksını zâhir eyleye
- 7336.Kim olur avret ki_anı söyleyeler
Yâ anuñ işini şerh eyleyeler

- 7337.Çünkü Âdem bahdı râh oldu aña
Huld bâğı hârı râh oldu aña
- 7338.Avretüñ işi nedür mekr ü hiyel
Ni'mete küfrân u hem ceng ü cedel
- 7339.Boyayup yüzine virmek reng ü bûy
Âyine dutup düzinmek zülf ü mûy
- 7340.Bi-vefâlih hem hıyânetdür işi
Gıybet ü yalancılıh suyu âşî
- 7341.Hakbalıhdur işi olduha cüvân
Karılıhda pûzevenklikdür hemân
- 7342.Pes gerek fazl ehline vâcib ola
K'anlaruñ adın getürmeye dile
- 7343.Dil ki Tañrı zikrinüñ ola yiri
Avret adından gerek ola arı
- 7344.Çün agız Kur'ân yiri-durur yakîn
Avret adın komaya anda ehl-i dîn

***DÂSİTÂN-I İ'RÂZ-I İSKENDER EZ-DÂRE'L-GURÛR VE İKBÂL
BE-DÂRİ'S-SÛRÛR MUKADDİMEİ***

- 7345.Olma hâmûş söyle iy mûrg-i seher
Vir bize Firdevs bâğından haber
- 7346.Çünkü sen bülbül bigi_ olduñ hoş-nüvâ
Vakt-i gül hâmûşlıh olmaz revâ
- 7347.Akl dutmuşdur benefşe bigi gûş
Tâ ki sinüñ sözlerüñi ide gûş
- 7348.Geh şeriatden rivâyet eylegil
Geh tarikatden hikâyet söylegil

MATLA-I DÂSİTÂN

- 7349.Çünkü Zülkarneyn'e bu oldu ayân
K'evvel âhir noldı nolısar cihân
- 7350.Bildi anı kim vefâsuzdur sipihr
İtmedi kimsey'ol itmez hiç mihr
- 7351.Dutmuş-ıdı dünyayı ser-tâ-be-ser
Ukbayı dahı_ isdedi ol nâm-ver

- 7352.Kıldı nefsinî fezâyilla arı
İtdi ahlâkın rezâyilden berî
- 7353.Gördi anı kim bî-bekâdur saltanat
Aña magrûr olmah olur şeytanat
- 7354.Üşbu deh-rûze haşem beglik degül
Ten bezeyüp bislemek yiglik degül
- 7355.Beglik ol kim mülk-i cân ma'mûr ola
Gayb şem'i-y-le gönül pür-nûr ola
- 7356.Beg ol ola kim var-iken dest-res
Bir işe ide bugün cândan heves
- 7357.Kim yarın bundan çü gider ola ol
Dahı yig yir begliğine bula yol
- 7358.Beglik ol mı genc ü mâla kalasın
Virmedüğüñ halk elinden alasın
- 7359.Beglik oldur kim olasın ehl-i dâd
Ulu kiçi kamu senden ola şâd
- 7360.Ten bezeyüp dimegil kim budur iş
Hulkuñı tehzîb itmege düriş

KISSA-İ RÛBÂH VE ÜFTÂDEN BE-HUM-I NİL

- 7361.Bir mesel vardur ki bir dilkü meger
Düşüben boya küpine oldı ter
- 7362.Cehd-ile çıhardı küpden kendüzin
Vardı güne karşı durdı gündüzin
- 7363.Çün irürdi aña şu'le âfitâb
Hûb u hoş-revnağ görindi ol hizâb
- 7364.Görinürdi gözde sürh ü sebz ü zerd
Hem müzehheb-güne vü hem lâciverd
- 7365.Didi kim zî hûb hoş-renk almışam
Râstî budur ki tâvûs olmuşam
- 7366.Kendüyi tâvûs diyü bî-gümân
Vardı dilküler katına şâdumân
- 7367.Pes idüben dilküler andan süvâl
Didiler eydüñ ki nice oldı hâl

7368.Gence mi irdüñ kim olduñ pür-ferah
Yâ çemend' içdüñ mi yâr ile kadah

7369.Şâdıluğñı i dilkü kıl ayân
Hem nedendür kibrüñi eyle beyân

7370.Didi kim dahı dimeñ baña rübâh
K' olmışam ben mazhar-ı lütf-ı İlâh

7371.Görüñüz binüm cemâl ü rengümi
Fikr eyleñ nakş ile nîrengümi

7372.Pes didiler dilküler eydüñ bize
Kim ne dürlü ad eyidelüm size

7373.Didi kim eydüñ baña tâvûs-ı ner
Kim görürsüz bende zib ü hüsn ü fer

7374.Didiler tâvus gül-zâra varur
Anda gül karşına celve urur

7375.Sen dahı tâvûs-ısañ gel varalum
Bâga anda celve urgıl görelüm

7376.Didi kim ben celve nedür bilmezem
Bilmedügüm işi da'vî kılmazam

7377.Didiler pes olmaduñ tâvûs sen
Dilküsin dahı tolu telbîs ü fen

7378.Sen dahı iy saltanat da'vî kılan
Cehd it da'vî ki olmaya yalan

7379.Girü dilküsin bu reng'aldanmagıl
Olmaz adı kendüzüñ'adanmagıl

7380.Saltanat dilerseñ istihkâk-ıla
Nefsüñi tehzîb it ahlâk-ıla

7381.Şâh ol-durur ki Zülkarneyn-vâr
Hâlıküñ kullıgın ide ihtiyâr

7382.Bu tene bahma ki ne peyker-durur
Nefsüñi aña ki ne cevher-durur

7383.Hâlıkımı ol kişi bilür hemîn
Kim ne-durur nefsinı bile yakîn

7384.Ne-durur sûretde âlem bir şecer
K'aña ma'nîde sen olmışsın semer

7385. Ger semer olmasa agaçdan ayân
Dikmeye-y-di anı hergiz bâgbân
7386. Çün semer-çün dikilür-imiş şecer
Pes şecerdür fer' ü asl aña semer
7387. Sonsın illâ mebde'ün oldu ezel
Fikr-durur evvel ü âhir amel
7388. Anuñ-ıçun ol resûl-i zû-fünûn
Dir ki "nahnü'l-âhirûne's-sâbikûn"
7389. Kim anuñ-çun Hak yaratdı âlemi
Belk'anuñ-çun kıldı peydâ Âdemi
7390. Âdem'anuñ-çun ider secde melek
Devr anuñ-çun kılur dâim felek
7391. Pes aña Âdem fer' olur ol añ'asl
Añla üşbu bâbı k'itdüm saña fasl
7392. Çün Sikender bildi dünyâ hâlini
Añladı hem âhret ahvâlini

AZM-İ İSKENDER BE-HİCÂZ

7393. Diledi kim ide ol azm-i Hicâz
Varup ol hazretde arz ide niyâz
7394. Cem' idiben besî hayl ü sipâh
Ka'beye varmaga kıldı azm-i râh
7395. Diledi evvel ki Bagdâd'a gire
Pes oradan Ka'beden yaña vara
7396. Ol zamân ol yol kamu ma'mûr-ıdı
Âb u zâd ol yolda pes mevfûr-ıdı
7397. Pes varup Bagdâd'a ol şâh-ı cihân
Kible yolını dutup oldu revân
7398. Gördi yolda ider-iken şâh seyr
Yapılı bir püştede bir yüce deyr
7399. Koyuban ol yolda hayl-ıla sipâh
Vardı iki kişi-le ol deyre şâh

RESİDEN-İ İSKENDER BE-DEYR-İ RÂHİB

- 7400.Girdi şâh ol deyre gördi bir hakîm
Orada olmuş riyâzetle mukîm
- 7401.İRte gice_ anda ibâdet eylemiş
Tâatı kendüye âdet eylemiş
- 7402.Şâha ol hîç iltifât eylemedi
Eyle kim lâyık-durur söylemedi
- 7403.Şâh didi kim sebeb noldı saña
K'iltifâtuñ olmadı hergiz baña
- 7404.Didi binüm kulumuñsın kulı sen
Câyiz olmaz izzet itsem saña ben
- 7405.Didi ben nice kuluña kul olam
Baña takrîr eylegil k'anı bilem
- 7406.Didi kul olup-durur şehvet baña
K'ol hakîkat hâce olmuşdur saña
- 7407.Çünkü hōcañ kul ola baña ayân
Sen kuluma kul olursın bî-gümân
- 7408.Kaldı hayrân üşbu söze şehriyâr
Çıhdı gözinden kamu şehr ü diyâr
- 7409.Râst söz münsiflere_ olur kâr-ger
Gerçi bî-insâfa itmez ol eser
- 7410.Pes didi şâh aña kim iy hûş-mend
N'ola diseñ baña birkaç dürlü pend
- 7411.Kim sözüñüñ dürri iy dâna-yı dîn
Kulagumda ola-y-ıdı gûş-vâr
- 7412.Didi kim dünyâya magrûr olmagıl
Hakdan aña teky'idüp dûr olmagıl
- 7413.Dime sîr-âb olam anda k'ol serâb
Kim görünür saña olmaz cüz' serâb
- 7414.Ger dilerseñ k'ola devlet nazmı düz
Hüsn ü hulki kendüñe pîrâye düz
- 7415.Zulmüñ encâmı nedür endîşe kıl
Adli kendüzüñe dâim pîşe kıl
- 7416.Sunmasun kimse dir-iseñ mülke dest
Câm-ı bâde nûş idiben olma pest

- 7417.Mülk saklayan kim ola bâde-nûş
Nice saklaya çün andan gide hûş
- 7418.Çünkü gâfil yatup uyıya şübân
Koyını kurda yidürür bî-gümân
- 7419.Memleketde olmasun diseñ haleb
Virmegil tâmi' kişiye sen amel
- 7420.Bî-edeb kişi-y-le olma hem-nişîn
Kim kılur nefse eser sohbet yakîn
- 7421.Bahta dilerseñ ki irmeye güzend
Kendüzüñi görüp olma hod-pesend
- 7422.Hod-pesend oldugı-çun şeytân yakîn
Adı olmışdur recîm ü hem la'în
- 7423.Dileseñ k'irmeye gönülüne nedem
Bitmeyinc'esbâb işe urma kadem
- 7424.Sözi evvel key tefekkür eylegil
Söyleyecek sözi âhir söylegil
- 7425.Ol ki söylemedin ebkem olasın
Yig ki sözi söyleyüp kem olasın
- 7426.Hayr işinde kimseneye tanmagıl
Şerri terk it yavuz ad adanmagıl
- 7427.Halk içinde kendüzüñi itme medh
Diler-iseñ k'itmeyeler saña kadh
- 7428.Mülki dilerseñ halelden ola dûr
Tâat eyle Hakka vü itme fücûr
- 7429.Tâkatuñca halka eylük eylegil
Söyledüğüñ sözi togru söylegil
- 7430.Dileseñ k'ola işüñ peyveste gey
Hilm tonın hil'at it boyuña gey
- 7431.Şükrini yirine getir Hâlıküñ
Halka hayr it virdüğinden Râzıküñ
- 7432.Düşmenüñüñ rif'atine_inanmagıl
Anı saña eylük ide sanmagıl
- 7433.Unf-durur düşmenüñ lutfi saña
Zehr-durur dimegil tiryâk aña

- 7434.Nerm diyü yılanı el sunmagıl
Nîşin anuñ nûşîdâru sanmagıl
- 7435.Olmasun diseñ riyâset işi süst
Dâyim olasın riyâsetde düsüst
- 7436.Pîşe kıl kendüzüñe sıdk u safâ
Ahd idicek ahdüñe eyle vefâ
- 7437.Hikmete cehd eyle kim ol-durur iş
Ger kemâl isder-iseñ aña düriş
- 7438.Key sahn key bir işe urma kadem
Kim ola anuñ ser-encâmı nedem
- 7439.İtme nefsüñ ârzûsına tama'
Şehvete aklüñi eyleme tebâ'
- 7440.Nefs şeytân-durur u aklüñ melek
Akl nefse tâi' olmamah gerek
- 7441.Mefsede ehlin katuña dirmegil
Nesneñi nâ-müstahakka virmegil
- 7442.Hayr işe hiç te'hîr eyleme
Hûb âdetlerde taksîr eyleme
- 7443.Şâh göñline pesend olup bu bend
Didi şâd ol iy hakîm-i hûş-mend
- 7444.Ol hakîme hayr bâd itd'anda şâh
Pes oradan kıldı girü azm-i râh
- 7445.Şâh u leşker çünki yola girdiler
Yolda giderken bir eyvân gördiler

RESÎDEN-İ İSKENDER BE-DAHME-İ ÂD

- 7446.Âli eyvân muhkem ü musmet-nihâd
Yapup irürmiş anı keyvâna Âd
- 7447.Bir tılsım urup aña bünyâd-ıla
Kapusını bağlamış pûlâd-ıla
- 7448.Tâ ki ol eyvâna kimse girmeye
Anuñ içinde ne vardur görmeye
- 7449.Ol tılsıma el urıncâh şâh-ı Rûm
Oldı elind'anuñ ol pûlâd mûm

- 7450.Çünki girdi gördi anda şehriyâr
Âcdan bir taht-durur zer-nigâr
- 7451.Taht üzre tâc-ıla bir nâm-ver
Yatmış olıban cihândan bî-haber
- 7452.Sâliyân yatmış ki hergiz durmamış
Gözlerin açup cihânı görmemiş
- 7453.Başı katında-durur bir levh-i zer
Bir yüzi levhüñ murassa' ser-te-ser
- 7454.Bir yüzinde yürüdi bâ'nuñ kalem
Anda birkaç satr urmuşlar rakam
- 7455.K'iy benüm ola diyüben şark u garb
İns ü cinn-ile iden peyveste harb
- 7456.Garre olma çarha k'ol nâ-mihribân
Kimseye virmedi vü virmez emân
- 7457.Sinüñ-ile ger bugün ol kıla ahd
Yarın ide anı nakz itmege cehd
- 7458.Ben ki Âd'am hükm eyledüm müdâm
Şark u garba biñ ikiyüz yıl temâm
- 7459.Âlemi cümle benüm sanmış-ıdum
Bu cihân ahdine inanmış-ıdum
- 7460.Cehd-ide bî-had çekiben dürlü renc
Cem' idüp yıgmış-ıdum mâl u genc
- 7461.Ulu sultân-ıdum u sâhib-şükûh
Tolu-y-ıdı leşkerüm deryâ vü kûh
- 7462.İrmeye bahtuma dir-iken hâlel
Baña nâ-geh irdi çengâl-i ecel
- 7463.Çün ecel çengâline oldum esîr
Kimse bulunmadı baña desti-gir
- 7464.Mâl u mülküm fâйд'itmedi baña
Bini gör ibret yiterem ben saña
- 7465.Zahmet-ile dirdüğüm ol mâl u genc
Ayrug almış baña kalmış mâr u renc
- 7466.Anı kim baña idüpdür bu cihân
Saña dahı idesidür bî-gümân

7467.Şâh anı ohıyup agladı zâr
Gözlerinden dökdi hûnîn-cûy-bâr

7468.Pes ol eyvândan çihup şâh-ı cüvân
Oldı girü Ka'beden yaña revân

BE-CÂY ÂVERDEN-İ İSKENDER MENÂSİK-İ HAC-RÂ

7469.Ka'benüñ Mîkâtına çün irdi şâh
Evvel İhrâmûn tonına girdi şâh

7470.Çıharup tenden rezâyil hasletin
Geydi ragbetle fezâyil hil'atin

7471.Çünkü kıldı varuban remy-i cimâr
Sürdi dîvi bâtınından nâm-dâr

7472.Her ki tenden nefis dîvin sürmeye
Ka'beye varsa Safâ'yı görmeye

7473.Sen eger senden bu dîvi süresin
Kamu yird' Allâh nûrın göresin

7474.Merve de kesüp mürüvvet eyledi
Ol Safâ-y-ıla fütüvvet eyledi

7475.Çün Safâ vü Merve'ye azm itdi şâh
Bâtınına biñ safâ virdi İlâh

7476.Çünkü Beytullâha girdi oldı şâd
Kıldı anda kuds gül-zârını yâd

7477.Buldı anda dürlü esrâra zuhûr
Rûşen oldı gönline Allâhü nûr

7478.Eyle itdi ol arada mahv-ı zât
K'anda kalmadı beşerlikden sıfât

7479.Kendülikden çün aña irdi fenâ
Buldı Hakdan ol fenâ-y-ıçun bekâ

7480.Bulmag isterseñ Haka irmege yol
Var kendü varlığıñdan mahv ol

7481.Mahv olup bulur göge şeb-nem zuhûr
Fâni olmayınca olmaz şem' nûr

7482.Dânelihdan dâne çıkmazsa temâm
Ne gül ü ne lâle olur bî-keâm

- 7483.Katre sulıhdan ıhıcah dr olur
Tohm sret terk idicek br olur
- 7484.Nutfe nkim sretn terkin kılır
Gr Musavvirden ki ne sret bulur
- 7485.Pes tavâf idibenn kıldı namâz
İtdi ol der-gâhda arz-ı niyâz
- 7486.n tahâretle tenini kıldı pâk
Gnli ihlâs-ıla oldu tâb-nâk
- 7487.Kıldı ol evde huz'ıla namâz
Arz itdi Mâlik'l-mlke niyâz
- 7488.Tâat oldur kim ola anda huş'
Tâat olmaz ol kim ola bî-huz'
- 7489.Sen gerek sırrın namâzuñ bilesin
Pes key ihlâs-ıla anı kılasın
- 7490.Geri oh-durur namâz ire niyâz
İki nef' ol kiřiye eyler namâz
- 7491.Kim řehâdet âleminden ol gide
Âlem-i gaybe varıban nakl ide
- 7492.Andan ide gayb-ı gayba intikâl
K'ol-durur ol Kâbe-Kavseyne misâl
- 7493.Âlem-i gayb itdiler ervâha ad
Gayb-ı gayb ol Hakdur anı eyle yâd
- 7494.Kim anuñ yâdı seni senden ala
Gayb-ı gaybet kend-y-ile_ iltebile
- 7495.n ne řartı var-ısa haccuñ temâm
Yirine getrdi řâh-ı nîg-nâm
- 7496.n menâsik iřini bitrdi řâh
Kamu řartı yirine yitrdi řâh
- 7497.On ikibiñ ko getrd'idp řmâr
Altı biñ buhtı dahı zerrîn-mehâr
- 7498.Sanıla onbiñ dahı miskâl zer
Dahı yz yk nukre biñ dâne gher
- 7499.Hâzır itdrp řeh-i iklîm-bahř
Ol mbârek yirde kıldı halka bahř

- 7500.Mekkede dervîş hergiz kalmadı
Kim şehûñ mâlî-y-ıla bay olmadı
- 7501.Çünkü devlet oldu saña dest-res
Mâlî hayra sarf itmek kıl heves
- 7502.Kim kıla dünyâda senden bir key ad
Olasın ol ad-ıla peyveste şâd
- 7503.Ulu kici kılalar saña du'â
Bay u yohsul ideler saña senâ
- 7504.Ger senâ-y-ıla du'â kesb idesin
Zâd ola saña çü bundan gidesin
- 7505.Yig-durur yig genc ü zerden bir du'â
Yig-durur yüzbiñ güherden bir senâ
- 7506.Her kişiye kim du'â hem-râh ola
Kanda varsa dest-gîr'Allâh ola
- 7507.Her kişi k'aña nasîb ola senâ
Bir bekâ bula k'aña irmez fenâ
- 7508.Gör ne nesnedür senâ k'ol Hayy-i Rab
Kullarından anı kılmışdur taleb
- 7509.Mâlî harc it k'ideler saña du'â
Genci sarf it k'ideler saña senâ
- 7510.Cûd Hâlık pîşesidür bil anı
Kendüzüñe dâima iş kıl anı
- 7511.Mâl çün bâkî degül elden gider
Yi yidür mihrin gönülden gider
- 7512.K'andan ayru düşicek bî-ihtiyâr
Olmaya ol saña renc ü derd ü mâr
- 7513.Gerçi kim cânuñ şakîkidur bu mâl
Sarf itmedükd'olur câna vebâl
- 7514.Mâl ol mıdur kim anı direler
Mâl ol kim sarf idiben vireler
- 7515.Çünkü kurbândan ferâgat buldı şâh
Mekkenüñ hâline meşgûl oldu şâh

- 7516.Sordı k'evvelden kimüñdür ol makâm
Kim-idi anda ululardan imâm
- 7517.Didiler kim hâkim-i_ evvelden yakîn
Bunda evlâd-ı Halîl-idi hemîn
- 7518.Oldı hükmind'anlarun çoh rûzigâr
Pes Yemen'den geldi Kahtân âşikâr
- 7519.Bî-kerân leşkerle bunda geldi ol
Kahr-ıla üşbu makâmı aldı ol
- 7520.Düşdi evlâd-ı Halîlu'llâh hakîr
Bu diyâra olıcah Kahtân emîr
- 7521.Üşbu iş üstine geçdi çoh zamân
Cürhümîler oldılar nâ-geh ayân
- 7522.Cürhümîer çünki zâhir oldılar
Sürüben Kahtân'ı bunı aldılar
- 7523.Ol zamândan iy şehinşâh-ı zemîn
Bunda hâkim Cürhümîlerdür hemîn
- 7524.Pes Halîl evlâdını buldurdu şâh
Ol makâmı anlara bildürdi şâh
- 7525.Virdi anlara besî zerr ü güher
Dahı çoh dîbâ-yı Rûmî sîm ü zer
- 7526.Çün olar şehden riyâset buldılar
Ad-ıla mecmû'ı sâdât oldılar
- 7527.Ulu ol-durur ki çün kudret bula
Ululıhdan düşmişüñ hâlin bile
- 7528.Pes elini alıp anuñ götüre
Girü anı mansıbına yitüre
- 7529.Kıla lutfi her kerîmi ser-firâz
Olmaya şöyle ki gerdûn dîn-nüvâz
- 7530.Kişi ol kim izzet el virse añâ
Hôr olanı izzet ehlinden añâ
- 7531.Şimdi olar kim halka ser-ver oldılar
Çarh bigi sifle-perver oldılar
- 7532.Çünkü hacc erkânını bitürdi şâh
Ol aradan kıldı Kuds'e azm-i râh

RESİDEN-İ İSKENDER BE-TÜRBE-İ İBRAHİMİ'L-HALÎL

- 7533.Vardı vü gördi Halîlün hazretin
Yüz sürüp öpdi mutahhar türbetin
- 7534.İsti'ânet idüp ol der-gâhdan
Merhamet kıldı taleb Allâh'dan
- 7535.Gerçi kim her yirde Hak Zâhir-durur
Her neye kim isdeseñ Kâdir-durur
- 7536.Lîki görmekten velîler türbetin
Kim bulıpdur Hakkuñ anlar kurbetin
- 7537.Kişinün çoh hâceti olur revâ
Dürlü derde bulunur anda devâ
- 7538.K'anlaruñ ervâhı şöyle kim ukûl
Kuds der-gâhında bulmuşdur kabûl
- 7539.Çün melâyik gibi_olaruñ cevheri
Cism naksından olup-durur berî
- 7540.Hem olar nûr-ı İlâhîdür yakîn
Akl-ıla nefse muzâhîdür yakîn
- 7541.Bunlar ecsâma çoğ iderler eser
Şöyle kim virdi Resûl andan haber
- 7542.Pes melekden her eser k'olur ayân
Dahı akl u nefsdan hem bî-gümân
- 7543.Râst çün cinsiyyet ara yirde var
Olur ol ervâhdan dahı_âşikâr
- 7544.Ol mezârâta çü sıdk-ıla_i'tikâd
Bağlanup varıla bulmaga murâd
- 7545.Çün taalluk vardur anlarda yakîn
Ol mezârât-ıla iy pâkîze-dîn
- 7546.K'andagı toprahdan anlar lâ-muhâl
Eylemişlerdi besî kesb-i kemâl
- 7547.Ol mezârâta varanuñ bî-gümân
Olur ahvâli ol ervâha ayân
- 7548.Şöyle k'olsa karşı iki âyine
Birbirinden nûr alur her-âyine

- 7549.Bunlara nûrı ol ervâhuñ gelür
Bunları ol nûr-ıla rûşen kıılır
- 7550.Lâ-büd âsârı olaruñ iy hakîm
Kesb-i hayr ü def'-i şerde_olur azîm
- 7551.Üşbu sırrı kim didüm ger bilesin
Ol mezârâtı ziyâret kılasın
- 7552.Hâcetüñ her ne ki var ola revâ
Olmaya redd anda olınan du'â
- 7553.Ol mübârek türbede şâh-ı cihân
Hâcetin ihlâs-ıla kıldı ayân
- 7554.Vird'anuñ halkına dahı sîm ü zer
Bî-kerâne genc ü envâ'ı güher
- 7555.Pes idiben ol haremden azm-i râh
Râst vardı Mescid-i Aksâ'ya şâh

RESİDEN-İ İSKENDER BE-MESCİD-İ AKSÂ

- 7556.Kıldı ol mescidde dahı hem namâz
İtdi Hak der-gâhına arz-ı niyâz
- 7557.Kıl namâzı k'ol saâdet tâcıdur
Koma_anı kim mü'minüñ mi'râcıdur
- 7558.Zâhiri ma'mûr ider erkân-ıla
Bâtını pür-nûr ider îmân-ıla
- 7559.Gayba_anuñ erkânı-la varur varan
Gayb-ı gayba_ekâr-ıla irer iren
- 7560.Orada dahı çoğ ihsân eyledi
Çoh hedâyâ dahı kurbân eyledi
- 7561.Mâl ol kim çün elüñde bulına
Sarf idesin anı sen Hak yolına
- 7562.Cem' idüp sahlamayasın viresin
Devlet-i ukbîye andan iresin
- 7563.Buldı şeh mescidde bir dâna kişi
Kim riyâzetti müdâm anuñ işi

RESİDEN-İ İSKENDER BE-KUTB-I DER-MESCİD-İ AKSÂ

- 7564.Sohbet itmişdi besî evtâd-ıla
Keşf bulmuş kutbdan irşâd-ıla
- 7565.İşini dün gün ibâdet eylemiş
Tâatı kendüye âdet eylemiş
- 7566.Munkatı' olıbanuñ eşbâhdan
İtmiş-idi kendüzin ervâhdan
- 7567.Şâh andan bir nasîhat istedi
Nideyim kim Hakk'a irişem didi
- 7568.Didi Hakk'a vâsıl ol vakt olasın
Kim taallukdan tecerrüd bulasın
- 7569.Zâyil olmayınca senden bu sıfât
Nice_ola gönlüne rûşen keşf-i Zât
- 7570.Kişi anda lâyıık-ı tevhîd ola
Kim taallukdan kamu tecrîd ola
- 7571.İy muvahhid müşrik işin kılmagıl
Hak gerekse saña gayre kalmagıl
- 7572.İtmegil gayre nazar didüñse hû
Rişte-i tevhid nic' olur dü-tû
- 7573.Hû didüñse kalmasun senden eser
İtmegil bir dem iki kevne nazar
- 7574.Anı dirseñ hâsıl eyle ma'rifet
Cehli ko kim sığmaz anda ol sıfat
- 7575.Ol kişi kim gönli tolu cehl ola
Nice âlim kurbetine ehl ola
- 7576.Câhil irse göge kadr ü câh-ile
Hem-nişîn olmaya âlim câhile
- 7577.İlm vasfidur Ol Allâhuñ yakîn
İlm-il'irer Allâh'a hemîn
- 7578.Âlimüñ katında izzet ol bulur
K'ol dahı hem ilm ehlinden olur
- 7579.Çünkü Hakk Âlim-durur pes câhili
Kendözine nicesi ide velî
- 7580.Her neye kim var-durur illet gerek
Dostlığına râst cinsiyyet gerek

- 7581.Âlime ilmi-y-le gerek pes heves
Bülbül ü zâguñ yiri olmaz kafes
- 7582.Bûm-ıla tâvûs ola mı hem-nişîn
Yâ ola mı karga tûtîye karîn
- 7583.Çünkü sıgmaz bir araya ilm ü cehl
Âlimi diyen gerekdür ilme ehl
- 7584.Çünkü bâtil işlûdür câhil olan
İre mi Hakk'a işi bâtil olan
- 7585.Göñlüñi Hak fikri-le ma'mûr it
Zikri-y-ile cânuñı pür-nûr it
- 7586.Bir dahı zîbâ söz eydem ben saña
Sen benefşe bigi gûş olgıl baña
- 7587.Nefsüñüñ şehrin imâret it düriş
Akl kânûnı-y-ıla kim budur iş
- 7588.Nefs-i insânî bedende iy emîn
Ol beden şehrine vâlidür yakîn
- 7589.Akl-durur bî-gümân aña vezîr
Kuvvet-i fikriyyedür aña müşîr
- 7590.Bu cevârihla kuvâ ana temâm
Pîşe-kâr u hem raiyyetdür müdâm
- 7591.Aña bir kullihcîdur şehvet yakîn
Dileğin virmek ana işi hemîn
- 7592.Bir avân-durur kapusunda gazab
Halka zulm ü kahr işi iy aceb
- 7593.Ol vezîre bu iki düşmen-durur
Düşmen işi nicedür rûşen-durur
- 7594.Vâliye çün ol vezîr-ile müşîr
Oldılar cân-ıla nâsîh hem nasîr
- 7595.Ol ikinüñ öğidine duta gûş
Kendüzine devşüriben fikr ü hûş
- 7596.Ol gazabla şehvete te'dîb ide
Kendünüñ ahlâkını tehzîb ide
- 7597.Lâ-cirem şehri anuñ ma'mûr ola
Zulm ü bid'atden dahı hem dûr ola

- 7598.Lâ-büd ola lâıyk-ı der-gâh ol
Bula kurbuñ perdesinde râh ol
- 7599.Çünki üşbu memleketden irile
Dahı yigrek pâdışahlıh virile
- 7600.Ola ol ukbî makâmında mukîm
Bula rûhı revh ü reyhân u Na'îm
- 7601.Akl u fikri şehvet ü hışma zebûn
İtdürür-ise aña cehl ü cünûn
- 7602.Bî-gümân şehri anuñ vîrân ola
Dünyî ukbîde aña hüsrân ola
- 7603.Cehd it irem diseñ Ol hazrete
Kim zebûn olmaya akluñ şehvete
- 7604.Hışm u şehvet dîv-durur dutma şek
Akl-durur akl bir ulu melek
- 7605.Dîve cehd it k'ol melek gâlib ola
K'anı 'lâ havle-y-le'emmâre kıla
- 7606.Gönlüñ aña bagla k'anı bulasın
Üns anuñla dut ki anuñ olasın
- 7607.İsder-iseñ anı zikrûñden gider
Gayret eyle gayrı fikrûñden gider
- 7608.Tâ günüñ şavkı-y-la şeb-nem yitmeye
Ulvi olup mâh u mihre yitmeye
- 7609.Mü'min-iseñ nice sürilse kazâ
Cân-ıla virseñ gerek aña rızâ
- 7610.Ger dilerseñ rişte-i tevhîdi berk
Şirk-i penhâdur riyâ kıl anı terk
- 7611.Niyyetüñ ihlâs-ıla eyle dürüst
Tâ kim olmaya amel erkânı süst
- 7612.Söyleyicek sıdk-ıla söyle müdâm
Her işi ihlâs-ıla eyle temâm
- 7613.Sıdk-durur saña ukbîde delîl
Sıdk-ıla buldı necât oddan Halîl
- 7614.Sıdk-ıla ürdügi-y-içün subh dem
Rûşen ider âlemi her subh-dem

- 7615.Nefsüne olgıl murâkıb dem-be-dem
K'olmaya itdügün işlerde nedem
- 7616.Ger bu âsârı tefekkür kılasın
Ol Mü'essir kudretini bilesin
- 7617.Keşf idesin vahdet esrârın temâm
Dünya ukbî sinüñ ola bî-keîâm
- 7618.Göñlüñi idüp riyâzet tâb-nâk
Her küdüretten anı kılursa pâk
- 7619.Rûşen ola bâtınuñda şem'-i din
Nakş ola âyînede ilme'l-yakîn
- 7620.Keşf-ile rûşen ola saña sıfât
Görine âyînede hem nûr-ı Zât
- 7621.Bilesin ilm-i Ledünnî'yi temâm
Kılasın bî-vâsıta fehm-i kelâm

AVDET-İ İSKENDER EZ-HİCÂZ

- 7622.Çün bu sözleri temâm işitdi şâh
Hasret-ile aglayup çog itdi âh
- 7623.İlerüden böyledür bu reh-güzer
Bunda gelen âh u derd-ile gider
- 7624.Derd ü mihnetde-durur bunda olan
Bir yıl aglasa gerek bir dem gülen
- 7625.Bir nefes güldüğü-çün gel bunda şâd
Gör nider âteşle aña hâk ü bâd
- 7626.Çıhdı gözinden anuñ hayl ü haşem
Düşdi göñlin'itdüğü işlerden nedem
- 7627.Pes oradan kıldı Mısr'a azm-i râh
Anuñ-ıla bî-gerân hayl ü sipâh
- 7628.Çünkü Dârü'l-mülk'e geldi şehriyâr
Buldı revnak girü ol şehri ü diyâr
- 7629.Halk içinde adli bünyâd eyledi
Ulu kiçi göñlini şâd eyledi
- 7630.Şâh ol-durur kim ehl-i dâd ola
Halk zulmından anuñ âzâd ola

- 7631.Hayr idüp toyura her bir acı ol
Bî-niyâz ide kamu muhtâcî ol
- 7632.Pes kamu yollardan ol götürdi bâc
Kimseden dahı_almadı mâl u harâc
- 7633.Yir yüzinde hîç bid'at kalmadı
K'anı ZÜLKARNEYN zâyil kılmadı
- 7634.Kanda kim buldı-y-sa bir dâna hakîm
Terbiyetle_itdi huzûrında mukîm
- 7635.Anuñ-ıla_otur ki ilm ehli ola
Câhil ile eglenen Bû Cehl ola
- 7636.Çün hüner-dâr-ıdı vü sâhib-nazar
Buldı andan terbiyet ehl-i hüner
- 7637.Terbiyet kılsañ hüner ehline kıl
Bî-hünerde nef' yoh andan kesil
- 7638.Zînetidür devletüñ ehl-i hüner
Şâhlar tâcına zîverdür güher
- 7639.Ehl-i ilm andan çü revnak buldılar
İlm arturmaga meşgûl oldılar
- 7640.Hikmet aksâmına kıldılar şürû'
Vaz' itdiler usûl-ıla fûrû'
- 7641.Dürlü dürlü ilm te'lif itdiler
Çoh kütüb adına tasnîf itdiler
- 7642.Lâ-büd andan kaldı ol gidüp gey ad
Kim iderler halk anı hayr-ıla yâd
- 7643.Ölmemişdür adını zinde kılan
Gitmemişdür dünyada adı kalan
- 7644.Diler-iseñ ölmemek iy pâk-zâd
Cehd it kim kala senden bir gey ad
- 7645.Ögüdümi cân kulagı-y-la işit
Nefsüñe tehzîb-i ahlâkı iş it
- 7646.Ahmedîñ hâtırı bir bahrdur
K'anda su yirine urur mevc dūr
- 7647.Geh hakikat sözünü kılur beyân
Geh tarîkat râzını ider ayân

7648.Ger sözini tutar olursañ anuñ
Dünyî vü ukbî senüñ ola senüñ

***DÂSİTÂN-I DUHÛL-İ İSKENDER BE-ZULUMÂT VE İNKİRÂZ-I DEVLET-İ Û
MUKADDİME-İ DÂSİTÂN***

7649.Nâle it iy andelîb-i nagme-ger
Kim kılur nâleñ senüñ câna eser

7650.Ûd bigi sûz-ıla sâz eylegil
Kıssa-i dil-sûza âgâz eylegil

7651.Çarh hâinden ki bilürsin ayân
Bize sen bir dâsitân eyle beyân

7652.Tâ ki ol destânı biz işidevüz
Aña lâyıık dünyada iş idevüz

7653.Dünyaya garre olma kim bu reh-güzer
Bir mekândur kim gelen aña gider

7654.Kimse anda câvidân kalmış degül
Kimsene andan vefâ bulmuş degül

7655.Naks-durur dünyada_ isdemk kemâl
Çün kemâl ardınca tîz irer zevâl

7656.Nergisüñ k'aña virildi tâc-ı zer
Gör nic'itdiler gözini bî-basar

7657.Ol benefşe k'oldı ucdan uca gûş
Ker-durur ker kulagı gör anı uş

7658.Ol mekân kim anuñ adı oldı yir
Ögmege lâyıık degüldür anı yir

7659.Bâgına dehrüñ mezemmet bu yiter
K'anda biten solıban tîzde yiter

7660.Bisledügi n'assı kişiyi bu yir
Çünki girü bisledügin kendü yir

7661.Tut ki mülk-ile Sikender olasın
Nef'i ne çün âhirü'l-emr ölesin

7662.Dut ki Behrâm itdi sini zerr ü zûr
Fâyide ne çün yirüñdür soñra gûr

7663.Her ki geldi dünyaya çünkim geçer
Anda ne bürhân u ne hüccet geçer

- 7664.Pes aña aldanmamahdur çâre bes
İtmemekdür anda durmaga heves
- 7665.Bu selâtîni ki saña söyledüm
Her birinüñ hâlini şerh eyledüm
- 7666.Sen dahı_ anlardan birin dutgıl seni
Garre olma devlete işid beni
- 7667.Kim saña bunca nasâyılı dimişem
Her kayuñı kim gerekdür yimişem
- 7668.Nişe kalduñ mâl u mülküñ nef'ine
Çünki gider saña kalmaz nef'i ne
- 7669.İtmedi ol kimseye itmez vefâ
Kimsene_ andan bulmadı bulmaz safâ
- 7670.Aldamasun sini bu tûl-ı emel
Kim yakîndür aña irürmez ecel
- 7671.Dut ki Zülkarneyn olduñ genc-ile
Fâyide ne çün gidersin renc-ile
- 7672.Saltanatda dut ki Dahhâk olasın
Nef'i ne çün âkıbet hâk olasın
- 7673.Nef'i ne Şeddâd olasın yâ şedîd
Çün ecel zahmı olur gâyet şedîd
- 7674.Pâdişahlıhda kişi ger ola Âd
Fâyide ne çün olur son ucu bâd
- 7675.Memleketde ger kişi Fir'avn ola
Çün ölür anda ne ferr ü avn ola
- 7676.Ne-durur bildüñ k'ecel bir nerre-şîr
Kim zebûndur aña yüzbiñ erde-şîr
- 7677.Olayım dimek ne hâcet Erdevân
Çün gider devlet yakîn iy er devân

ZİKR-İ AZÎMET-İ İSKENDER BE-MAŞRIK BE-TALEB-İ ÂB-I HAYÂT

- 7678.Çün Sikender devletin gördi temâm
Göñline korhu düşürdi_ ol nîg-nâm
- 7679.Kim bilürdi işe irdükde kemâl
Başlar aña irmege nakş u zevâl

7680. Ay bedr olduhda başlar eksilür
Hem husûfi dah'anuñ ol vakt olur
7681. Mihr-i âlem-tâb çün evce iner
Başlar oradan hazîzine döner
7682. Çün bahâruñ bâgına irer kemâl
İrürür dest-i hazân aña zevâl
7683. Gül kemâl-i zînet-ile_ olduhda şâd
Virür anuñ hırmenini suya bâd
7684. Bu yakîndür kim kemâl-i bî-zevâl
Ölmez illâ kim kemâl-i Lâ-Yezâl
7685. Şâh üşbu gussadan dil-teng-idi
Ol mübârek çihresi bed-reng-idi
7686. Şâh hâlin añlayıban bir hakîm
Bildi kim göñlinde vardur derd ü bîm
7687. Şâh anuñ teng-dil olmuş-durur
Gül yüzi ol gussadan solmuş-durur
7688. Şâha birgün didi kim iy tâc-ver
Görürem sende tegayyürden eser
7689. Ne-durur ol nesneye digil sebeb
Kim kılavuz çâresin anuñ taleb
7690. Üşbu fikri kim gerekdi ol nihân
Âşikâr'itdi aña şâh-ı cihân
7691. Bir iş işlemek dileyicek felek
Biñ bahâne kopara aña gerek
7692. Çün işitdi şeh sözini ol hakîm
Didi şâha hâtıruñda dutma bîm
7693. Var-durur bir çeşme maşırıkda revân
Anda kim zulmet olur dâyim ayân
7694. Adıdur ol çeşmenüñ Aynü'l-Hayât
K'andan içen nkişiye irmez memât
7695. Her kişi k'andan bir içim su bulur
Câvidân dünyâda ol bâkî kalur
7696. Lîki yolları katı düşvâr olur
Az kişi ol yolları varıbilür

- 7697.Assısı çoh nesne zahmetdür tolu
Hârsuz hirciz gül olmaz iy ulu
- 7698.Asılı-la pâkîze-gevher kopdı dür
Lâ-büd anuñ yiri ka'r-ı bahrdur
- 7699.Çünkü olmadı şebah vâlâ güher
Lâ-büd andan tolıdur Rûm u Hazer
- 7700.Sen eger ol çeşme-sârı bulasın
Câvidân dünyâda zinde kalasın
- 7701.Bu sözi çün şâh işitdi oldı şâd
Sandı kim virildi aña her murâd
- 7702.Ol kamu zîreklik-ile tâc-ver
Gelmedi fikrine bârî bu kader
- 7703.Kim kemândan çün çıha tîr-i Kazâ
Râst umaca irer ol bî-hatâ
- 7704.Kişiye çün togrıla rumh-ı Kader
Hiç hîle olmaz aña bir siper
- 7705.Şah yarak eyledi kim şarka vara
Ol su-y-ıçun zulmet içine gire
- 7706.Yüridi bir leşker-ile bî-gerân
Şarkdan yaña şeh-i sâhib-kırân
- 7707.Var-ıdı bir oğlı adı İskenderûs
Kim felek ayagina virürdi bûs
- 7708.Anı_Arestû-y-ıla yirine kodı
Ben gelince mülki saklañuz didi
- 7709.Hızrı yoldaş eyledi kendü-y-ile
Âb-ı Hayvân isdeyü girdi yola
- 7710.Bir zamân çün sürdi germ-â-germ şâh
Berhemen şehrine ilettdi_anı râh

RESİDEN-İ İSKENDER BE-ŞEHR-İ BERÂHİME

- 7711.Gördi bir taguñ içinde bî-şümâr
Halk durmuşlar kamu uryân u zâr
- 7712.Her biri bir gârı düzetmiş vatan
Terk-i dünyî kılmış u hem cân u ten

- 7713.Geydügi agac kabı yüdügi ot
Dahı anlarda ne pûşîş var ne kût
- 7714.Kendülere zühdi âdet eylemiş
Sâliyân anda ibâdet eylemiş
- 7715.Didi ulularına kim Berhemen
Üşbu tagda nişe dutdunuz vatan
- 7716.Bir imâratlıhda yigrek k'olasın
K'anda bir kût-ıla kisvet bulasın
- 7717.Çün imâret kût-ıla olur temâm
Hergiz olmaz kûtsuz kuvvet müdâm
- 7718.Kût pes artuh gerekdür âbide
K'an'ider ol kamudan yig fâide
- 7719.Âbid olmayan ne yirse hâk olur
Âbidüñ yidügi nûr-ı pâk olur
- 7720.Böyle didi şehriyâra Berhemen
Kim taâmı sanma tenhâ kût sen
- 7721.Bu yidüğüñüzden ayruh dahı kût
Rûz idüpdür bize Hayy-i Lâ-Yemût
- 7722.Lezzetin anuñ eger siz bilesiz
Yidüğüñüz kûtı terkin kılasız
- 7723.Sinüñ-içün döşenüp hân-ı kerem
Niş'idersin ârzü âş-ı kelem
- 7724.Hâzır-iken saña ol me'kûl-ı nûr
Hayf ola kim yiyesin nân-ı tenûr
- 7725.Sen dahı bizüm big'olsañ bu nebât
Vire saña lezzet-i kand-ı nebât
- 7726.Ten gidâsı olmag-ıçun bu yiter
Nef' ne artuh yimek çünkim yiter
- 7727.Dirliğ-içündür bu yimek bî-gümân
Yimeg-içün sanma dirliği hemân
- 7728.Bize dirsın bir imâret yir buluñ
Pes buradan varuban anda oluñ
- 7729.Bir harâbedür cihân iy şehriyâr
K'anda ne ma'mûr yir var ne diyâr

- 7730.Sen ki yir yoh kim cihânda olmaduñ
Eglenecek bir imâret bulmaduñ
- 7731.Anuñ-ıçun irte gice bî-karâr
Cüst ü cûy içindesin iy şehriyâr
- 7732.Var sanursın bunda ma'mûr iy acab
K'isdeyü anı çekersin çoh ta'ab
- 7733.Biz bunuñ vîrânlığını bilmişüz
Lâ-cirem yık-pâre terkin kılmışuz
- 7734.Burada olmaz imâret bellü bil
Dahı yirde olur azm'aña kıl
- 7735.İreyim dir-iseñ ol gül-zâra sen
İşbu hâr-istân'idinmegil vatan
- 7736.İşburadan ol yahın menzil-durur
Bir nefesdür sanma k'ay u yıl-durur
- 7737.Biz bu yirde ihtiyâr itdük fenâ
K'ol imâretde bulavuz hoş-bekâ
- 7738.Ne bekâ kim yok-durur aña zevâl
Naks bulmaz hirciz andağı kemâl
- 7739.Çün fenâ-y-ıla bulunur ol bekâ
Pes fenâyâ cân gerek k'ola behâ
- 7740.Şem' oda yanmasa nûr olamaz
Su buhâr olmasa yagmur olamaz
- 7741.Dâne degşürmezse sûret gül m'olur
Yâsemîn ü lâle vü sünbül m'olur
- 7742.Beyzanuñ çün sûreti bulur zevâl
Cûj'olup cândan aña irer kemâl
- 7743.Dökilicek girü andan bâl ü per
Nakş bulıban olur tâvûs-ı ner
- 7744.Su revân olup çü gül-zâra varur
Gül kökinden tallar içine girür
- 7745.Ol kuru ağaç içind'olup revân
Ölmiş-iken cân ider aña revân
- 7746.Sûretin koyup dahı sûret alur
K'ol agaca şâh u berg ü bâl olur

- 7747.Müddet-ile itmege kesb-i kemâl
Üstine andan geçer çoh dürlü hâl
- 7748.Başın'anuñ dürlü dürlü iş gelür
Gâh yaprah gâh tâze gül olur
- 7749.Şöyle kim gözüñle göresin ayân
Döner ol etvâr içinde bir zamân
- 7750.Çoh şikence-y-l'ol mazâyıkda kalur
Dürlü sûretler geyüp terkin kılur
- 7751.Gerçi telh ü türş dadar bî-hisâb
Lîki hall olup olur soñra gül-âb
- 7752.Su-y-ıdı soñ ucı olur girü su
Lîki bes sâfi vü gâyet nîg-bû
- 7753.Nice su kim cânlara olur devâ
Sayrulara irişür andan şifâ
- 7754.Cânlara cân olur u gözlere nûr
Başlara akl u gönüllere sürür
- 7755.Çün vücûdın fidde san'ol kıldı cûd
Buldı Hak'dan uşbu resm-ile vücûd
- 7756.Bu vücûduñ sen dahı terkin ur
Ne vücûda irgürür Hak sini gör
- 7757.Katre çünkim berre irer bürr olur
Çünki deryâya irişür dürr olur
- 7758.Çün kuru diken yeşerüp gül olur
Kara toprah yeşerüp sünbül olur
- 7759.Çünki taş yâkût su lü'lü olur
Anı gören âkıl-ısa giy bilür
- 7760.K'âdemî dahı olabilür melek
Şöyle kim cevlen-gehi ola felek
- 7761.Âkıl olan kim bu ma'nîyi bile
Nicesi râzî ola bu menzile
- 7762.Kim anuñ bünyâdı âb u gil-durur
Anda kalan gişi bî-hâsıl-durur
- 7763.Ko bunı bir yire kılığıl sen heves
K'orada biñ cân bulasın her nefes

7764.Ol makâmı bil ki hoş gül-şen-durur
Bunı gör kim karañu kül-han-durur

7765.Gül-şeni koyup duta mı kül-hanı
Olmayan bî-devlet ü gey kül-hanî

7766.Sırrı anladuñsa sana bir kitâb
Râzlar fasl eyledüm min külli bâb

RESİDEN-İ İSKENDER BE-DEYR-İ ZÜLKARNEYN-İ EVVEL

7767.Oradan dahı gidiben tâc-ver
Ugradı bir künbede bes mu'teber

7768.Heft-cûş-ıla yapılmış-ıdı ol
Şöyle k'aña bulamazdı kimse yol

7769.Cehd-ile açdı anı şâh-ı cihân
Kim göre ne var-durur anda ayân

7770.Girdi gördi çâr-suffe yapılı
Dürr ü gevher ucdan uca toptolu

7771.Ferşi ûd u anber ü dîvârı zer
Sakfi dahı hem zer ü dürlü güher

7772.Orta yirde bir murassa' yüce taht
Taht üzre tâc-ıla bir nîg-baht

7773.Yatmış anda sâliyân u durmamış
Sanasın hirciz cihânı görmemiş

7774.Başı üzre la'lden bir ulu levh
K'anı görmek irürürdi rûha revh

7775.Altun-ıla la'l üzre yazılı
K'iy Sikender kim meliksin ü ulu

7776.Çün güzer üşbu mekâna kılasın
Bini görüp dehr hâlin bilesin

7777.Şâh Zülkarneyn kim dirler benem
Yidi iklîmi dutan server benem

7778.Dört biñ kırh yıl ben öñdin gelmişem
Kılıcumla şark u garbı almışam

7779.Bu cihânı ben dahı idüp talab
Çekmişem sencileyin derd ü ta'ab

7780.Memleket kesb idüben sor n'itmişem
Âkıbet cümle koyuban gitmişem

7781.Renc-ile gerçi ki dirdüm mâl u genc
Derdüm uşol mâ u gencüm mâr u renc

7782.Şehrde ayruhlar olmuş şehriyâr
Ben burada yaturam uş hâr u zâr

7783.Gâfil andan kim ne iş ide kader
Ölmeyeyüm diyüben iy nâmever

7784.Âb-ı Hayvân isdeyüben gelmişem
Uş burada zâr u hayrân kalmışam

7785.Çeşme-i Hayvânuñ içinde ecel
Kişiyi bulur nedür bunca emel

7786.Zehr olur irdükd'ecel Âb-ı Hayât
Vây aña k'ardıncadur anuñ memât

7787.Bini gördüğüñ saña ibret yiter
Gâyetine akl her râzuñ yiter

7788.Andan aglayu gidüp şâh-ı cihân
Râst kıldı cânib-i şarka inân

7789.Germ süriben şeh-i gerden-firâz
İrdi bir sahrâya toptolu gürâz

7790.Her birinüñ azusı hûn-rîz-idi
Nitekim kılıc be-gâyet tîz-idi

7791.Toñuzuñ şeklinde dîv-idi gelen
Şâha vü ol leşkere hamle kılan

7792.Şâhı çün gördiler âheng itdiler
Şâh-ıla orada çoh ceng itdiler

7793.Âkıbet şâh anlara bulup zafer
Kıldı ucdan anlara zîr ü zeber

7794.Çün olardan pâk itdi yolu şâh
Ol aradan kıldı girü azm-i râh

7795.Bir zamân dahı çü gitdi şehriyâr
İrdi bir vâdiye kim tolu-y-dı mâr

7796.Kamusı ef'î-di ol yılanlaruñ
Zehrin'ass'itmezdi tiryâk anlaruñ

- 7797.Şâh yılanları itdürüp helâk
Kıldı ucdan uca ol vâdîyi pâk
- 7798.Çün yılana tûde tûde kırdılar
Yol arınsun diyü oda urdılar
- 7799.Oradan gidüp şeh-i pîrûz-ceng
Ugradı bir bîşeye tolu peleng
- 7800.Şeh buyurdı tir bârân itdiler
Var pelengi anda bî-cân itdiler
- 7801.Yâ zihinden çün çıha tîr-i hadeng
Zahmı-y-ıla hâk olur bebr ü peleng
- 7802.Cânavardan bîşeyi arıtdılar
Pes oradan dahı koyup gitdiler
- 7803.İrdi bir müddet yürüyüp şehriyâr
Bir yire câzû tolu şeh ü diyâr
- 7804.Câzular şâhuñ katına geldiler
Soruban kasdı ne yirdür bildiler
- 7805.Hoş söz-ile şâhı meftûn itdiler
Pes koyup şâhuñ katından gitdiler
- 7806.Bulmasun diyü şeh ol suya tarîk
Sihir-ile böyl'itdiler mekr iy refîk
- 7807.Kim yolını tutdı ucdan uca nâr
Bahr bigi k'ana bulunmaz kenâr
- 7808.Kaldı hayrân ol arada şehriyâr
Pes didi Hızır'a ki iy dâna-yı kâr
- 7809.Ne-durur fikr it bu işüñ çâresi
Bu belâdan cân nice kurtarası
- 7810.Âb-ı Hayvân'ı kılur iken taleb
Hak bizi bu oda mı yahar aceb
- 7811.Hızır didi hâtiruñda dutma bîm
Halka Hak fazlı öküş-durur azîm
- 7812.Hakk elindedür her işüñ çâresi
Pes kamu işde aña yalvarası
- 7813.Her ki anı diye nev-mîd olmaya
Her k'aña yalvara zâyî' kalmaya

7814.Şâh âmîn didi Hızır itdi du'â
Çünkü ihlâs-ıla-dı oldu revâ

7815.Aslı kamu tâatuñ ihlâs olur
Kulda kim ihlâs ola ol hâs olur

7816.Çıhdı bir bulıt hevâdan nâ-gehân
Şöyle k'oldı yiryüzi andan nihân

7817.Ol bulıtdan seyl indi şol kadar
Kim ol oddan kalmadı hirgiz eser

RESİDEN-İ İSKENDER BE-ŞEHR-İ ZENÂN

7818.Oradan yol sürübün bir ay temâm
Geldiler bir şehre adı Şâd-kâm

7819.Bir ulu enbûh şehri bî-kerân
Cümle avret anda yoh erden nişân

7820.Avret-idi cümle şehri vü sipâh
Ulu kiçi vü hizmet-kâr u şâh

7821.Anda bir ulu ağaç vardı ayân
K'anlara ol Kıbla-y-ıdı bî-gümân

7822.Sâl u mâh ol sebz-idi vü ser-bülend
İtmez-id'aña hazân yili güzend

7823.Ol ağaç dibinde bir çeşme revân
K'olmuş-ıdı kuvvet ü kût-ı revân

7824.Her kim oğlan ider-idi ârzû
Gusl idüp ol çeşmeden içerdı su

7825.Bir koyun kurbân idiben gündüzün
Ol ağaca sürer-idi kendüzün

7826.Hâmile olup giderdi oradan
Gör neler ider cihânı Yaradan

7827.Tokuz ay çünkim geçerdı bî-gümân
Bir kız andan dahı olurdu ayân

7828.Kâr-gâh-ı fitrata eyle nazar
Gör bu ne eşkâldur bu ne suver

7829.Germ andan dahı sürüp şehriyâr
Anda vardı k'oldı zulmet âşikâr

7830.Didiler şâha ki iy şâh-ı zemîn
Çeşme şol zulmet içindedür yakîn

7831.Bundan aña gerçi az menzil-durur
Lîki yol ucdan uca müşkil-durur

7832.Didi şeh kim Hakk anı âsân ide
Müşkil ü âsânını yiksân ide

7833.Renc katında koyılmış râst genc
Ol ki genc ister n'ola görürse renc

7834.Çekmeyince ışk yolında belâ
Nic'ola âşık ki ma'şûkî bula

RESİDEN-İ İSKENDER VE LEŞKER-İ Ū BE-TÂRİKİ

7835.Ol aradan yürüyüp şâh u sipâh
Vardı vü zulmet içine girdi şâh

7836.Gitdiler zulmet içinde bir zamân
Bir gice bir ebr kopdı nâ-gehân

7837.Gurriş itdi ra'd u rahşân oldı berk
Sanasın kim oda yandı garb u şark

7838.Bahr dökildi hevâdan mevc mevc
Seyl kopdı yiryüzinde fevc fevc

7839.Şöyle tûfân kopdı Tûfân-ı Nûh
Feth-idi katında anuñ bel fûtûh

7840.Leşker ü şeh işlerini yazdılar
Yürür-iken birbirinden azdılar

7841.Çünkü görmezlerdi birbirin ayân
Azdılar biri birinden bî-gümân

7842.Hızr k'ol yolda ol-ıdı pîşivâ
Bi'z-zarûre şâhdan düşdi cüdâ

7843.Kimini ol halkuñ itdi seyle gark
Kimin aldı yil kimini yahdı berk

7844.Kimi azd'andan bulunmadı nişân
Kimi acz-ile revân itd'anda cân

7845.Çünkü bu ahvâli gördi bildi şâh
Kim bulunmadı bulunmaz suya râh

7846.Nesne kişiyeye ki kısmet olmaya
Gerçi çok cehd ide anı bulmaya

7847.Çünkü nâ-çâr oldu girü döndü ol
Lîki bulunmadı ol geldüğü yol

7848.Bi'z-zarûre gelmeg-içün bu yaña
Bir yañadın dahı yol düşdi aña

7849.Gider-iken ugradılar bir yire
Kim anuñ taşı güherdür yiksere

7850.Kimi yâkût-ıdı kimi la'l-i nâb
Kimi pîrûze dökilü bî-hisâb

7851.Her yaña gevher dökilmiş şeb-çirâğ
Rûşen olmuş gevherüñ nûrı-y-la tag

7852.Şâh leşker'ol güherden bî-kerân
Dirüben oradan oldılar revân

7853.Cehd idüp çün yürüdiler bir zemân
Çıhdılar zulmet içinden nâ-gehân

HURÛC-I İSKENDER EZ-TÂRÎKÎ

7854.Gördiler kim leşkerüñ bir nısfı pâk
Kaluban olmuşdur ol yirde helâk

7855.Şâh Hızır'ı istedi vü bulmadı
Nice old'ahvâli anuñ bilmedi

7856.Tuymadılar anı kim varmış-ıdı
Âb-ı Hayvân'a yahın irmiş-ıdı

7857.Çünkü ol aña koyılmışdı yakîn
Lâ-cirem rûzî aña oldu hemîn

7858.Nesne kim ol saña kısmet olmaya
Nice cehd itseñ elüñe gelmeye

7859.Nesne kim bir kişiyeye ola nasîb
Bî-taab girür ele ol an-karîb

7860.Zulmet içinde Sikender çekdi renc
Renc aña kaldı vü Hızır iletđi genc

7861.Kısmeti kim Hakk ide ayruh olamaz
Kimsene rızkın kimesne alamaz

7862.Ol aradan çünki gitdi şehriyâr
Geldi bir sahrâya tolu mürg-zâr

**SEHÛN-GOFTEN-İ DIRAHT BE-İSKENDER VE HABER-DÂDEN BE-Û EZ-KURB-I
ATLAS**

7863.Ortada bitmiş bir ağaç sâye-vâr
Diye-y-idüñ adı Tûbî'dür meger

7864.Ol arada kurduruban bârîgâh
Ol ağaç dibinde yatd'ol gice şâh

7865.Çünki gitdi gicenüñ nısfı temâm
Kam'uyıdı gayr-i Hayy-i Lâ-Yenâm

7866.Ol ağaç nâle idiben zâr zâr
Didi k'iy mihnet çekici şehriyâr

7867.Niçe yüridür seni bu hırs u âz
Mâl çoğı n'assı çün ömr ola az

7868.Ömrüñ âhir oldı pes nedür sebeb
Kim kılursın dünyayı böyle taleb

7869.Pâdişâhlıh sürdüñ on dört yıl temâm
Bir gün olmaduñ cihânda şâd-kâm

7870.Bunca cem' itdüñ velîkin yimedüñ
Ben ölem ayruga kala dimedüñ

7871.Uş gidersin ayruga kalur bu genc
Sen çekersin arada bî-hûde renc

7872.İy dirîg ü derd sinüñ rencüñe
Kim elüñ uş irmez oldı gencüñe

7873.Şâh ağaçdan bu sözi k'itdi semâ'
Sanki didi cân tenine el-vidâ

7874.Gitdi dil-hasta oradan subh-dem
Huşk-leb olmuş gözi toptolu nem

7875.Gice gündüz sürdi bir müddet temâm
Tâ ki ird'Îrân'a şâh-ı nîg-nâm

BİMÂR-ŞÛDEN-İ İSKENDER DER-KUMUS

7876.Çünk'irişdi Kûmus'a şâh-ı cihân
Bir ru'âf old'aña ârız nâ-gehân

7877.Şöyle k'ata olamadı pâyidâr
Bî-haber düşdi atından şehriyâr

7878.Bir cebeh altına döşek itdiler
Üstine altunlu kalkan dutdılar

7879.Kim gelüp ana tabîb ide ilâc
Kim arına ol sekâmetden mizâc

7880.Ol ki şâhuñ tâli'in görmiş-idi
Hükmi anuñ buraya irmiş-idi

7881.Kim dimişdi şâh ölesine yahın
Hasta düşiser bir arada yakîn

7882.Kim gögi altun yiri pûlâd ola
Anda dünyâdan Sikender yâd ola

7883.Çünkü hûşa geldi şâh-ı Cem-nijâd
Üşbu hükm'ışitmiş-idi kıldı yâd

7884.Bildi kim yahın gelüp-durur ecel
K'itmez aña fâ'ide hirgiz hıyel

7885.Ne yigit dir ne koca dir öldürür
Kamu yavuzdan beter nesn'ol-durur

7886.Dilmez İskender melikdür yâ cüvân
Hiç rahm itmez alur cânın revân

NÂME-NÜVİŞTEN-İ İSKENDER BE-MÂDEREŞ VE VASIYYET-KERDEN

7887.Pes eline alup ol lahza kalem
Çekdi kâfûr üstine müşgîn-rakam

7888.Zâr aglayu idiben âh-ı serd
Bir biti yazd'ânesine tolu derd

7889.Didi kul oğlu kul İskender selâm
Rûkıyâ Hâtûn'a virbiyür peyâm

7890.Kim Sikender kim cihâna toymadı
Geldi gitdi geldüğünü tuymadı

7891.Dünyada bağlamış-ıdı çoh emel
Lîki anı aña irürmed'ecel

7892.İsdeyü varur-iken Âb-ı Hayât
Yolda sundılar aña zehr-i memât

- 7893.Bu gelen işler bizüm üstümüze
Hakk Ezelde yazmış-ıd'anı bize
- 7894.Nesne kim Hak'dan kaderlenmiş ola
Cehd-ile def'ini anuñ kim kıla
- 7895.Hâlık'ıñ rûh Ol virür ü Ol alur
İ'tirâz anuñ işine küfr olur
- 7896.Nefs anuñdur cân anuñdur akl anuñ
Pes eyit kim arada neñ var senüñ
- 7897.Tâ ki anuñ-çun feza' eyleyesin
Yâhud aglayup ceza' eyleyesin
- 7898.Ne kaderlenmişse göklerde kazâ
Yirüñ ehline gerek aña rızâ
- 7899.Ol ki yazılmış-ıdı irdi baña
Sabr-durur çâre bu işde saña
- 7900.Sabr-durur mü'minüñ ser-mâyesi
Sabr olur âkılüñ pîrâyesi
- 7901.Çün ceza' itmekle dönmez bu kazâ
Pes kazâyâ ne gerek sabr u rızâ
- 7902.Pîşe ide her ki mü'mindür yakîn
Sabrı "v'allâhü yuhibbü's-sâbirîn"
- 7903.Çünkü bir yire varuruz biz ayân
Kim bu yirden yig-durur ol bî-gümân
- 7904.Varmaga pes anda şâd olmah gerek
Ayşdan orada dad almah gerek
- 7905.Sabr kıl geçince bu bir iki dem
Sen dahı ol mülke urursın kadem
- 7906.Birbirimizi biz anda bulavuz
Ol-durur mülk anda bâkî olavuz
- 7907.Ger hatâ itdümse yâ isyân saña
Lutf it küllini afv eyle baña
- 7908.Ulu kiçi halkımı cem' eylegil
Kamusına hoşlıg-ıla söylegil
- 7909.Dileseñk' olmaya işünde halel
Sîretümi itmegil hirgiz bedel

- 7910.Komagıl İskenderûs'ı bir nefes
K'ola nâ-geh lu'b u yâ lehve heves
- 7911.Kişi k'anuñ işi lu'b u lehv ola
Olmaya hîç iş ki ol bî-sehv ola
- 7912.Memleket âyînini öğret añâ
Şöyle kim bilürsin öğretdüñ baña
- 7913.Bu kamusın yazuban şâh-ı cihân
Dâr-ı mülk-i Mısr'a itdürdi revân
- 7914.Pes oradan şehr-i Zû'ya geldi şâh
Anda renc artdı vü hâl'oldı tebâh
- 7915.Geldi Eflâtûn k'ide añâ ilâc
Lîki n'assı gitmiş-id'elden mizâc
- 7916.Çün maraz gâlib zaîf ola kuvâ
Bellüdür ne nef'ide añâ devâ
- 7917.İstedi nabzuñ tokuz cinsin ayân
Bulmadı birinde sıhhatden nişân
- 7918.Sihhate çün mâil olmaya mizâc
N'assı itdügi tabîb añâ ilâc
- 7919.Ger devâ ola kamu Âb-ı Hayât
Ne vefâ ide çün irişe vefât
- 7920.Cân-durur nûr-ı çerâg u yil ecel
Yagı bu yinen gidâdur fi'l-mesel
- 7921.Çünkü yile karşı koyıla çirâg
Ne kadar rûşen dutısar anı yag
- 7922.Gördi şeh kim düşdi Eflâtûn'a bîm
Çünkü nabzın bildi anuñ ol hakîm
- 7923.Didi olmagıl i dâna ters-nâk
Kim bize mihmân-durur mihmân işi
- 7924.Çün gelüp gitmek-durur mihmân işi
Gitudübine renc niş'olsun kişi
- 7925.Mürg-i Kudsîdür bu cân u ten kafes
Bunda durmagı nice itsün heves
- 7926.Çünkü kendü âşiyânın ide yâd
Ol kafesde nice durıbile şâd

- 7927.Çünkü bundan yig yire vardur anuñ
Bunda dura didüğüñ kejdür senüñ
- 7928.Ger Arestû ol'ilâc iden yakîn
Ol tabîat hâdimi-durur hemîn
- 7929.Sıhhate çün tab' olmaya karîb
Hidmet-ile neylesün aña tabîb
- 7930.Pes vasıyyet itdi şeh kim çün öle
Götürenler anı sultânlar ola
- 7931.Dutmayalar ölümini muhtasar
Düzeler anuñ-ıçun tâbût-ı zer
- 7932.İdeler tâbûta gevherden hilî
Kılalar kâfûr-ıla cismin tilî
- 7933.İdicek tâbût içind'anı nihân
Bir elini taşra koyalar ayân
- 7934.Tâ göreler kim Sikender pâdişâh
Kim yid'iklîmi dutup olmışdı şâh
- 7935.Geldügi bigi tehî-dest uş gider
Pes kişi dünyâyı dutuban nider
- 7936.Pes anı omuzlara götüreler
Pâdişehler Mısır'a dek yitüreler
- 7937.Şöyle k'ehl-i Mısır an'ideler sezâ
Mısır'da tutalar anuñ-çun azâ
- 7938.Anda ne kim müstahak var direler
Anlara çoh mâl anuñ-çun vireler
- 7939.Oradan İskenderiyye'ye devân
İdüben kılalar an'anda nihân
- 7940.Şöyle kim toprahda medfûn olamaya
Kandalığın dahı kimse bilmeye
- 7941.Üşbu sözi dir-iken bir iki dem
Ürdi Zülkarneyn pes oldı adem
- 7942.Gitdi pervâz idübenüñ mürğ-i cân
Ögine düşdi kadîmî âşiyân
- 7943.Yâd idüp ol müzeyyen gül-şeni
Terk kıldı bu müşevveş külheni

- 7944.Yiryüzin cümle getürmişdi ele
Vardı kim ol âlemi dahı ala
- 7945.Himmetine çün bu yir gelmişdi az
Dahı yig yir virdi aña bî-niyâz
- 7946.Nice yir kim aña gâyet yoh-durur
Hoşlığın'anun nihâyet yoh-durur
- 7947.Gitdi Zülkarneyn görüp dürlü renc
Kaldı bunda tâc u taht u mâl u genc
- 7948.Çarh ümidi kasrını kıldı harâb
İsdedüg'Âb-ı Hayât oldu serâb
- 7949.Yandı berk-ı kahr-ıla bâg-ı cemâl
Kopdı bîh ü bünden ol serv-i celâl
- 7950.Bî-hazân dökildi ol nev-reste bâg
Urdı yüreklere lâle bigi dâg
- 7951.Geydi anuñ-çun benefşe nîl-gûn
Oldı gül derdinden anuñ gark-ı hûn
- 7952.Gülbün-i devlet dügildi vü bu derd
Nergis-i ra'nâ yüzini kıldı zerd
- 7953.Saltanat bedrine irişdi mehâkk
Buldı devlet müşterîsi ihtirâk
- 7954.Tag u taş aglayu didi âh âh
K'öldi yigitlikde Zülkarneyn şâh
- 7955.Yirde gökde hîç zerre kalmadı
K'anuñ öldüğine nâle kılmadı
- 7956.İtdi yigirmi yaşınd'ol nev-cüvân
Bu yidi iklîme fermânın revân
- 7957.Çünkü on dört yıl cihânda oldu şâh
Çarh rûşen günini kıldı siyâh
- 7958.Âdeti budur cihânuñ bellü bil
Gâfil olma kendüzüne çâre kıl
- 7959.Şöyle kim didi şehi götürdiler
Mısr dârü'l-mülkine yitürdiler

GİRYE VÜ ZÂRÎ-KERDEN-İ RÛKIYÂ BER-İSKENDER VE Bİ-VEFÂYÎ-İ RÛZİGÂR

7960. Geld'anası urdı tâbûta yüzün
Bîm-idi k'öldüre anda kendüzün
7961. Aglayup üstine anuñ zâr zâr
Gözlerinden dökdi hûnîn-cûybâr
7962. Didi iy şâh isdedüm Âb-ı Hayât
Nişe sunuldı saña ke's-i memât
7963. Yüz ne tîz dönderdi senden üşbu dehr
Anı kim tiryâk sanduñ oldu zehr
7964. Görmedin dünyâyı iy şâh-ı cihân
Raht bağlayup ne tîz olduñ revân
7965. Şâm senüñ-çün döker hûn-ı ciger
Mâteminde subh ceybin çâk ider
7966. İy dirîgâ ol keyânî yâl ü bâl
İy dirîg ol göz ü kaş u hatt u hâl
7967. İy dirîg ol kadr ü câh u izz ü baht
İy dirîg ol emr ü mülk ü tâc u taht
7968. İy dirîg ol kerr ü ferr ü bezm ü rezm
İy dirîg ol hilm ü ilm ü hazm ü azm
7969. Kim kamusı oldu toprahda nihân
Gör ki ne bî-mihr ü zâlimdür cihân
7970. Resmi bu-y-ıdı ki öle Rûkıyâ
Şah Sikender anı topraga koya
7971. Çarhı gör kim anı topraga koya
Rûkıyâ-yı saht-cânı kor diri
7972. Saht-cân olmasa-y-ıdı âdemî
An'ogulsuz ürmeye-y-di bir demi
7973. Pes yürüdi şâh-ıçun kim her hakîm
Bir söz eyde k'ola hikmetde azîm
7974. Tâ aña mersiyye ola ol kelâm
Hem işidene ögüt ola müdâm

MERSİYYE-İ ARESTOTALİS BER-İSKENDER

7975. Did' Ârestû iy cihân-dâr u cüvân
K'olmuş-ıdı âleme hûlmüñ revân

7976.Dahı kâni olmaz-ıduñ sen aña
N'itdi bu gaddârı gördüñ mi saña

MERSİYYE-İ BUKRÂT HAKÎM

7977.Didi Bukrât iy ki yiryüzi saña
Tar görünürdi haber virgil baña

7978.Kim nicedür ki seni tâbût-ı tenk
Habse saldı olmadın arada cenk

MERSİYYE-İ EFLÂTÛN

7979.Didi Eflâtûn ki görüp bunca renc
Cem'itdüñ çoh ciger kanı-y-la genc

7980.Yimedüñ uş koyuban gitdüñ anı
Taş dahı görürse esirger seni

MERSİYYE-İ TIMTİRÛN-I HAKÎM

7981.Didi Tımtırûn ki iyşâh-ı dilîr
Kim senüñ ser-pençeñe döymezi şîr

7982.Niçün itmedüñ ecel bebri-y-le ceng
Kodı gitdi yirüñi ol gûr-ı teng

MERSİYYE-İ RÛFES-İ HAKÎM

7983.Didi Rûfes iy şeh-i sâhib-kırân
Dün senüñdi ucdan uca bu cihân

7984.Sini kim azl itdi bu resme bu gün
Râyetüñi böyle kim kıldı nigûn

MERSİYYE-İ BÛRTÛS-I FEYLESÛF

7985.Didi Bürtûs şunca halk'itdüñ adem
Ölmeyeyim diyü iy şâh-ı Acem

7986.Lîkin ölmek def'ini kılamadüñ
Kanda-y-ıdı ölümün bilemedüñ

MERSİYYE-İ BÂLÛS-I HAKÎM

7987.Didi Bâlûs söyler-idi dün dilüñ
Âlemün gencine irerdi elüñ

7988.N'oldı bu gün kim dilüñ bağlandı oş

Kamu nesneden elüñ niş'oldı boş

MERSİYYE-İ FEYLÛS-I HAKÎM

7989.Didi Feylus kimde kim ola nazar
Sinüñ öldügüñ aña ibret yiter

7990.Maşrık u Magrib senüdi dün yakîn
Bir kefen kaldı saña bugün hemîn

MERSİYYE-İ İMROS-I ŞÂİR-İ YÛNÂN

7991.Didi İmros aldadı şâh-ı cüvân
Sini üşbu rûbeh-i pîr-i cihân

7992.Dimne bigi saña efsûn eyledi
Âkıbet uş sini magbûn eyledi

MERSİYYE-İ SOKRAT-I HAKÎM

7993.Didi Sokrât iy melik idüp talab
Dünyada çekdün besî renc ü ta'ab

7994.Ol ta'abdan hiç râhat görmedüñ
Geldüñ ü gitdüñ murâda irmedüñ

MERSİYYE-İ FEYSÂGORS

7995.Didi Feysâgors i şâh-ı tâc-ver
K'olmuş-ıduñ kamu işe çâre-ger

7996.Üşbu işe nişe çâre bulmaduñ
Nişe bu derdüñ devâsın kılmaduñ

MERSİYYE-İ ZEYTÛN HAKÎM

7997.Didi Zeytûn döymedi san'ejdehâ
Divler almadı cengüñden rehâ

7998.İtd'ecel az renc-ile sini helâk
Yire düşüp olduñ uş nâ-gâh hâk

MERSİYYE-İ MİRÂVUS-I FEYLESOF

7999.Didi Mîrâvûs kim bunca hakîm
Bisledüñ virüp firâvân zer ü sîm

8000.Birisi rencün ne-durur bilmedi
Birisi derdüñe çâre kılmadı

MERSİYYE-İ BİDAGROS-I HAKÎM

8001.Didi Bîdagros ki iy deryâ-şükûh
Kim çeriñ tolı-y-ıdı sahrâ vü kûh

8002.Bu ecel nic'oldı buldı saña dest
Kim seni toprag içinde kıldı pest

MERSİYYE-İ SABNOS-I HAKÎM

8003.Sâbnos didi ki iy şâh-ı bülend
Dün felek boynına salmışduñ kemend

8004.Sini nişe itdi ol bugün esîr
Anuñ-ılan kılmaduñ sen dâr u gir

KELÂM-I SOLON-I FELSEFÎ

8005.Didi Sûlon bende-fermân-ıd'ı şâh
Dün saña devr ü sipihr ü mihr ü mâh

8006.Bugün el boyadı kanuña sipihr
Mâh u mihr itmedi saña hiç mihr

***FİRİSTÂDEN-İ RÛKIYÂ TÂBÛT-I İSKENDER-RÂ BE-MEVZİ'Î Kİ
VASIYYET-KERDE BÛD***

8007.Söyleyecek sözi hoş söylediler
Bu meselleri beyân eylediler

8008.Her vasıyyet k'itdi-di ol nîg-nâm
Yirine getürdiler anı temâm

8009.Pes oradan anı alup gitdiler
Ol didügi yirde penhân itdiler

8010.Renc tartup genc dird'itdi nihân
Anı dah'itdi nihân âhir cihân

8011.Üşbudur k'ışitdün ahvâl-i sipihr
Cehd eyle pes ana baglama mihr

8012.Biñ yıl anda kalur-ısañ şâdumân
Çünkü gitdün bir nefes-durur hemân

AHVÂL-İ İSKENDERUS BİN İSKENDER VE İMTİNÂ-I Û EZ-PÂDİŞÂHÎ

8013.Pes diled'İskenderus'ı Rûkıyâ
Şâh Zülkarneyn tahtına koya

- 8014.Ol zamân olmışdı ol bir feylesûf
Kim cihan hâline bulmışdı vukûf
- 8015.Üşbu dünyâ ragbet'anda yog-ıdı
Âhret korhusı gâyet çoğ-ıdı
- 8016.Didi atam saltanat idüp talab
Çekdi dürlü dürlü renc-ile ta'ab
- 8017.Dutdı mülk ü dirdi bunca mâl u genc
Kodı gitdi kendüye ne kaldı renc
- 8018.Çarh n'itdi gör aña önden soña
Baña dahı an'ide itdi aña
- 8019.Pâdışâhlıh gerçi pes mergûbdur
Çün girü elden gider nâ-hûbdur
- 8020.Renc'il'atam dirdi bunca genc ü mâl
Kodı gitdi aña ne kaldı vebâl
- 8021.Anı kim ol itdi ben kaçan idem
Ya nic'uram pâdışâhlığa kadem
- 8022.Ger kerâmet ols'imâretde yakîn
Ol kerem ehlinüñ ola-y-dı hemîn
- 8023.Çün aña lâyıık olur herbir le'îm
Pes anı isdemeye hırgız kerîm
- 8024.Begligüñ almah-durur ser-mâyesi
Aldugın virmek-durur pîrâyesi
- 8025.Alınur almayacah yirden yakîn
Virilür virmeyecek yire hemîn
- 8026.Pâdışahlıh ol ki çoh renc ü belâ
Çeküben bir kişi tâc u taht ala
- 8027.Görmedin andan temettü' zâr ola
Mülk andan soñra ayruga kala
- 8028.Lezzeti mülküñ nedür vehm ü hayâl
Pes aña nic'aldana ehl-i kemâl
- 8029.Biñ yıl-ısa çün olur soñı adem
Âkıl olan urmaya aña kadem
- 8030.Pes varup bir kûşe itdi ihtiyâr
Tâata meşgûl olup leyl ü nehâr

- 8031.Ömrüni zühd-ile geçürdi temâm
Zî kerem k2itdi aña Rabbü'l-enâm
- 8032.Hak Taâlâ kime kim in'âm ide
Tâatını kendünüñ ilhâm ide
- 8033.Atası dünyâyı itdi-ise sayd
Eyledi ol devlet-i ukbîyi kayd
- 8034.Çünkü böyle oldı hâl-i saltanat
Düşdi halkuñ arasında şeytanat
- 8035.Her kişi bir şehri dutup oldı şah
Bu anı kıldı vü ol bunı tebâh
- 8036.Halk birbirini garet itdiler
İllere dürlü hasâret itdiler
- 8037.Fitne vü âşub toldı rûzigâr
Erdeşîr-i şâh olunca âşikâr
- 8038.Revnaka yüz dutdı andan kibr ü dehr
Başladı k'ola imâret il ü şehri
- 8039.Şah Sikender k'itdi bahr u berri geşt
Budur anuñ-çun didüğüñ ser-güzeşt
- 8040.Her ne kim nakl oldı-sa andan sahîh
Uş rivâyet eyledüm saña sarîh
- 8041.Diñleyiben dutgıl andan i'tibâr
Cehd it aldanma dünyâyı i yâr
- 8042.Üşbu destânuñ ki itmişem beyân
Dinl'işâretin k'idem sana ayân

DER-TEMSÎL VE HÂTİME-İ KİTÂB

- 8043.İlm-durur didüğüñ Âb-ı Hayât
K'anı bulan nefse irişmez memât
- 8044.İlm ehli zinde-i câvîd olur
Câhil olan işden nev-mîd olur
- 8045.Ger meselde ne-durur dirseñ gürâz
Ol degüldür hirciz illâ hırs u âz
- 8046.Kahr itmezseñ kanâatle anı
Maksada irmege komaz ol seni

- 8047.Dünya-yı dündür didüğüm ol yılan
Zehri girçekdür ü tiryâki yalan
- 8048.Key sahin tiryâkine sunma anuñ
Yohsa zehri cânuñı alur senüñ
- 8049.Ol peleng-i cân-sitân nedür gazab
K'ol-durur ol dürlü isyâna sebeb
- 8050.Ol didüğüm od nedür şehvet yakîn
K'ışı buldugını yhmahdur hemîn
- 8051.Oda beñzer her ne bulsa ider helâk
Nesne bulmasa ider kendüyi hâk
- 8052.Câzu İblîs-i Lainedür bî-keâm
Kim seni tezvîr-ile aldar müdâm
- 8053.Ger seni ol dîv magbûn itmeye
Sana rütbetde melâyik yitmeye
- 8054.Ne-durur avret cihânnuñ zîneti
Halkı aldamahdur anuñ hasleti
- 8055.Görüben rengini magbûn olmagıl
İşvesine k'ide meftûn olmagıl
- 8056.Tâze-durur dime hadrâ-yı dimen
Tîz olur pejmürde bilgil anı sen
- 8057.Ol ağaç kim şehriyâra söyledi
Ömri hâlini aña şerh eyledi
- 8058.Dehre beñzer ol ki geçdügi anuñ
Her nefesde bir habercündür senüñ
- 8059.Hâl dilin söyler ol anı işit
Cân kulagı-y-la aña göre iş it
- 8060.Hızr âlim ilmdür Âb-ı Hayât
K'anı içen kişiye gelmez memât
- 8061.Sözümü diñle ki ol cândan gelür
Her ne dirsem ayn-i irfândan gelür
- 8062.Her ne söz kim iderem ben sana nakl
Ma'ni-i Kur'ân-dur u yâ rây-ı akl
- 8063.Çünkü anber-bâr idüp hâmeyi
Nakş kıldum ben Sikender-nâme'yi

8064. Mustafâ'nuñ hicretinden bellü bil
Kim yidiyüz toksan ikinci-y-di yıl
8065. Evveli-y-idi Rebî'ü'l-âhirüñ
K'oldı nazmı hatm üşbu defterüñ
8066. Şah Sikender'den dahı geçmişdi hem
Biñ yidi yüz yıl u bir bî-bîş ü kem
8067. Yidi yüz dört yıl olalı Yezdecird
Pâdîşâh olup Acem cüml'aña gird
8068. Hem Melikşâh devletinden dahı bil
K'ol yıl-ıdı üç yüz ü onıncı yıl
8069. Şükr kim bu defter-i gevher-nizâm
Böyle hoş tertîb-ile oldı temâm

TÂRİH-İ NAZM-İ İSKENDER-NÂME

8070. Hakk'a minnet kim bu silk-i cevheri
Tuhfe itdüm ana k'oldur cevherî
8071. Üşbu resme dürc-i pür-nakş u nigâr
Çîn içinde yazamaz gevher-nigâr
8072. Lafzı zîbâ vü ibârâtı lâtif
Nazmı mevzûn u işârâtı şerîf
8073. Bir gül-istândur açılmış gülleri
Tâze olmuş lâle vü sünbülleri
8074. Dürci hikmetdür leb-â-leb tolu dür
Derci ma'nîdür kamu fazlı-y-la pür
8075. Her sözi kim anda ben söylemişem
Her göher kim anda nazm eylemişem
8076. Her birin bir nesneye kıldum mesel
Tâ ki sözümde bulunmaya hâlel
8077. Benden öñdin buncalar söylediler
Dürlü destânlar beyân eylediler
8078. Kıl tefahhus herbirinüñ hâlmı
Gör nicedür cümle kıl u kâlmı
8079. Gör nazarla kamusın önden soña
Hiç birisi beñzeyiser mi buña

8080. Buña insâf-ıla kılursañ nazar
Göresin kim nicedür silk-i göher
8081. Çarh hâlin evvel âhir bilesin
Görmedin yiri teferrüc kılasın
8082. Bilesin mebde' ne n'iredür ma'âd
Hem ne-durur âferînişden murâd
8083. Saltanat şuglında kâdir olasın
Memleket fikrinde nâdir olasın
8084. Hân-ı ma'nî döşemişem saña ben
Üşbu ni'met çün Hak'a şükr eyle sen
8085. Hayr-ıçun ben çün konuhladum seni
Sen dahı hayr-ıla yâd eyle beni
8086. Hayr-ıl'olsun dünyi vü ukbîde şâd
AHMEDÎ'yi her k'ide hayr-ıla yâd
8087. Bil ki üşbu ıkd dürcindeki dür
Akd-i dest-ile sekiz biñ dânedür
8088. Hem iki yüz elli anuñla bile
Rahmet aña kim göher kadrın bile